

# NCHAA NÀCUÁA NÍ QUIDE CUE TÉE NÍ TÁÚCHÍÚ<sup>n</sup> JÈSÚS DACUÀHA ÑAHA XII ÑÁYIU TNÚHU-GÁ

---

Jèsús ní cachí tnúhu ndáá-gá sá quíxí  
Espíritú Yă Ndiöxí cundecu ndihi ñáyiú

**1** <sup>1</sup>Te duha ní cáhá<sup>n</sup> té Lùcá ní xii-dé té Tëofilú: Yúhú sa ní chídó tnùn-í núú librú ndéé díhna nchaa sá ñí quide Jèsús, ndihi nchaa sá ñí dácuhá-gă ñáyiú. Te ní chídó tnùn-í nchaa sá ñí quide-gá ndéé nduu ñí quesaha-gă quidé chiú<sup>n</sup>-gá, <sup>2</sup>ndihi nchaa sá ñí quide-gá ndéé òré cuánda-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue téé ní cáhá<sup>n</sup>-gá dacuàha ñaha xii ñáyiú tnúhu-gá, te mee Espíritú Yă Ndiöxí ní chindee ñàha-xi xii-gá ní xáha<sup>n</sup>-gă nàcuáa cada-güedé. <sup>3</sup>Te sáta ñí xihí- gá te ní ndoto-gá, te ní xíndecu-gá údico nduu. Te titní xito ní sáhá<sup>n</sup>-gá núú ñí xíndecu-güedé, te duca<sup>n</sup> ñí quide-gá cuendá quiní-güedé sá ndáá ní ndoto-gá, te ní xáha<sup>n</sup>-gă nàcuáa quide Yă Ndiöxí ndihu ndaha-gă ñáyiú.

<sup>4</sup>Te ñí<sup>n</sup> nduu ndècu ndihi ñaha-gá xii-güedé, te ní xáha<sup>n</sup>-gă:

—Vá quéé-ní-ndó ñúú Jerusàlén, chi cundetu-ndo quixi Espíritú Yă Ndiöxí cundecu ndihi-ndo, chi sa ní cachí tnúhu-í sá dúcá<sup>n</sup> ñí cáhá<sup>n</sup> Tătá-ó Dütú Ndiöxí Yaá ndécú àndiu nacuáa cunduu. <sup>5</sup>Te ndáá sá ndíi Juàá ní dácúándüte ñaha ndíi xii-ndo, dico vitna ñá túú-gă cuéhé nduu, te quexìo Espíritú Yă Ndiöxí cundecu ndihi-ndo —càchí-gá xáha<sup>n</sup>-gă xii-güedé.

Jèsús cuánda-gá andiu

<sup>6</sup>Te òré ní xíndecu-güedé ndihi Jèsús, te ní xáha<sup>n</sup>-güedé xii-gá:

—Mèstrú, cuíní-ndí cachí tnúhu-n ñú sa ta cùyatni nduu chindee-n ñáyiú ñúú Isràél cuendá taxi tnùn-í tucú-yu ñúú-yu —càchí-güedé xáha<sup>n</sup>-güedé xii-gá.

<sup>7</sup>Te ní xáha<sup>n</sup> Jèsús xii-güedé:

—Ñá túú xìni ñuhu-xi cunaha nchohó xíá<sup>n</sup>, chi Tătá-ó Dütú Ndiöxí náhá-gă ná nduu càda-gá nchaa sá ñí cáhá<sup>n</sup>-gá. <sup>8</sup>Te òré quexìo Espíritú Yă Ndiöxí cundecu ndihi-ndo, te cuyíi-ndo nì yuhu nì iní-ndó quíhí<sup>n</sup>-ndó cáhá<sup>n</sup>-ndó tnúhu-í núú ñáyiú ñúú Jerusàlén ndihi núú ñáyiú distrítú Jùdeá

ndihi núú ñáyiú distritú Sàmariá. Te duca<sup>n</sup>-ni cǎhá<sup>n</sup>-ndó quǐhí<sup>n</sup>-ndó nì caxico ñuyíú —càchí-gá xáha<sup>n</sup>-gǎ xii-güedé.

<sup>9</sup>Te sátá dúcá<sup>n</sup> ñí cǎhá<sup>n</sup>-gá, te ndèhe-güedé ní ndanchita-gá cuándaa-gá andiu cuǎndihu-gá xití vícó, te ñá túú-gǎ ní xìní ñáhá-güedě xii-gá. <sup>10</sup>Te ndèhe vihi-güedé andiu núú ndèè quiní ñáhá-güedě xii-gá yòtnúhu, te ní quexìo cunu úú cue téé nìhnu dóó cuixí<sup>n</sup> núú ndécú-güedě. <sup>11</sup>Te xǎha<sup>n</sup>-güedě:

—Nchòhó cue téé Galileá, ìná cuendá ndéhé-ndó àndiu? Te dàtná-ni càa Jesús cuándaa-gá andiu vitna, te duca<sup>n</sup>-ni cùnduu-gá quixi tucu-gá —càchí cue téé nìhnu dóó cuixí<sup>n</sup>-á<sup>n</sup> xǎha<sup>n</sup>-güedě.

**Cuendá sá ñà túú-gǎ ndíi Jùdás nùu ní nanducu-güedě té Màtiá ní nucúnutnǐi-dé núú ndíi**

<sup>12</sup>Te ní ndee-güedé yucu Òlívú cuánuhú-güedé ñuú Jerusàlén, te ní xúhu<sup>n</sup>-güedé cuèdicó cuádava òré ichi. <sup>13</sup>Te òré ní ndexìo-güedé ñuú-á<sup>n</sup>, te cuándaa-güedé cuàrtú ndéé núú ñinu, chi vehe yòdo tnaha ndecu-güedé. Te ní naníhí tnáhá-güedě nchaa-güedé té Pèlú, té Jàcobó, té Juàá, té Ndrìxí, té Lìpé, té Mǎxí, té Bartolòmé, té Màteú, té Jàcobó déhe té Àlfeú, ndihi té Xímú téé ní cundihí cue téé canànistá, ndihi té Jùdás ñaní té Jàcobó. <sup>14</sup>Te ní naníhí tnáhá-güedě nchaa-güedé yàcá<sup>n</sup> ndihi tá Màriá nǎná Jèsús, ndihi cue ñaní-gá ndihi dava-gá cue ñáyiú dǐhí. Te ì<sup>n</sup>-ni ñí cuú-yu ní cǎhá<sup>n</sup> ndihí-yu Yá Ndiòxí.

<sup>15</sup>Te ì<sup>n</sup> nduu ní xíndecu dàtná ì<sup>n</sup> cièndú ócò mee-ni ñáyiú sàndáá iní tnúhu Jèsús, te ní ngúnutnǐi té Pèlú núú-yu, te ní xáha<sup>n</sup>-dě xií-yu:

<sup>16-17</sup>—Nchòhó cue ñáyiú ndècu ndihí-í ichi Xítóhó Jesucristú, na càni-í cuèndú núú-ndó nàcuáa ní chídó tnùní ndíi Dàvíí téé ní xíndecu ndéé sanaha nàcuáa ní cǎhá<sup>n</sup> Espiritú Yǎ Ndiòxí cuendá té Jùdás. Te dacuitíí dùca<sup>n</sup> ní cuu, chi tnáhá té Jùdás ní xíndecu ndihí-o, te ní xinu cuechi-o ndihí-dé núú-gǎ sá dǐhna, te duca<sup>n</sup> ñí quide-dé ní sáha cuendá-dé Jèsús núú cuè téé cùu úhú iní ñáhá xii-gá. <sup>18</sup>Te ní cháhu ñaha-güedě xii-dé cuendá sá ñí sáha cuendá ñáhá-dě xii-gá. Te ní sáhá<sup>n</sup>-dé ì<sup>n</sup> xichi ní sata caa-dé méé-dě, te ní ngava-dé, te ní cahndí duu<sup>n</sup> xití-dé te xía<sup>n</sup> ñí xihí-dé. Te ní naquehe<sup>n</sup>-güedé díhú<sup>n</sup> sǎ ñí cháhu-güedé ndíi, te ní nacuaa<sup>n</sup>-güedé ñuhu núú ñí ngava ndíi-á<sup>n</sup>. <sup>19</sup>Te nchaa ñáyiú Jerusàlén ní níhí-yu tnúhu, te ní dánání-yu ñuhu-á<sup>n</sup> Acèldamá. Te tnúhu mèé-yu quèe-xi: Ñuhu núú ñí sati níñí. <sup>20</sup>Te duha ní cǎhá<sup>n</sup> ndíi Dàvíí ní chídó tnùní ndíi núú libríú Sǎlmú ní dándöo ndíi: “Nà ndóo nahi vèhe-dé, vá yòo ì<sup>n</sup> quǐhí<sup>n</sup> cundecu”, duha ní cǎhá<sup>n</sup> ndíi. Te ingá tucu tnúhu ní cachí ndíi: “Na nànducu-güedé ingá téé nucúnutnǐi núú ndíi”, duha ní cǎhá<sup>n</sup> ndíi Dàvíí —càchí té Pèlú xǎha<sup>n</sup>-dě xií-yu.

21-22 Te ní xáha<sup>n</sup> tùcu-dé:

—Te duca<sup>n</sup> nǐ cáhá<sup>n</sup> ndíi Dàvií, te vitna xìni ñuhu-xi nanducu-o ìi<sup>n</sup> tée nucúnutnǐ-dé núú ndíi Jùdás, te xìni ñuhu-xi diu-ni ìi<sup>n</sup> tée ní xica cuu ndíhi Xítóhó Jesucrístú cútnàhá ní xica cuu-o ndíhi-gá, ìi<sup>n</sup> tée ní xiní ndéé òré ní dácuaándùte ñaha ndíi Juàá xii-gá, te ndéé òré cuánda-gá andiu. Te tée nanducu-o cùndecu-dé cáhá<sup>n</sup>-dé nàcuáa ní cuu ní ndoto-gá —càchí té Pèlú xáha<sup>n</sup>-dě xií-yu.

23 Te ní cacunehe-güedé úú tnàhá-güedé nùu ndèdacàa-güedé nduu táhú-güedě nucúnutnǐ-güedé núú ndíi. Te ìi<sup>n</sup>-dé nání-dě Chèè Barsàbás, àdi Justú chi úú diu-dé, te ingá-dé nání-dě Màtiá. 24 Te ní cáhá<sup>n</sup> ndíhi-güedé Yă Ndiöxí, te xáha<sup>n</sup>-güedě xii-gá:

—Yòhó Dútú Ndiöxí xìní-n ìní nchaa ñáyiu, te mee-n nàha-n núu ndèda càa núú ùú cue téa tnàhá iní-n 25 cáhá<sup>n</sup>-güedé tnúhu-n nùú ñáyiu, te téa-á<sup>n</sup> nucúnutnǐ-dé núú ndíi Jùdás, chi cuáhá<sup>n</sup> ndíi núú ùhú núú ndàhú núú tàú-xi quíhí<sup>n</sup> ndíi —càchí-güedé xáha<sup>n</sup>-güedě xii-gá.

26 Te ní xito ndéé-güedé, te ní cutnùní sá tée nàni Matíá quendóo-dé ndíhi úxí ìi<sup>n</sup> cue téa ní táuchíú<sup>n</sup>-gă dacuàha ñaha xii ñáyiu tnúhu-gá.

### Ní quexìo Espíritú Yă Ndiöxí cundecu ndíhi ñáyiu

**2** 1 Te ní sáa nduu còo vico Pentecostés te xíndecu nchaa ñáyiu ìi<sup>n</sup>-ni xìchi. 2 Te ní tecú dóho-yu uu<sup>n</sup>ni ní nǐhi andiu, dàtná quidé ìi<sup>n</sup> táchí nǐhi vǐhi ní quide-xi, te duca<sup>n</sup> nǐ cuu ndéé xítí vehe núú ndécü-yu ncháá-yu. 3 Te ní xiní-yu dàtná cáá itá ñuhú cáá sǎ ndécú xítí vehe, te ní xíté nuu-xi ní ngoyo ndodo-xi díquǐ-yu ncháá-yu. 4 Te duca<sup>n</sup> nǐ quide-xi òré ní quexìo Espíritú Yă Ndiöxí ní ngúndecu ndíhí-yu ncháá-yu. Te ní ngúíta-yu ní cáhá<sup>n</sup>-yu tnúhu cue ñáyiu ñá túú cùu ñáyiu isràél, te nchaa xíá<sup>n</sup> ní quide Espíritú Yă Ndiöxí.

5 Te vǎi ñáyiu isràél xíndecu nchaa dava-gá ñuú ní tacá-yu ñuú Jerusàlén, te ñáyiu-á<sup>n</sup> ìo ndùcu ndeé-yu dàcuahá-yu nchaa ndudú sá dácuaàha tnahí-yu. 6 Te òré ní tecú dóho-yu nǐhi, te ní sáhá<sup>n</sup>-yu ní xíndedóho-yu tnúhu càhá<sup>n</sup> méě-yu ìi<sup>n</sup> ìi<sup>n</sup> ñuú-yu, chi ndí díí<sup>n</sup> ndí díí<sup>n</sup> tnúhu càhá<sup>n</sup> ñáyiu ndècu-á<sup>n</sup>. 7 Te xíá<sup>n</sup> ío ní cuñúhu ñáyiu véxi dava-gá ñuú, te ní xíttnàhá-yu:

—Ñáyiu duca<sup>n</sup> xícáhá<sup>n</sup> cúü-yu ñáyiu distrítú Galileá. 8 ¿Te nása ní quidé-yu ní cutúha-yu nàcuáa càhá<sup>n</sup>-ó ìi<sup>n</sup> ìi<sup>n</sup>-o ndéé lǐhli-o? 9 Te iha véxi ñáyiu dava nàció<sup>n</sup>, chi véxi ñáyiu Pàrtiá, véxi ñáyiu Mèdiá, véxi ñáyiu Èlám, véxi ñáyiu Mesopòtamiá, véxi ñáyiu Jùdeá, véxi ñáyiu Capàdociá, véxi ñáyiu Pòntó, véxi ñáyiu Àsiá, 10 véxi ñáyiu Frìgiá, véxi ñáyiu Pànfilíá, véxi ñáyiu Ègiptú, véxi ñáyiu Áfricá ñáyiu ndècu ndéé núú-gă-xi ñuú Cìrené. Te tnàhá ñáyiu ñuú Ròmá véxi, te ñáyiu-á<sup>n</sup> chi ñá díú mèe-ni ñáyiu

isràél cúũ-yu nchaá-yu, dico ì<sup>n</sup>-ni cùu sá dáciuàhá-yu. **11**Te véxi ñáyiũ Crètá, véxi ñáyiũ Àrabiá. Te nchaa-o sa ndèdóho-o càhá<sup>n</sup>-yu náciua cuáhá<sup>n</sup> tnúhu mee-o ì<sup>n</sup> ì<sup>n</sup>-o. Te nchaa ñáyiũ xícáhá<sup>n</sup> tnúhu-o càhá<sup>n</sup>-yu cuèndá nchaa sá vǎ yõo tnàhí ndàcu cada ní quide Yá Ndiõxí —càchí-yu xǐtnàhá-yu.

**12**Te ní cuñúhu vîhí-yu, te ñá ná sàà iní-yu nása ní cuu, te xǐtnàhá-yu: —¿Nása ní cuu duha càhá<sup>n</sup>-yu tnúhu-o? —càchí-yu xǐtnàhá-yu.

**13**Te davá-yu ní sácú ndeé yíchí ñáhǎ-yu, te xǐtnàhá-yu:

—Xǐxíni ñáyiũ-á<sup>n</sup> nõu ñá náhǎ-yu tnúhu càhá<sup>n</sup>-yu —càchí-yu xǐtnàhá-yu.

### Tnúhu ní xáha<sup>n</sup> tǎ Pèlú xii cue ñáyiũ

**14**Te ní ngúnutnǐ té Pèlú ndihí úxí ì<sup>n</sup> cue téé ní táuchíú<sup>n</sup> Jèsús dacuàha ñaha xii ñáyiũ tnúhu-gá, te níhi ní cáhá<sup>n</sup>-dé, te xǎha<sup>n</sup>-dǎ xíi-yu:

—Nchaa nchòhó ñáyiũ distritú Jùdeá ndihí nchòhó ñáyiũ nõú Jerusàlén, cundedóho váha-ndo tnúhu na càhá<sup>n</sup>-í-a. **15**Ñá ndàá tnúhu càhá<sup>n</sup>-ndó, chi ñá túú xǐni-ndí te duca<sup>n</sup> càhá<sup>n</sup>-ndó, chi davitna cùu-xi caá í<sup>n</sup> dátneé, vátá tnàhá-gá òré coho ñáyiũ ndidí. **16**Te yúhú ná càchí tnúhu-í xii-ndo vitna nacúaá ní xáha<sup>n</sup> Yǎ Ndiõxí xii ndíi Jòél téé ní xóo cáhá<sup>n</sup> tnúhu-gá ndeé sanaha náciua cada ñaha-gǎ xii ñáyiũ, te ndíi-á<sup>n</sup> nõ chídó tnùní ndíi náciua ní cáhá<sup>n</sup>-gá. **17**Te duha ní xáha<sup>n</sup>-gǎ xii ndíi:

Cùmání-gǎ sáá nduu nàa ñuyíú, te cuañaha-ǐ Espíritú-í cundecu ndihí nchaa ñáyiũ na quìndáá iní ñáhá xìi-í.

Te cue déhe-yu cáhá<sup>n</sup>-yu tnúhu-í,

te cue téé cuechi dacòto núú ñáhá-xí xii-güedé,

te duca<sup>n</sup>-ni cuè téé ni sàhnu cáhá<sup>n</sup> saní-güedé,

te diu-ni cuèndá nchaa sá quídè-í duca<sup>n</sup> dàcoto núú ñáhá-xí

xii-güedé.

**18**Te nchaa ñáyiũ xínu cuechi núu-í cáhá<sup>n</sup>-yu tnúhu-í, te cuañaha-ǐ Espíritú-í cundecu ndihí-yu.

**19**Te ndeé andiu, yàcá<sup>n</sup> vài sá cáda-í náciua cuñúhu vîhí-yu,

te núú ñuyíú-a cada-í ì<sup>n</sup> sá vátá quìní tnàhí-gá-yu,

te ngoyo níñí te ngoyo ñuhú te quene vîhi ñúhmá.

**20**Te vá dáyèhé-gá nchícanhii,

cuu nee ñuyíú te cuu ticuèhé núú yõó dàtná ticuèhé níñí.

Te dàvá-á<sup>n</sup> sáá nduu quixi Yaá cúú Xǐtohó-yu,

te nduu-ǎ<sup>n</sup> cuu-xi ì<sup>n</sup> nduu càhnu vihi, chi cada-gá nchaa sá ñà túú

xìní-yu, te cuñúhu vîhí-yu.

**21**Te òré xía<sup>n</sup> te nchaa ñáyiũ càhá<sup>n</sup> ndihí ñaha xii Yaá cúú

Xǐtohó-yu-á<sup>n</sup> naníhí tàhú-yu.

Duha ní xáha<sup>n</sup> Yǎ Ndiõxí xii ndíi Jòél ní chídó tnùní ndíi.

22<sup>o</sup> Te nchòhó ñáyiú isràél, cundedóho váha-ndo tnùhu na càhá<sup>n</sup>-í-a cuendá Jèsús tée ñúú Nazàrét. Te Jèsús ní quide-gá chiù<sup>n</sup> Yá Ndiöxí, chi mee Yă Ndiöxí ní chindee ñàha-gá ní quide Jèsús ná daha núú chiù<sup>n</sup>, núú xíă<sup>n</sup> ní ndacu-gá ní quide-gá nchaa sá vă yõo tnàhí ndàcu cada, te xíă<sup>n</sup> ní cuñúhu vîhi-ndo. Te sa nàha-ndo nacuáa ní quide-gá cútnàhá ní xica cuu-gá ñuyíú. 23<sup>o</sup> Te ndíi Jùdás ní taxi cuendá ñáhá ndíi Jèsús xii nchòhó cue tée ní cuu úhú iní ñáhá xii-gá, te ní ndúcú-ndó cuè tée úhú iní-xi ní tñii ñaha-güedě xii-gá te ní sata caa ñaha-güedě núú cùrúxí, te núú cùrúxí-á<sup>n</sup> ní xíhí-gá. Dico sa ní cutnùní iní Yă Ndiöxí sá dúcá<sup>n</sup> càda-ndo Jesús, te mee Yă Ndiöxí ní cachí-gá sá dúcá<sup>n</sup> ndòho Jesús. 24<sup>o</sup> Te ñiu-ni mee Yă Ndiöxí ní dándótó-gă Jèsús, chi sa ní cáhá<sup>n</sup>-gá sá òré cuú-gá te vá cùú dúcá<sup>n</sup>-gă. 25<sup>o</sup> Te ndíi Dàvíí tée ní xíndaha ñàha xii cue ñaní tnáhá-ó nñ xíndecu ndéé sanaha nñ chídó tnùní ndíi nàcuáa ní cáhá<sup>n</sup> Jèsús, te duha ní cáhá<sup>n</sup>-gá:

Cùtnuní iní-í sá ncháá ndùu ndecu ndíhi-í Yă Ndiöxí, te ío chindee ñaha-gá xii-í,  
te ñá túú tnàhí sá yùhú-í.

26<sup>o</sup> Te ío ndàcá<sup>n</sup> táhù-í núú Yă Ndiöxí chi cùdífí iní-í, chi sa nàha-í sá cùú-í dico ndoto-í,

27<sup>o</sup> chi vá dáñá-gă quíhí<sup>n</sup> dúcá<sup>n</sup> àlmá-í núú ndécú ñăyiú ní xíhí,  
te vá dáñá-gă téhyú yiqui cùñú-í chi cùu-í Déhe-gá, te yúhú sa nàha-í sá cùú iní ñáhá-gă xii-í.

28<sup>o</sup> Te sa ní cachí tnúhu-gá nàcuáa cada-í cundecu-í ichi váha, te cuendá sá ndécú ndíhi ñaha-gá xii-í nñu ío cùdífí iní-í.

Duha ní cáhá<sup>n</sup> Jèsús, te duca<sup>n</sup> nñ chídó tnùní ndíi Dàvíí.

29<sup>o</sup> Te nchòhó cue ñaní tnáhà-í, na càchí tnúhu ndáá-í xii-ndo cuendá ndíi Dàvíí tée ní xíndecu ndéé sanaha vîhi, chi ní xíhí-dé, te ní chindúxi ñaha-güedě, te nàha-o tnavíí núú nñ chindúxi ñaha-güedě. 30<sup>o</sup> Te ndíi Dàvíí ní xóo cáhá<sup>n</sup> ndíi tnúhu Yá Ndiöxí, te sa nàha ndíi sá Yă Ndiöxí ní cáhá<sup>n</sup> ndáá cuiti-gá sá díú-ní ñi<sup>n</sup> tnaha ndíi taxi tnùní-dé ñăyiú isràél ndéé cuèé-gá dàtná ní xóo taxi tnùní méé ndíi cútnàhá ní xíndecu ndíi, te tée taxi tnùní-á<sup>n</sup> cùú Crìstú chi cùu-gá ñi<sup>n</sup> tnàha ndíi. 31<sup>o</sup> Te sa ní cutnùní iní ndíi sá ndótó Crìstú, núú xíă<sup>n</sup> ní chídó tnùní ndíi sá vă dáñá Yă Ndiöxí sá quíhí<sup>n</sup> dúcá<sup>n</sup> àlmá-gá cundecu-xi núú ndécú ñăyiú ní xíhí, te vá dáñá-gă téhyú yiqui cùñú-gă.

32<sup>o</sup> Te ndáá chi Yá Ndiöxí ní dándótó-gă Jèsús, te nchúhú ní xiní-ndí sá nñ ndoto-gá. 33<sup>o</sup> Te ní xáha<sup>n</sup> Yă Ndiöxí xii Jèsús sá cùndecu ndíhi ñaha-gá, te taxi tnùní Jèsús ni caa ni quíhí<sup>n</sup>. Te Yá Ndiöxí ní sáñaha-gă Espíritú-gá ní ngúndecu ndíhi-gá nàcuáa ní xáha<sup>n</sup>-gă, te ñiu Jèsús ní quide-gá nchaa sá ní xiní-ndó vîtna ndíhi nchaa sá nñ xíndedóho-ndo. 34<sup>o</sup> Te ndíi Dàvíí ñá túú ní

ndaa túu ndíi andíu ndíhi yiqui cuñú ndíi, te òré ndécú-gă ndíi ñuyíú-a ní cachí ndíi:

Dútú Ndiöxí ní xáha<sup>n</sup>-gă xii Yaá cúú Xĩtohó-í:

“Ngóo xio cùha-í,

**35** te yúhu cada-í te nchaa sá cúú ũhú iní ñáhá xì-n canehe-xi sá yĩñùhu núú-n.”

Duha ní xáha<sup>n</sup> Dútú Ndiöxí xii Yaá cúú Xĩtohó-í cächí ndíi.

**36** Te nchòhó ñáyiu isràèl cùu-ndo ndi mee-í, te cuiní-í cundedóho váha-ndo ìh<sup>n</sup> tnúhu na càhá<sup>n</sup>-í-a. Jèsús ní sata caa-ndo-gă núú cùrúxí, dico Yá Ndiöxí ní cachí-gá sá Jèsús dacăcu nihnu-gă ñáyiu, te vá cání ìh<sup>n</sup> caní úú iní-ndó, chi diu-gă cúnùu-gă núú nchàa ñáyiu —cächí té Pèlú xáha<sup>n</sup>-dë xíi-yu.

**37** Te ñáyiu ní xíndedóho tnúhu ní cáhá<sup>n</sup> té Pèlú ní ndixi túu iní-yu nàcuáa quidé-yu ndécú-yu, te ní xáhă<sup>n</sup>-yu xii-dé ndíhi dava-gă cue téé ní táúchíú<sup>n</sup> Jèsús dacuàha ñaha xíi-yu tnúhu-gă:

—Nchaa nchòhó cue ñaní tnáhá-ndĭ, ñása cachí-ndó cùnduu, nása cada-ndí vitna? —cächí-yu xáhă<sup>n</sup>-yu xii-güedé.

**38** Te ní xáha<sup>n</sup> tē Pèlú xíi-yu:

—Daña-ndo nchàa sá cuèhé sá dúhá quide-ndo, te cada cànnu iní Yă Ndiöxí nchaa yíca cuèchi-ndo. Te cuandute-ndo cuendá quiní-yu sá ñĭ natuha-ndo ìchi Jesús, te duca<sup>n</sup> te taxi Yá Ndiöxí Espiritú-gă cundecu ndíhi-ndo, **39** chi cuiní-gă taxi-gă Espiritú-gă xii mee-ndo ndíhi déhe-ndo, te cuañaha-gă Espiritú-gă xii nchaa ñáyiu ñĭ càa xico ñuyíú, ñáyiu cáhá<sup>n</sup>-gă cundecu ichi-gă ndéé ìdá-gă —cächí té Pèlú xáha<sup>n</sup>-dë xíi-yu.

**40** Te titní-gă tnúhu ní xáha<sup>n</sup>-dë nàcuáa cadá-yu, te xáha<sup>n</sup> tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó să quidé dàva-gă-yu —cächí-dé xáha<sup>n</sup>-dë.

**41** Te nchaa ñáyiu ní sándáá iní-xi tnúhu ní cáhá<sup>n</sup> té Pèlú ní sanduté-yu, te diu-ni nduu-ă<sup>n</sup> ñĭ cuu dàtná úní mĭl ñáyiu ní sándáá iní-xi ní xíndecu ndíhi ñáyiu xídacuáhá tnúhu Yá Ndiöxí. **42** Te ío ní xíndedóho-yu tnúhu ní cáhá<sup>n</sup> cue téé ní táúchíú<sup>n</sup> Jèsús dacuàha ñaha xíi-yu tnúhu-gă, te ío váha ní xíndecú-yu ní xóo ndatnúhu váha-yu. Te ní xóo caxi cànú-yu cuendá náhă-yu sá dúcá<sup>n</sup> ñĭ quide Jèsús cútnáhá vátá cáhní ñàha-gă-güedé xii-gă, te ní xóo cáhá<sup>n</sup> ndíhí-yu Yá Ndiöxí.

**Nàcuáa ní quide nchaa ñáyiu ní sándáá iní tnúhu Jèsús ndéé díhna nuu**

**43** Te ncháa-yu ní cuñúhu vĭhí-yu, chi cue téé ní táúchíú<sup>n</sup>-gă dacuàha ñaha xíi-yu tnúhu-gă ní quide-güedé titní núú să vă yóo tnáhí ndàcu cada, te xĭă<sup>n</sup> ní cutnùnĭ iní-yu sá méé Yă Ndiöxí chíndèè ñaha-gă xii-güedé. **44** Te nchaa ñáyiu sándáá iní tnúhu Jèsús càhá<sup>n</sup> ndíhi tnàha váha-yu, te cuèi-ni

nchaa ndachìu<sup>n</sup> nandíhi-yu ndècu cahnu. <sup>45</sup>Te ní dícõ-yu nchaa ndachìu<sup>n</sup> sá ñà túú xìni ñuhú-yu, te ní níhĩ-yu díhú<sup>n</sup> te ní sáñàhá-yu xii nchaa ñáyiu ñá nihí. <sup>46</sup>Te ì<sup>n</sup> nduu ì<sup>n</sup> nduu ní xóo quíhĩ<sup>n</sup> ndihi tnàhá-yu veñúhu cànno sá ïo cùnno. Te ní xexi ndihi tnàhá-yu vehé-yu. Te ío ní cudíí ìní-yu chi ì<sup>n</sup>-ni ní cuú-yu ncháá-yu. <sup>47</sup>Te ío ní ndacá<sup>n</sup> táhũ-yu núú Yă Ndiõxí, te nchaa dava-gá ñáyiu ní cáhá<sup>n</sup> váha-yu cuendá ñáyiu-á<sup>n</sup>. Te mee Yă Ndiõxí ní quide-gá ní sándáá ìní vâi-gá ñáyiu, te ní xíndecú-yu ndihi dava-gá ñáyiu xídacuáhá tnũhu-gá.

### Quide tátna-güedé ì<sup>n</sup> té yacua

**3** <sup>1</sup>Te ì<sup>n</sup> nduu òré caá úní sacuaa, òré xícáhá<sup>n</sup>-yu ndihi Yă Ndiõxí cuáhá<sup>n</sup> té Pèlú ndihi té Juàá veñúhu cànno sá ïo cùnno sácúú-xí ñáyiu isràél. <sup>2</sup>Te ndècu ì<sup>n</sup> té yacua, te duca<sup>n</sup>-ni càa-dé ní cacu-dé. Te sàhá<sup>n</sup> ndihi ñàhá-yu veñúhu cànno sá ïo cùnno, te sàcòo-dé ì<sup>n</sup> xio yuyèhe veñúhu sá nání Yèhe Vii Caa, chi duca<sup>n</sup> nàni-xi, te xicá<sup>n</sup> ndàhú-dé núú nchàa ñáyiu sàhá<sup>n</sup> veñúhu. <sup>3</sup>Te ní xíní-dé té Pèlú ndihi té Juàá cuánguìhu-güedé veñúhu, te xicá<sup>n</sup> ndàhú-dé núú-güedé. <sup>4</sup>Te ní ndacoto-güedé núú-dě, te ní xáha<sup>n</sup> tẽ Pèlú xii té yacua-ã<sup>n</sup>:

—Cundehe ñàha xii-ndí —càchí té Pèlú xáha<sup>n</sup>-dě xii-dé.

<sup>5</sup>Te ní xíndéhé ñàha-dé xii-güedé, chi ní cáhá<sup>n</sup>-dě sá ìó ì<sup>n</sup> sá cuãñaha-güedé. <sup>6</sup>Te ní xáha<sup>n</sup> tẽ Pèlú:

—Ñá túú tnàhí díhú<sup>n</sup> néhè-í dico chindee ñàha-í xii-n, te Xítóhó Jesucristú Yaá ní xíndecu ñuú Nazàrét, ndacu-gá cada tátna ñaha-gã xii-n, ndacuñí te caca-n —càchí-dé xáha<sup>n</sup>-dě.

<sup>7</sup>Te té Pèlú ní tñi-dé ndaha cùha té yacua-ã<sup>n</sup>, te ní ngúita-dé ndàcàni ñaha-dé, te òré xíá<sup>n</sup> ñí naníhí ndéé-dě, te ní ndúha sáhá-dě. <sup>8</sup>Te ní ndacuñí cunu mee-dě te ní xica-dé, te ní cachí-dé sá ïo cànno cuu Yă Ndiõxí cuendá sá ñí ndúha-dé, te ta sàndava-dé cuánguìhu ndihi ñaha-güedé veñúhu. <sup>9</sup>Te nchaa ñáyiu xíndecu-á<sup>n</sup> ñí xíní-yu sá ñí nduu váha-dé, te ndèhé-yu ndàcá<sup>n</sup> táhú-dě núú Yă Ndiõxí. <sup>10</sup>Te ní naquiní ñáhã-yu xii-dé sá díú tẽ xicá<sup>n</sup> ndàhú té ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vîhí-yu sá ñí ndúha-dé.

### Té Pèlú ní cáhá<sup>n</sup>-dé corredór sá néhé òu ndíi Salòmón

<sup>11</sup>Te sátá veñũhu càa corredór sá néhé òu ndíi Salòmón. Yàcá<sup>n</sup> ndécú tẽ Pèlú ndihi té Juàá ndihi té ní ndúha sáhá-xi, te ñá cuíní té ní ndúha sáhá-xi-á<sup>n</sup> dañá-dě quíhĩ<sup>n</sup>-güedé dandõ ñaha-güedé xii-dé. Te chítú-yu ní quexìo coyó-yu núú ndécú-güedé, te ní cuñúhu vîhí-yu sá ñí ndúha sáhá tẽ cùhú-á<sup>n</sup>. <sup>12</sup>Te té Pèlú ní xíní-dé ní quexìo coyó-yu, te ní xáha<sup>n</sup>-dě xii-yu:

—Nchòhó ñáyiú isràél, ¿ná cuèndá ndéé dúcá<sup>n</sup> ndèhe ñaha-ndo xii-ndí te cùñúhu-ndo sã ñí ndúha té yacua-ái<sup>n</sup>? Nchòhó cáhá<sup>n</sup>-ndó sã méé-ndí ní quide tátna-ndí-dé sá ïo váha iní-ndí, dico ñáhá chi ñá díú mèe-ndí ní quide tátna-ndí-dé. <sup>13</sup>Chi Yá Ndiöxí ní ndadúha ñaha-gã xii-dé, chi ñiu-gá cúú Ndiöxí ndíi Àbrahám ndíhi ndíi Isàác ndíhi ndíi Jàcób, te ñiu-ni cue téé-á<sup>n</sup> cúú ñàní tnáhá-ó ñí xíndecu ndéé sanaha vìhi. Te ñiu-ni Ndiöxí-á<sup>n</sup> ñí xáha<sup>n</sup>-gã xii Déhe-gá Jèsús sá táxí tnùnigá nchaa sá ïó andíu ndíhi nchaa ñáyiú ndècu ñuyíú-a, dico mee-ndo ñí sáha cuèndá-ndó Jèsús núú tée cùchiu<sup>n</sup>. Te té Pìlatú ní cuiní-dé dacäcu-dé Jèsús ní cùu, te mee-ndo ñá ní cuiní-ndó. <sup>14</sup>Te Yá Ndiöxí ní cachí-gá sá ïo váha iní Jèsús te ñá túú tnàhí cuéchi-gá. Te mee-ndo ñá túú ní cuiní-ndó cäcu-gá ñúu ní xáha<sup>n</sup>-ndo xii té Pìlatú sá vãha-gá dacäcu-dé ñí<sup>n</sup> tée ndècu vìhi cuéchi-xi, te vá dacäcu-dé Jèsús. <sup>15</sup>Te ní xáha<sup>n</sup>-ndo sã cáhni-güedé Jèsús Yaá quidé nchìto-o ndecu-o, dico Yá Ndiöxí ní dándótó ñaha-gá, te ní xiní-ndí sá ndàá ní ndoto-gá. <sup>16</sup>Te nchúhú sa nàha-ndí sá díú Xìtohó Jesucristú ní ndadúha-gá té yacua, te náí-dé nútní-a. Te duca<sup>n</sup> ñí quide-gá chi ní sándáá iní ñáhá-dé xii-gá, te vitna ní xiní-ndó sã ndàá ní ndúha-dé.

<sup>17</sup>Te nchòhó ndíhi cue téé cùnuu ní sahani-ndo Xìtohó Jesucristú, chi ñá ní cùnuni iní-ndó sã ñí quide-ndo. <sup>18</sup>Te cue téé ní xóo cáhá<sup>n</sup> tnúhu Yá Ndiöxí ndéé sanaha ñí chídó tnùnigüedé nàcuáa ní xáha<sup>n</sup> Yá Ndiöxí xii-güedé sá Crìstú quixi-gá ñuyíú-a, te ndoho vìhi-gá, te xiá<sup>n</sup> ñúu duca<sup>n</sup> ñí cuu ïo ní ndoho-gá. <sup>19</sup>Te vitna te dañá-ndo nchàa sá cuèhé sá dúhá quide-ndo. Te quindáá iní-ndó Yá Ndiöxí, te duca<sup>n</sup> te cada càhnu iní-gá nchaa sá ñá túú vãha ní quide-ndo ñuyíú-a, te canu ichi ñaha-gã xii-ndo ñí<sup>n</sup> ichi váha. <sup>20</sup>Te ní tendaha-gá Crìstú ní quixi-gá ñuyíú-a, chi mee Yá Ndiöxí ní cachí-gá sá díú Crìstú taunihnu ñaha-gã xii-ndo. <sup>21</sup>Te dacuití cùndecu-gá andíu ndéé ná sàá nduu nàtaxi ndecu-gá nchaa sá ndécú ñuyíú nàcuáa sàni iní méé-gã. Te ñiu duca<sup>n</sup> ñí cáhá<sup>n</sup> Yá Ndiöxí ñúu duca<sup>n</sup> ñí chídó tnùnigüedé téé ní xóo cáhá<sup>n</sup> tnúhu-gá ndéé sanaha. <sup>22</sup>Te ndíi Moisés ní xáha<sup>n</sup> ndíi xii cue ñàní tnáhá-ó ñí xíndecu ndéé sanaha: “Yá Ndiöxí tendaha-gã ñí<sup>n</sup> tée quixi-dé cáhá<sup>n</sup>-dé tnúhu-gá dàtná cuiní-ndó ñí quide ñaha-gã xii yúhú, te téé-á<sup>n</sup> cuu-dé ñí<sup>n</sup> ñàní tnáhá-ndó. Te cundedóho váha-ndo nchàa tnúhu cáhá<sup>n</sup>-dé. <sup>23</sup>Te nchaa ñáyiú vá quindáá iní tnúhu cáhá<sup>n</sup>-dé, te cuíta nihnú-yu chi vá quíhí<sup>n</sup>-yu núú quíhí<sup>n</sup> ñáyiú sándáá iní tnúhu Yá Ndiöxí”, duha ní xáha<sup>n</sup> ndíi Moisés xií-yu —càchí té Pèlú xáha<sup>n</sup>-dè xií-yu.

<sup>24</sup>Te ní xáha<sup>n</sup> tùcu té Pèlú xií-yu:

—Ndíi Sàmuel ndíhi nchaa cue téé nchìcú<sup>n</sup>-gá ní xóo cáhá<sup>n</sup> tnúhu Yá Ndiöxí ndéé sanaha ñí cáhá<sup>n</sup>-güedé nàcuáa cada-xi vitna. <sup>25</sup>Te Yá Ndiöxí ní cáhá<sup>n</sup>-gá ndíhi cue téé ní cáhá<sup>n</sup> tnúhu-gá ndéé sanaha. Te ní quide



ndáá-gá ndihi nchaa ñaní tnáhá-ó nǐ xíndecu ndéé sanaha nàcuáa cada-gá naníhí tǎhú-ó. Te duha ní xáha<sup>n</sup>-gǎ xii ndíi Àbrahám: “Ìó nduu cacu ìi<sup>n</sup> tnàha-n, te téé-á<sup>n</sup> cada-dé te naníhí tǎhú ñáyiu ñuyú-a”, duha ní xáha<sup>n</sup>-gǎ xii ndíi Àbrahám. <sup>26</sup>Núu xǎ<sup>n</sup> ní tendaha-gǎ Déhe-gá ní quixi-gá núu ndécú-ndó cuèndá dañ-ndo nchaa sá cuèhé sá dúhá quide-ndo, te naníhí tǎhú-ndó —càchí té Pèlú xǎha<sup>n</sup>-dě xíi-yu.

**Té Pèlú ndihi té Juàá ndécú-güedě ndaha té cùchiu<sup>n</sup>**

**4** <sup>1</sup>Te té Pèlú ndihi té Juàá càhá<sup>n</sup> dúcá<sup>n</sup>-ni-güedě ndihi ñáyiu, ní quexìo cue dútú ndihi téé tàxi tnuní ñáhá xii cue téé quide cuèndá veñúhu càhnu sá ìo cùnuu, ndihi cue téé cùu saducéú. <sup>2</sup>Te ní cudéé<sup>n</sup>-güedě nchaa-güedé núu tǎ Pèlú ndihi té Juàá sá xǎha<sup>n</sup>-güedě xii ñáyiu sá ndótó ñáyiu ní xíhí dàtná ní ndoto Jèsús. <sup>3</sup>Te ní tniì ñaha-güedě ní chihí ñaha-güedě vecaá xii-güedé, te ñá ní quide ndáá téé cùchiu<sup>n</sup> cuéchi-güedé nduu-ǎ<sup>n</sup> chi sa ní cuaa. <sup>4</sup>Te ìo vǎi ñáyiu ní sándáá iní-yu tnúhu ní cáhá<sup>n</sup>-güedé, te ñáyiu-á<sup>n</sup> ndihi ñáyiu sa ní sándáá iní-xi ndéé cǎni-gá ní xínu dàtná úhú<sup>n</sup> mǐl mee-ni cuè téé, te ìi<sup>n</sup> ñáyiu ìihí ndihi landú.

<sup>5</sup>Te nduu tněé-á<sup>n</sup> ìiu-ni ñúú Jerusàlén-á<sup>n</sup> nǐ tacá cue téé yìndaha veñúhu, ndihi cue téé cùu sacuéhé nǔú ñáyiu isràél ndihi cue téé dàcuaha ñaha xíi-yu nchaa tnúhu ní chídó tnùnì ndíi Moisés. <sup>6</sup>Te tnàhá dútú cùnùu-gá téé nàni Anás ndécú ndihi té Caifás, ndihi té Juàá, ndihi té Lìjandrú ndihi dava-gá ñaní tnáhá dǔtú cùnùu-gá-á<sup>n</sup> ndécú. <sup>7</sup>Te ní xáha<sup>n</sup>-güedě xii cue téé xínu cuechi núu-güedě:

—Chí cuàhá<sup>n</sup> queñuhu-ndo tǎ Pèlú ndihi té Juàá vecaá, te na quixi-güedé iha —càchí-güedé xǎha<sup>n</sup>-güedě.

Te ní quexìo té Pèlú ndihi té Juàá núu cuè téé cùnuu, te cue téé cùnuu-á<sup>n</sup> nǐ xícá<sup>n</sup> tnúhú-güedě núu-güedě, te xǎha<sup>n</sup>-güedě:

—¿Nása ní quide-ndo cuèndá téé yacua-ǎ<sup>n</sup>? ¿Yoo ní táuchíú<sup>n</sup> dùca<sup>n</sup> cada-ndo? —cachí-güedé xǎha<sup>n</sup>-güedě.

<sup>8</sup>Te ndècu ndihi té Pèlú Espíritú Yǎ Ndiöxí, núu xǎ<sup>n</sup> ní xáha<sup>n</sup>-dě xii-güedé:

—Nchòhó cue téé cùchiu<sup>n</sup> ndihi nchòhó cue téé cùu sacuéhé nǔú ñáyiu isràél, <sup>9</sup>te núu cuìnì-ndó quìnì-ndó nǎsa ní quide-ndí ní ndúha téé yacua-ǎ<sup>n</sup>, <sup>10</sup>te cundedóho-ndo ìi<sup>n</sup> tnúhu na càhá<sup>n</sup>-í-a. Xìni ñuhu-xi cundedóho nchaa ñáyiu isràél cuèndá quiní-yu nàcuáa ní cuu ní ndúha téé-ǎ<sup>n</sup>. Xítóhó Jesucristú Yáá ní xíndecu ñúú Nazàrét ní quide tátna-gá sáhá tǎe yacua ní ndúha, te ìiu-ni-gá ní sata caa-ndo nǔú cùrúxí te núu cùrúxí-á<sup>n</sup> nǐ xíhí-gá, te ní dándótó ñaha Yá Ndiöxí xii-gá. <sup>11</sup>Te núu tütú Yǎ Ndiöxí càchí-xi: “Cristú cúu-gǎ dàtná ìi<sup>n</sup> yúu ndécú xǐquí ìi<sup>n</sup> vehe. Te yúu càchí-yu sá ñà túu nàndíhi, te ìiu xǎ<sup>n</sup> ní nàndíhi-xi ní ngúnutnǐ-xi xíquí

véhé”, duha càchí-xi núú tùtú-gá. Te duca<sup>n</sup> sãtnahá-xi cùu Jesús, chi càchí-ndó sã ñà túú nãndíhi-gá, <sup>12</sup>dico Yá Ndiöxí ñá túú ndèé ní tàxi ndecu-gá ingá tée dàcácu nihnu ñaha xii-o núú ùhú núú ndàhú, chi ì<sup>n</sup>dii díi-ni Déhe-gá Xítóhó Jesucristú dacácu nihnu ñaha-gã xii-o —càchí té Pèlú xãha<sup>n</sup>-dë xii-güedé.

<sup>13</sup>Te té Pèlú ndihi té Juàá ñá túú tũha-güedé, te cùnũhu cue tée cùchiu<sup>n</sup> sá ïo ñíí xĩndáa-güedé. Te ní cutnùní iní cue tée cùchiu<sup>n</sup>-á<sup>n</sup> sã Jèsús ní xica cuu ndihi-güedé, núu xíã<sup>n</sup> ñá túú tnàhí yùhú-güedé càhá<sup>n</sup>-güedé. <sup>14</sup>Te cuendá ndécú ndihi té Pèlú ndihi té Juàá tée ní ndúha sáhá-xi, núu xíã<sup>n</sup> ñá ní ñíhí cue tée cùchiu<sup>n</sup> tnúhu càhá<sup>n</sup>-güedé. <sup>15</sup>Te ní xáha<sup>n</sup>-güedë xii té Pèlú ndihi té Juàá sá quée-güedë quehé cuendá ndóo mee-güedë ndatnúhu-güedé. <sup>16</sup>Te ní xítnàha-güedé:

—¿Nása cada-o ũú cue tée-ã<sup>n</sup>?, chi nchaa ñáyiu ñuú Jerusalén nãhá-yu sá ñí quide tátna-güedé ì<sup>n</sup> tée yacua, te xíã<sup>n</sup> xĩcuñúhu vïhi ñáyiu. Te vá cúú càchí-ó sã ñã ndàá, chi vãi ñáyiu ní xiní nàcuáa ní cuu. <sup>17</sup>Te dayùhú-ó-güedë te cùnãha-o sã vã càhá<sup>n</sup>-gá-güedé tnúhu Jèsús, chi núu ñáhá te quindáa-gá iní-yu —càchí-güedé xítnàha-güedé.

<sup>18</sup>Te ní cana tucu-güedé té Pèlú ndihi té Juàá, te xáha<sup>n</sup>-güedë sá vã dáciuaha-gá-güedé ñáyiu tnúhu Jèsús. <sup>19</sup>Te té Pèlú ndihi té Juàá ní xáha<sup>n</sup>-güedë:

—Chí cuãha cuendá, te núu sá càchí nchòhó cada-ndí àdi sá càhá<sup>n</sup> Yã Ndiöxí cada-ndí. Te cada càhnu iní-ndó chi vá cúú càda-ndí sá càchí-ndó, chi cada nahi-ni-ndí sá càchí Yã Ndiöxí. <sup>20</sup>Chi dacuitíí càhá<sup>n</sup>-ndí nàcuáa ní càhá<sup>n</sup> Jèsús, te càhá<sup>n</sup>-ndí nchaa sá ñí xiní-ndí ní quide-gá —càchí-güedé xáha<sup>n</sup>-güedë.

<sup>21</sup>Te cue tée cùchiu<sup>n</sup> níhi-gá ní càhá<sup>n</sup>-güedé xáha<sup>n</sup>-güedë sá cáda càstiú ñáhá-güedë ñuú vá dáñá-güedë sá dáciuaha-güedé ñáyiu. Te duca<sup>n</sup> te ní dáñá ñàha-güedé cuánuhú-güedé, chi ñá ní ñíhí-güedë nása cada-güedé cada castiú ñáhá-güedë, chi nchaá-yu ndàcá<sup>n</sup> táhũ-yu núú Yã Ndiöxí sá ñí ndúha tée yacua. <sup>22</sup>Te tée ní quide tátna-güedé-á<sup>n</sup> ndécú-dë vïhi-gá údico cuíá-dë, te ío ní cuñúhu-yu sá ñí ndúha-dé.

**Ñáyiu sàndáa iní tnúhu Jèsús xicá<sup>n</sup> táhũ-yu núú-gã sá vã yùhú-yu càhá<sup>n</sup>-yu tnúhu-gá**

<sup>23</sup>Te ní ndee té Pèlú ndihi té Juàá cuánuhú-güedé núú ndécú cuè tée cùndihi-güedé, te ní nacani tnúhu-güedé nàcuáa ní xáha<sup>n</sup> cuè dútú cùnù ndihi cue tée cùu sacuéhé ñuú ñáyiu isràél. <sup>24</sup>Te sátá ñí xĩndedóho-yu tnúhu ní càhá<sup>n</sup>-güedé, te ì<sup>n</sup>-ni tnúhu ní càhá<sup>n</sup>-yu nchaá-yu ndihi Yá Ndiöxí, te ní xáhã<sup>n</sup>-yu xii-gá:

—Yòhó Dútú Ndiöxí, ní cadúha-n àndiu, ní cadúha-n ñùyíú, ní cadúha-n làmár, ní cadúha-n nchàandi túhú sá ío ñuyíú. **25**Te ndíi Dàvíí ní sándáá iní ndíi tnúhu ní cáhá<sup>n</sup>-n, te ní chídó tnùní ndíi nàcuáa ní xáha<sup>n</sup>-n cǎhá<sup>n</sup> ndíi, te ñu-ni Espíritú-n ñí chindee ñàha-xi xii ndíi ní chídó tnùní ndíi, te duha ní chídó tnùní ndíi:

Ñáyíu ñá túú cùu ñáyíu isràél ío cùdée<sup>n</sup>-yu núú Yǎ Ndiöxí,  
te cuíní-yu nàá-yu ndíhi-gá, dico vá ndácü-yu chi mee-gǎ cúnùu-gá.

**26**Te cue téé yìndaha nació<sup>n</sup> ndíhi cue téé cùchiu<sup>n</sup> tacá-güedé  
nàá-güedé ndíhi Dútú Ndiöxí ndíhi Crìstú Yaá ní quixi ñuyíú-a.  
Duha ní chídó tnùní ndíi Dàvíí nàcuáa ndùu tnúhu ní cáhá<sup>n</sup>-n —càchí-yu  
xǎhǎ<sup>n</sup>-yu xii Yá Ndiöxí.

**27**Te xáha<sup>n</sup> tucú-yu xii-gá:

—Ndáá ní cáhá<sup>n</sup> ndíi Dàvíí chi ñu-ni ñuú iha ní tacá té Hèrodés ndíhi té Pònciú Pìlatú ndíhi ñáyíu ñá túú cùu ñáyíu isràél ndíhi ñáyíu isràél ní cáhá<sup>n</sup> cuèhé-yu cuèndá Jèsús. Te Yòhó Dútú Ndiöxí, Déhe-n cùu Jesús ñuú ío váha iní-gá, te ní sáha chiú<sup>n</sup>-n-gá, te ío úhú ní cuu iní ñáhá ñáyíu xii-gá.

**28**Te ní quidé-yu nàcuáa ní sani iní-n càdá-yu ndéé sanaha, ndéé cùtnàhá ní ngáva ñuyíú. **29**Te Yòhó Dútú Ndiöxí sa nàha-n nása càhá<sup>n</sup> cue téé cuíní cada úhú ñáhá xii-ndí. Te quide-ndí chiú<sup>n</sup> tahu-n, te vitna chindee ñàha-n xii-ndí cuèndá sá vǎ yùhú-ndí cáhá<sup>n</sup>-ndí tnúhu-n. **30**Te cada tátna-n ñáyíu cùhú, te chindee ñàha-n xii-ndí, te cada-ndí nchaa sá vǎ yòo tnàhí ndàcu cada nacuáa cuñúhu vìhí-yu. Te xìní-ndí sá méé Jèsús chindee ñàha-gá xii-ndí, chi quide-gá chiú<sup>n</sup> tahu-n —cachí-yu xǎhǎ<sup>n</sup>-yu xii Yá Ndiöxí.

**31**Te sátá ñí yáha ní cáhá<sup>n</sup>-yu ndíhi Yá Ndiöxí, te ní quidi-xi vehe núú xíndecú-yu, te òré-á<sup>n</sup> ñí cutáhú tucú-yu nchaá-yu Espíritú-gá. Te ní cáhá<sup>n</sup>-yu tnúhu Yá Ndiöxí, te ñá túú tnàhí ni yùhú-yu.

#### **Cuèndá nchaa ndachìu<sup>n</sup> cánehe chiú<sup>n</sup>-yu**

**32**Te nchaa ñáyíu ní sándáá iní tnúhu Yá Ndiöxí ñí<sup>n</sup>-ni tnúhu ní cáhá<sup>n</sup>-yu nchaá-yu. ñí<sup>n</sup>-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhǎ-yu nchaa sá xíní ñùhú-yu, te ni ñí<sup>n</sup>-yu ñá túú ní cǎhá<sup>n</sup>-yu sá ndàchiú<sup>n</sup>-yu ñí<sup>n</sup>dií-ní-yu cùu nchaa sá ndécú ndíhí-yu. **33**Te cue téé ní táuchíú<sup>n</sup> Jèsús dacuàha ñaha xíí-yu tnúhu-gá ío váha ní cáhá<sup>n</sup>-güedé nàcuáa ní cuu ní ndoho Xítóhó Jesucrìstú. Te ío ní chindee ñàha Yá Ndiöxí ní cáhá<sup>n</sup>-yu tnúhu-gá, te ñá túú ní cǎhá<sup>n</sup> cuèhé dava-gá-yu cuèndá ñáyíu dàcuaha tnúhu-gá. **34**Te ñá túú tnàhí ni cùndahú-yu díhú<sup>n</sup>, chi nchaa ñáyíu ndècu ndíhi ñuhu-xi, ndíhi nchaa ñáyíu càa vehe-xi ní nadìcò-yu, te da ñí<sup>n</sup> da ñí<sup>n</sup> ndachìu<sup>n</sup>-yu ní nadìcò-yu òré xíní ñùhú-yu díhú<sup>n</sup>. **35**Te ní sáñàhá-yu xii cue téé ní táuchíú<sup>n</sup> Jèsús dacuàha ñaha xíí-yu tnúhu-gá, te cue téé-á<sup>n</sup> ñí dácǎhñu-güedé nchaa ñáyíu xini ñuhu. **36**Te distrìtú Chìpré ndécú ñí<sup>n</sup> téé

nàni-dé Chèé ñaní tnáhá ndíi Lèví, te ní xóo cunu cuechi-dě veñúhu ñáyiú israél. Te cuèndá sá sãñaha-dě tnúhu ndee iní xií-yu, xiá<sup>n</sup> núu ní dánání ñaha-güedé Vèé xii-dé. <sup>37</sup>Te téé-á<sup>n</sup> nĩ nadico-dě luha ñuhu-dé, te nèhe-dé díhú<sup>n</sup> cuáhá<sup>n</sup> núú cuè téé ní táúchíú<sup>n</sup>-gã dacuàha ñaha xií-yu tnúhu-gá.

### Té Ananiás ndihi tá Sàfirá ñá túú ní quide ndáá-yu

**5** <sup>1</sup>Te ndècu ií<sup>n</sup> téé nàni Ananiás, te ñadìhí-dé nání-á<sup>n</sup> Sàfirá, te ñáyiú-á<sup>n</sup> nĩ nadicó-yu luha ñuhú-yu. <sup>2</sup>Te ní taxúha-dé sacú díhú<sup>n</sup>, te sacú-gá néhé-dě cuáhá<sup>n</sup> ní sãñaha-dě xii cue téé ní táúchíú<sup>n</sup> Jèsús dacuàha ñaha xii ñáyiú tnúhu-gá, te ní dándàhú ñáhá-dě xii-güedé, chi ní xáha<sup>n</sup>-dě sá ñihí ní sãñaha-dě, te nàha ñadìhí-dé sá dúcá<sup>n</sup> nĩ quide-dé. <sup>3</sup>Te ní xáha<sup>n</sup> tẽ Pèlú xii-dé:

—Ananiás, ¿ná cuèndá duca<sup>n</sup> nĩ quide-n nĩ dáñá-n nĩ quíhu sácuíhná iní-n? Te ní dácúandèhnde-n núú Espíritú Yã Ndiöxí, te ní taxúha-n sácú díhú<sup>n</sup> nĩ níhí-n cuèndá ñuhu-n. <sup>4</sup>¿Te ñuhu-á<sup>n</sup> cuèndá sá ñúhú mèe-n, àdi díhú<sup>n</sup>-á<sup>n</sup> cuèndá sá díhú<sup>n</sup> méé-n cùu-xi, te cuu-ni cada-n nàcuáa càchí iní-n càha<sup>n</sup>-n ñá? ¿Ná cuèndá duca<sup>n</sup> nĩ quide-n? ¿Ná ní quide-xi iní-n núu ní dácúandèhnde-n núú Yã Ndiöxí? Chi ñá díú-ní mèe-ni ñáyiú ni dándahú-n —càchí té Pèlú xáha<sup>n</sup>-dě xii-dé.

<sup>5</sup>Te òré ní ndihi tnúhu ní xáha<sup>n</sup> tẽ Pèlú, te uu<sup>n</sup>ni ní nduá-dé te ní xíhí-ni-dé. Te nchaa ñáyiú ní níhí tnúhu sá nĩ xíhí-dé, te ní yùhú víhí-yu. <sup>6</sup>Te ní quixi ií<sup>n</sup> úú cue téé cuechi, te ní ndanehe ñaha-güedě ní sacá<sup>n</sup> ñáhá-güedě núú yuu, te ní ducu<sup>n</sup> nuu ñaha-güedě yuu-á<sup>n</sup>, te ní xido ñaha-güedě néhé ñaha-güedé cuáhá<sup>n</sup> chindúxi ñaha-güedě xii-dé.

<sup>7</sup>Te ní cuu úú uní òré, te ní quexìo ñadìhí téé ní xíhí-á<sup>n</sup>, te vátá quíní-gá-a<sup>n</sup> sá nĩ xíhí yíi-a<sup>n</sup>. <sup>8</sup>Te ní xáha<sup>n</sup> tẽ Pèlú xii-a<sup>n</sup>:

—Cuíní-í cachí tnúhu ndáá-n. ¿Ndèdau ní dícó-ndó ñuhu, ní dícó-ndó nàcuáa ní cachí yíi-n á<sup>n</sup>? —càchí té Pèlú xáha<sup>n</sup>-dě xii-a<sup>n</sup>.

Te ní xáha<sup>n</sup>-a<sup>n</sup>:

—Ndáá sá díú-ní dùca<sup>n</sup> —cachí-a<sup>n</sup> xáha<sup>n</sup>-a<sup>n</sup>.

<sup>9</sup>Te ní xáha<sup>n</sup> tẽ Pèlú:

—¿Ná cuèndá duca<sup>n</sup> nĩ chitnàha tnúhu-ndo dùca<sup>n</sup> ní quide-ndo nĩ cuíní-ndó dándahú-ndó Espíritú Yã Ndiöxí? Quíní-n, chi sa cuándixi cue téé ní sáhá<sup>n</sup> ní chindúxi yíi-n, te yòhó tnáhá-n càndeca ñaha tucu-güedé xii-n quíhí<sup>n</sup> vitna —càchí-dé xáha<sup>n</sup>-dě xii-a<sup>n</sup>.

<sup>10</sup>Te òré-á<sup>n</sup> nĩ nduá-a<sup>n</sup> núú tẽ Pèlú, te ní xíhí-ni-a<sup>n</sup>. Te cuándihu cue téé cuechi-á<sup>n</sup> xití vehe, te ní xiní-güedé sá sà ní xíhí-a<sup>n</sup>, núu ní xido ñaha tucu-güedé cuáhá<sup>n</sup> chindúxi-güedé-a<sup>n</sup> dñi yíi-a<sup>n</sup>. <sup>11</sup>Te ní yùhú víhí ñáyiú ní sándáá iní tnúhu Yá Ndiöxí, ndihi dava-gá ñáyiú ní níhí tnúhu nàcuáa ní cuu.

**Ní quide-güedé titní núú sǎ vǎ yǒo tnàhí ndàcu cada te ío ní cuñúhu ñáyiú**

**12**Te cue téé ní táúchíú<sup>n</sup> Jèsús dacuàha ñaha xií-yu tnúhu-gá titní víhí sǎ vǎ yǒo tnàhí ndàcu cada ní quide-güedé, te ní cuñúhu vǐhí-yu. Te nchaa ñáyiú ní sándáá iní-xi tnúhu Jèsús ní xóo tacá-yu corrèdór néhé òu ndíi Salòmón. **13**Te nchaa ñáyiú ñá túú dàcuaha tnúhu-gá ñá ní cùyíí-yu chitnahá-yu ñáyiú ní sándáá iní-xi tnúhu-gá, dico nchaá-yu ní cáhá<sup>n</sup> váha-yu cuèndá ñáyiú ní sándáá iní-xi tnúhu-gá. **14**Te vǎi téé, vǎi ñadihí ní sándáá iní-yu tnúhu-gá. **15**Te cuèndá sá ñí níhí-yu tnúhu sá quidé tǎtna cue téé ní xica cuu ndíhi Jèsús, núú xǎ<sup>n</sup> ní queñuhú-yu nchaa ñáyiú cùhú ichi, te davá-yu ní quide túha-yu camá te davá-yu ní quide túha-yu yuu, núú núú ncháa xǎ<sup>n</sup> tá sàcá<sup>n</sup>-yu cue ñáyiú cùhú-á<sup>n</sup> cuǎhá<sup>n</sup>, te xǎ<sup>n</sup> cáǎ-yu ndètú-yu, chí ní sani iní-yu sá òré yáha té Pèlú te cuèdicó cuándáhú-dě yáha ndodo ñaha-xi xií-yu te ndúha-yu. **16**Te ní quixi ñáyiú ñúú yatni Jerusàlén ndécǎ-yu ñáyiú cùhú, ndíhi ñáyiú yìhi ñaha espíritú cùndíhi yucu ñáváha ní quixi, te nchaá-yu ní ndúha.

### **Ío ní quide úhú-güedé té Pèlú ndíhi té Juàá**

**17-18**Te dútú cùnù-gá ndíhi cue téé cùu saducéú cue téé cùndíhi-dé ní cudéé<sup>n</sup>-güedě sá ïo chítú-yu dàcuaha tnúhu Jèsús, núú xǎ<sup>n</sup> ní tñi-güedé cue téé ní táúchíú<sup>n</sup> Jèsús dacuàha ñaha xií-yu tnúhu-gá ní chíhi ñaha-güedě vecaá. **19**Te xití niú-á<sup>n</sup> ñí quexìo ïí<sup>n</sup> espíritú xínú cuèchi núú Yǎ Ndiòxí ní nacaá<sup>n</sup>-xi yèhe vecaá ní quee-güedé, te ní xáha<sup>n</sup>-xi xii-güedé:

**20**—Quíhí<sup>n</sup>-ndó venúhu càhnu sá ïo cùnùu te cùñaha-ndo xii ñáyiú nàcuáa cadá-yu naníhí tǎhú-yu —càchí espíritú-á<sup>n</sup> xǎha<sup>n</sup>-xi xii-güedé.

**21**Te sá dúcá<sup>n</sup> ñí xáha<sup>n</sup>-xi nùu sátá ñí túndaá, te ní sáhá<sup>n</sup>-güedé venúhu càhnu sá ïo cùnùu sá cúú-xí ñáyiú isràél ní dácuáhá ñaha-güedé xií-yu.

Te dútú cùnù-gá ndíhi cue téé cùndíhi-dé ní nadatàcá tnáhá-güedě ndíhi nchaa cue téé cùu sacuéhé nùú ñáyiú isràél ndíhi cue téé cùchiu<sup>n</sup>, te ní tendaha-güedě sandàdú cuáhá<sup>n</sup> queñuhu-güedé cue téé yìhi vecaá ní cùu. **22**Te ní quexìo-güedé yèhe vecaá, te ní xiní-güedé sá ñí ïí<sup>n</sup>-gá cue téé dàcuaha ñaha xii ñáyiú tnúhu Jèsús ñá túú-gǎ-güedé yíhí. Te cuánuhú-güedé **23**ní xítnùhu-güedé cue téé cùchiu<sup>n</sup>, te xǎha<sup>n</sup>-güedé:

—Ní sáhá<sup>n</sup>-ndí ní sándéhé-ndí vecaá, te ndèé chóó-ni, te xíndecu-ni sandàdú cue téé xíndeé yèhe vecaá. Te ní nacaá<sup>n</sup>-ndí vecaá, te vá yǒo ïí<sup>n</sup>-gá yíhí —càchí-güedé xǎha<sup>n</sup>-güedě.

**24**Te sá dúcá<sup>n</sup> ñí xáha<sup>n</sup>-güedě, te cuáhá<sup>n</sup> iní cue dútú cùnù ndíhi téé tàxi tnuní cue téé xíndeé venúhu càhnu sá ïo cùnùu, te ní xítnàha-güedé:

—¿Nása cada-xi vitna duha càa ní cuu ní xinu cue téé yìhi vecaá-i?  
—càchí-güedé xítnàha-güedé.

25Te ní quexìo ìí<sup>n</sup> téé ní xáha<sup>n</sup>-dě:

—Cundedóho-ndo na càchí tnúhu-í ìí<sup>n</sup> tnúhu. Cue téé ní chihi-ndo vècaá ndécú-güedě veñúhu càhnu sá ìo cùnunu dacuaha-güedé ñáyiú —càchí-dé xáha<sup>n</sup>-dě.

26Te cue téé ndèé veñúhu ndìhi téé tàxi tnuní ñáhá xii-güedé cuánguaca ñaha-güedě, te ñá túú ní quide úhú ñáhá-güedě, chi ní yùhú-güedé cuáha yúú ñáhá ñáyiú dii ñùú-xi-á<sup>n</sup>. 27Te ní ndexìo ndìhi ñaha-güedé núú cuè téé cùu sacuéhé ndìhi núú cuè téé cùchiu<sup>n</sup>. Te dútú cùnùu-gá ní ngüíta-dé ténàá ñáhá-dě xii-güedé, te xáha<sup>n</sup>-dě:

28—Te náa ñá díú ñí cachí-ndí sá vǎ dácuaaha-gá-ndó ñáyiú tnúhu Jèsús te dàcuaha-ni-ndó-yu, te vitna nchaa ñáyiú ñuú Jerusàlén ní níhí-yu tnúhu nàcuáa càhá<sup>n</sup>-ndó. ¿Te ná cuendá duca<sup>n</sup> quide-ndo, te càchí-ndó sǎ nchǔhú ndècuéchi-ndí ní sahani-ndí Jèsús-i? —càchí dútú cùnùu-gá xáha<sup>n</sup>-dě xii-güedé.

29Te té Pèlú ndìhi dava-gá cue téé ní táuchíú<sup>n</sup> Jèsús dacuàha ñaha xií-yu ní xáha<sup>n</sup>-güedě xii cue téé cùchiu<sup>n</sup>:

—Nchúhú, Yá Ndiöxí cùnùu-gá sàndáá iní-ndí tnúhu càhá<sup>n</sup>-gá dácúxí tnúhu càhá<sup>n</sup> ñáyiú. 30Te nchòhó ní sata caa-ndo Jèsús núú cùrúxí te núú cùrúxí-á<sup>n</sup> ñí xihí-gá, dico ní dándótó ñàha Yá Ndiöxí xii-gá. Te Yá Ndiöxí ní sàndáá iní cue ñaní tnáhá-ndí ní xindecu ndéé sanaha. 31Te Yá Ndiöxí ní xáha<sup>n</sup>-gǎ sá cùndècu Jesús xio cùha-gá cuendá taxi tnùní-gá te dacăcu nihnu-gá ñáyiú isràél núú ùhú núú ndàhú. Te duca<sup>n</sup>-ni dacăcu nihnu-gá nchaa ñáyiú na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. 32Te ní xiní-ndí nàcuáa ní quide-gá, núú xiǎ<sup>n</sup> cání-ndí cuèndú núú nchàa ñáyiú, te Espíritú Yǎ Ndiöxí chíndèe ñaha-xi xii-ndí càhá<sup>n</sup>-ndí tnúhu-gá. Te diu-ni Espíritú-gá ní sǎnaha-gǎ xii nchaa ñáyiú ní sàndáá iní-xi tnúhu-gá —càchí té Pèlú ndìhi dava-gá-güedé xáha<sup>n</sup>-güedě xii cue téé cùchiu<sup>n</sup>.

33Te sátá dúcá<sup>n</sup> ñí xáha<sup>n</sup>-güedě xii cue téé cùchiu<sup>n</sup>, te ní cudéé<sup>n</sup>-güedě, te ní ndatnúhu-güedé sá cáhní ñaha-güedé. 34Te ìí<sup>n</sup> téé cùu fariséú tnàha-dé cúú-dě chiú<sup>n</sup>, te nàni-dé Gamaliél, te cùu-dé mèstrú dácuaaha-dé ñáyiú nàcuáa ní chídó tnùní ndí Moisés, te ío yíñùhu cahá<sup>n</sup> ndìhi ñáhá-yu xii-dé. Te ní ngúnutnǐí-dé, te ní xáha<sup>n</sup>-dě sá ná quèe tnaa té Pèlú ndìhi dava-gá-güedé quehé. 35Te ní xáha<sup>n</sup>-dě xii cue téé cùchiu<sup>n</sup>:

—Nchòhó cue téé isràél, xìni ñuhu-xi sá cání vǎha iní-ndó ñasa cada-ndo ndìhi cue téé-ǎ<sup>n</sup>. 36Chi ní cunaha ñí xindecu ìí<sup>n</sup> téé ní xínani Tèudás, te ní cachí-dé sá cùnùu-dé, te ní cundìhi-dé dàtná cúmí cièndú cue téé, te ñá ní cuíní-güedé cuu ìí<sup>n</sup>nuu-güedě ndìhi cue téé cùchiu<sup>n</sup>. Te ní sahani ñaha cuè téé cùchiu<sup>n</sup>-á<sup>n</sup> xii téé Tèudás, te ní ndìhi cue téé ní xica cuu ndìhi-dé ní xíte nuu-güedé, te ñá túú-gǎ ní quide-güedé nàcuáa ní sani iní-güedé

cada-güedé. <sup>37</sup>Te sátá nì xíhí téé-á<sup>n</sup>, te ní tnahá nduu nùcódó tnùnì ñáyiú. Te dàvá-á<sup>n</sup> nì xíndecu ì<sup>n</sup> téé distritú Galileá ní xínani-dě Jùdás. Te titní-güedé ní chitnahá ñáhá-güedě xii-dé. Te tnahá-dé ní sahnì ñaha tucu cue téé cùchiu<sup>n</sup>, te nchaá cue téé ní xica cuu ndìhi-dé ní xité nuu-güedé. <sup>38</sup>Te na càchí tnúhu-í sá dáñá-ndó cuè téé-á<sup>n</sup>, te ni ñà túú nǎgá tnúhu cúñaha-ndo xii-güedé, chi núu chiu<sup>n</sup> mee-güedé quídé-güedě te cuíta-güedé, <sup>39</sup>dico núu chiu<sup>n</sup> Yá Ndiöxí quídé-güedě, te vá ndínìhnu chiu<sup>n</sup> quide-güedé. Te núu quide-güedé chiu<sup>n</sup> Yá Ndiöxí, te vá nàá-ndó ndìhi-güedé, chi Yá Ndiöxí nàá ndìhi-ndo sǎ dúcá<sup>n</sup> xiquide-ndo —càchí té Gamàliél xǎha<sup>n</sup>-dě xii cue téé cùchiu<sup>n</sup>.

<sup>40</sup>Te nchaá-güedé ní cáhá<sup>n</sup> sá tnúhu ndáá càhá<sup>n</sup>-dé. Te dàtnùnì ní nacana tucu-güedé té Pèlú ndìhi dava-gá-güedé te ní caniha-güedě, te ní cáhá<sup>n</sup> níhi-güedé, te xǎha<sup>n</sup>-güedě sá vǎ càhá<sup>n</sup>-gá-güedé tnúhu Jèsús, te dàtnùnì ní dáñá ñaha-güedé cuánuhú-güedé. <sup>41</sup>Te ío ní cudíí iní-güedé, chi mee Yá Ndiöxí ní cachí-gá sá dúcá<sup>n</sup> ndòho-güedé dacuàha-güedé ñáyiú tnúhu Jèsús. <sup>42</sup>Te ì<sup>n</sup> nduu ì<sup>n</sup> nduu ní dácuahá-güedě ñáyiú xití veñúhu càhnu sá ío cùnunu ndìhi nchaá vehé-yu. Te ní xǎha<sup>n</sup>-güedě xií-yu sá Jèsús cúú-gǎ Crìstú Yaá ní quixi ñuyíú-a.

#### Ní ndúcú-güedě úsá cue téé cundecu dacǎhñu sá cáxí ñáyiú

**6** <sup>1</sup>Te diu-ni dàvá-á<sup>n</sup> nì sándáá iní vài ñáyiú tnúhu Jèsús. Te cue ñáyiú griégú ní cáhá<sup>n</sup> cuèhé-yu cuèndá ñáyiú isràél, sá ñáyiú òhí ñáyiú quèè ñáyiú càhá<sup>n</sup> tnúhu griégú ñà túú tnahá sá cáxí-yu, chi ñà túú sǎñaha ì<sup>n</sup>nuu-güedé. <sup>2</sup>Te cue téé úxúú ní táúchíú<sup>n</sup> Jèsús dacuàha ñaha xií-yu tnúhu-gá, cue téé-ǎ<sup>n</sup> nì cana-güedé nchaá ñáyiú sándáá iní tnúhu Jèsús. Te ní xǎha<sup>n</sup>-güedě xií-yu:

—Nchúhú chi vá cúú dàcǎhñu-ndí sá cáxí-yu, chi mee-ni tnúhu Yá Ndiöxí càhá<sup>n</sup>-ndí. <sup>3</sup>Te nchòhó cue téé ndècu ndìhi-ndí ichi Xítóhó Jesucristú cáhá<sup>n</sup> ndìhi-ndo úsá cue téé xíndecu iha, cue téé càhá<sup>n</sup> ndìhi ñáhá-yu mee-ni tnúhu yíñùhu, cue téé ndècu ndìhi Espíritú Yá Ndiöxí, mee-ni cuè téé cùtnunì váha iní-xi. Te cue téé-á<sup>n</sup> cuǎha-ndí-güedé chiu<sup>n</sup> cada-güedé dacǎhñu-güedé sá cáxí-yu. <sup>4</sup>Te nchúhú mee-ni Yá Ndiöxí cáhá<sup>n</sup> ndìhi-ndí, te mee-ni tnúhu-gá dacuàha-ndí-yu —càchí-güedé xǎha<sup>n</sup>-güedě xií-yu.

<sup>5</sup>Te nchaá-yu ní tnií-yu tnúhu ní cáhá<sup>n</sup>-güedé, núu ní ndúcú-yu cue téé cada chiu<sup>n</sup>-á<sup>n</sup>. Te ì<sup>n</sup>-dé nání-dě Těvá, te ío váha sándáá iní-dé Yá Ndiöxí, te ndècu ndìhi-dé Espíritú-gá. Te duha ní xínani dàva-gá-güedé: té Lìpé, té Pröcoró, té Nicànor, té Tímón, té Pàrmenás, té Lǎxí téé ñuú Antiòquiá téé ní sándáá iní-xi sá dácuahá ñáyiú isràél te vitna ní sándáá iní-dé tnúhu Jèsús. <sup>6</sup>Te úsá cue téé-á<sup>n</sup> nì sáhá<sup>n</sup>-güedé núu cuè téé úxúú ní táúchíú<sup>n</sup> Jèsús

dacuàha ñaha xií-yu tnúhu-gá, te cue tée úxúú-á<sup>n</sup> ñí cáhá<sup>n</sup> ndihí-güedé Yă Ndiöxí, te ní sacá<sup>n</sup> ndodo-güedé ndaha-güedé díquí cuè tée úsá-á<sup>n</sup>.

<sup>7</sup>Te ñáyiú ní sándáá iní tnúhu Jèsús cuáhá<sup>n</sup>-yu titní xichi càhá<sup>n</sup>-yu tnúhu-gá. Te vài-gá ñáyiú ta sándáá iní-yu tnúhu-gá cuáhá<sup>n</sup>, te ní xíndecú-yu ndihí dava-gá ñáyiú dăcuaha tnúhu-gá ñuú Jerusàlén. Te titní dútú ñí sándáá iní-güedé tnúhu-gá.

### Ní tñii-güedé té Těvá

<sup>8</sup>Te té Těvá ní quide-dé titní núú să vă yõ tñàhí ndàcu cada, te ní cuñúhu vîhí-yu sá dúcá<sup>n</sup> ñí quide-dé, te duca<sup>n</sup> ñí quide-dé chi ndècu ndihí-dé Yă Ndiöxí chíndèe ñaha-gá. <sup>9</sup>Te ní xíndecu cue tée ní xóo cunu cuechi núú ì<sup>n</sup> tée tàxi tnuní, te tée tàxi tnuní-á<sup>n</sup> ñă ní xõ daña tñàhí-dé quee-güedé núú chíú<sup>n</sup>-dě, te ní xinu-ná-güedé. Te sátá xǎ<sup>n</sup>, te ní dácáá-güedě veñúhu-güedé, te veñúhu-á<sup>n</sup> sàhá<sup>n</sup> ñáyiú ñuú Cìrené, ñáyiú ñuú Alejàndriá, ñáyiú ñuú Cìliciá, ndihí ñáyiú distritú Àsiá. Te nchaa ñáyiú-á<sup>n</sup> ñí nàá ndihí-yu té Těvá. <sup>10</sup>Te ñá ní ñhí-yu tnúhu cáhá<sup>n</sup>-yu, chi ío váha ní sáá díquí-dě năcuáa ní xáha<sup>n</sup>-dě xií-yu, chi Espíritú Yă Ndiöxí ní chindee ñàha-xi xii-dé. <sup>11</sup>Te ní cháhu-yu cue tée ní dăcuándèhnde tnúhu ní cáhá<sup>n</sup> té Těvá núú-yu. Te ní xáha<sup>n</sup>-güedě sá càhá<sup>n</sup> cuèhé-dé cuendá ndíi Moisés ndihí cuendá Yă Ndiöxí. <sup>12</sup>Te cuendá sá dúcá<sup>n</sup> ñí dăcuándèhnde-güedé núú ní sándáá iní-yu, te ní cudéě<sup>n</sup>-yu núú tě Těvá. Te ní cudéé<sup>n</sup> cue tée cùu sacuéhé, te tñàhá cue tée dăcuaha ñaha xií-yu nchaa tnúhu ní chídó tñuní ndíi Moisés ní cudéé<sup>n</sup>-güedě. Te ní sáhá<sup>n</sup>-güedé ní tñii-güedé té Těvá ndécá ñàha-güedé cuáhá<sup>n</sup> núú quídé cuè tée cùchiu<sup>n</sup> jundá, ndihí cue tée cùu sacuéhé. <sup>13</sup>Te ndécá-yu cue tée dăcuandehnde cuáhá<sup>n</sup> núú quídé-güedě jundá, te ní quesaha-ni tùcu-güedé càhá<sup>n</sup> cuèhé-güedé, te xăha<sup>n</sup>-güedě:

—Tée-a mee-ni càhá<sup>n</sup> cuèhé-dé cuendá veñúhu sá ïo cùnuu, veñúhu ní cuu íí, te càhá<sup>n</sup> cuèhé-dé cuendá nchaa sá ñí chídó tñuní ndíi Moisés. <sup>14</sup>Te ní tecú dóho-ndí càchí-dé sá Jèsús tée ñuú Nazàrét dangòyo-dé veñúhu càhnu sá ïo cùnuu te vá dáñá-gă-dé cada-ndí năcuáa ní cachí ndíi Moisés cada-ndí —càchí-güedé xăha<sup>n</sup>-güedě.

<sup>15</sup>Te nchaa cue tée ndècu jundá ní ndacoto váha-güedé núú tě Těvá. Te ní dáyèhé-xi núú-dě dàtná quídé-xí núú espíritú xínú cuèchi núú Yă Ndiöxí.

### Té Těvá xăha<sup>n</sup>-dě sá ñà túú cuèchi-dé

**7** <sup>1</sup>Te ní xáha<sup>n</sup> dútú cúnùu-gá xii-dé:

—¿Ndáá tnúhu càhá<sup>n</sup>-güedé cuendá-n-ă<sup>n</sup>? —càchí-dé xăha<sup>n</sup>-dě.

<sup>2</sup>Te té Těvá ní xáha<sup>n</sup>-dě xii-güedé:



—Nchòhó cue ñaní tnáhà-í ndihi nchòhó cue tée cùu sacuéhé, cundedóho-ndo ìí<sup>n</sup> tnúhu na càhá<sup>n</sup>-í-a. Yá Ndiöxí ío cùnuu-gá, te ní cáhá<sup>n</sup> ndihi-gá ndíi Àbrahám nàció<sup>n</sup> Mesopòtamiá cútnàhá vátá quíhí<sup>n</sup>-gá ndíi cundecu ndíi ñuú Hàrán. <sup>3</sup>Te ní xáha<sup>n</sup>-gã xii ndíi: “Daña-n nchàa ñaní tnáhà-n, te daña-n ñuhu-n, te quíhí<sup>n</sup>-n ìí<sup>n</sup> xichi núú dánèhé ñáhà-í cundecu-n”, duha ní xáha<sup>n</sup> Yã Ndiöxí xii ndíi Àbrahám. <sup>4</sup>Te sátá dúcá<sup>n</sup> ñí xáha<sup>n</sup> Yã Ndiöxí xii ndíi Àbrahám, te ní ndee ndíi ñuú Cáldeá, te cuáhá<sup>n</sup> ndíi cundecu ndíi ñuú Hàrán. Te sátá ñí xíhí tătá ndíi, te ní xáha<sup>n</sup> Yã Ndiöxí quixi ndíi cundecu ndíi núú ndécú-ó vîtna. <sup>5</sup>Te Yá Ndiöxí ñã túú ní sãñaha-gã ni lùha ñuhu cuu cuendá ndíi núú ñí xíndecu ndíi. Te ní xáha<sup>n</sup> ndää Yã Ndiöxí xii ndíi sá cuãñaha-gã ñuhu cuu cuendá ndíi, te na cùú ndíi, te ndóo ndihi nchaa ñaní tnáhà ndíi cacu túú ndéé cuèé-gá. Te duca<sup>n</sup> ñí xáha<sup>n</sup>-gã cuèi vátá cùndècu-gá ni ìí<sup>n</sup> déhe ndíi. <sup>6</sup>Te ní xáha<sup>n</sup> tùcu Yá Ndiöxí xii ndíi Àbrahám sá díú-ní ñaní tnáhà ndíi quíhí<sup>n</sup>-yu núú xíca cùndecú-yu cúmí cièndú cuíá, te vá dáñã-yu queé-yu núú chíú<sup>n</sup>-yu, te ío dandòho ñaha-güedé núú cùndècu-yu. Duha ní xáha<sup>n</sup> Yã Ndiöxí xii ndíi, te ndáá duca<sup>n</sup> ñí cuu. <sup>7</sup>Te ní xáha<sup>n</sup> tùcu Yá Ndiöxí xii ndíi Àbrahám: “Yúhú dandòho-í nchaa ñáyiu na dàndoho ñaha xii cue ñaní tnáhà-n. Te dàvá-á<sup>n</sup> te ndee cue ñaní tnáhà-n nùú cùndècu-yu, te quixí-yu chiñuhu ñàhá-yu xii-í iha”, duha ní xáha<sup>n</sup> Yã Ndiöxí xii ndíi Àbrahám, te ndáá duca<sup>n</sup> ñí cuu. <sup>8</sup>Te Yá Ndiöxí ní quide ndáá-gá ndihi ndíi Àbrahám, te ní xáha<sup>n</sup>-gã xii ndíi sá cuãha-güedé sèñá ñíi nchaa landú tée cuendá cunàhá-yu nàcuáa ndùu sá ñí quide ndáá-gá ndihi ndíi Àbrahám. Núu xíã<sup>n</sup> núú ùná nduu sá ñí cacu té Isàác déhe ndíi Àbrahám, te ní sáha ndíi sèñá ñíi-dé. Te ñiu-ni duca<sup>n</sup> ñí quide tucu té Isàác déhe-dé té Jàcób, te ñiu-ni duca<sup>n</sup> ñí quide té Jàcób, chi úxúú déhe-dé ní xíndecu, te nchaa-güedé duca<sup>n</sup> ñí quide-dé. Te ndi ùxúú cue tée-á<sup>n</sup> ñí cuu-güedé ñaní tnáhà-ó.

<sup>9</sup>Te ìí<sup>n</sup> déhe té Jàcób ní xínani-dě Chèé. Te ñá ní cùu váha iní cue ñaní-dé núú-dě, núu ní díco ñàha-güedé ní quehe<sup>n</sup> ñaha cuè tée cuáhá<sup>n</sup> nàció<sup>n</sup> Ègiptú, te Yá Ndiöxí ñá ní dàña ñaha-gá xii-dé cuíta nihnu-dé. <sup>10</sup>Te ní chindee ñàha-gá xii-dé ní cácu-dé cútnàhá ní ndoho vîhi-dé. Te tée yìndaha Egiptú ío ní cudíi iní-dé té Chèé, te ní cutnùní iní-dé sá ío váha túha té Chèé, te duca<sup>n</sup> ñí cutnùní iní-dé, chi Yá Ndiöxí ní chindee ñàha-gá xii té Chèé. Te ní xáha<sup>n</sup> tée yìndaha Egiptú xii té Chèé sá díú tẽ Chèé coo-dé gobièrnú Ègiptú, te taxi tnùní-dé nchaa ñáyiu xínu cuechi núú tée yìndaha Egiptú-á<sup>n</sup>.

<sup>11</sup>Te ní quíhu tnamá nihíi nàció<sup>n</sup> Ègiptú ndihi nàció<sup>n</sup> Cànáá, te ío ní ndohó-yu. Te nchaa ñaní tnáhà-ó ñí xíndecu ndéé sanaha ñã ní xõ níhí-gã-yu sá cáxí-yu. <sup>12</sup>Te ní níhí tẽ Jàcób tnúhu sá ìo tríú Ègiptú, núu ní tendaha-dě cue déhe-dé ní sáhá<sup>n</sup>-güedé ní sânguaa<sup>n</sup>-güedé tríú-á<sup>n</sup>, te

dàvá-á<sup>n</sup> nǐ sáhá<sup>n</sup> cue ñaní tnáhá-ó xito díhna nuu nació<sup>n</sup> Ègiptú. **13**Te xito cùu uú cuáhá<sup>n</sup>-güedé, te ní xáha<sup>n</sup> tǎ Chèé sá ñaní-dé cúu-güedě. Te tée yìndaha Egiptú ní cutnùnǐ iní-dé sá díú-ní ñaní té Chèé cúu-güedě. **14-15**Te ní cana té Chèé tǎtá-dě té Jàcób ndihi nchaa ñaní tnáhá-dě. Te cùu-xi datná únídico sáhú<sup>n</sup>-yu ndèca té Jàcób cuáhá<sup>n</sup> nació<sup>n</sup> Ègiptú núu ndécú tǎ Chèé, te xía<sup>n</sup> nǐ quexió-yu ní ngóo-yu. Te yàcá<sup>n</sup> ní xíhí té Jàcób ndihi nchaa déhe-dé cue ñaní tnáhá-ó. **16**Te sátá nǐ cuu titní cuía, te ní natava-güedé yiqui ndíi Jàcób ndihi nchaa déhe ndíi nchido-güedé cuáhá<sup>n</sup> ñuú Sìquém. Te ndíi Àbrahám sa ní cuu titní-gá cuía sǎ nǐ nacuaa<sup>n</sup> ndíi ñuhu núu cuè déhe ndíi Hámór. Te xía<sup>n</sup> nchíi yaú ní nachindúxi-güedé yiqui-á<sup>n</sup>.

**17**Te cútnàhá vátá nátava-gá-güedé yiqui cue ndíi, te sa ta tnàhá yatni cada Yá Ndiöxí nàcuáa ní xáha<sup>n</sup>-gǎ xii ndíi Àbrahám cada-gá sá cúu-xí ñǎyiu isràél ndécú Ègiptú, te ta cǎyá víhǐ-yu cuáhá<sup>n</sup>. **18**Te dàvá-á<sup>n</sup> chi ingá tée yìndaha nació<sup>n</sup> Ègiptú, te ñá túú-gǎ ní xiní-dé nása ní xóo cada ndíi Chèé. **19**Te tée yìndaha Egiptú ñá ní quide ndáá-dé, chi ío ní dándóhó-dě ñaní tnáhá-ó nǐ xíndecu dàvá-á<sup>n</sup>. Te ní táúchíú<sup>n</sup>-dě sá xócuñí-yu dàndóo-yu déhe yiqui<sup>n</sup> cuèndá ndihi-güexi cuú. **20**Te dàvá-á<sup>n</sup> nǐ cacu té Moisés, te ío ní cudíí iní ñáhá Yǎ Ndiöxí xii-dé. Te ní xíndecu ndihi ñaha nǎná-dě ndihi tǎtá-dě úní-ni yóó. **21**Te ndèca ñahá-yu cuáhá<sup>n</sup> ingá xichi, te yàcá<sup>n</sup> ní dándóo ñahá-yu xii-dé, te ní naníhí ñahá déhe yoco tée yìndaha Egiptú, te ní xito-xi-dé dàtná xító-xí ì<sup>n</sup> déhe mee-xi nǐ xito-xi-dé ndéé ní sahnú-dé. **22**Te ní cutúha-dé nchaa sá xiní cue tée ègiptú, te ío váha ní sáá díquí-dě tnúhu cáhá<sup>n</sup>-dé ndihi nchaa sá cádá-dě.

**23**Te cútnàhá ndécú-dě údico cuía-dě, te ní cachí-dé sá quíhí<sup>n</sup>-dé cáhá<sup>n</sup> ndihi-dé cue ñaní tnáhá-dě ñáyiu isràél. **24**Te ní xiní-dé ní caniha ì<sup>n</sup> tée ègiptú xii ì<sup>n</sup> tée isràél, te ñá ní cùndee iní-dé cundehe-dě nǔu ní sáhá<sup>n</sup>-dé ní chindee-dě tée isràél, te ní sahní-dé tée ègiptú, **25**chi ní cachí Yǎ Ndiöxí sá díú-dě dacǎcu-dé ñaní tnáhá-dě ñáyiu isràél núu cuè tée ègiptú. Te ní sani iní-dé sá cutnùnǐ iní-yu nàcuáa ní xáha<sup>n</sup> Yǎ Ndiöxí xii-dé, dico ñá túú ní cùtnuní iní-yu. **26**Te nduu tněé ní xiní-dé nàá úú cue tée isràél, te ñá túú ní tnàhá iní-dé nàá-güedé nǔu ní xáha<sup>n</sup>-dě xii-güedé: “¿Ná cuèndá duca<sup>n</sup> xǐnàá-ndó? ¿Náa ñá díú ndìmee-ndo núu duca<sup>n</sup> xǐnàá-ndó?” Duha ní xáha<sup>n</sup> tǎ Moisés xii-güedé. **27**Te tée ndècuéchi ní sáhá<sup>n</sup>-dé ní chindaha ñihnu-dé té Moisés ì<sup>n</sup> xio, te ní xáha<sup>n</sup>-dě: “¿Ná cúu yòhó nǔu véxi-n tàxi tñuní ñáhá-n? **28**Te tnàhá-ni tucu yúhú cahni-n dàtná ní sahní-n tée ègiptú icu càha<sup>n</sup>-n á”, duha ní xáha<sup>n</sup>-dě xii té Moisés. **29**Te sá dúcá<sup>n</sup> nǐ cáhá<sup>n</sup> tée isràél nǔu ní yùhú té Moisés ní xinú-dé cuáhá<sup>n</sup>-dé ní sáá-dé nació<sup>n</sup> Mèdián. Yàcá<sup>n</sup> ní ngóo-dé, te yàcá<sup>n</sup> ní tnándaha-dé, te ní cacu úú déhe tée-dé.

**30**Te sátá nǐ xinú údico cuía, te ní sáhá<sup>n</sup> té Moisés ì<sup>n</sup> xio yucu Sinàí. Te yàcá<sup>n</sup> ní xiní-dé ì<sup>n</sup> tnutàú nchìcú<sup>n</sup> ñuhú, te xití itá ñuhú-á<sup>n</sup> nǐ xiní-dé yíhí

ii<sup>n</sup> espíritú xínú cuèchi núú Yă Ndiöxí. **31**Te òré ní xiní-dé sá yíhí-xí xítí itá ñuhú-á<sup>n</sup>, te ní cuñúhu vîhi-dé sá nî xiní-dé espíritú-á<sup>n</sup> xítí itá ñuhú-á<sup>n</sup>, te ní sândehe-gá-dé, te ní xíndéhé vâha-dé. Te ní tecú dóho-dé ní cáhá<sup>n</sup> Yă Ndiöxí, te xáha<sup>n</sup>-gă xii-dé: **32**“Yúhú cúu-í Ndiöxí ní cáhá<sup>n</sup> ndîhi cue ñanî tnáhá-n ndéé sanaha, ndîi Àbrahám ndîhi ndîi Isàác ndîhi ndîi Jàcób, ndîhi dava-gá cue ñanî tnáhá-n. Nchaa cue ndîi-á<sup>n</sup> nî xóo cáhá<sup>n</sup> ndîhi-í.” Duha ní xáha<sup>n</sup>-gă xii té Moisés. Te ní quidi ñaha-xi xii té Moisés sá nî yùhú-dé, te ñá ní cùyii-gá-dé cundehe-dě tnutàú nchìcú<sup>n</sup> ñuhú-á<sup>n</sup>. **33**Te Yă Ndiöxí ní xáha<sup>n</sup>-gă xii-dé: “Queñuhu chàú-n, chi núú ñúhú nî cuu íí nútnî-n. **34**Te yúhú ndéhè-í sá ïo ndòho nchaa ñáyiu cùu cuendá-í, ñáyiu ndècu nació<sup>n</sup> Ègiptú. Te ní tecú dóho-í sá ïo ndàhú xícáhá<sup>n</sup>-yu, núu xíá<sup>n</sup> véxi-í càchí tnúhu-í sá nùhú-n nació<sup>n</sup> Ègiptú cuendá ndeñùhú-n-yu yàcá<sup>n</sup>.” Duha ní xáha<sup>n</sup> Yă Ndiöxí xii té Moisés.

**35**Te ñá ní sàndáá iní-yu té Moisés ndéé díhna, chi ní xáhă<sup>n</sup>-yu: “¿Ná cuendá véxi-n tàxi tñunî ñáhá-n xii-ndí?” Duha ní xáhă<sup>n</sup>-yu xii té Moisés. Te ñu-ni té Moisés ní tendaha ñàha Yă Ndiöxí ní sáhá<sup>n</sup>-dé dacăcu-dé ñáyiu isràél nació<sup>n</sup> Ègiptú cuèi ñá ní sàndáá iní ñáhă-yu xii-dé. Dico ní taxi tñunî-dé-yu, chi duca<sup>n</sup> nî xáha<sup>n</sup>-gă òré ní xiní-dé espíritú xínú cuèchi núú-gă xítí tnutàú nchìcú<sup>n</sup> ñuhú. **36**Te té Moisés ní ngüita-dé ní quide-dé sá vă yôo tnàhí ndàcu cada, te ní cuñúhu vîhí-yu sá dúcá<sup>n</sup> nî quide-dé, te duca<sup>n</sup> nî quide-dé Ègiptú ndîhi Làmár Tícuèhé. Te ní ngódó núú-dě núu-yu ní queé-yu Ègiptú cuáhá<sup>n</sup>-yu ii<sup>n</sup> ichi xítí yucu núú vă yôo tnàhí ndècu, te ní xíhi-yu údico cuía xítí yucu-á<sup>n</sup>, te xíá<sup>n</sup> nî xóo cada-dé sá vă yôo tnàhí ndàcu cada. **37**Te ñu-ni té Moisés ní xáha<sup>n</sup>-dě xii cue ñanî tnáhá-dě dàvá-á<sup>n</sup>: “Yă Ndiöxí cada-gá te coo ii<sup>n</sup> ñanî tnáhá-ndó ndéé cuèé-gá, te téé-á<sup>n</sup> cáhá<sup>n</sup>-dé tnúhu-gá núú-ndó dàtná cuinî-ndó nî cachí-gá quidé yùhú, te ío xîni ñuhu-xi cundedóho-ndo tñuhu cáhá<sup>n</sup>-dé”, duha ní xáha<sup>n</sup> tē Moisés xií-yu dàvá-á<sup>n</sup>. **38**Te ñu-ni té Moisés ní xíndecu ndîhi-dé ñáyiu isràél xítí yucu, te ní sáá-dé yucu Sinài, te xíá<sup>n</sup> nî quixi ii<sup>n</sup> espíritú xínú cuèchi núú Yă Ndiöxí ní cáhá<sup>n</sup> ndîhi ñaha-xi xii-dé, te yàcá<sup>n</sup> ní dăcuáhá ñàha-xi tnúhu-gá, te ñu-ni tnúhu-á<sup>n</sup> nî ndóo dăcuaha-o.

**39**Te cue ñanî tnáhá-ó nî xíndecu ndéé sanaha ñă ní sàndáá iní-yu té Moisés, te ñá ní ndèe iní ñáhă-yu xii-dé, chi ní cuinî-yu nuhú tucú-yu ñuú Ègiptú cundecú-yu. **40**Te òré ndécú tē Moisés yucu ní xáhă<sup>n</sup>-yu xii ñanî-dé té Àrón: “Cadúha-n ii<sup>n</sup> úú ndiöxí díhú<sup>n</sup> cuàá<sup>n</sup> codonùu núú-ó cùhu<sup>n</sup>-o ichi, chi ñá túú cùtnunî iní-ó ndèe ichi cuáhá<sup>n</sup> té Moisés, téé yòdo nuu núú-ó ndùu ní quee-o Ègiptú”, duha ní xíi-yu té Àrón. **41**Te dàvá-á<sup>n</sup> nî cadúha-güedé ii<sup>n</sup> chēhlu mee-ni díhú<sup>n</sup> cuàá<sup>n</sup>, te ní sahnî-güedé ii<sup>n</sup> úú quiti nchìto ní quide càhnu-güedé chēhlu-á<sup>n</sup>. Te ío ní cudíí iní-yu quiti-á<sup>n</sup>, chi ní cachí-yu sá díú-ní ndiöxí cúú-dí. **42**Te sá dúcá<sup>n</sup> nî quidé-yu, xíá<sup>n</sup> ní dáñá

ñàha Yá Ndiöxí xií-yu. Te ní dáñá-gă ní xóo cada càhnú-yu nchíanchii, ndìhi yóó, ndìhi nchaa chódíní. Te duha ní chídó tnùní ìí<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha nàcuáa ní xáha<sup>n</sup>-gă xii ñáyiú dává-á<sup>n</sup>:

Nchòhó ñáyiú isràél, ní cuu údico cuíá yíhí-ndó yùcu,  
te ní sahní-ndo quìti-ndo ní quide càhnu ñaha-ndo xii-í cáhá<sup>n</sup>-ndó,  
dico ñáhá chi ní sahní-ndo-güèdi ní quide càhnu-ndo sá ñí  
cadúha mee-ndo.

**43** Te ní cadúha-ndo ìí<sup>n</sup> veñúhu lǐhli,  
te ní sanutní-ndo Mòlóc sá càchí-ndó cùu ndióxí-ndó xica  
nchido-ndo xití yucu,  
te ní cadúha-ndo ìí<sup>n</sup> chódíní, te quiti-á<sup>n</sup> càchí-ndó sǎ cúú-dí ndiöxí  
Rènfán,  
te ndi ndùú sá ñí cadúha-ndo-á<sup>n</sup> ñí quide càhnu-ndo.  
Te cuèndá sá dúcá<sup>n</sup> ñí quide-ndo te yúhú queñuhu ñaha-í xii-ndo  
quíhí<sup>n</sup>-ndó cùndecu-ndo ìngá xio nàció<sup>n</sup> Babìloniá.

Duha ní xáha<sup>n</sup> Yá Ndiöxí xií-yu, te duca<sup>n</sup> ñí chídó tnùní téé ní xóo cáhá<sup>n</sup> tnúhu-gá.

**44** Te xití yucu-á<sup>n</sup> ñí dácáá-güedě ìí<sup>n</sup> veñúhu vehe dóó. Te vehe-á<sup>n</sup> ñí cuu-xi ìí<sup>n</sup> sá cútnùní iní-yu sá Yá Ndiöxí ndécú ndìhi ñaha-gá xií-yu. Te vehe-á<sup>n</sup> ñí dácáá-güedě nàcuáa ní xáha<sup>n</sup> Yá Ndiöxí xii té Moisés, chi ní dánèhé ñáhá-gă xii-dé nàcuáa dacàa-güedé. **45** Te sátá ñí xíhí nchaa cue téé-á<sup>n</sup>, te ní ndóo ndìhi nchaa déhe-güedé veñúhu-á<sup>n</sup>. Te ní xido tucu-güedé veñúhu-güedé cuáhá<sup>n</sup>-güedé, te cuáhá<sup>n</sup> ndìhi-güedé té Jòsué núú cùndécú-yu. Te sátá ñí quexió-yu, te ní dácúnü-yu ñáyiú dii ñùú-xi-á<sup>n</sup> chi mee Yá Ndiöxí ní chindee ñàha-gá xií-yu. Te sátá ñí ndìhi nchaa ñáyiú ní xica nchido veñúhu dóó-á<sup>n</sup> ñí xíhí, te ní ndóo ndìhi dava-gá-yu. Te duca<sup>n</sup>-ni ndècu-xi ní cacu té Dàvií, téé ní xíndaha ñàha xií-yu. **46** Te Yá Ndiöxí ní cudíí víhí iní-gá té Dàvií. Te ní xícá<sup>n</sup> tnúhú-dě núú-gă ñüu cuu dacàa-dé veñúhu cuu cuèndá-gá, chi ìí<sup>n</sup>-ni Yá Ndiöxí ní xóo cada càhnu té Dàvií ndìhi té Jàcób, ñaní tnáhá-ó ñí xíndecu ndéé sanaha vîhi-gá. **47** Te Yá Ndiöxí ñá ní dàña-gá dacàa té Dàvií veñúhu-gá dico déhe-dé té Salòmón, chi ní dáñá-gă ní dácáá-dě veñúhu cuu cuèndá-gá **48** cuèi ñá túú sàcùndecu-gá veñúhu dàcaa cue téé ñuyíú-a, chi nděni xía<sup>n</sup> ndécú-gă chi espíritú cúú-gă. Te duha ní chídó tnùní téé ní xóo cáhá<sup>n</sup> tnúhu Yá Ndiöxí ndéé sanaha nàcuáa ní cáhá<sup>n</sup>-gá:

**49** Yúhú táxi tnùní-í andiú ndìhi ñuyíú,  
te xía<sup>n</sup> ñüu nchòhó vá ndácú-ndó chìhi ñaha-ndo xití veñúhu dàtná  
quidě-yu sá càchí-yu cùu ndióxí-yu ní cadúha-yu.

Te ñá túú xìni ñuhu-í núú ndétàtú-í,

**50** chi yúhú ní cadúha-í nchaa sá ìó ñuyíú-a.

Duha ní cáhá<sup>n</sup> Yă Ndiöxí, te ñi-<sup>n</sup>i duca<sup>n</sup> ñi chídó tñuní tée ní xóo cáhá<sup>n</sup> tñuhu-gá —duha ndùu nchaa tñuhu ní xáha<sup>n</sup> tē Těvá xii-güedé.

**51**Te ní xáha<sup>n</sup> tùcu-dé:

—Nchòhó, ío sàá iní-ndó chi quide-ndo datná quidé ñăyiu ñá túú cùu ñăyiu isràèl chi ñá túú tédóho-ndo tñuhu càhá<sup>n</sup> Yă Ndiöxí, chi ñá cuíní-ndó quindáá iní-ndó tñuhu-gá, mee-<sup>n</sup>i cùu úhú iní-ndó Espíritú-gá dàtná ní xóo cada cue ñaní tñáhá-ndó ñi xíndecu ndéé sanaha. **52**Chi cue tée-á<sup>n</sup> ño ní xóo dandòho-güedé nchaa cue tée ní xóo cáhá<sup>n</sup> tñuhu Yă Ndiöxí ndéé sanaha. Te ní sahani-güedé nchaa cue tée ní cáhá<sup>n</sup> sá quíxí Crístú ñuyúú-a, te Yaá-á<sup>n</sup> ñá túú cuèchi-gá. Te ñi-<sup>n</sup>i duca<sup>n</sup> ñi quide-ndo Crístú cútnáhá ní quixi-gá ñuyúú-a, chi ní sáha cuèndá-ndó-gă núú cuè tée ní cuu úhú iní ñáhá xì-gá ní sahani ñaha-güedé. **53**Te ndècu ndìhi-ndo tñuhu ní chídó tñuní ndíi Moisés nàcuáa ní xáha<sup>n</sup> espíritú xínú cuèchi núú Yă Ndiöxí xii ndíi, te ní dùca<sup>n</sup> ñá túú sàndáá iní-ndó tñuhu-á<sup>n</sup> ñuú ní sahani-ndo Jèsús. Te ñi-<sup>n</sup>i tñuhu-á<sup>n</sup> ndécú ndìhi-ndo ndéé vitna —càchí té Těvá xáha<sup>n</sup>-dē xii-güedé.

### Ní sahani-güedé té Těvá

**54**Te sá dúcá<sup>n</sup> ñi xáha<sup>n</sup> tē Těvá xii-güedé, te ní cudéé<sup>n</sup> víhí-güedé núú-dě, núú ní quide rúhñú-güedé núhu-güedé sá sàtú iní-güedé. **55**Te té Těvá ndécú ndìhi-dé Espíritú Yă Ndiöxí, te ní ndacoto váha-dé andiu, te ní xiní-dé súúní dàtása<sup>n</sup>-xi núú ndécú Yă Ndiöxí, te ní xiní-dé Xítóhó Jesucrístú nútní-gá xio cùha Yă Ndiöxí. **56**Te ní xáha<sup>n</sup> tē Těvá xii-güedé:

—Chí cùndèhe andiu chi yúhú ndéhè-í Xítóhó Jesucrístú nútní-gá xio cùha Yă Ndiöxí, te ñi-<sup>n</sup>gá cúú-gă ñaní tñáhá-ndó nchàa-ndo —cachí-dé xáha<sup>n</sup>-dē.

**57**Te ní sadí-güedé dóho-güedé cuèndá sá ñă ní tñáhá iní-güedé cundedóho-güedé tñuhu càhá<sup>n</sup>-dé, te uu<sup>n</sup>i ní cuáá-güedé, te ní taxi ndaha ñaha-güedé xii-dé **58**ndécá ñaha-güedé cuáhá<sup>n</sup> ndéé ñi<sup>n</sup> xio yuhu ñuú, te yàcá<sup>n</sup> ní sáñaha-güedé yúú xii-dé. Te ndècu ñi<sup>n</sup> tée cuechi nàni-dé Sàulú, te tée-á<sup>n</sup> ñi quide cuèndá-dé dóó-güedé cuèndá ní nune ndaha-güedé ní sáñaha-güedé yúú xii té Těvá. **59**Te òré sáñaha-güedé yúú, te ní cáhá<sup>n</sup> ndìhi-dé Xítóhó Jesucrístú te xáha<sup>n</sup>-dē:

—Yòhó Xítóhó Jesucrístú, naquehe<sup>n</sup>-n ñi-í —càchí-dé xáha<sup>n</sup>-dē xii-gá.

**60**Te ní ngúíñí xítí-dē, te níhi ní cáhá<sup>n</sup>-dé, te xáha<sup>n</sup>-dē:

—Yòhó Xítóhó Jesucrístú, vá tēcuèchi-n cuè tée-a sá dúhá quide ñaha-güedé xii-í —càchí-dé xáha<sup>n</sup>-dē xii-gá.

Te xíá<sup>n</sup>-nă ní cáhá<sup>n</sup>-dé, te ní xíhí-dé.

**Té Sàulú chíhí-dě ñáyiú sàndáá iní-xi tnúhu Jèsús vecaá**

**8** <sup>1</sup>Te té Sàulú ní nduu vétú iní-dé sá ñí sahani-güedé té Těvá. <sup>2</sup>Te ñíu-ni nduu-ǎ<sup>n</sup> ñí cuu níhi cuendá nchaa ñáyiú sàndáá iní-xi tnúhu Jèsús ñuú Jerusàlén. Te ní ndihí-yu ní xité nuu cuáhá<sup>n</sup>-yu distrítú Jùdeá ndihi distrítú Sàmariá. Te cue téé ní táuchíú<sup>n</sup> Jèsús dáciuàha ñaha xií-yu tnúhu-gá ní ndóo-güedé ñuú Jerusàlén. <sup>3</sup>Te nchaa cue téé cáhá<sup>n</sup> ndihi Yá Ndiöxí ní chindúxi-güedé ndii Těvá. Te ío ní ndáhyú ñáyiú ní sàndáá iní tnúhu Jèsús sá ñí xíhí ndii. <sup>4</sup>Te té Sàulú ío dándoho-dé-yu, chi ndi vehe ndi vehe cuáhá<sup>n</sup>-dé cuátnii-dé cuèi téé cuèi ñadìhí ndécá-dě cuáhá<sup>n</sup> vecaá.

**Càhá<sup>n</sup>-yu tnúhu Yá Ndiöxí distrítú Sàmariá**

<sup>4</sup>Te nchaa ñáyiú ní xité nuu cuáhá<sup>n</sup>-yu càhá<sup>n</sup>-yu tnúhu Jèsús nchaa núú quexió-yu. <sup>5</sup>Te té Lìpé cuáhá<sup>n</sup>-dé distrítú Sàmariá càhá<sup>n</sup>-dé tnúhu Xítóhó Jesucrístú Yaá ní tendaha Yá Ndiöxí ní quixi ñuyíú-a. <sup>6</sup>Te ío vai núú sǎ vǎ yǎo tnàhí ndàcu cada ní quide-dé, te ní cuñúhu vèhí-yu, te ní xíndedóho váha-yu nchaa tnúhu ní cáhá<sup>n</sup>-dé. <sup>7</sup>Te vai ñáyiú yèhi ñaha espíritú cùndìhi yucu ñávàha ní queñuhu-dé nchaa espíritú-á<sup>n</sup> yiqui cùñú-yu, te ní cana saa-xi òré ní ndee-xi yiqui cùñú-yu cuáhá<sup>n</sup>-xi, te ní ndúha-yu. Te vai ñáyiú cùhú ñá cúú-gǎ candá nihnú-yu ndihi ñáyiú yacua ní quide tátna-dé, te ní ndúha-yu. <sup>8</sup>Te sá dúcá<sup>n</sup> ñí cáhá<sup>n</sup>-dé tnúhu Jèsús te ní quide tátna-dé-yu, xíǎ<sup>n</sup> ío ní cudíí ìní ñáyiú ñuú-á<sup>n</sup>.

<sup>9</sup>Te ñíu-ni ñuú-á<sup>n</sup> ndécú ñí<sup>n</sup> téé nàni Xímú, te téé-á<sup>n</sup> xíní-dé cada ndùu-dé, te ní cuu naha dùca<sup>n</sup> quide-dé, te ní xóo cuñúhu ñáyiú distrítú Sàmariá sá dúcá<sup>n</sup> quide-dé, te ní cachí-dé sá díú-ní-dě cúnùu. <sup>10</sup>Te nchaa ñáyiú cuèi ñáyiú cuica te cuèi ñáyiú ndàhú ío nèhé-yu sá yíñùhu núú-dě, te xítnàhá-yu:

—Téé-ǎ<sup>n</sup> ío chìndee ñaha Yá Ndiöxí xii-dé ñúu vai núú sǎ quíde-dě —càchí-yu xítnàhá-yu.

<sup>11</sup>Te ní sàndáá iní-yu nàcuáa ní xóo cada ndùu-dé, te ní xóo cuñúhu vèhí-yu, te ní cuu naha dùca<sup>n</sup>-ni dandahú ñáhá-dě xií-yu. <sup>12</sup>Te té Lìpé ní cáhá<sup>n</sup>-dé tnúhu Xítóhó Jesucrístú, te ní xáha<sup>n</sup>-dě xií-yu sá Yá Ndiöxí cuìní-gá ndíhu ndaha ñàha-gá xií-yu. Te cuèi téé cuèi ñadìhí ní sàndáá iní-yu tnúhu-gá, te ní sanduté-yu. <sup>13</sup>Te tnàhá té Xímú ní sàndáá iní-dé tnúhu-gá, te ní sandute-dé, te ní xica cuu-dé ndihi té Lìpé, te ní cuñúhu-dé chi titní núú sǎ vǎ yǎo tnàhí ndàcu cada ní quide té Lìpé, te ní cuñúhu vèhi nchaa ñáyiú.

<sup>14</sup>Te dava-gá cue téé ní táuchíú<sup>n</sup> Jèsús dáciuàha ñaha xii ñáyiú tnúhu-gá ní níhí-güedě tnúhu sá ñáyiú distrítú Sàmariá ní sàndáá iní-yu tnúhu Yá Ndiöxí. Te ní tendaha-güedě té Pèlú ndihi té Juàá cuáhá<sup>n</sup>-güedé distrítú

Sàmariá. **15**Te ní quexìo-güedé, te ní cáhá<sup>n</sup> ndìhi-güedé Yă Ndiöxí ní xicá<sup>n</sup>-güedé Espíritú-gá quixi cundecu ndihí-yu. **16**Chi ni ì<sup>n</sup>-yu vátá sàá-gá Espíritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. **17**Te òré ní sacá<sup>n</sup> ndodo-güedé ndaha-güedé díquǐ-yu, te ní quexìo Espíritú-gá ní ngúndecu ndihí-yu.

**18**Te ní xiní té Xímú nàcuáa ní quide-güedé ní quexìo Espíritú-gá ní ngúndecu ndihí-yu, te cuíní-dé cuáñaha-dě díhú<sup>n</sup> xii té Pèlú ndìhi té Juàá ní cùu. **19**Te ní xáha<sup>n</sup>-dě:

—Chindee ñàha-ndo cuendá nděda-ni càá-yu cacá<sup>n</sup> ndodo-í ndaha-í díquǐ-yu, te níhǐ-yu Espíritú Yă Ndiöxí cundecu ndihí-yu —càchí-dé xáha<sup>n</sup>-dě xii-güedé.

**20**Te té Pèlú ní xáha<sup>n</sup>-dě xii-dé:

—Yòhó cuíta nihnu-n ndìhi díhú<sup>n</sup>-n, chi cuíní-n cuàa<sup>n</sup>-n sá vǎha quide Yá Ndiöxí. **21**Yòhó vá cúu càda-n chiu<sup>n</sup> quide-ndí, chi ñá túú ndècu váha iní-n nǔú Yă Ndiöxí. **22**Te vá dúcá<sup>n</sup> cǎhá<sup>n</sup>-n, chi ío nèhé càhá<sup>n</sup>-n sǎ dúcá<sup>n</sup> càhá<sup>n</sup>-n. Te cáhá<sup>n</sup> ndàhú-n nǔú Yă Ndiöxí sá ná cádá càhnu iní-gá tnúhu ní cáhá<sup>n</sup>-n. **23**Te yúhú sa xìní-í sá ìo úhú iní-n, chi mee-ni sǎ cuèhé sá dúhá chido nuu-n quide-n —cachí té Pèlú xáha<sup>n</sup>-dě xii té Xímú.

**24**Te ní xáha<sup>n</sup> tǎ Xímú xii-güedé:

—Cáhá<sup>n</sup> ndàhú-ndó nǔú Yă Ndiöxí sá ñà túú nǎ tnahá-í sá dúcá<sup>n</sup> nǐ cáhá<sup>n</sup>-í —càchí-dé xáha<sup>n</sup>-dě.

**25**Te té Pèlú ndìhi té Juàá ní cáhá<sup>n</sup>-güedé tnúhu Yá Ndiöxí núú ñǎyiu ñuú-á<sup>n</sup>. Te ní xáha<sup>n</sup>-güedě nchaa nàcuáa ní quide Jèsús ní xiní-güedé òré ní xica cuu-gá ñuyíú-a. Te ní tni-güedé ichi cuánuhú-güedé ñuú Jerusàlén, te ní yáha-güedé títí ñuú yíndèhu distritú Sàmariá, te ní cáhá<sup>n</sup>-güedé tnúhu-gá.

### Té Lìpé ndìhi ì<sup>n</sup> tée ñuú Etiòpiá

**26**Te ì<sup>n</sup> espíritú xínú cuèchi núú Yă Ndiöxí ní quexìo-xi ñuú Jerusàlén ní xáha<sup>n</sup>-xi xii té Lìpé:

—Cada túha-n chi quée nuu-n ñuú Gǎzá, dico mee-ni xití yucu cuáhá<sup>n</sup> ichi —càchí-xi xáha<sup>n</sup>-xi xii-dé.

**27**Te ní xica-dé cuáhá<sup>n</sup>-dé, te ní natnahá-dé ì<sup>n</sup> tée nació<sup>n</sup> Etiòpiá ñúhú-dě ichi. Te cùu-dé tesorèrú xínú cuèchi-dé núú ì<sup>n</sup> ñadìhí ñaha yíndaha nació<sup>n</sup> Etiòpiá, te ñaha-á<sup>n</sup> nání-á<sup>n</sup> Cándacé. **28**Te tée etiòpiá-á<sup>n</sup> nǐ sáhá<sup>n</sup>-dé ñuú Jerusàlén ní cáhá<sup>n</sup> ndìhi-dé Yă Ndiöxí, te ñuhu-dé ichi cuánuhú-dé ñuú-dé ñúhú-dě carrétá, te dàcuaha-dé tnúhu ní chídó tnùní ndíi Chàia tée ní xóo cáhá<sup>n</sup> tnúhu Yá Ndiöxí ndéé sanaha. **29**Te ní xáha<sup>n</sup> Espíritú Yă Ndiöxí xii té Lìpé:

—Quíhí<sup>n</sup> tuha-n càrretá-ǎ<sup>n</sup> —càchí Espíritú-gá xáha<sup>n</sup>-xi xii-dé.

**30** Te té Lìpé ní sátuha-dé carrètá-á<sup>n</sup>, te ní tecú dóho-dé nàcuáa càhá<sup>n</sup> té etiòpiá-á<sup>n</sup>, té ñuhu carretá-á<sup>n</sup> dácuaaha-dé nàcuáa ní chídó tnùní ndíi Chàíá. Te ní xáha<sup>n</sup> tē Lìpé xii té etiòpiá-á<sup>n</sup>:

—¿Técú tnùní-n nchàa tnúhu dàcuaha-n-á<sup>n</sup>? —càchí té Lìpé xăha<sup>n</sup>-dē xii-dé.

**31** Te ní xáha<sup>n</sup> tē etiòpiá:

—¿Nása tecú tnùní-í te vá yõo dànehé ñáhá xii-í? Ta quène iha coo-n chi danèhé ñáhá-n —càchí-dé xăha<sup>n</sup>-dē xii té Lìpé.

Te cuásaá té Lìpé núú carrètá ní ngóo-dé. **32** Te ndèdóho-dé nàcuáa dàcuaha té etiòpiá-á<sup>n</sup> nàcuáa ní chídó tnùní ndíi Chàíá núú tùtú Yă Ndiõxí núú càchí-xi:

Dàtná quíde ìi<sup>n</sup> mbéé cada-dé òré candeca ñaha-güedě xii-dé quíhí<sup>n</sup>  
cahni ñaha-güedě chi ñá túú nă cada-dé,  
dàtná cuíní-ndó quíde mbéé òré dèté-di ñá túú ndàhí-di duca<sup>n</sup>  
càda-dé òré cahni ñaha-güedě chi ni vă càhá<sup>n</sup>-dé.

**33** Te mee-ni cùdiquí ndeé ñáhá-güedě xii-dé, te ni vă ndúcú  
tnúhu-güedé núú-dē nūu ndáá ndècuéchi-dé.

Te ío cuu nduu cuihna ìní cue ñaní tnáhá-dē, chi cahni ñaha-güedě  
xii-dé ñuyíú-a.

Duha càhá<sup>n</sup> tutú ní dácuahá tē etiòpiá ní xíndedóho té Lìpé.

**34** Te ní xáha<sup>n</sup> tùcu té Etiòpiá xii té Lìpé:

—Cundee ìní-n càchí tnúhu-n yòo cacunehe té ní cáhá<sup>n</sup> tnúhu Yă Ndiõxí ndéé sanaha, núú càhá<sup>n</sup>-dé cuendá méé-dē àdi cáhá<sup>n</sup>-dé cuendá ingá ñáyiu —càchí té etiòpiá-á<sup>n</sup> xăha<sup>n</sup>-dē xii té Lìpé.

**35** Te té Lìpé ní cani-dé cuèndú núú tē etiòpiá nàcuáa ní cáhá<sup>n</sup> ndíi Chàíá nàcuáa cada Jèsús òré quixi-gá ñuyíú-a. Te ní xáha<sup>n</sup>-dē nàcuáa ndùu tnúhu Jèsús ndíhi nàcuáa ní quíde-gá. **36** Te ñuhu-güedé ichi cuáhá<sup>n</sup>-güedé ní naníhí-güedě ìi<sup>n</sup> xichi núú ñúhú ndùte, te ní xáha<sup>n</sup> tē etiòpiá:

—Iha ñuhu ndute, ¿te vá cúú cuàndute-í iha-ă<sup>n</sup>? —càchí-dé xăha<sup>n</sup>-dē xii té Lìpé.

**37** Te xăha<sup>n</sup> tē Lìpé:

—Te núú sàndáá ndisa ìní-n Jèsús, te cuu cuandute-n —càchí-dé xăha<sup>n</sup>-dē.

Te ní xáha<sup>n</sup> tē etiòpiá:

—Sàndáá ndisa ìní-í sá Dēhe Yă Ndiõxí cúú Xítohó Jesucrístú —càchí-dé xăha<sup>n</sup>-dē.

**38** Te ní ngani-dé carrètá, te ní nuu-güedé ndi ndùú-güedé, te cuánguee-güedé xití ndute, te ní dácuañdùte ñaha té Lìpé xii-dé. **39** Te òré ní nene-güedé xití ndute, te ndèca ñaha Espíritú Yă Ndiõxí xii té Lìpé cuáhá<sup>n</sup>. Te ñá túú ní xìní té ní sandute-á<sup>n</sup> ndéé ichi cuáhá<sup>n</sup> té Lìpé. Te ío



ní cudíí ìní-dé sá nǐ natuha-dé ichi Yá Ndiöxí, te cuándaa-dé núú carrètá-dé cuánuhú-dé. <sup>40</sup>Te ní quexìo té Lìpé ñuú Àzotó, te ndì tnahá ñuú ndì tnahá ñuú cuáhá<sup>n</sup>-dé càhá<sup>n</sup>-dé tnúhu Yá Ndiöxí, te ní yáha-dé cuáhá<sup>n</sup>-dé ní quexìo-dé ndéé ñuú Cèsareá.

**Té Sàulú ní tuha-dé ichi Xítóhó Jesucrìstú**

(Hch. 22:6-16; 26:12-18)

**9** <sup>1</sup>Te té Sàulú mee-ni càhá<sup>n</sup> cuèhé-dé cuèndá ñáyiu ní sándáá iní tnúhu Jèsús, te cuìní-dé cahni ñaha-dě xií-yu. Te ní sáhá<sup>n</sup>-dé núú dǔtú cúnùu-gá, <sup>2</sup>te ní xáha<sup>n</sup>-dě sá cádǔha dútú-ǎ<sup>n</sup> ì<sup>n</sup> tutú canehe-dé quíhí<sup>n</sup> cuáha-dé cue téé xǐndeé nchito veñúhu ñuú Dàmascú, chi cuìní-dé tñi-dé nchaa ñáyiu dàcuaha tnúhu Xítóhó Jesucrìstú candeca ñaha-dě quíhí<sup>n</sup> ñuú Jerusàlén. <sup>3</sup>Te ní xica-dé cuáhá<sup>n</sup>-dé tá cùyatni-dé ñuú Dàmascú, te uu<sup>n</sup>ni ní quee ñuhú andiu, te ní dáyèhé-xi ndéé núú núnǐ-dé. <sup>4</sup>Te ní nduá-dé ndéé ñuhu, te ní tecú dóho-dé càhá<sup>n</sup> ì<sup>n</sup> sá càhá<sup>n</sup> núú nǐnu, te xáha<sup>n</sup>-xi xii-dé:

—Yòhó Sàulú, ìná cuèndá cúú ũhú iní ñáhá-n xii-í te dándoho ñaha-n?  
—càchí sá càhá<sup>n</sup>-á<sup>n</sup> xáha<sup>n</sup>-xi xii-dé.

<sup>5</sup>Te ni xáha<sup>n</sup>-dě:

—¿Ná cúú yòhó sá càhá<sup>n</sup>-á<sup>n</sup>-i? —càchí-dé xáha<sup>n</sup>-dě.

Te ní xáha<sup>n</sup> sǎ càhá<sup>n</sup> xii-dé:

—Yúhú cúu-í Jèsús téé cùu úhú iní-n. Te ío dándoho-n mee-n, chi dàtná quidé ndìcutu quide-n, chi quiti-á<sup>n</sup> nǔu na cǔxi-güedé-di pùyá te sáha-di patadá núu-xi, te quide úhú-di mee-di. Te duca<sup>n</sup> sǎtnahá-xi cùu yohó chi ñá túú sándáá iní ñáhá-n xii-í —càchí sá càhá<sup>n</sup>-á<sup>n</sup> xáha<sup>n</sup>-xi xii-dé.

<sup>6</sup>Te té Sàulú ní quidi ñaha-xi xii-dé sá nǐ yùhú-dé, te ní xáha<sup>n</sup>-dě:

—Xítóhó Jesucrìstú, ¿te ná cuìní-n càda-í-i? —càchí-dé xáha<sup>n</sup>-dě.

Te Jèsús ní xáha<sup>n</sup>-gǎ xii-dé:

—Ndacóo, te quíhí<sup>n</sup>-n ñuú-ǎ<sup>n</sup>, te yàcá<sup>n</sup> tecú tnúhu-n nǎ cúú sǎ cádá-n —càchí-gá xáha<sup>n</sup>-gǎ xii-dé.

<sup>7</sup>Te cue téé cuáhá<sup>n</sup> ndihi té Sàulú ní tecú dóho-güedé càhá<sup>n</sup> ì<sup>n</sup> sá càhá<sup>n</sup>, dico vá yòo tnahí ni xini-güedé, te ní yùhú víhí-güedě, te ñá túú tnahí ni cǎhá<sup>n</sup>-güedé. <sup>8</sup>Te ní ndacóo té Sàulú, te ñá ní cùu-gá cundehe-dě, chi ní cuaa-dé, te ní tñi-güedé ndaha-dé ndécá ñaha-güedé cuáhá<sup>n</sup> ñuú Dàmascú. <sup>9</sup>Te yàcá<sup>n</sup> ní xíndecu-dé úní nduu, te ñá ní cùu tnahí cundehe-dě, te ñá túú nǎ ní xèxi-dé, te ñá túú ní xìhi-dé ndute.

<sup>10</sup>Te ndècu téé sándáá iní tnúhu Jèsús ñuú Dàmascú, nání-dě Anàniás, te ní sáhá<sup>n</sup> Jèsús núú sàní-dé, te ní xáha<sup>n</sup>-gǎ xii-dé:

—iAnàniás! —càchí-gá xáha<sup>n</sup>-gǎ.

Te ní xáha<sup>n</sup>-dě:

—¿Yúhú càhá<sup>n</sup> ndihi-n-ǎ<sup>n</sup>? —càchí-dé xáha<sup>n</sup>-dě.

**11** Te ní xáha<sup>n</sup>-gă:

—Ndacuíñí, te quíhí<sup>n</sup>-n ì<sup>n</sup> chiu<sup>n</sup> ichi núú dánàni-güedé Ichi Ndáá, te yàcá<sup>n</sup> nanducu-n vèhe té Jùdás, chi vehe téé-á<sup>n</sup> ndécú ì<sup>n</sup> téé ñúú Tàrsú nání-dě Sàulú, te téé-á<sup>n</sup> sa càhá<sup>n</sup> ndìhi ñaha-dě xii-í. **12** Te téé-á<sup>n</sup> ñí dácótó ñàha-xi sá ñí xiní ñáhá-dě xii-n ñí quexìo-n núú ndécú-dě, te ní sacá<sup>n</sup> ndodo-n ndàha-n díquí-dě, te duca<sup>n</sup> te ní nacaá<sup>n</sup> núú-dě ní dácótó ñàha-xi xii-dé —càchí-gá xáha<sup>n</sup>-gă.

**13** Te té Anàniás ní xáha<sup>n</sup>-dě:

—Yòhó Xítóhó Jesucrìstú, càchí tnúhu-í xii-n sǎ ñí ñíhì-í tnúhu nàcuáa quide-dé sá ìo quide úhú-dé ñáyiu càhá<sup>n</sup> ndìhi-n ñúú Jerusàlén. **14** Chi nèhe-dé tutú ní sǎnaha cuè dútú cúnùu cuendá ñíhí-dě nàcuáa cada-dé tñii-dé nchaa ñáyiu sàndáá iní ñáhá xii-n —cachí-dé xǎha<sup>n</sup>-dě xii-gá.

**15** Te Jèsús ní xáha<sup>n</sup>-gă xii-dé:

—Quíhí<sup>n</sup>-n ndàtnúhu-n ndìhi-dé, chi cuíní-í cada-dé chiú<sup>n</sup>-í, quíhí<sup>n</sup>-dé cáhá<sup>n</sup>-dé tnúhu-í núú cuè ñáyiu isràél, ndìhi núú cuè ñáyiu ñá túú cùu ñáyiu isràél, ndìhi núú cuè téé yìndaha ñaha xií-yu. **16** Te yúhú cúñaha-í xii-dé sá ndóhó vîhi-dé cuendá-í —càchí-gá xáha<sup>n</sup>-gă xii té Anàniás.

**17** Te cuáhá<sup>n</sup> té Anàniás vehe núú ndécú tǎ Sàulú te ní sacá<sup>n</sup> ndodo-dé ndaha-dé díquí tǎ Sàulú, te ní xáha<sup>n</sup>-dě:

—Yòhó té Sàulú téé ndècu ndìhi-í ichi Xítóhó Jesucrìstú, diu-ni Xítóhó Jesucrìstú Yaá ní cáhá<sup>n</sup> ndìhi ñaha xii-n ichi ní tendaha ñàha-gá véxi-í cuendá cacá<sup>n</sup> táhù-í núú-gă cuendá-n te ndúha núú-n, te dǎtnùní quixi Espiritú-gá cundecu ndìhi-n —càchí-dé xǎha<sup>n</sup>-dě.

**18** Te dàtná sá ñí xócání-ó ì<sup>n</sup> sá ndèdí núú-dě ní quide ñaha-xi xii-dé, te ní nacaá<sup>n</sup> núú-dě, te ní sandute-dé. **19** Te ní xexi-dé, te ní naníhí ndéé-dě, te tìtní nduu ní xíndecu ndìhi-dé ñáyiu ní sàndáá iní tnúhu-gá ñúú Dàmascú.

### **Té Sàulú dácuàha-dé ñáyiu tnúhu Yá Ndiöxí ñúú Dàmascú**

**20** Te sátá ñí ndúha núú-dě, te ní sáhá<sup>n</sup>-dé veñúhu cue ñáyiu isràél ní xáha<sup>n</sup>-dě sá Jèsús cúú-gă Déhe Yá Ndiöxí. **21** Te nchaa ñáyiu ní xíndedóho tnúhu ní cáhá<sup>n</sup>-dé, te ní cuñúhu vîhí-yu, te ní xítnàhá-yu:

—Diu téé-ǎ<sup>n</sup> ní sahní-dé ñáyiu ní xóo chiñuhu ñaha xii Jesús ñúú Jerusàlén. Te ní quixi-dé iha ní cuíní-dé tñii ñaha-dě xií-yu candeca ñaha-dě quíhí<sup>n</sup> núú cuè dútú cúnùu ni cuu —cachí-yu xítnàhá-yu.

**22** Te ió iní-gá té Sàulú xǎha<sup>n</sup>-dě xií-yu sá díú Jèsús cúú-gă Crìstú Yaá ní tendaha Yǎ Ndiöxí ní quixi ñuyíú-a, te xíǎ<sup>n</sup> ñá ní ñíhí ñáyiu isràél ndécú ñúú Dàmascú tnúhu cáhá<sup>n</sup>-yu, te ní cuñúhu vîhí-yu.

### Té Sàulú ní dǎxíó-dě núú ñǎyiu isràél

23Te sǎtá nǐ cuu titní nduu, te ní ndatnúhu cue téé isràél sǎ cáhni-güedě té Sàulú. 24Te té Sàulú ní níhí-dě tnúhu nàcuáa càhá<sup>n</sup>-güedé cada ñaha-güedě xii-dé, te cuèi nduu cuèi niú néhé cuèndá-güedé yuyèhe núú ñúdòco ndóho yuhu ñùú cuèndá cuìní-güedé tni ñaha-güedě xii-dé te cahni ñaha-güedě. 25Te ì<sup>n</sup> niú ndécá ñàha cue téé ní sǎndáá iní-xi tnúhu Jèsús cuáhá<sup>n</sup> ndéé núú ñúdòco ndóho yuhu ñùú. Te ní sǎá-güedé núú ndòho, te ní chihi ñaha-güedě xii-dé xití tídihi te ní dánděe ñaha-güedě núú ñúhú, te ní quene-dé cuáhá<sup>n</sup>-dé.

### Te Sàulú ndécú-dě ñuú Jerusàlén

26Te té Sàulú ní nasáá-dé ñuú Jerusàlén, te cuìní-dé chitnahá-dé ñáyiu sǎndáá iní tnúhu Jèsús, te ní yùhú-yu chi ní cáhǎ<sup>n</sup>-yu sǎ dándàhú ñáhá-dě sǎ sǎndáá iní-dé Jèsús. 27Te té Bèè ndécá-dě té Sàulú cuáhá<sup>n</sup> núú ndécú cuè téé ní táuchíú<sup>n</sup> Jèsús dacuàha ñaha xií-yu tnúhu-gá. Te ní cani té Bèè cuèndú núú-güedě nàcuáa ní cuu ní naníhí tnáhá tǎ Sàulú ndihi Jèsús ichi, te ní cáhá<sup>n</sup> ndihi ñaha-gǎ xii-dé. Te ní xáha<sup>n</sup> tùcu té Bèè nàcuáa ní cáhá<sup>n</sup> té Sàulú tnúhu Jèsús núú ñáyiu Dàmascú, te ñá túú tnàhí ni yùhú-dé ní cáhá<sup>n</sup>-dé, càchí té Bèè xǎha<sup>n</sup>-dě xii-güedé. 28Te ní xíndecu té Sàulú ndihi ñáyiu xídacuáhá tnúhu-gá ñuú Jerusàlén. Te ní ndicuu ndicuu-dé ní cáhá<sup>n</sup>-dé tnúhu Jèsús, te ñá túú tnàhí ni yùhú-dé 29ní cáhá<sup>n</sup> ndihi-dé ñáyiu isràél ñáyiu càhá<sup>n</sup> tnúhu grìégú. Te ñáyiu-á<sup>n</sup> nǐ ngüíta-yu ndatnúhu-yu sǎ cáhni ñàhá-yu xii-dé. 30Te ñáyiu sǎndáá iní tnúhu-gá ní níhí-yu tnúhu nàcuáa cuìní ñáyiu càhá<sup>n</sup> tnúhu grìégú cada ñàhá-yu xii té Sàulú, núú ní sǎndeca ñàhá-yu xii-dé ñuú Cèsareá, te yàcá<sup>n</sup> ní tendaha ñàhá-yu cuánuhú-dé ñuú Tàrsú.

31Te sǎtá xǎá<sup>n</sup> te ní sanaá-yu ñá túú-gǎ ní xǒo cada úhú-yu nchaa ñáyiu sǎndáá iní tnúhu Jèsús nihí distritú Jùdeá, ndihi distritú Galileá, ndihi distritú Sàmariá. Te ní níhí ndéè-yu ní quidé-yu nàcuáa ní xáha<sup>n</sup> Yǎ Ndiöxí cadá-yu, te ío ní xíndecu yíñùhú-yu núú-gǎ, te Espiritú-gá ní chindee ñàha-xi xií-yu, te vǎi-gá ñáyiu ní sǎndáá iní-yu tnúhu-gá.

### Té Pèlú ní quide tátna-dé té Èneás

32Titní xichi ní sǎhá<sup>n</sup> té Pèlú ní cáhá<sup>n</sup>-dé tnúhu Yá Ndiöxí. Te ì<sup>n</sup> nduu ní sǎhá<sup>n</sup>-dé ñuú Lìdá ní cáhá<sup>n</sup> ndihi-dé ñáyiu sǎndáá iní ñáhá xii Jesús. 33Te yàcá<sup>n</sup> ní naníhí-dě ì<sup>n</sup> téé nàni Eneás, te ní cuu úná cuíá cùhú-dé, te ni lùha ñá cúú-gǎ candá nihnu-dé. 34Te ní xáha<sup>n</sup> tǎ Pèlú xii-dé:

—Èneás, Xítóhó Jesucristú cada tátna ñaha-gǎ xii-n tnàvíí. Ndacóo te ndocani-n yùu-n —cachí-dé xǎha<sup>n</sup>-dě.

Te òré-ni ní ndacóo-dé. **35**Te nchaa ñáyiú ñuú Lìdá ndìhi ñáyiú ñuú Sàrón ní xiní-yu sá ñí ndúha-dé, te ní sándáá víhí iní-yu Xítóhó Jesucrìstú.

### Ní ndoto tá Dòrcás

**36**Te ñuú Jòpé ndécú ìí<sup>n</sup> ñadìhí sàndáá iní-a<sup>n</sup> tnúhu Jèsús, te nàni-a<sup>n</sup> Tabitá, te tnúhu grìégú xǎhǎ<sup>n</sup>-yu Dòrcás, te ío váha ní xóo cada-a<sup>n</sup> chí ío váha iní-a<sup>n</sup>, te ní xóo chindee-a<sup>n</sup> ñáyiú ndàhú. **37**Te váha-ni ndècu-a<sup>n</sup> ní cuu, te ní tñi ñaha cuèhé ñí xíhí-a<sup>n</sup>, te ní nadacùchi ñahá-yu, te ní chihi ñàhá-yu ìí<sup>n</sup> cuàrtú ndécú ndéé núú ñnu. **38**Te ñáyiú ní sándáá iní tnúhu Jèsús ñuú Jòpé ní níhí-yu tnúhu sá ndécú tē Pèlú ñuú Lìdá. Te yatni-ni càa ñuú-á<sup>n</sup>, te ní tendàhá-yu úú cue tée cuáhá<sup>n</sup>-güedé núú ndécú-dě cuèndá cúñaha-güedě candeca ñaha-güedě xii-dé quíhí<sup>n</sup> núú ndécü-yu. Te ní xáha<sup>n</sup>-güedě xii té Pèlú:

—Yáchí ná quíhí<sup>n</sup>-ó ñuú-ndí, chí yàcá<sup>n</sup> cáná ñàhá-yu quíhí<sup>n</sup>-n tnàvíí —càchí-güedé xǎha<sup>n</sup>-güedě xii té Pèlú.

**39**Te té Pèlú ní xica-dé cuáhá<sup>n</sup>-dé ndìhi cue tée-á<sup>n</sup> ñuú Jòpé, te òré ní quexìo-güedé ndìhi-dé, te cuásaá ndìhi ñaha-güedě cuàrtú ndéé núú ñnu. Te nchaa ñáyiú dìhí ñáyiú quèé ní tacá ndèè ñàhá xii ndíyi-á<sup>n</sup> xíndáhyú-yu, te ní dánèhé ñàhǎ-yu nchaa dóó ñí cadúha ñaha ní xíhí-á<sup>n</sup>. Chí ní xóo cadúha-a<sup>n</sup> dícú<sup>n</sup>, te ní xóo cadúha-a<sup>n</sup> dío òré ní xíndecu-a<sup>n</sup> ñuyíú-a, te nchaa xǎ<sup>n</sup> ní dánèhé ñàhǎ-yu xii té Pèlú. **40**Te té Pèlú ní xáha<sup>n</sup>-dě sá quèé-yu ncháá-yu quehé, te ní queé-yu. Te ní ngüíñí xítí-dě te ní cáhá<sup>n</sup> ndìhi-dé Yǎ Ndiöxí, te dàtnùní ní ndacoto-dé núú cándòdo ndíyi-á<sup>n</sup>, te ní xáha<sup>n</sup>-dě:

—Tàbitá, ndacóo —càchí-dé xǎha<sup>n</sup>-dě.

Te ní ndacoto-a<sup>n</sup> núú tē Pèlú te ní ndacóo-a<sup>n</sup>. **41**Te ní tñi-dé ndaha-a<sup>n</sup> ní nacanutñi ñaha-dě. Te ní cana-dé nchaa ñáyiú dìhí ñáyiú quèé ndìhi nchaa ñáyiú sàndáá iní tnúhu Jèsús cuèndá quiní-yu sá ñí ndoto-a<sup>n</sup>. **42**Te nchaa ñáyiú ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xíhí-á<sup>n</sup>, te vǎi-yu ní sándáá iní-yu Xítóhó Jesucrìstú. **43**Te títí nduu ní xíndecu té Pèlú vehe té Xímú tée dàcuitá ñi.

### Té Pèlú ndìhi té Còrneliú

**10**<sup>1</sup>Te ndècu ìí<sup>n</sup> tée nàni-dé Còrneliú ñuú Cèsareá te cùu-dé capità<sup>n</sup>, te ndècu ndìhi-dé ìí<sup>n</sup> cièndú sandàdú. Te cue tée-á<sup>n</sup> nání-güedě Sandàdú Itàlianú. <sup>2</sup>Te tée cùu capità<sup>n</sup> ío váha iní-dé, te mee-dě ndìhi ñadìhí-dé ndìhi nchaa landú-dé ío nèhé-yu sá yíñùhu núú Yǎ Ndiöxí, te sáha-dé ñáyiú ndàhú ñáyiú isràél díhú<sup>n</sup>, te ío càhá<sup>n</sup> ndìhi-dé Yǎ Ndiöxí. <sup>3</sup>Te ìí<sup>n</sup> nduu dàtná òré caá úní sacuaa ní dácótó núú ñàhá-xí xii-dé sá ni sǎhá<sup>n</sup> ìí<sup>n</sup> espíritú xínú cuèchi núú Yǎ Ndiöxí núú-dě, te ní xáha<sup>n</sup>-xi:

—Còrneliú —càchí-xi xăha<sup>n</sup>-xi xii-dé.

<sup>4</sup>Te ní xiní-dé ndi ndùú xio núú-dě espíritú-á<sup>n</sup>. Te ío ní yùhú-dé. Te ní xăha<sup>n</sup>-dě:

—¿Ná chíú<sup>n</sup> vëxi-n? —càchí-dé xăha<sup>n</sup>-dě.

Te xăha<sup>n</sup>-xi:

—Ío càhá<sup>n</sup> ndihi-n Yă Ndiöxí, te ñáyiú ndàhú sãñaha-n dīhú<sup>n</sup>-n, te nchaa xíă<sup>n</sup> sa nàha-gá. <sup>5</sup>Te vitna tendaha-n cuè téé na quihí<sup>n</sup>-güedé ñuú Jòpé quíngana-güedé ì<sup>n</sup> téé nàni Xímú, àdi Pelú chi úú ðiú-dé, te candeca ñaha-güedě quixi. <sup>6</sup>Te òré quexìo-dé te cachí tnúhu-dé nchaa dava-gá sá cuìní Yă Ndiöxí cada-n. Te ndècu-dé vehe ingá tucu téé nàni Xímú téé dàcuitá ñii, te vehe téé-á<sup>n</sup> cáá ì<sup>n</sup> xio yuhu lamár —càchí-xi xăha<sup>n</sup>-xi xii-dé.

<sup>7</sup>Te sátá cuáhá<sup>n</sup> espíritú-á<sup>n</sup>, te té Còrneliú ní cana-dé úú tnàhá cue téé xìnu cuechi núú-dě ndihi ì<sup>n</sup> sandàdú xínú cuèchi tucu núú-dě, te tnàhá sandàdú-á<sup>n</sup> ío càhá<sup>n</sup> ndihi-dé Yă Ndiöxí. <sup>8</sup>Te té Còrneliú ní cani-dé cuèndú núú-güedě nàcuáa ní cáhá<sup>n</sup> espíritú xínú cuèchi núú Yă Ndiöxí. Te ní tendaha ñàha-dé xii-güedé cuáhá<sup>n</sup>-güedé ñuú Jòpé.

<sup>9</sup>Te nduu tněé-á<sup>n</sup> ñúhú-ní-güedě ichi cuáhá<sup>n</sup>-güedé, te cùu-xi datná òré caúxúú nduu ta cùyatni-güedé ñuú-á<sup>n</sup>, te òré-á<sup>n</sup> ñí sáá té Pèlú díquí véhé càhá<sup>n</sup> ndihi-dé Yă Ndiöxí. <sup>10</sup>Te òré-á<sup>n</sup> sa xihí-dé docó cuìní-dé caxi-dé, te ñini càdúha-yu sá caxí-dě ní dácótó núú ñáhá-xí <sup>11</sup>să ñí xiní-dé ì<sup>n</sup> sá ndécú àndiú, te càa datná cáá ì<sup>n</sup> dóó cáhnú nchìcú<sup>n</sup> yoho ndi cùmí xíquí-xi véxi cuu<sup>n</sup> núú ñúhú. <sup>12</sup>Te núú dđó-ă<sup>n</sup> yódó cőó ndihi quiti ndàva ndihi nchaa núú quiti ndéé cùmí sãhá-xi. <sup>13</sup>Te ní tecú dóho-dé càhá<sup>n</sup> ì<sup>n</sup> sá càhá<sup>n</sup>, te xăha<sup>n</sup> sã càhá<sup>n</sup>-á<sup>n</sup> xii-dé:

—Pèlú, ndacuñí cahni-n nděda-ni càa quiti-a caxi-n-di —cachí sá càhá<sup>n</sup>-á<sup>n</sup> xăha<sup>n</sup>-xi xii-dé.

<sup>14</sup>Te té Pèlú ní xăha<sup>n</sup>-dě:

—Vá cáhnì-í-di chi càchí tnúhu sá sánú ichi ñaha xii nchúhú ñáyiú isràél sá vă cúú càxi-ndí nchaa quiti-a chi cuu cuéchi, te vátá caxí-gă-í-di ni ì<sup>n</sup> xito —cachí-dé xăha<sup>n</sup>-dě.

<sup>15</sup>Te ní cáhá<sup>n</sup> tucu sá ñí cáhá<sup>n</sup>-á<sup>n</sup>, te xăha<sup>n</sup>-xi:

—Vá cúú càchí-n sã vă cúú càxi-n-di, chi mee Yă Ndiöxí ní cachí-gá sá díú nchàa quiti-a cuu caxi-o vitna —cachí sá ñí cáhá<sup>n</sup>-á<sup>n</sup> xăha<sup>n</sup>-xi xii-dé.

<sup>16</sup>Te duca<sup>n</sup> ñí cáhá<sup>n</sup> sá ñí cáhá<sup>n</sup>-á<sup>n</sup> ùní xito, te dătnuní cuándaa tucu dóó-ă<sup>n</sup> andiú. <sup>17</sup>Te té Pèlú ñá ní cùtnuní iní-dé ná cuèndá duca<sup>n</sup> ñí dácótó núú ñáhá-xí xii-dé, núú xíă<sup>n</sup> ío cuéhé ñí sani iní-dé. Te òré-á<sup>n</sup> ñí quexìo cue téé ní tendaha té Còrneliú ndéé yuyèhe, chi ndi vehe ndi vehe cuáhá<sup>n</sup>-güedé ndúcú tnúhu-güedé ndéé cáá vèhe té Xímú téé dii vèhe-xi ndecu té Pèlú. <sup>18</sup>Te ní cáhá<sup>n</sup> níhi-güedé, te xăha<sup>n</sup>-güedě:

—Ñá túú cùdana iha ndecu ìí<sup>n</sup> téé nànducu-ndí nání-dě Xímú, àdi Pelú chi úú ðiù-dé —càchí-güedé xăha<sup>n</sup>-güedě.

**19**Te té Pèlú vâi sani iní-dé sá nǐ dácótó nǔú ñáhá-xí xii-dé. Te òré-á<sup>n</sup> nǐ xáha<sup>n</sup> Espíritú Yă Ndiöxí xii-dé:

—Cundedóho-n ìí<sup>n</sup> tnúhu na càhá<sup>n</sup>-í-a. Ní quexìo úní cue téé nànducu ñaha xii-n. **20**Yáchí, cuandèe chi quíhí<sup>n</sup>-n ndìhi-güedé, te vá yùhú-n chi yúhú ní xáha<sup>n</sup>-í véxi cuaca ñaha-güedě xii-n —càchí Espíritú-gá xăha<sup>n</sup>-xi xii té Pèlú.

**21**Te ní xica-dé cuánde-dé núú ndécú cuè téé xica nanducu ñaha xii-dé, te xăha<sup>n</sup>-dě xii-güedé:

—Yúhú cúú tée nànducu-ndo-á<sup>n</sup>. Náú-í-a núú ná chíú<sup>n</sup> cuíní ñáhá-ndó —càchí-dé xăha<sup>n</sup>-dě xii-güedé.

**22**Te xăha<sup>n</sup>-güedě:

—Tée cùu capitá<sup>n</sup> téé nàni Corneliú ní tendaha ñaha-dé véxi-ndí, te téé-á<sup>n</sup> ìo váha iní-dé, chi ìo sàndáá iní-dé Yă Ndiöxí, te nchaa ñáyiù isràél ìo váha càhá<sup>n</sup>-yu cuèndá-dé. Te ìí<sup>n</sup> espíritú xínú cuèchi núú Yă Ndiöxí ní xáha<sup>n</sup>-xi xii-dé sá cáná ñaha-dé xii-n quíhí<sup>n</sup>-n vèhe-dé dacuàha-n-dé tnúhu Yă Ndiöxí —càchí cue téé ní tendaha té Còrneliú xăha<sup>n</sup>-güedě xii té Pèlú.

**23**Te ní xáha<sup>n</sup> tē Pèlú sá quíhu-güedé vehe-dé, te candeca tnàha-güedé ndìhi-dé quíhí<sup>n</sup> ndéé nduu tnéé. Te nduu tnéé-á<sup>n</sup> nǐ xica-güedé ndéca tnàha-güedé ndìhi té Pèlú cuáhá<sup>n</sup>, te tnàhá ìí<sup>n</sup> úú cue téé sàndáá iní tnúhu Jèsús ñuú Jòpé cuáhá<sup>n</sup> ndìhi ñaha-güedě xii-dé.

**24**Te ndéé ingá nduu ní quexìo-güedé ñuú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndìhi ñadìhí-dé ndìhi nchaa landú-dé ndìhi cue téé ìo váha tnàhá tnúhu ndìhi-dé, chi ní cana ñaha-dé ní nítnáhă-yu ndìhi-dé cundetú-yu té Pèlú. **25**Te sátá nǐ quèxio té Pèlú vehe té Còrneliú, te ní quee-dé quehé, te ní ngüíñí xítí-dě núú tē Pèlú chíñùhu ñaha-dé ní cùu. **26**Te té Pèlú ní xáha<sup>n</sup>-dě:

—Ndacuíñí vá ngüíñí xítí-n nǔú-í chi ñá díú Ndiöxí cúu-í, ðicó ìí<sup>n</sup> téé ñuyíú-a cùu-í —càchí té Pèlú xăha<sup>n</sup>-dě xii-dé.

**27**Te ta căhá<sup>n</sup> té Pèlú ndìhi té Còrneliú cuánguihu-güedé xítí vehe, te chitu ñáyiù xixíhi xítí vehe. **28**Te ní xáha<sup>n</sup> tē Pèlú xii-yu:

—Sa nàha-ndo sá càchí tnúhu sá sánú ìchi ñaha xii nchúhú ñáyiù isràél sá vă cúú quixi-ndí vehe ni ìí<sup>n</sup> nchohó ñáyiù ñá túú cùu ñáyiù isràél te ni vă cúú tnàhá tnúhu ndìhi ñaha-ndě xii-ndo. Dico Yă Ndiöxí ní cachí-gá sá vă cúú căhá<sup>n</sup>-í sá vă cúú căhá<sup>n</sup> ndìhi-í ñáyiù ñá túú cùu ñáyiù isràél, chi cuu cuéchi. **29**Núú xíă<sup>n</sup> ndìhi-ni véxi-í òré ní quexìo tnúhu sá cáná ñaha-ndo. Te cachí tnúhu-ndo nă cuèndá cáná ñaha-ndo —cachí té Pèlú xăha<sup>n</sup>-dě xii-yu.

**30**Te té Còrneliú ní xáha<sup>n</sup>-dě:

—Ní cuu cúmí nduu, te ñi-ni ñàtá òré iha cùu-xi, te yúhú ndècu-í ñi-ni vehe-í, te ñá túú ñàhí ná xéxi-í cáhá<sup>n</sup> ndihi-í Yá Ndiöxí, te òré-á<sup>n</sup> ñí quexìo ñí<sup>n</sup> espíritú xínú cuèchi núú-gá ñíhí-xí dǒo cuixí<sup>n</sup> dóo chàhchí. **31**Te càchí-xi: “Còrneliú, ní xíndedóho Yá Ndiöxí ñíhí-ní cáhá<sup>n</sup>-n ndihi-gá, te xíní-gá sá sãhaha-n ñíhí<sup>n</sup> xii ñáyíu ndàhú. **32**Te ñuú Jòpé ndécú ñí<sup>n</sup> té nàni Xímú, àdi Pelú chi úú ñi-dé, te ndècu-dé vehe ñí<sup>n</sup> té nàni tucu Xímú té dácuitá ñí<sup>n</sup>, te càa vehe-dé ñí<sup>n</sup> xio yuhu làmár, te cana-n-dě ná quixi-dé ndatnúhu-n ndihi-dé”, duha ní cáhá<sup>n</sup> espíritú xínú cuèchi núú Yá Ndiöxí. **33**Núú xíá<sup>n</sup> ndihi-ní ní cana ñaha-í xii-n. Te táxáhu xii-n sá vèxi-n chi iha ndècu-ndí nchaa-ndí ndétú ñàha-ndí xii-n cùndedóho-ndí ñíhí Yá Ndiöxí, te cuíní-ndí cachí ñíhí-n nchaa ñíhí ní cachí Yá Ndiöxí cáhá<sup>n</sup>-n —càchí té Còrneliú xáha<sup>n</sup>-dě.

### Té Pèlú ní ndatnúhu-dé ndihi ñáyíu ní tacá vehe té Còrneliú

**34**Te té Pèlú xáha<sup>n</sup>-dě xii-yu:

—Vitna ní xíní-í sá Yá Ndiöxí cáhá<sup>n</sup> ndihi-gá ñáyíu cuèi ndèda-ni càa ñuú, te ñí<sup>n</sup>-ni quide-gá ndihi nchaa-yu. **35**Te nchaa ñáyíu nèhe sá yíñuhu núú Yá Ndiöxí, te xiquide váha-yu, te nchaa-yu cùu váha iní ñáhá-gá xii-yu. Te ñá túú quide cuendá-gá cuèi ná ñáyíu ñuú cúú-yu. **36**Te Yá Ndiöxí ní tendaha-gá Xítoho Jesucristú ní sáhá<sup>n</sup>-gá ní xíndecu-gá nació<sup>n</sup> Isràél, te ní xáha<sup>n</sup>-gá xii-yu ñí<sup>n</sup> ñíhí váha nàcuáa cuu váha iní-yu. Te ñi-ni mee Jèsús cùnù-gá núú ñáyíu ní càa xico ñuyíú. **37**Te ñaha-ndo sá ñíhí-gá ndí Juàá ní cáhá<sup>n</sup> ndí ñíhí Yá Ndiöxí núú ñáyíu, te ní dácuándute ñaha ndí xii-yu. Te ñàtá ní ngúíta Jèsús ní cáhá<sup>n</sup>-gá ñíhí-gá distritú Galileá, te ñàtá ní sáhá<sup>n</sup>-gá ñíhí nació<sup>n</sup> Isràél ní cáhá<sup>n</sup>-gá ñíhí-gá núú ñáyíu. **38**Te sa ñaha-ndo sá Yá Ndiöxí ní sãhaha-gá Espíritú-gá xii Jèsús té ñuú Nazàrét ndécú ndihi-dé chíndèe ñaha-xi xii-dé. Te ñaha-ndo sá ñí xica cuu Jèsús ní quide tátá-gá nchaa ñáyíu yíhí ñaha espíritú cùndihi yucu ñávaha. Te ío vèi-gá sá váha ní quide ñaha-gá xii-yu, te duca<sup>n</sup> ñí quide-gá, chi Yá Ndiöxí ní chindee ñaha-gá. **39**Te mee-ndí ní xíní-ndí nàcuáa ní quide Jèsús ñuú Jerusàlén ndihi ñíhí nació<sup>n</sup> Isràél. Te ní sata caa ñaha-güedě xii-gá núú cùrúxí te yàcá<sup>n</sup> ní xíhí-gá. **40**Te núú ñí nduu ní dándótó ñaha Yá Ndiöxí xii-gá. Te ní cuíní-gá sá cùndècu Xítoho Jesucristú ñíhí nduu sátá ñí ndoto-gá cuendá cáhá<sup>n</sup> ndihi ñaha-gá xii-ndí nchaa-ndí nàcuáa ní xica cuu-ndí ndihi-gá. **41**Te ñá ncháá ñáyíu ní xíní ñáhá xii-gá, chi mee-ni nchúhú cue té ní cachí-gá sá cáhá<sup>n</sup> ndáá-ndí sá ñí ndoto-gá, chi ní xíndecu ndihi-ndí-gá, te ní xíhí ní xexi-ndí ndihi-gá, núu cáhá<sup>n</sup> ndáá-ndí sá ñí ndoto-gá. **42**Te ní cachí-gá sá nchúhú quíhí<sup>n</sup>-ndí cùñaha-ndí xii ñáyíu sá méé Yá Ndiöxí ní táúchíú<sup>n</sup>-gá sá Jèsús cada ndáá-gá cuèchi nchaa ñáyíu ndècu vívú ndihi cuèchi nchaa ñáyíu ní xíhí.

Te duca<sup>n</sup> nì xáha<sup>n</sup> Yă Ndiöxí xii Jèsús, te ñiu-ni duca<sup>n</sup> nĩ cachí Jèsús cáhá<sup>n</sup>-ndí. <sup>43</sup>Te cue tée ní cáhá<sup>n</sup> tnúhu Yá Ndiöxí ndée sanaha nĩ cáhá<sup>n</sup>-güedé sá quíxí Jèsús, te ní cachí-güedé sá ncháá ñăyiu na quëndáá iní ñáhá xii Jesús, te cada càhnu iní-gá nchaa cuéchi-yu —càchí té Pèlú xăha<sup>n</sup>-dě xií-yu.

**Ní quexìo Espíritú Yă Ndiöxí ní ngúndecu ndihi  
cue ñăyiu ñá túú cùu ñăyiu isràél**

<sup>44</sup>Te mei òré càhá<sup>n</sup>-dé ndèdóho-yu ní quexìo Espíritú Yă Ndiöxí ní ngúndecu ndihi nchaa ñăyiu-á<sup>n</sup>. <sup>45</sup>Te cue tée isràél cuáhá<sup>n</sup> ndihi té Pèlú, cue tée ní sándáá iní tnúhu Jèsús ní cuñúhu vîhi-güedé sá nĩ quexìo Espíritú Yă Ndiöxí ní ngúndecu ndihí-yu, chi cuèndá sá ñà díú ñăyiu isràél cúú-yu núu xíă<sup>n</sup> ní cuñúhu-güedé. <sup>46</sup>Te ní cutnùní sá nĩ quexìo Espíritú Yă Ndiöxí ní ngúndecu ndihí-yu, chi ní ngüíta-yu càhá<sup>n</sup>-yu tnúhu sá dácàhu iní ñáhá Espíritú-gá, tnúhu sá ñà túú xìní-yu cáhá<sup>n</sup>-yu. Te ní ndacá<sup>n</sup> táhŭ-yu núu Yă Ndiöxí cuèndá nchaa sá nĩ quide-gá. <sup>47</sup>Te dătnùní ní xáha<sup>n</sup> tē Pèlú:

—Vitna te cuandute ñăyiu ní natuha ichi Xítóhó Jesucrístú chi sa ndècu ndihí-yu Espíritú Yă Ndiöxí dătná cuiní-ndó ndècu ndihi nchoo, núu xíă<sup>n</sup> vâ cúú càchí dava-gá ñăyiu sá vâ cúú cuànduté-yu —càchí-dé xăha<sup>n</sup>-dě xií-yu.

<sup>48</sup>Te dătnùní ní xáha<sup>n</sup>-dě xii ñăyiu:

—Vitna te cuandute-ndo, te òré-á<sup>n</sup> te cacunehe-ndo Xítóhó Jesucrístú —càchí-dé xăha<sup>n</sup>-dě xií-yu.

Te dătnùní ní cáhá<sup>n</sup> ndàhú-yu núu tē Pèlú cundecu ndihi ñaha-dě xií-yu ñ<sup>n</sup> úú nduu.

**Té Pèlú ní cani-dé cuèndú núu ñăyiu sándáá  
iní tnúhu Jèsús ñuú Jerusàlén**

**11** <sup>1</sup>Te cue tée ní táuchíú<sup>n</sup> Jèsús dacuàha ñaha xii ñăyiu tnúhu-gá, ndihi cue ñăyiu ní sándáá iní tnúhu-gá, ñăyiu ndècu distritú Jùdeá ní níhŭ-yu tnúhu sá ñăyiu ñá túú cùu ñăyiu isràél ní sándáá iní-yu tnúhu Yá Ndiöxí. <sup>2</sup>Te òré ní ndexìo té Pèlú ñuú Jerusàlén, te ñăyiu isràél ñăyiu ní cachí sá cádá nchàa nacuáa ní cáhá<sup>n</sup> ndíi Moisés ní satnuhu ñàhá-yu xii-dé. <sup>3</sup>Te ní xáhă<sup>n</sup>-yu xii té Pèlú:

—¿Ná cuèndá ní sáhá<sup>n</sup>-n ndée ndíácă<sup>n</sup> ní cáhá<sup>n</sup> ndihi-n ñăyiu-ă<sup>n</sup>, te ñá túú quidé-yu dătná quidé nchòo-i? Te ní sáhá<sup>n</sup>-n yàcá<sup>n</sup> ní xexi-n ndihí-yu —càchí-yu xăhă<sup>n</sup>-yu xii-dé.

<sup>4</sup>Te té Pèlú ní cani-dé cuèndú năcuáa ní cuu núu nĩ sáhá<sup>n</sup>-dé, te xăha<sup>n</sup>-dě:

<sup>5</sup>—Ní xíndecu-í ñuú Jòpé. Te òré càhá<sup>n</sup> ndihí-í Yă Ndiöxí, te ní dácótó ñàha-xi xii-í sá vëxi cuu<sup>n</sup> ñ<sup>n</sup> dóó cáhnú àndiu, te ndùtu ndi cumí xíquí-xi,



te ní ngava-xi núú ndécù-í. <sup>6</sup>Te ní xíndéhé vǎha-í, te ní xiní-í nchaa quiti yòdo núú-xi. Te ìí<sup>n</sup> xichi yòdo quiti cúmí sáhá-xi, te ìí<sup>n</sup> xichi yòdo quiti déé<sup>n</sup>, te ìí<sup>n</sup> xichi yòdo cóó, te ìí<sup>n</sup> xichi yòdo quiti ndava. <sup>7</sup>Te ní tecú dóho-í cǎhá<sup>n</sup> ìí<sup>n</sup> sá cǎhá<sup>n</sup>, te cǎchí-xi: “Pèlú, ndacuñí cahni-n nděda-ni cǎa quiti-a caxi-n-di”, cachí sá ñ cǎhá<sup>n</sup>-á<sup>n</sup>. <sup>8</sup>Te ní xáha<sup>n</sup>-í: “Vá cǎhni-í-di chi cǎchí tnúhu sá sánú ìchi ñaha xii nchúhú ñáyiú isràél sá vǎ cúú cǎxi-ndí nchaa quiti-a”, xǎha<sup>n</sup>-í. <sup>9</sup>Te ní tecú dóho-í cǎhá<sup>n</sup>-ni tucu núú ñnu, te cǎchí sá cǎhá<sup>n</sup>-á<sup>n</sup>: “Vá cúú cǎchí-n sǎ vǎ cúú cǎxi-n-di, chi mee Yǎ Ndiòxí ní cachí-gá sá díú nchǎa quiti-á<sup>n</sup> cuu caxi-o”, cǎchí sá cǎhá<sup>n</sup>-á<sup>n</sup>. <sup>10</sup>Te duca<sup>n</sup> ñ cǎhá<sup>n</sup> sá ñi cǎhá<sup>n</sup>-á<sup>n</sup> ùní xito, te dǎtnùní cuándaa dóó-ǎ<sup>n</sup> ndihí nchaa quiti-á<sup>n</sup> andiu. <sup>11</sup>Te òré-ni ní quexìo ùní cue tée vehe núú ndécù-í. Te cue tée-á<sup>n</sup> ñ tendaha ñaha ìí<sup>n</sup> tée ñnuú Cèsareá nándùcu ñaha-güedé xii-í. <sup>12</sup>Te mee Espiritú Yǎ Ndiòxí ní cachí-xi sá quíhí<sup>n</sup>-í ndihí-güedé, te ní cachí-xi sá ñà túú ñà caní iní-í. Te tnàhá ínú cue tée ndècu iha ní sáhá<sup>n</sup> ndihí ñaha-güedě xii-í, te nchaa-ndí ní sáhá<sup>n</sup>-ndí vehe té Còrneliú ñnuú Cèsareá. <sup>13</sup>Te ní caní-dé cuèndú nàcuáa ní cuu ní sáhá<sup>n</sup> ìí<sup>n</sup> espíritú xínú cuèchi núú Yǎ Ndiòxí vehe-dé, te ní quíhu-xi ndéé xití vehe-dé, te ní xáha<sup>n</sup>-xi xii-dé: “Tendaha-n cuè tée na quíhí<sup>n</sup>-güedé ñnuú Jòpé quíngana-güedé ìí<sup>n</sup> tée nàni Xímú, àdi Pelú chi úú dèu-dé. Te candeca ñaha-güedě quixi. <sup>14</sup>Te tée-á<sup>n</sup> cachí tnúhu-dé nása cada-n nàníhí tǎhú-n ndihí ñadihí-n, ndihí landú-n, ndihí nchaa ñáyiú xínu cuechi vehe-n”, duha ní xáha<sup>n</sup> espíritú-á<sup>n</sup> xii té Còrneliú. <sup>15</sup>Te òré ní ngúíta-í cǎhá<sup>n</sup> ndihí-í-yu ní quexìo Espiritú Yǎ Ndiòxí ní ngúndecu ndihí-yu dǎtná ní quide-xi cútnàhá ní taxi Yá Ndiòxí Espiritú-gá ndéé díhna ní ngúndecu ndihí nchoo. <sup>16</sup>Te ní ndacu iní-í nàcuáa ní cǎhá<sup>n</sup> Xítóhó Jesucrístú, te duha ní cachí-gá: “Té Juàá ní xóo dacuàndute-dé ñáyiú, dico yúhú sǎñaha-í Espiritú Yǎ Ndiòxí cundecu ndihí-yu”, duha ní cachí-gá. <sup>17</sup>Te Yá Ndiòxí ní sǎñaha-gǎ Espiritú-gá cundecu ndihí ñáyiú ñà túú cùu ñáyiú isràél dǎtná ní quide-gá cútnàhá ní sándáa iní-ó tnúhu Jèsús, núú xiǎ<sup>n</sup> vá cǎchí-í sá vǎ cúú cǎda-í ìí<sup>n</sup> sá cuíní Yǎ Ndiòxí cada-í —cǎchí té Pèlú xǎha<sup>n</sup>-dě xii-yu.

<sup>18</sup>Te sátá dúcá<sup>n</sup> ñi xáha<sup>n</sup> tǎ Pèlú, te ñà túú-gǎ ná tnúhu ñi cǎhá<sup>n</sup>-yu, te ío ní cudíí iní-yu nchaa nàcuáa ní quide Yá Ndiòxí, te ní xitnàhá-yu:

—Tnàhá nchaa ñáyiú ñà túú cùu ñáyiú isràél naníhí tǎhú-yu núu na dàñá-yu nchaa sá cuèhé sá dúhá quidé-yu, chi duca<sup>n</sup> cuíní Yǎ Ndiòxí cunduu —cǎchí-yu xitnàhá-yu.

### Ñáyiú sándáa iní tnúhu Jèsús ñnuú Antiòquia

<sup>19</sup>Te sátá ñi sahani-güedé té Těvá, te ní cuíní-güedé cada úhú-güedé nchaa ñáyiú ní sándáa iní-xi tnúhu Jèsús, te ní xité nuú-yu ndi tnàhá ìí<sup>n</sup> ìí<sup>n</sup> ñnuú. Te davá-yu cuáhá<sup>n</sup>-yu ndéé distrítú Fèniciá ndihí distrítú Chìpré ndihí

ñuú Antiòquiá. Te ní cáhá<sup>n</sup>-yu tnúhu Jèsús núú mee-ni ñáyiú isràél, te ñá ní xítñuhu-yu dava-gá-yu. <sup>20</sup>Te dava-gá ñáyiú distritú Chìpré ndihi ñáyiú ñuú Cìrené ní sáhá<sup>n</sup>-yu ñuú Antiòquiá. Te ñá díú mèe-ni ñáyiú isràél ní cáhá<sup>n</sup> ndihí-yu, chi tnàhá ñáyiú ñá túú cùu ñáyiú isràél ní xáhá<sup>n</sup>-yu tnúhu Jèsús. <sup>21</sup>Te ní chindee ñàha-gá xii ñáyiú càhá<sup>n</sup> tnúhu-gá, te vài-gá-yu ní sàndáá iní-yu-gá chi ní tuhá-yu ichi-gá.

<sup>22</sup>Te ñáyiú ndècu ñuú Jerusàlén ñáyiú ní sàndáá iní tnúhu Jèsús ní níhí-yu tnúhu nàcuáa ní cuu, núu xíá<sup>n</sup> ní tendàhá-yu té Bèé cuáhá<sup>n</sup>-dé ñuú Antiòquiá. <sup>23</sup>Te òré ní quexìo té Bèé, te ní xiní-dé nàcuáa ní quide ñàha-gá xií-yu sá ñí naníhí tàhú-yu, núu xíá<sup>n</sup> ío ní cudíí ìní-dé. Te ní dácáhu ìní ñàhá-dě, te ní xáha<sup>n</sup>-dě:

—Ío nducu ndèe-ndo cada-ndo nchaa sá càchí Yă Ndiöxí cada-ndo —càchí-dé xáha<sup>n</sup>-dě xií-yu.

<sup>24</sup>Te té Bèé cúú-dě ìí<sup>n</sup> téé váha iní-xi, te ndècu ndihi-dé Espiritú Yă Ndiöxí, te ío sàndáá iní-dé tnúhu Jèsús. Te vài vihi ñáyiú ní tuhá-yu ichi-gá.

<sup>25</sup>Te dàtnùní cuáhá<sup>n</sup> té Bèé ñuú Tàrsú cuánúndúcú-dě té Sàulú. <sup>26</sup>Te òré ní naníhí ñàhá-dě, te ndèca ñàha-dé cuáhá<sup>n</sup> ñuú Antiòquiá, te yàcá<sup>n</sup> ní xíndecu-güedé ìí<sup>n</sup> cuíá ndihi ñáyiú ní sàndáá iní tnúhu Jèsús, te vài-yu ní dácúhá ñàha-güedé tnúhu-gá. Te ñuú ñuú Antiòquiá ní dánání ñàhá-yu Cristiànú xii nchaa ñáyiú sàndáá iní tnúhu Jèsús.

<sup>27</sup>Te ndéé dàvá-á<sup>n</sup> ñí quee ìí<sup>n</sup> úú cue téé càhá<sup>n</sup> tnúhu Yă Ndiöxí ñuú Jerusàlén cuáhá<sup>n</sup>-güedé ñuú Antiòquiá. <sup>28</sup>Te ìí<sup>n</sup>-dé nání-dě Àgabú, te ní chindee ñàha Espiritú Yă Ndiöxí xii-dé, te ní sáhá<sup>n</sup>-dé núú nchaa ñáyiú sàndáá iní tnúhu-gá, te ní xáha<sup>n</sup>-dě xií-yu sá quíxí ìí<sup>n</sup> tnamá nihí ñuyíú. Te duca<sup>n</sup> ñí cuu sátá ñí ngúnutñíí té Clàudiú téé yìndaha cuéhé nació<sup>n</sup>. <sup>29</sup>Núu xíá<sup>n</sup> nchaa ñáyiú sàndáá iní tnúhu Jèsús ñuú Antiòquiá ní ndatnúhu-yu sá chíndéé-yu nchaa ñáyiú sàndáá iní tnúhu-gá ndécú distritú Jùdeá cuèndá vá ndóhó vîhí-yu docó. Te nàcuáa ní níhí-yu, te duca<sup>n</sup> ñí sacá<sup>n</sup> tnáhá-yu. <sup>30</sup>Te ní tacá díhú<sup>n</sup>-ă<sup>n</sup>, te nèhe té Bèé ndihi té Sàulú cuáhá<sup>n</sup>, cuáha-güedé cue téé yìndaha ñáyiú sàndáá iní tnúhu-gá.

### Sátá ñí xíhí té Jàcobó, te ní ngava té Pèlú vecaá

**12** <sup>1</sup>Te ndéé dàvá-á<sup>n</sup> ñí ngüíta té Hèrodés téé yìndaha ñàha xii ñáyiú isràél ní quide úhú-dé ìí<sup>n</sup> úú ñáyiú sàndáá iní tnúhu Yă Ndiöxí. <sup>2</sup>Te ní táuchíú<sup>n</sup>-dě ní tñii-güedé té Jàcobó ñaní té Juàá, te ní sahani ñàha-güedé ndihi machítí. <sup>3</sup>Te ío ní cudíí ìní dava ñáyiú isràél cuèndá sá ñí sahani ñàha-güedé xii té Jàcobó, núu xíá<sup>n</sup> ní tendaha tùcu té Hèrodés sandadú-dé ní sáhá<sup>n</sup> tñii tucu-güedé té Pèlú. Te duca<sup>n</sup> ñí quide-dé cútnàhá ní xóo vico ní xexí-yu pàá sá ñà túú yìhi levadurá. <sup>4</sup>Te ní naníhí-güedé té Pèlú, te ní

tnii ñaha-güedë ndécá ñaha-güedé cuáhá<sup>n</sup> vecaá. Te té Hèrodés ní táuchíú<sup>n</sup>-dë cuáhá<sup>n</sup> sáhú<sup>n</sup> ii<sup>n</sup> sandàdú cùndeé-güedé té Pèlú. Te ní xáha<sup>n</sup>-dë: —Cundeé-ndó ndì cúmí ndì cúmí-ndó tõe-ǎ<sup>n</sup> —càchí-dé xǎha<sup>n</sup>-dë xii-güedé.

Te té Hèrodés ní sani iní-dé queñuhu-dé té Pèlú vecaá òré ná yǎha vico cuendá cahni ñaha-güedë cáhá<sup>n</sup>-dë ní cùu. <sup>5</sup>Te ní xíhi-ni té Pèlú vecaá, te ní xindeé cuaa ñaha sandadú xii-dé. Te cue ñáyiú sandáá iní tnúhu Yá Ndiöxí ío ní xícá<sup>n</sup> táhǔ-yu núú-gǎ cuendá sá ñà túú nǎ cada ñaha-güedë xii-dé.

### Yá Ndiöxí ní dácăcu-gá té Pèlú vecaá

<sup>6</sup>Ii<sup>n</sup> niú-gá quihi té Pèlú vecaá ní cùu, te nduu tněé tauchìu<sup>n</sup> té Hèrodés quíhí<sup>n</sup> sandàdú queñuhu ñaha-güedë xii-dé vecaá cuendá quiní nchaa ñáyiú nása cada ñaha-güedë ní cùu. Te té Pèlú cáá-dë xidí-dé xití vecaá, te ndì ndùú dúcú<sup>n</sup> ndáhá-dë ndútú càdená, te xio xio dñi-dé ndécú sandadú, te dava-gá sandàdú xindeé-güedé yèhe vecaá. <sup>7</sup>Te ní quexìo ii<sup>n</sup> espíritú xínú cuèchi núú Yǎ Ndiöxí xití vecaá núú cáá tǎ Pèlú xidí-dé, te uu<sup>n</sup>ni ní dáyèhé-xi xití vecaá, te ní danguíhi ñaha-xi xii-dé, te xǎha<sup>n</sup>-xi xii-dé:

—Yáchí, ndàcòo —càchí-xi xǎha<sup>n</sup>-xi xii-dé.

Te ní ndacòo-dé, te nchaa cadená ndútú dǔcú<sup>n</sup> ndáhá-dë ní nandáxí. <sup>8</sup>Te ní xáha<sup>n</sup> tùcu espíritú-á<sup>n</sup> xii-dé:

—Yáchí, nucuíhnu dóo-n, te ndíhu-n chàu-n —càchí-xi xǎha<sup>n</sup>-xi xii-dé.

Te ní ndíhu nuu-dé dóo-dë, te ní xáha<sup>n</sup> tùcu espíritú-á<sup>n</sup>:

—Candixi dóo-n, te na quíhí<sup>n</sup>-ó —càchí-xi xǎha<sup>n</sup>-xi xii-dé.

<sup>9</sup>Te té Pèlú ní chinchícú<sup>n</sup>-dé espíritú-á<sup>n</sup>, te ñá ní cùtnuní iní-dé nǔu ndáá ii<sup>n</sup> espíritú xínú cuèchi núú Yǎ Ndiöxí duca<sup>n</sup> quide àdi ñáhá, te dàcoto ñaha-xi xii-dé ní sani iní-dé. <sup>10</sup>Te ndëndaha-ni-dë espíritú-á<sup>n</sup> cuáhá<sup>n</sup> ní yáha-dé nàcuáa xǐnutní sandàdú, te ta yǎha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáhá<sup>n</sup> ndéé xití ñuú, te ní nacaá<sup>n</sup> méé yèhe-á<sup>n</sup>, te ní quee-dé cuáhá<sup>n</sup>-dé ndíhi espíritú-á<sup>n</sup>. Te ní tnahá-dé ii<sup>n</sup> tnuú, te yàcá<sup>n</sup> ní dándöo ñaha espíritú-á<sup>n</sup> xii-dé. <sup>11</sup>Te dǎtnùní ní nene váha saní núú-dë, te ní cutnùní iní-dé, te ní cachí-dé:

—Ndáá sá Yǎ Ndiöxí ní tendaha-gǎ espíritú-ǎ<sup>n</sup> ní quixi-xi ní dácăcu ñaha-xi xii-í cuendá sá và cáhni ñaha té Hèrodés. Te dava ñáyiú isràel ío ní cudíí iní-yu cuendá sá nǐ cuiní té Hèrodés cahni ñaha-dë xii-í —duha ní cachí-dé sátá nǐ cutnùní iní-dé.

<sup>12</sup>Te sátá nǐ cutnùní iní-dé sá nǐ cácu-dé, te cuáhá<sup>n</sup>-dé vehe ii<sup>n</sup> ñaha nàni Mariá nǎná tǎ Juàá, àdi Mácú chi úú dǐu-dé, te xía<sup>n</sup> ndécú vǎi-yu càhá<sup>n</sup> ndíhí-yu Yá Ndiöxí. <sup>13</sup>Te té Pèlú ní quexìo-dé ndéé yuyèhe ní dácásá<sup>n</sup>-dë,

te ní quixi ìí<sup>n</sup> xíchí nání Ròdé ní quixi ndehe-xi nă cúú ñăyiu dâcasa<sup>n</sup>. 14Te ní nucúhu<sup>n</sup> ndudú-xi sá díú tĕ Pèlú, te ní cudíí víhí ìní-xi, dico ñá ní nàcaá<sup>n</sup>-xi yuyèhe. Te ní quene cunu-xi cuáhá<sup>n</sup> ngúñaha-xi xíí-yu sá nútnĭ tĕ Pèlú yuyèhe ndaa quehé. 15Te ñá ní sàndáá ìní-yu tnúhu ní cáhá<sup>n</sup>-xi, te xăhă<sup>n</sup>-yu xii-xi:

—iNá tnúhu vĭhi cáhá<sup>n</sup>-ô<sup>n</sup> xíchí lùcú! —càchí-yu xăhă<sup>n</sup>-yu.

Te xăha<sup>n</sup>-xi să ndàá nútnĭ-dé, te xăhă<sup>n</sup>-yu:

—Ñá díú tĕ Pèlú chi espíritú sá xító ñaha xii-dé cúú să càhá<sup>n</sup> —càchí-yu xăhă<sup>n</sup>-yu xii-xi.

16Te òré duca<sup>n</sup> xĭtnàhá-yu, te tĕ Pèlú ní dácásá<sup>n</sup> tùcu-dé yuyèhe. Te ní sáhá<sup>n</sup>-yu ní nacaá<sup>n</sup>-yu yuyèhe, te ní xiní-yu sá díú tĕ Pèlú, te ní cuñúhu vĭhí-yu. 17Te ní quide-dé ndaha-dé núŭ-yu cuëndá cadí-yu yuhú-yu. Te ní ngúíta-dé ní cani-dé cuëndú nàcuáa ní quide ñaha Yă Ndiôxí xii-dé sá nĭ dácăcu ñaha ìí<sup>n</sup> espíritú xínú cuèchi núú-gă xii-dé vecaá, te ní xáha<sup>n</sup>-dĕ xíí-yu:

—Cúu-ndo tĕ Jàcobó ndĭhi dava-gá ñăyiu sàndáá ìní tnúhu Jèsús nàcuáa ní quide ñaha Yă Ndiôxí xii-í —càchí-dé xăha<sup>n</sup>-dĕ xíí-yu.

Te sátá dúcá<sup>n</sup> nĭ xáha<sup>n</sup>-dĕ, te ní quee-dé cuáhá<sup>n</sup>-dé ìngá xichi.

18Te sátá nĭ túndaá, te ní ngúíta nchaa sandàdú càhá<sup>n</sup> ìí<sup>n</sup> càhá<sup>n</sup> ìí<sup>n</sup>-güedé, te xĭtnàha-güedé:

—Ñá túú-gă tĕ Pèlú yĭhí vècaá, ¿te nása cada-o-i? —càchí-güedé xĭtnàha-güedé.

19Te tĕ Hèrodés ní tendaha-dĕ titní sandàdú cuáhá<sup>n</sup>-güedé cuánúndúcú ñaha-güedé, te ñá ní nàníhí ñáhá-güedĕ xii-dé. Te dătnùní ní cana-dé sandàdú cue tĕe ní xindeé ñáhá xii tĕ Pèlú, te ní tenàá ñáhá-dĕ xii-güedé, te ní xáha<sup>n</sup>-dĕ xii dava-gá cue sandàdú-dé:

—Cahni-ndo cuè tĕe-ă<sup>n</sup> —càchí tĕ Hèrodés xăha<sup>n</sup>-dĕ.

Te dătnùní ní quee tĕ Hèrodés distrítú Jùdeá cuáhá<sup>n</sup>-dé ñuú Cèsareá, yàcá<sup>n</sup> ní ngúndecu-dé.

### Ní xíhí tĕ Hèrodés

20Tĕ Hèrodés ní cudéé<sup>n</sup>-dĕ núú ñăyiu ñuú Tìrú ndĭhi núú ñăyiu ñuú Sìdón. Te xĭă<sup>n</sup> ní ndatnúhu-yu ní cuu ìí<sup>n</sup>nuu tnúhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndĭhi ñáhá-yu xii-dé, te ní ndatnúhu ndĭhí-yu tĕ Blàstú. Te tĕe-á<sup>n</sup> cúú-dĕ chiú<sup>n</sup> quide-dé núú tĕ Hèrodés, te ní chindee tnúhu ñaha-dĕ xíí-yu, chi ní cáhá<sup>n</sup> ndàhú-yu núú tĕ Hèrodés sá vă cadá ŭhú ñáhá-dĕ xíí-yu. Te duca<sup>n</sup> nĭ quidé-yu cuëndá ñuú tĕ Hèrodés-á<sup>n</sup> queé să xéxí-yu. 21Te ní xáha<sup>n</sup> tĕ Hèrodés ná nduu quĭhí<sup>n</sup>-yu ndatnúhu ndĭhi ñaha-dĕ xíí-yu, te nduu-ă<sup>n</sup> nĭ quíunuu-dé ìí<sup>n</sup> dóó văha, ìí<sup>n</sup> sá sácũhnu tĕe tàxi tnuní. Te ní ngóo-dé núú xilé váha, xilé sá sácõo nchĭhi tĕe tàxi tnuní,

te ní nguíta-dé ní cáhá<sup>n</sup> sàhú-dé dóho-yu. <sup>22</sup>Te uu<sup>n</sup>ni ní cuáá-yu te cächí-yu:

—iTée-a càhá<sup>n</sup>-dé dico ñá díú tēe ñuyíú-a cùu-dé chi ndiöxí cúú-dě!  
—cächí-yu xitnàhá-yu.

<sup>23</sup>Te ñiu-ni òré-á<sup>n</sup> ñí yáha ñí<sup>n</sup> espíritú xínú cuèchi núú Yá Ndiöxí, te ní sáñaha-xi cuèhé xii té Hèrodés. Te duca<sup>n</sup> ñí tnahá-dé chi mee-dě ñá ní xáha<sup>n</sup>-dě sá ñáyiú cùu-dé, te ní cáhá<sup>n</sup>-yu sá ndiöxí cúú-dě. Te nchìto-gá-dé ní sanú ñáhá tìndácú xii-dé, te dàtnùnì ní xíhí-dé.

<sup>24</sup>Te ío titní xichi ní sáhá<sup>n</sup> ñáyiú sàndáá iní tnúhu Yá Ndiöxí ní cáhá<sup>n</sup>-yu tnúhu-gá, te ío chítú-yu ní sàndáá iní-yu tnúhu-gá.

<sup>25</sup>Te té Bèé ndihi té Sàulú ní ndihi chiú<sup>n</sup>-güedé, te ní ndee-güedé ñuú Jerusàlén cuáhá<sup>n</sup>-güedé ndihi té Juàá, àdi Mácú chi úú ñiu-dé.

**Té Bèé ndihi té Sàulú cuáhá<sup>n</sup>-güedé dácuaàha-güedé ñáyiú tnúhu Yá Ndiöxí nchaa ñuú xícá**

**13**<sup>1</sup>Te ñuú Antiòquiá ndécú ñí<sup>n</sup> úú cue tée càhá<sup>n</sup> tnúhu Yá Ndiöxí núú nchaa ñáyiú ní sàndáá iní-xi tnúhu-gá. Te ndècu tucu ñí<sup>n</sup> úú cue tée cùu mestrú dácuaàha ñaha-güedé xií-yu tnúhu-gá. ñí<sup>n</sup>-dé nání-dě Bèé, te ñí<sup>n</sup>-dé nání-dě Xímú, te té Xímú-á<sup>n</sup> xáha<sup>n</sup>-güedě Nègrú chi tnuu-dě. Te ingá-dé nání-dě Lùciú, te tée-á<sup>n</sup> cúú-dě tée ñuú Cìrené. Te ingá-dé nání-dě Sàulú, te ingá tucu-dé nání-dě Manàén. Te té Manàén-á<sup>n</sup> ndihi té Hèrodés tée cùu gobiernú Galileá ío váha ní xóo cáhá<sup>n</sup> ndihi tnàha-güedé cútnàhá ní cuu líhli-güedé. <sup>2</sup>Te ñí<sup>n</sup> nduu ñá túú ñá ní xèxi ñáyiú ní sàndáá iní tnúhu Yá Ndiöxí cuèndá mee-ni-gă ní cáhá<sup>n</sup> ndihí-yu, te ní xáha<sup>n</sup> Espíritú Yá Ndiöxí xií-yu:

—Tendaha-ndo tē Bèé ndihi té Sàulú quíhí<sup>n</sup>-güedé dava-gá ñuú cada-güedé chiú<sup>n</sup> tahu-í, chi duca<sup>n</sup> cuìní-í cunduu —cächí Espíritú-gá xáha<sup>n</sup>-xi xíí-yu.

<sup>3</sup>Te ní cáhá<sup>n</sup> ndihi tucú-yu Yá Ndiöxí, te ñá túú tnàhí ná ní xèxi tucú-yu, te ní sacá<sup>n</sup> ndodo-güedé ndaha-güedé díquí tē Bèé ndihi té Sàulú. Te sátá dúcá<sup>n</sup> ñí quide-güedé, te ní quide ndee ñí ñáhá-yu xii-güedé.

**Té Bèé ndihi té Sàulú cuáhá<sup>n</sup>-güedé distritú Chìpré cáhá<sup>n</sup>-güedé tnúhu Yá Ndiöxí**

<sup>4</sup>Te té Bèé ndihi té Sàulú ní quee-güedé cuáhá<sup>n</sup>-güedé cuèndá duca<sup>n</sup> cuìní Espíritú Yá Ndiöxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcá<sup>n</sup> ní quée-güedé bàrcú cuáhá<sup>n</sup>-güedé distritú Chìpré. Te ñuú-á<sup>n</sup> cáá xítí làmár chi ndècu ñuhu yichí xítí ndute.

<sup>5</sup>Te ní quexìo-güedé mei ñuú Salàminá, te ní quene-güedé bàrcú, te ní xica-güedé cuáhá<sup>n</sup>-güedé nchaa veñúhu ñáyiú isràél càhá<sup>n</sup>-güedé tnúhu Yá

Ndiöxí. Te cuáhá<sup>n</sup> ndihi-güedé té Juàá cuèndá chindee ñàha-dé xii-güedé. <sup>6</sup>Te ní tñii-güedé ichi cuáhá<sup>n</sup>-güedé ñuú Páfós cáá ndàa ingá xio Chìpré, te yàcá<sup>n</sup> ní naníhí tnáhá-güedě ndihi ì<sup>n</sup> tée isràél nání-dě Barjèsús, te tée-á<sup>n</sup> xìní-dé cada ndùu-dé, te càchí-dé sá càhá<sup>n</sup>-dé tnúhu Yá Ndiöxí dico ñá ndàá. <sup>7</sup>Te tée-á<sup>n</sup> quidé chiù<sup>n</sup>-dé ndihi té Sèrgiú, àdi Páblú chi úú òu-dé, te cùu-dé gobièrnú Chìpré, te ío túha-dé. Te ní cana-dé té Bèé ndihi té Sàulú, chi cuìní-dé cundedóho-dé tnúhu Yá Ndiöxí. <sup>8</sup>Te tée quide nduu-á<sup>n</sup> ñá ní dàña-dé cáhá<sup>n</sup>-güedé tnúhu-gá, chi ñá ní cuìní-dé sá tée cùu gobièrnú-á<sup>n</sup> tuha-dé ichi Yá Ndiöxí. Te duca<sup>n</sup> ñí quide té Barjèsús, tée xàha<sup>n</sup>-güedě Èlimás. <sup>9</sup>Te tnàhá tucu té Sàulú ndécú úú òu-dé chi xàha<sup>n</sup> tùcu-güedé Páblú, te ndècu ndihi-dé Espiritú Yá Ndiöxí. Te ní xíndéhé ñí ñáhá-dě xii tée quide nduu-á<sup>n</sup>. <sup>10</sup>Te ní xáha<sup>n</sup>-dě:

—Yòhó, chi dàtná quidé yùcu ñávàha quide-n chi mee-ni dándahú-n ñáyiu. Yòhó cúu-n dèhe sácuihná, chi nchaa tnúhu váha cuìní Yá Ndiöxí cáhá<sup>n</sup>-yu, te yòhó ñá dáñá-n. <sup>11</sup>Te vitna quiní-n nàcuáa cunduu, chi taxi Yá Ndiöxí ì<sup>n</sup> castiú xii-n chi vá cútnùní-gá núu-n càca cuu-n ì<sup>n</sup> úú nduu —càchí-dé xàha<sup>n</sup>-dě xii tée quide nduu-á<sup>n</sup>.

Te òré duca<sup>n</sup> ñí xáha<sup>n</sup> tē Páblú xii-dé, te òré-ni ní cuaa-dé, te ñá túú ní cùtnuní tnàhí-gá núu-dě, te ní xóo nducu-nă-dé ñáyiu ní xóo cuita nehe ñaha xii-dé. <sup>12</sup>Te tée cùu gobièrnú ní xìní-dé nàcuáa ní quide té Páblú, te ío ní cuñúhu-dé. Te ní tnahá iní-dé tnúhu Jèsús, núu xíá<sup>n</sup> ní sándáá iní-dé.

### **Té Páblú ndihi té Bèé ndécú-güedě ñuú Antiòquiá Pìsidiá**

<sup>13</sup>Te té Páblú ndihi dava-gá cue tée xica cuu ndihi-dé ní quée-güedé bàrcú, te ní quee-güedé ñuú Páfós cuáhá<sup>n</sup>-güedé ñuú Pèrgé, te ñuú-á<sup>n</sup> yíndèhu-xi distritú Pànfilíá. Te té Juàá ní nacuico-dě ní dándöo ñaha-dě xii-güedé cuánuhú-dé ñuú Jerusàlén. <sup>14</sup>Te dava-gá-güedé ní quee-güedé ñuú Pèrgé cuáhá<sup>n</sup>-güedé ñuú Antiòquiá, te Pìsidiá yíndàha-xi ñuú-á<sup>n</sup>. Te nduu xíndetatú-yu, te ní sáhá<sup>n</sup>-güedé veñúhu ñáyiu isràél, te ní ngóo-güedé xití veñúhu. <sup>15</sup>Te cue tée ndècu veñúhu ní quehe<sup>n</sup>-güedé tutú yódó tnùní nchaa tnúhu sá ñí chídó tnùní ndíi Moisés ndihi tutú yódó tnùní nchaa tnúhu sá ñí chídó tnùní dava-gá cue tée ní xóo cáhá<sup>n</sup> tnúhu Yá Ndiöxí ndéé sanaha, te ní dácuáhá-güedě ní xíndedóho cue ñáyiu, te dàtnùní cue tée yíndaha veñúhu-á<sup>n</sup> ñí xáha<sup>n</sup>-güedě xii té Páblú ndihi dava-gá-güedé:

—Nchòhó cue tée cùu ñaní tnáhá-ndě, te núu cuìní-ndó cãhá<sup>n</sup>-ndó tnúhu Yá Ndiöxí, te cuu cáhá<sup>n</sup>-ndó tnàvíí cuèndá cutúha-yu —càchí-güedé xàha<sup>n</sup>-güedě.

<sup>16</sup>Te té Páblú ní ndacuñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáhá<sup>n</sup>-dé, te ní xáha<sup>n</sup>-dě:

—Te nchòhó ñáyiú quide nchaa nacúaa càhá<sup>n</sup> Yă Ndiöxí ndihi nchaa nchòhó ñáyiú isràél, cundedóho-ndo nchaa-ndo ì<sup>n</sup> tnúhu na càhá<sup>n</sup>-í-a. 17Te cuèi ndéé sanduu te cuèi vitna chindee ñaha-ni Yá Ndiöxí xii nchaa ñáyiú isràél, te ní nacáxi ñaha-gă xií-yu te ní chindee ñaha-gă cuendá cáyá-yu, chi cuiní-gă sá cúú vâi-yu, te duca<sup>n</sup> ñi quide-gă cútnàhá ní xíndecú-yu nàció<sup>n</sup> Ègiptú. Te dătnùní ní dácăcu ñaha-gă xií-yu ñuú-á<sup>n</sup>, chi mee-gă nchaa ndăcu-gă quidé-gă. 18Te ní xíndecú-yu ì<sup>n</sup> xichi núú ñà túú tnàhí sàcúndecu ñáyiú údico cuía, te xití údico cuía-ă<sup>n</sup> ñi cundee ìní-gă nchaa sá ñi quidé-yu. 19Te Yá Ndiöxí ní chindee ñaha-gă xii ñáyiú isràél, te ní dánáă-yu úsá nàció<sup>n</sup>, chi cuendá ní cuiní-gă cuu cuendá-yu ñuhú-á<sup>n</sup>. 20Te dătnùní ní cachí Yă Ndiöxí sá díú-ní cuè tée cùchiu<sup>n</sup> taxi tnuní-güedé nchaa ñáyiú, te duca<sup>n</sup> ñi quide-güedé dătná cúmí ciendú dava cuía. Te sátá xăă<sup>n</sup>, te ní xíndecu té Sămuél tée ní cáhá<sup>n</sup> tnúhu Yá Ndiöxí. 21Te dăvâ-á<sup>n</sup> ñi cuiní ñáyiú isràél sá cúndecu ì<sup>n</sup> tée quindaha ñaha-dé xií-yu, te Yá Ndiöxí ní cachí-gă sá tē Sàúl quindaha-dě-yu, te tē-á<sup>n</sup> ñi cuu-dé déhe té Cïs, te té Benjâmín tē ní xíndecu ndéé sanaha-gă ní cuu ñaní tnáhá-dě. Te té Sàúl ní xíndaha-dě ñáyiú údico cuía. 22Te Yá Ndiöxí ñá ní cuiní-gă cundecu-ni-dé quindaha-dě ñáyiú, chi ní cuiní-gă sá tē Dăvií ndíhu ndaha-dě cue ñáyiú isràél, te ní cachí-gă: “Ío váha ní tnahá ìní-í năcuáa quide té Dăvií déhe tē Isái, te cada-dé nchaa năcuáa cúñaha-ï xii-dé”, duha ní cachí Yă Ndiöxí —càchí té Păblú xăha<sup>n</sup>-dě xií-yu.

23Te ní xáha<sup>n</sup> tucu té Păblú:

—Díu-ni ñaní tnáhá tē Dăvií cúú Jèsús. Te Yá Ndiöxí ní tendaha-gă Jèsús ní quixi-gă ñuyúú-a cuendá nchaa ñáyiú isràél ná quèndáá ìní ñáhá xii Jèsús naníhí tăhú-yu, chi duca<sup>n</sup> ñi cachí Yă Ndiöxí cunduu. 24Te cútnàhá vátá nguíta-gă Jèsús cáhá<sup>n</sup>-gă tnúhu Yá Ndiöxí, te ní cáhá<sup>n</sup> té Juáa núú ñáyiú isràél sá xíní ñuhu-xi dăná-yu nchaa sá cuèhé sá dúhá, te cuanduté-yu. 25Te sa ta cùyatni-ni-gă cuú-dé, te ní xáha<sup>n</sup>-dě xií-yu: “Nchòhó càchí-ndó să yŷhú cúú-í Crístú Yaá ndétú-ndó dico ñáhá, chi ñá díú yŷhú cúú-í Crístú, chi davitna quixi Crístú Yaá tendaha Yă Ndiöxí quixi ñuyúú-a. Te yŷhú cúú-í ì<sup>n</sup> tē duu<sup>n</sup> duu<sup>n</sup> ñá túú tàú nandaxi cuèdicó chàú-gă dico quide-í chiú<sup>n</sup>-gă”, duha ní cáhá<sup>n</sup> te Juáa —càchí té Păblú xăha<sup>n</sup>-dě xií-yu.

26Te ní xáha<sup>n</sup> tucu té Păblú:

—Cundedóho tucu-ndo ìngá tnúhu na càhá<sup>n</sup>-í. Nchòhó tnáhá-ndó cùu-ndo ñaní tnáhá ndíi Àbrahám, te xíní-ndó să Yă Ndiöxí cúnùu-gă. Te díu-ni-gă cuiní-gă sá ncháá-ndó cundedóho-ndo tnúhu-gă, chi cùu-xi tnúhu sá càhá<sup>n</sup> năcuáa naníhí tăhú-ndó. 27Te nchaa ñáyiú ndècu ñuú Jerusàlén ndihi nchaa cue tē cùnùu ñá ní cùtnuní ìní-yu ndihi-güedé sá Yă Ndiöxí ní tendaha-gă Jèsús ní quixi-gă ñuyúú-a. Te ñá ní săha-yu cuendá sá díú Jèsús

ní cacunehe cue téé ní cáhá<sup>n</sup> tnúhu Yá Ndiöxí ndéé sanaha cuëi ní dácuáhă-yu tnúhu-gá veñúhu-yu ndi tnahá úná nduu, nduu ndètatú-yu. Te ní cachí-yu sá ndècuéchi Jèsús, te ní xáhă<sup>n</sup>-yu sá cáhni ñaha-güedé xii-gá. Te xíă<sup>n</sup> sa ñaha cue téé ní xóo cáhá<sup>n</sup> tnúhu-gá ndéé sanaha sã dúcá<sup>n</sup> càhá<sup>n</sup>-yu. **28**Te cuëi ñá túú ñă ní quide-gá te ní xáhă<sup>n</sup>-yu xii té Pìlatú téé cùu gobiernú sá táuchìu<sup>n</sup>-dé cahni ñaha-güedě xii-gá. **29**Te xíă<sup>n</sup> ñuu ní sata caa ñaha-güedě xii-gá núú cùrúxí. Te ní quide-güedé nchaa nàcuáa ní chídó tnùní cue téé ní cáhá<sup>n</sup> tnúhu Yá Ndiöxí ndéé sanaha. Te sátá ñí xíhí-gá, te ní nunehe ñaha-güedě xii-gá núú cùrúxí, te nchìdo ñaha-güedé cuáhă<sup>n</sup>, te ní chihi ñaha-güedě ì<sup>n</sup> xití yaú. **30**Te Yá Ndiöxí ní dándótó-gă Jèsús. **31**Te titní xito ní sáhă<sup>n</sup> Jèsús núú ndécú ñăyiu ní xica cuu ndihi-gá, ñăyiu ní quee distritú Galileá ní sáhă<sup>n</sup>-yu ndihi-gá ñuu Jerusàlén. Te vitna nchaa ñăyiu-á<sup>n</sup> xáhă<sup>n</sup>-yu xii dava-gá ñăyiu isràél nàcuáa ní cuu ní ndoto-gá.

**32**Te nchúhú càhá<sup>n</sup>-ndí nàcuáa cada-ndo nàníhí tàhú-ndó, chi Yá Ndiöxí ní xáha<sup>n</sup>-gă xii cue ñaní tnáhá-ó ñí xíndecu ndéé sanaha sã téndàha-gá Déhe-gá Jèsús quixi-gá ñuyíú-a. **33**Te ní quixi-gá ní xíhí-gá, te ní dándótó ñaha Yá Ndiöxí xii-gá, te núú xíă<sup>n</sup> naníhí tàhú-ó ñuu na quèndáa iní-ó-gă. Te ì<sup>n</sup> téé ní cáhá<sup>n</sup> tnúhu Yá Ndiöxí ndéé sanaha ñí chídó tnùní-dé núú sàlmú cúú ùú nàcuáa ní cáhá<sup>n</sup> Yă Ndiöxí ní xáha<sup>n</sup>-gă xii Déhe-gá, te duha ní xáha<sup>n</sup>-gă: “Yòhó cúú-n Dêhe-í, te vitna cutnùní iní ñăyiu sá yùhú cúú-í Tătá-n”, duha ní xáha<sup>n</sup>-gă xii Jèsús. Te ñiu-ni duca<sup>n</sup> ñí chídó tnùní téé ní cáhá<sup>n</sup> tnúhu-gá ndéé sanaha. **34**Te ingá xichi tucu núú tütú-gá ní chídó tnùní ì<sup>n</sup> téé ní xíndecu ndéé sanaha nàcuáa ní xáha<sup>n</sup>-gă xii Déhe-gá, te duha ní xáha<sup>n</sup>-gă: “Mee-ni sã văha cada ñaha-ï dàtná ní xíi-í té Dàvíí”, duha ní xáha<sup>n</sup>-gă. Te duca<sup>n</sup> ñí chídó tnùní téé ní xíndecu ndéé sanaha nàcuáa ní cáhá<sup>n</sup> Yă Ndiöxí, chi òré ní xíhí Jèsús te ní dándótó ñaha-gá cuèndá sá vă tíú yìqui cuñú-gá. **35**Te núú xíă<sup>n</sup> duha ní chídó tnùní ì<sup>n</sup> téé ní xíndecu ndéé sanaha núú librú Sàlmú nàcuáa ní xáha<sup>n</sup>-dě xii-gá: “Vă dáñá-n sã tíú yìqui cuñú Déhe-n chi ío văha quide-gá”, duha ní chídó tnùní téé ní xíndecu ndéé sanaha —càchí té Păblú xáha<sup>n</sup>-dě xii-yu.

**36**Te xáha<sup>n</sup> tùcu-dé:

—Te té Dàvíí ní quide-dé nchaa chiu<sup>n</sup> ní táhú Yă Ndiöxí cada-dé, te dàtnùní ní xíhí-dé. Te ní chindúxi ñaha-güedě xii-dé yatni nàcuáa yìndúxi cue ñaní tnáhá-dě ndéé sanaha-gă, te xíă<sup>n</sup> ñí téhyú yìqui cuñú-dé. **37**Te Jèsús chi ñá ní tēhyú yiqui cuñú-gá, chi ní dándótó ñaha Yá Ndiöxí xii-gá. **38**Te cuìní-í cachí tnúhu-í xii-ndo cuèndá cutnùní iní-ndó nchàa-ndo sá cádá càhnu iní Yă Ndiöxí nchaa cuéchi-o, chi ní xíhí Jèsús cuèndá naníhí tàhú-ó. **39**Te nchaa ñăyiu na quèndáa iní ñáhă xii Jesús te cada càhnu iní-gá nchaa sá ñà túú văha ní quidé-yu, chi núú mee-ni tnúhu ní chídó



tnùní ndíi Moisés ná quèndáá iní-yu te vá nánihí tàhú-yu. **40-41** Te ío coto-ndo mée-ndo cuendá sá vǎ yǎha-ndo dàtná ní cachí Yǎ Ndiöxí yáha cue ñáyiu ñá túú ní quèide váha ní xíndecu ndéé sanaha. Te nàcuáa ní cáhá<sup>n</sup>-gá ní chídó tnùní ì<sup>n</sup> téé ní cáhá<sup>n</sup> tnúhu-gá ndéé sanaha, te duha ní xáha<sup>n</sup>-gǎ xií-yu dàvá-á<sup>n</sup>:

Cundedóho nchaa nchòhó ñáyiu cuèhé yuhu-xi na càhá<sup>n</sup>-í ì<sup>n</sup> tnúhu te quiní-ndó ñǎ cuñúhu-ndo,  
yúhú quídè-í vǎi núú sǎ ìo váha vitna ndècu-ndo ñuyíú-a,  
te cuèi na còo ñáyiu cachí tnúhu xii-ndo nàcuáa ndùu nchaa sá vǎha-á<sup>n</sup>, dico nchòhó vá quèndáá iní-ndó,  
te sá dúcá<sup>n</sup> càda-ndo vá quèndáá iní-ndó, te dàcuíta nihnu-ndo mée-ndo.

Duha ní xáha<sup>n</sup>-gǎ xií-yu te duca<sup>n</sup> ñǎ chídó tnùní téé ní cáhá<sup>n</sup> tnúhu-gá ndéé sanaha —càchí té Pǎblú xǎha<sup>n</sup>-dǎ xií-yu.

**42** Te òré ní ndee té Pǎblú veñúhu ñáyiu isràél ndihí cue téé xica cuu ndihí-dé, te ní cáhá<sup>n</sup> ndàhú ñáyiu yèhi veñúhu núú-dǎ sá quèhí<sup>n</sup>-dé núú ùná nduu, te ñiu-ni tnúhu ní cáhá<sup>n</sup>-dé cáhá<sup>n</sup> tucu-dé òré quexìo-dé. **43** Te sátá ñǎ túhú veñúhu-yu, te vǎi ñáyiu isràél ndihí ñáyiu ní chitnahá ñáhá xii-yu nchìcú<sup>n</sup> nihnu quèide nacuáa quèdé-yu càhá<sup>n</sup> ndihí-yu Yá Ndiöxí cuáhá<sup>n</sup> ndihí-yu té Pǎblú ndihí té Bèé. Te ní xáha<sup>n</sup>-güedǎ xií-yu sá vǎ dáñá ndèé-yu canchicú<sup>n</sup> nihnú-yu tnúhu sá càhá<sup>n</sup> nàcuáa quèide Yá Ndiöxí sá cúú-xí-yu.

**44** Te núú ùná nduu, nduu ndètátú-yu ní quexìo vai vihi ñáyiu, chi ñihí ñuu ní quexìo ndedóho-yu tnúhu Yá Ndiöxí. **45** Te cuèndá sá ìo vǎi ñáyiu ní quexìo, núú xíǎ<sup>n</sup> ní cuu cuédú iní ñáhá ñáyiu isràél xii té Pǎblú, te ní xícuèhé ñáhǎ-yu xii-dé. Te ní xáhǎ<sup>n</sup>-yu xii-dé sá dándàhú ñáhá-dǎ xií-yu ndihí tnúhu càhá<sup>n</sup>-dé. **46** Te té Pǎblú ndihí té Bèé ñá túú ní yùhú ñáhá-güedǎ xií-yu. Te ní xáha<sup>n</sup>-güedǎ:

—Xini ñuhu-xi díhna-gá nchòhó ñáyiu isràél cáhá<sup>n</sup> ndihí-ndí tnúhu Yá Ndiöxí, te mee-ndo ñǎ cuiní-ndó cundedóho-ndo. Te sá dúcá<sup>n</sup> quèide-ndo, te vá nánihí tàhú-ndó, te ni vǎ càhá<sup>n</sup>-gá-ndí tnúhu Yá Ndiöxí núú-ndó, dico cáhá<sup>n</sup>-ndí núú dàva-gá ñáyiu cuèi ñá díú ñáyiu isràél cúú-yu, **47** chi duca<sup>n</sup> ñǎ táuchíú<sup>n</sup> Yá Ndiöxí cada-ndí. Te ní cachí-gá:

Cuíní-í cundecu-ndo dàtná ì<sup>n</sup> téé yòtnuú ñuhú cundecu-ndo cǎhá<sup>n</sup>-ndó tnúhu-í núú nchàa ñáyiu ñá túú cùndihí-ndo ñáyiu ndècu ñihí ñuyíú, te naníhí tàhú-yu,

duha ní cáhá<sup>n</sup>-gá —càchí té Pǎblú ndihí té Bèé xǎha<sup>n</sup>-güedǎ xií-yu.

**48** Te ñáyiu ñá túú cùu ñáyiu isràél ío ní cudíí iní-yu sá dúcá<sup>n</sup> ñǎ cáhá<sup>n</sup>-güedé, te ní xítnahá-yu sá ìo váha cuáhá<sup>n</sup> tnúhu Yá Ndiöxí. Te mee Yá Ndiöxí sa nàha-gá nándi cùu ñáyiu naníhí tàhú, te ñiu-ni ñáyiu-á<sup>n</sup> ñǎ sándáá iní-yu. **49** Te nchaa xichi xíá<sup>n</sup> ñǎ sáhá<sup>n</sup>-yu ní cáhá<sup>n</sup>-yu tnúhu-gá. **50** Te cue téé isràél ní ndatnúhu-güedé ndihí cue téé cùnuu, ndihí cue ñáyiu

dìhí cúnùu, te ñáyiú dìhí-á<sup>n</sup> ñà túú tnàhí cùmánĩ-yu veñúhu. Te ní xáha<sup>n</sup>-güedě sá cáda úhú-yu té Păblú ndihí té Bèé, te dătnùnı́ cuícú<sup>n</sup> ñáhă-yu xii-güedé, te duca<sup>n</sup> ñı́ quidé-yu. <sup>51</sup>Te ní casa<sup>n</sup> ñuhu té Păblú ndihí té Bèé sáhă-güedě ní naquidi-güedé tı́cá chúhmá ñı́ tnı́ sáhă-güedě. Te duca<sup>n</sup> ñı́ quide-güedé cuendá cutnùnı́ inı́-yu sá ñà túú ní quide váha-yu. Te dătnùnı́ ní quee-güedé cuáhă<sup>n</sup>-güedé ñuú Ìconiú. <sup>52</sup>Te ñáyiú ní sándáá inı́-xi tnúhu Jèsús ío váha ní cuu inı́-yu cuendá sá ñı́ nanı́hı́ tàhú-yu, te nchaá-yu sa ndècu ndihı́-yu Espı́ritú Yă Ndiöxı́.

**Té Păblú ndihı́ té Bèé ndécú-güedě ñuú Ìconiú**

**14** <sup>1</sup>Te ní quexı́o té Păblú ndihı́ té Bèé ñuú Ìconiú. Te ní sáhă<sup>n</sup>-güedé veñúhu ñáyiú isràél, te ío váha ní cáhá<sup>n</sup>-güedé tnúhu Yă Ndiöxı́, te vâi ñáyiú isràél ndihı́ ñáyiú ñá túú cùu ñáyiú isràél ní sándáá inı́-yu tnúhu-gá. <sup>2</sup>Te dava ñáyiú isràél ñá ní sándáá inı́-yu, te ní cáhá<sup>n</sup> cuèhé-yu cuendá té Păblú ndihı́ té Bèé cuendá sá vă quındáá inı́ ñáyiú ñá túú cùu ñáyiú isràél. <sup>3</sup>Te ní xındecu-güedé titnı́ nduu, te ñá túú tnàhı́ ni yùhú-güedé ní dăcuáhă-güedě ñáyiú tnúhu Yă Ndiöxı́. Te mee-gă ní chindee ñàha-gá ní quide-güedé titnı́ núú să vă yöo tnàhı́ ndàcu cada, te ío ní cuñúhu-yu. Te duca<sup>n</sup> ñı́ quide-gá cuendá cutnùnı́ inı́-yu sá ndáá càhá<sup>n</sup>-güedé sá méé-gă ío cùu inı́ ñáhă-gă xı́-yu, te nanı́hı́ tàhú-yu núu na quındáá inı́-yu tnúhu-gá. <sup>4</sup>Te ní quee dava ñáyiú ñuú Ìconiú, davá-yu cùndihı́-yu ñáyiú isràél ñáyiú ñá túú sándáá inı́ tnúhu Jèsús. Te davá-yu cùndihı́-yu cue tée ní táuchı́ú<sup>n</sup> Jèsús càhá<sup>n</sup> tnúhu-gá. <sup>5</sup>Te ñáyiú isràél ndihı́ dava-gá ñáyiú ñá túú sándáá inı́-xi ní cuu ñı́nùú-yu ndihı́ cue tée cùnuu sá cánı́-yu-güedé, te cuáha yúú ñáhă-yu xii-güedé. <sup>6</sup>Te té Păblú ndihı́ té Bèé ní níhı́-güedě tnúhu sá cuını́-yu canı́há-yu, núu xı́ă<sup>n</sup> dayuhu ñı́ quee-güedé cuáhă<sup>n</sup>-güedé ñuú Lıstrá ndihı́ ñuú Dèrbé. Te ndı́ ndúú ñuú-á<sup>n</sup> yındèhu-xi Licaoniá. Te ní sáhă<sup>n</sup>-güedé dava-gá ñuú lıhli càa yatni xı́ă<sup>n</sup>. <sup>7</sup>Te nchaa ñuú-á<sup>n</sup> ñı́ cáhá<sup>n</sup>-güedé tnúhu Jèsús.

**Ñuú Lıstrá ní sáha yúú ñáhă-yu xii té Păblú**

<sup>8</sup>Te ñuú Lıstrá ndécú ñı́ tée yacua, mee-ni núcóo-dé chi duca<sup>n</sup> tnàhı́ càa-dé ní cacu-dé. <sup>9</sup>Te ndèdóho-dé tnúhu càhá<sup>n</sup> té Păblú, te ní cutnùnı́ inı́ té Păblú sá ío sándáá inı́ tée yacua-ă<sup>n</sup> să Yă Ndiöxı́ cada tátna ñàha-gă xii-dé, núu xı́ă<sup>n</sup> ní xındéhé ñàha váha té Păblú xii-dé. <sup>10</sup>Te té Păblú ní cáhá<sup>n</sup> níhi-dé, te ní xáha<sup>n</sup>-dě:

—Ndacuíñı́ cunutnı́ váha-n —càchı́-dé xăha<sup>n</sup>-dě.

Te ní ndacuíñı́ cunu-dé te ní xica-ni-dé. <sup>11</sup>Te òré ní xinı́-yu sá tē Păblú ní quide tátna-dé tée yacua-ă<sup>n</sup>, te nchaá-yu ní cáhá<sup>n</sup>-yu tnúhu mée-yu tnúhu Licàoniá. Te ní cáhá<sup>n</sup> níhi-yu, te xı́tnàhá-yu:

—Cue tée-ǎ<sup>n</sup> sànuu sá ñǎyiu cùu-güedé dico ñáhá, chi ndiöxí cúu-güedé te ní quexìo-güedé ñuyíu-a —càchí-yu xìtnàhá-yu.

12Te ní cachí-yu sá tē Bèé cúu-dě ndiöxí dánàní-yu Jüpitér, te té Pǎblú cúu-dě ndiöxí dánàní-yu Mèrcuriú, chi cuendá tée-á<sup>n</sup> cúu-dě tée càhá<sup>n</sup>.

13Te càa ì<sup>n</sup> veñúhu yuhu ñùú-á<sup>n</sup> núú quidé càhnú-yu ndiöxí sá dánàní-yu Jüpitér. Te dútú yíndàha veñúhu-á<sup>n</sup> ndécá-dě ì<sup>n</sup> úú ndicutu cuáhá<sup>n</sup> quehé veñúhu, te ñùhu itá dúcú<sup>n</sup>-güedi. Te cue quití-á<sup>n</sup> cahni-dé cada càhnu-dé ndihí-yu té Bèé ndihí té Pǎblú ní cùu, chi duca<sup>n</sup> quidé-yu quide cahnú-yu ndiöxí-yu. 14Te té Bèé ndihí té Pǎblú ní níhí-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuendá cutnùní iní-yu sá ñǎ tnàhá iní-güedé nàcuáa sàni iní-yu cadá-yu. Te xínu-güedé cuánguihu-güedé tnuú-yu, te níhi ní cáhá<sup>n</sup>-güedé, te xǎha<sup>n</sup>-güedé:

15—¿Ná cuendá duca<sup>n</sup> cuiní-ndó càda-ndo? Te diu-ni tnàha ñáyiu-ndo cùu-ndí, dicó-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vǎ cadá-gǎ-ndó nàcuáa quide-ndo, te quindáá iní-ndó Yǎ Ndiöxí, chi ì<sup>n</sup>dii-ni Yá Ndiöxí ndécú. Te diu-gá ní cadúha-gá andiu ndihí ñuyíu-a ndihí làmár ndihí nchaandi túhú sá ió ñuyíu-a. 16Te ndéé sanaha ñǎ dáñá Yǎ Ndiöxí ní quidé-yu nàcuáa cuáhá<sup>n</sup> iní méè-yu. 17Te ní xóo cada-gá sá vǎha cuendá cutnùní iní-yu sá ió vǎha iní-gá. Te diu-gá dácùu<sup>n</sup>-gá dáú, te tàxi-gá sá nchító-ó chi xìto-gá nchaa tatá xítú-ó, te xǎ<sup>n</sup> cúdí ìní-ó ndècu-o ñuyíu-a —càchí té Pǎblú ndihí té Bèé xǎha<sup>n</sup>-güedé xii-yu.

18Te cuèi duca<sup>n</sup> ñǎ xǎha<sup>n</sup>-güedé nchaa tnúhu-á<sup>n</sup>, dico ió úhú ní sándáá iní-yu ñá ní sàhní-yu ndicutu-á<sup>n</sup> chi cuendá duca<sup>n</sup> tnàhí quidé-yu sàhní-yu ndicutu òré quidé càhnú-yu ndiöxí-yu.

19Te ñuú Antiòquiá ndihí ñuú Ìconiú xíndecu dava ñáyiu isràél, te ní queé-yu cuáhá<sup>n</sup>-yu ñuú Lìstrá núú ndécú tē Pǎblú. Te xía<sup>n</sup> ñǎ quexìo-yu te ní xáhǎ<sup>n</sup>-yu xii ñáyiu dii ñùú xía<sup>n</sup> sǎ cáhñi-yu té Pǎblú. Te ní sáha yúú ñáhǎ-yu xii-dé, te ní cáhǎ<sup>n</sup>-yu sá ñǎ xíhí-dé, te ní tñii ñaha-güedé xii-dé, te tañuhu ñaha-güedé xii-dé cuáhá<sup>n</sup> ì<sup>n</sup> xio yuhu ñùú ní sá dáquéné ñaha-güedé. 20Te ní quexìo cue ñáyiu sándáá iní tnúhu Jèsús núú cātùu-dé-á<sup>n</sup>, te ní nadúcú<sup>n</sup> ndèè ñáhǎ-yu xii-dé, te nini xínutnǎi-yu-á<sup>n</sup> ñǎ ndacóo-dé cuánuhú ndihí ñaha tucu-dé xii-yu xití ñuú. Te nduu tnèè-á<sup>n</sup> ñǎ ndee-dé ndihí té Bèé cuáhá<sup>n</sup>-güedé ñuú Dèrbé.

21Te ní cáhá<sup>n</sup>-güedé tnúhu Yá Ndiöxí ñuú-á<sup>n</sup>, te ió vǎi ñáyiu ní sándáá iní-yu tnúhu-gá. Te dǎtnùní ní quee-güedé cuáhá<sup>n</sup> tucu-güedé ñuú Lìstrá, ndihí ñuú Ìconiú, ndihí ñuú Antiòquiá. 22Te ní xǎha<sup>n</sup>-güedé xii-yu sá vǎ dáñá ñìhnú-yu tnúhu Jèsús. Te sá dúcá<sup>n</sup> ñǎ cáhá<sup>n</sup>-güedé, te vìhi-gá ní cudí iní-yu cadá-yu nàcuáa cuiní Yǎ Ndiöxí cadá-yu, te ní xǎha<sup>n</sup>-güedé:

—Dacuití cùndecu-o ñuyíu-a ndoho-o, te dǎtnùní duca<sup>n</sup> te nacuaca ñaha Yǎ Ndiöxí xii-o —càchí-güedé xǎha<sup>n</sup>-güedé xii-yu.

**23**Te ní sáhá<sup>n</sup>-güedé ndi tnahá ì<sup>n</sup> ì<sup>n</sup> xichi núú ndécú ñäyiu dàcuaha tnúhu Yá Ndiöxí, te ní taxi ndecu-güedé cue téé quindaha ñaha xií-yu, te ní cáhá<sup>n</sup> ndihi-güedé Yă Ndiöxí, te ñá túú tnàhí ná ní xèxi-güedé cuèndá sá ñí cáhá<sup>n</sup> ndihi-güedé-gá. Te ní xáha<sup>n</sup>-güedé sá Yă Ndiöxí coto ñaha-gă xií-yu chi diu-ni-gá ní sándáá iní-yu.

**Té Păblú ndihi té Bèé cuáhá<sup>n</sup> tucu-güedé ñuú Antiòquiá Siriá**

**24-25**Te dătnùní ní quee té Păblú ndihi té Bèé cuáhá<sup>n</sup>-güedé, ní yáha-güedé distrítú Pìsidiá. Te ní quexìo-güedé ñuú Pèrgé, xíá<sup>n</sup> ñí cáhá<sup>n</sup>-güedé tnúhu Jèsús. Te ñuú-á<sup>n</sup> yíndèhu-xi Panfiliá. Te dătnùní cuáhá<sup>n</sup>-güedé ñuú Àtaliá. **26**Te yàcá<sup>n</sup> ní quee-güedé bàrcú cuánuhú tucu-güedé ñuú Antiòquiá. Te ñuú-á<sup>n</sup> cúu-xí ñùú núú ñí xícá<sup>n</sup> táhŭ-yu núú Yă Ndiöxí cuèndá sá chíndèè ñaha-gá xii-güedé chiu<sup>n</sup> quide-güedé. Te cuèndá sá ñí ndihi chiu<sup>n</sup>-güedé nchaa ñuú núú ñí sáhá<sup>n</sup>-güedé, núú xíá<sup>n</sup> cuánuhú-na-güedé. **27**Te ní ndexìo-güedé ñuú-á<sup>n</sup>, te ní cana-güedé nchaa ñáyiu sándáá iní tnúhu-gá, te ní cani-güedé cuèndú núú-yu nchaa nàcuáa ní cuu núú ñí sáhá<sup>n</sup>-güedé, te xăha<sup>n</sup>-güedé: “Yá Ndiöxí ío ní chindee ñaha-gá xii-ndí ní cáhá<sup>n</sup>-ndí tnúhu-gá núú ñí sáhá<sup>n</sup>-ndí, te mee-gă ní quide sá tnàhá ñáyiu ñá túú cùu ñáyiu isràél ní xíndedóho-yu tnúhu-gá cuèndá quíndáá iní-yu”, cächí-güedé xăha<sup>n</sup>-güedé xií-yu. **28**Te vâi nduu ní xíndecu-güedé ñuú Antiòquiá ndihi nchaa ñáyiu ní sándáá iní tnúhu Jèsús.

**Ní natacá ñáyiu sándáá iní tnúhu Jèsús ñuú Jerusàlén**

**15**<sup>1</sup>Te ní quee ì<sup>n</sup> ũú cue téé distrítú Jùdeá cuáhá<sup>n</sup>-güedé ñuú Antiòquiá, te ní sáá-güedé, te ní xáha<sup>n</sup>-güedé xii ñáyiu sándáá iní tnúhu Jèsús sá ñuu vá cuăha-güedé sēñá ñii nchaa cue téé dătná ní cachí ndíi Moisés, te vá nánihí tàhú-güedé. <sup>2</sup>Te sá dúcá<sup>n</sup> ñí cáhá<sup>n</sup> cue téé-á<sup>n</sup>, te ní ngúíta té Păblú ndihi té Bèé ní tenàá-güedé cue téé-á<sup>n</sup>, chi dandàhú ñáhá-güedé cuíní-güedé ní cùu. Te nchaa ñáyiu sándáá iní tnúhu-gá ní cachí-yu sá quihí<sup>n</sup> té Păblú ndihi té Bèé ndihi ì<sup>n</sup> ũú-gá-güedé ñuú Jerusàlén. Te yàcá<sup>n</sup> cada-güedé ì<sup>n</sup> jùndá ndihi mee-ni cuè téé ní táuchíú<sup>n</sup> Jèsús cáhá<sup>n</sup> tnúhu-gá, ndihi cue téé yìndaha ñáyiu sándáá iní tnúhu-gá ñuú-á<sup>n</sup>, te jùndá-á<sup>n</sup> cada ndáá-güedé tnúhu ní cáhá<sup>n</sup> cue téé ní sáá ñuú Antiòquiá.

<sup>3</sup>Te nchaa ñáyiu sándáá iní tnúhu-gá ní quide ndee ìní ñáhă-yu xii-güedé, te ní tñi-güedé ichi cuáhá<sup>n</sup>-güedé. Te ní yáha-güedé distrítú Fèniciá ndihi distrítú Sàmariá, te yàcá<sup>n</sup> ní cani-güedé cuèndú nása ní cuu ní tuha ñáyiu ñá túú cùu ñáyiu isràél ichi Yá Ndiöxí, te ní cudíí víhí ìní nchaa ñáyiu ní xíndedóho-á<sup>n</sup>.

<sup>4</sup>Te té Păblú ndihi té Bèé ní ndexìo-güedé ñuú Jerusàlén, te ío ní cudíí ìní-yu sá ñí ndexìo váha-güedé. Te ndècu dava-gá cue téé ní táuchíú<sup>n</sup> Jèsús

dacuàha ñaha xií-yu tnúhu-gá, ndihi cue tée yìndaha ñaha xií-yu, ndihi dava-gá ñáyiú sàndáá iní tnúhu-gá, te ní cani-güedé cuèndú núú-yu nàcuáa ní quide Yá Ndiöxí ní chindee ñàha-gá xii-güedé ní quide-güedé chiú<sup>n</sup>-gá.

<sup>5</sup>Te ndècu ìí<sup>n</sup> úú cue tée ní tuha ichi Yá Ndiöxí, te cue tée-á<sup>n</sup> cúú-güedé cue tée fariséú, te ní ndacuíñí-güedé, te ní xáha<sup>n</sup>-güedé:

—Dacuitíí xini ñuhu-xi sá cuàha-güedé sèñá ñii cue tée cùmání cue tée ñá túú cùu ñáyiú isràél, te cúñaha-ndo sá ná cáda-güedé nchaa nàcuáa ní chídó tnùní ndíi Moisés —càchí cue tée cùu fariséú-á<sup>n</sup> xáha<sup>n</sup>-güedé xii-güedé.

<sup>6</sup>Te cue tée ní táuchíú<sup>n</sup> Jèsús dacuàha ñaha xii ñáyiú tnúhu-gá, ndihi cue tée yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. <sup>7</sup>Te vèi vihi tnúhu ní cáhá<sup>n</sup>-güedé. Te té Pèlú ní ndacuíñí-dé, te ní xáha<sup>n</sup>-dè xii-güedé:

—Nchòhó cue tée ndècu ndihi-í ichi Xítóhó Jesucristú, chí cùndèdóho ìí<sup>n</sup> tnúhu na càhá<sup>n</sup>-í-a. Sa nàha-ndo sá ñí cachí Yá Ndiöxí sá dèú-í cáhá<sup>n</sup>-í tnúhu Jèsús núú ñáyiú ñá túú cùu ñáyiú isràél cuèndá sá quèndáá iní-yu, te naníhí tàhú-yu. <sup>8</sup>Dico Yá Ndiöxí sa nàha-gá nása càa iní ìí<sup>n</sup> ìí<sup>n</sup> ñáyiú. Te cùtnuní iní-ó sá cúú ìní ñáhá-gá xii cue ñáyiú ñá túú cùu ñáyiú isràél, chi ní sáñaha-gá Espiritú-gá ndécú ndíhí-yu dàtná cuìní-ndó ñí taxi-gá ndécú ndíhi nchoo. <sup>9</sup>Chi Yá Ndiöxí ìí<sup>n</sup>nuu-ni cùu iní ñáhá-gá xii-o nchàa-o ndíhi cue ñáyiú ñá túú cùu ñáyiú isràél, chi tnàhá-yu ní xócání-gá nchaa sá cuèhé sá dúhá ñí xóo cáda-yu ndéé òré ní sàndáá iní-yu Jèsús. <sup>10</sup>¿Te ná cuèndá nchòhó cuìní-ndó càda ñáyiú ní sàndáá iní tnúhu-gá ìí<sup>n</sup> sá ñá tnàhá iní-gá sá cáda-yu? Te cuìní-ndó dàndoho-ndó-yu. Te ni nchòo te ni cue ñaní tnàhá-ó ñí xíndecu ndéé sanaha ñá ní ndàcú-yu cáda-yu nchaa xíá<sup>n</sup>. <sup>11</sup>Te vá dúcá<sup>n</sup> cãhá<sup>n</sup>-ndó, chi sa nàha-ndo sá Yá Ndiöxí ní cundàhú iní ñáhá-gá xii-o, te dió duca<sup>n</sup> ñí quide-gá sá naníhí tàhú-ó nchàa-o. Te diu-ni duca<sup>n</sup> ñí quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáha<sup>n</sup>-dè xii-güedé.

<sup>12</sup>Te dàtnùní té Bèé ndíhi té Pàblú ní ngüíta-güedé ní cáhá<sup>n</sup>-güedé, te ní xíndedóho-yu nchaa tnúhu ní cáhá<sup>n</sup>-güedé. Te ní xáha<sup>n</sup>-güedé xií-yu nàcuáa ní chindee ñàha Yá Ndiöxí xii-güedé, te ní quide-güedé vèi núú sá vã yòo tnàhí ndàcu cada, te duca<sup>n</sup> te ní cutnùní iní ñáyiú ñá túú cùu ñáyiú isràél sá ndáa càhá<sup>n</sup>-güedé. <sup>13</sup>Te òré ní ndíhi cuèndú ní cáhá<sup>n</sup>-güedé, te té Jàcobó ní xáha<sup>n</sup>-dè:

—Nchòhó cue tée ndècu ndihi-í ichi Xítóhó Jesucristú, chí cùndèdóho ìí<sup>n</sup> tnúhu na càhá<sup>n</sup>-í-a. <sup>14</sup>Té Xímú, àdi Pelú chi úú dèu-dé, ní cani-dé cuèndú nàcuáa ní quide Yá Ndiöxí ndéé díhna ní dáquée dèí<sup>n</sup>-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuèndá cuìní-gá chiñuhu ñàhá-yu xii-gá. <sup>15</sup>Te dàtnùní ní cáhá<sup>n</sup>-dé nàcuáa ní cáhá<sup>n</sup> Yá

Ndiöxí ndéé sanaha. Te duha ní chídó tnùní cue téé ní xóo cáhá<sup>n</sup> tnúhu-gá ndéé sanaha nàcuáa ní cáhá<sup>n</sup>-gá, te duha ní cachí-gá:

16 Dàtná cuíní-ndó cùu ìí<sup>n</sup> vehe ní sáá te ní ngoyo te dàndaa-güedé xito cùu uú, duca<sup>n</sup> sãtnahá-xi cada-xi ìí<sup>n</sup> nduu, chi ñaní tnáhá ndíi Dàvíí ní xóo cáhá<sup>n</sup> ndíhi ñàhá-yu xii-í ní cùu, te ní dáñá ndèé-yu ichi-í, te na quìxi-í te natuha ñaha tùcú-yu.

17 Te duca<sup>n</sup> te vài ñáyíu ñá túú cùu ñáyíu isràél nandùcú-yu ichi-í te cáhá<sup>n</sup> ndíhi ñàhá-yu.

18 Duha ní cáhá<sup>n</sup> Yã Ndiöxí, te duca<sup>n</sup> ñí chídó tnùní cue téé ní xóo cáhá<sup>n</sup> tnúhu-gá ndéé sanaha —càchí té Jàcobó xãha<sup>n</sup>-dë xii-güedé.

19 Te xãha<sup>n</sup> tùcu-dé:

—Yúhú càchí iní-í sá vã cúú dàsatú-ó iní nchaa ñáyíu ta sàndáá iní-xi tnúhu Yá Ndiöxí, ñáyíu ñá túú cùu ñáyíu isràél, te ìí<sup>n</sup> úú-ni tnúhu cúñaha-o nàcuáa cadá-yu. 20 Dico xini ñuhu-xi daquihí<sup>n</sup>-ó tùtú cúñaha-o sã vã cáxí-gã-yu nchaa sá nchító-ó ndùu táhú nchaa sá càchí-yu cùu ndióxí-yu. Te cúñaha-o sã vã càhá<sup>n</sup> ndíhi cue téé ñàdihí te núu ñá díú ñàdihí-güedé cúú-yu, te ni cuè ñáyíu dñí vã càhá<sup>n</sup> ndíhi-yu téé te núu ñá díú yí-yu cùu-güedé, te vã cáxí-yu cuñú quiti cuèhné, te vã cáxí-yu níñí. 21 Te duca<sup>n</sup> cúñaha-o, chi ndi tnahá ñuú núú ndécú-yu, te xñdecu ñáyíu isràél dácuahá-yu tnúhu ní chídó tnùní ndíi Moisés, te ndi tnahá nduu ndètátú-yu dàcuahá-yu tnúhu ndíi veñúhu-yu —càchí té Jàcobó xãha<sup>n</sup>-dë xii-güedé.

22 Te dàtnùní cue téé ní táuchíú<sup>n</sup> Jèsús dacuaaha ñaha xii-yu tnúhu-gá, ndíhi cue téé yìndaha ñáyíu sàndáá iní tnúhu-gá ní cachí-güedé sá ndúcú-güedë ìí<sup>n</sup> úú-gá cue téé quíhí<sup>n</sup> ndíhi té Pãblú ndíhi té Bèé ñuú Antiòquiá, te ñíu-ni duca<sup>n</sup> ñí cáhá<sup>n</sup> dava-gá ñáyíu ndècu ichi-gá. Te úú cue téé ní ndúcú-güedë, ìí<sup>n</sup>-dë nání-dë Silás, te ìí<sup>n</sup>-dë nání-dë Jùdás, àdi Barsabás chi úú ñíu-dé, te cùnuu-güedé ndi ndúú-güedé. 23 Te ní cadúha nchaa cue téé cùnuu tutú canehe-güedé quíhí<sup>n</sup>, te duha càhá<sup>n</sup>-xi:

“Cóvãha díí-ndó nchàa-ndo. Nchúhú cue téé ní táuchíú<sup>n</sup> Jèsús cáhá<sup>n</sup>-ndí tnúhu-gá, ndíhi cue téé yìndaha cue ñáyíu sàndáá iní tnúhu-gá quide ndee iní ñàhá-ndí xii nchòhó cue ñáyíu ndècu ndíhi-ndí ichi-gá cuèi ñá díú ñáyíu isràél cúú-ndó. Te nchòhó ñáyíu xñdecu ñuú Antiòquiá, ndíhi nchòhó ñáyíu ndècu distritú Sìriá, ndíhi nchòhó ñáyíu ndècu distritú Cìliciá, càchí tnúhu-ndí xii-ndo sã 24 ñí níhí-ndí tnúhu sá ìí<sup>n</sup> úú cue téé ndècu iha ní quixi-güedé núú ndécú-ndó, te ñá túú chiu<sup>n</sup> ni tahu-ndí quixi-güedé. Te sá íí<sup>n</sup> tnúhu ní cáhá<sup>n</sup>-güedé ní xáha<sup>n</sup>-güedë xii-ndo sã ngñdecu sèñá ñíi-ndo, te canchicú<sup>n</sup> nihnu-ndo nchàa nacuaáa ní chídó tnùní ndíi Moisés, te xíã<sup>n</sup> ní sani ìí<sup>n</sup> ní sani úú iní-ndó, chi ñá túú xìní-ndó nñu ndáá tnúhu càhá<sup>n</sup>-güedé àdi ñá ndáá. 25 Te ní ndatnúhu-ndí nàcuáa

cunduu sá téndàha-ndí úú cue tée quixi-güedé ndihi té Bèé ndihi té Păblú, cue tée ío cùu iní-ndí, te cue tée-án cǎhá<sup>n</sup>-güedé nàcuáa cǎhá<sup>n</sup>-ndí-a. **26**Te diu-ni té Bèé ndihi té Păblú ní sǎhá<sup>n</sup>-güedé ní cǎhá<sup>n</sup>-güedé tnúhu Xítóhó Jesucristú nchaa xichi. Te ndi tnahá cuáhá<sup>n</sup>-güedé cuíní-yu cahni ñáhá-yu xii-güedé. **27**Te tendaha-ndí té Jùdás ndihi té Silás quixi-güedé tnáhá-güedé cachí tnúhu váha-güedé nàcuáa cuáhá<sup>n</sup> tnúhu cǎhá<sup>n</sup>-ndí. **28**Te diu-ni duca<sup>n</sup> cǎhá<sup>n</sup>-ndí cǎchí tnúhu-ndí nàcuáa cǎhá<sup>n</sup> Espíritú Yǎ Ndiöxí cada-ndo, chi nchúhú vá cǎhá<sup>n</sup>-ndí sá cadá-ndó nchàa sá ñí cǎhá<sup>n</sup> ndíi Moisés cada ñáyi, chi ío úhú, te vá yóo ndacu cada. Te vitna na cǎhá<sup>n</sup>-ndí ñí<sup>n</sup> úú-ni tnúhu nàcuáa cada-ndo. **29**Vá cǎxí-ndó sǎ nchító-ó ndùu táhú nchaa sá cǎchí ñáyi cùu ndiöxí-yu, te vá cǎxí-ndó ñíí, te vá cǎxí-ndó cùñú quiti cuèhné, te vá cǎhá<sup>n</sup> ndihi cue tée ñadíhí te núu ñá díú ñadíhí-güedé cúú-yu, te ni cuè ñáyi díhí vá cǎhá<sup>n</sup> ndíhí-yu tée te núu ñá díú yí-yu cùu-güedé. Te núu na càda-ndo nchaa nacuáa cǎhá<sup>n</sup>-ndí-a, te cada váha-ndo. Te vitna ío cada ndee iní-ndó nchàa-ndo-na.” Duha ní chídó tnùní-güedé núu tütú ní tendaha-güedé cuáhá<sup>n</sup>.

**30**Te ní quide ndee iní-yu cue tée quíhí<sup>n</sup> ñúú Antiòquiá, te duca<sup>n</sup> te ní xica-güedé cuáhá<sup>n</sup>-güedé. Te òré ní quexìo-güedé ñúú-á<sup>n</sup>, te ní cana-güedé nchaa ñáyi sàndáá iní tnúhu Jèsús, te ní sǎñaha-güedé tutú xií-yu. **31**Te ní dǎcuáhǎ-yu tutú ní sǎñaha-güedé-á<sup>n</sup>, te ní cudíí víhí iní-yu chi ío váha cǎhá<sup>n</sup> tutú-á<sup>n</sup>. **32**Te té Jùdás ndihi té Silás tnáhá-güedé ní nduu táhú-güedé cǎhá<sup>n</sup>-güedé tnúhu sá dǎcàhu iní ñáhá Yǎ Ndiöxí. Te ní xáha<sup>n</sup>-güedé vǎi tnúhu nàcuáa cadá-yu, te vǐhi-gá ní cudíí iní-yu cadá-yu nàcuáa cǎhá<sup>n</sup> Yǎ Ndiöxí cadá-yu. **33**Te ní xíndecu-güedé ñí<sup>n</sup> úú nduu ndíhí-yu, te dǎtnùní ní quide ndee iní ñáhǎ-yu xii-güedé cuèndá sá nùhú-güedé núu vèxi-güedé, te mee-ni tǎ Jùdás cuánuhú-dé. **34**Te té Silás ní xáha<sup>n</sup>-dǎ sá vǎ nùhú-ni-dé. **35**Te té Păblú ndihi té Bèé ní ndóo-güedé ní cǎhá<sup>n</sup>-güedé tnúhu Yǎ Ndiöxí ñúú Antiòquiá, te vǎi-gá tucu ñáyi Antiòquiá ní cǎhá<sup>n</sup>-yu tnúhu-gá.

### **Xito cùu uú cuáhá<sup>n</sup> té Păblú cǎhá<sup>n</sup>-dé tnúhu Yǎ Ndiöxí núu ñáyi**

**36**Te sátá ñí cuu cuéhé nduu, te ní xáha<sup>n</sup> tǎ Păblú xii té Bèé:

—Na quíhí<sup>n</sup>-ó nchàa ñúú núu ñí sǎhá<sup>n</sup>-ó ñí cǎhá<sup>n</sup>-ó tnúhu Yǎ Ndiöxí cǎhá<sup>n</sup> ndihi-o nchàa ñáyi ní tuha ichi-gá cuèndá quíní-ó ñúu ndècu váha-yu —cǎchí-dé xǎha<sup>n</sup>-dǎ.

**37**Te té Bèé ní xáha<sup>n</sup>-dǎ sá quíhí<sup>n</sup> ndihi-güedé té Juàá, àdi Mácú chi úú dèu-dé. **38**Dico té Păblú ñá ní dàña-gá-dé quíhí<sup>n</sup> té Juàá, chi ní dándóo ñaha-dǎ xii-güedé cútnáhá ní xíndecu-güedé Pànfilíá, te ní nacuico-dǎ cuánuhú-dé, te ñá túú-gǎ ní sǎhá<sup>n</sup> ndihi ñaha-dǎ xii-güedé. **39**Xíá<sup>n</sup> ní cuu ní tenàá tnáhá tǎ Bèé ndihi té Păblú, te ichi cǎa ichi caa ní cuu-güedé. Te té Bèé ndihi té Mácú ní quée-güedé bàrcú cuáhá<sup>n</sup>-güedé Chìpré. **40**Te té Păblú

ní xáha<sup>n</sup>-dě xii té Silás sá quíhí<sup>n</sup> ndihi ñaha-dě, te ñáyiú sàndáá iní-xi tnúhu Jèsús ní cáhá<sup>n</sup> ndihí-yu Yá Ndiöxí sá chíndèe ñaha-gá xii-güedé. <sup>41</sup>Te ní xica-güedé cuáhá<sup>n</sup>-güedé te ní yáha-güedé nihíi distritú Síríá ndihi distritú Cìliciá. Te ní cáhá<sup>n</sup>-güedé tnúhu Jèsús núú nchàa ñáyiú ní sàndáá iní tnúhu-gá, núú xíã<sup>n</sup> ío-gá ní cudíí iní-yu cadá-yu nàcuáa càhá<sup>n</sup> Yá Ndiöxí.

**Tnàhá té Timùteú cuáhá<sup>n</sup> ndihi-dé té Páblú ndihi té Silás**

**16** <sup>1</sup>Te té Páblú ndihi té Silás cuáhá<sup>n</sup>-güedé ñuú Dèrbé ndihi ñuú Lìstrá, te ñuú Lìstrá yàcá<sup>n</sup> ndécú ñi<sup>n</sup> tée nàni Timuteú. Te tée-á<sup>n</sup> sàndáá iní-dé tnúhu Jèsús, te tnàhá náná-dě sàndáá iní-a<sup>n</sup> tnúhu-gá, te ñaha isràèl cúu-á<sup>n</sup>, te tée grìégú cúu tătá-dě.

<sup>2</sup>Te nchaa ñáyiú ní sàndáá iní tnúhu-gá ñáyiú ndècu ñuú Lìstrá, ndihi ñáyiú ñuú Ìconiú, nchaa ñáyiú-á<sup>n</sup> cudíí iní-yu nàcuáa quide-dé. <sup>3</sup>Te ní cuiní té Páblú sá tnàhá té Timùteú quíhí<sup>n</sup> ndihi-dé dava-gá ñuú, núú xíã<sup>n</sup> díhna-gá sèñá ní sáha té Páblú ñi<sup>n</sup> té Timùteú, chi ñá ní tnàhá iní té Páblú sá càhá<sup>n</sup> cuèhé ñáyiú isràèl cuèndá té Timùteú. Te nchaa ñáyiú isràèl ndécú ñuú-á<sup>n</sup> xìní-yu sá tée grìégú cúu tătá-dě, te ñá díú tée isràèl cúu-dě, te xíã<sup>n</sup> ní sáha té Páblú sèñá ñi<sup>n</sup> té Timùteú. <sup>4</sup>Te ndi tnahá ñuú ndi tnahá ñuú cuáhá<sup>n</sup>-güedé càhá<sup>n</sup> ndihi-güedé nchaa ñáyiú ní sàndáá iní tnúhu Jèsús. Te ní xáha<sup>n</sup>-güedé nàcuáa càhá<sup>n</sup> tutú ní cadúha cue tée ní táúchíú<sup>n</sup> Jèsús dacuàha ñaha xii-yu tnúhu-gá, ndihi cue tée yìndaha ñáyiú sàndáá iní tnúhu-gá ñuú Jerusàlén. <sup>5</sup>Te cuèndá duca<sup>n</sup> ñi<sup>n</sup> sáhá<sup>n</sup>-güedé nchaa ñuú núú ndécú ñáyiú sàndáá iní tnúhu-gá ní dácúhá ñàha-güedé xii-yu, núú xíã<sup>n</sup> tá cùu túha-gá-yu tnúhu Yá Ndiöxí, te vài-gá-yu ní tuhá-yu ichi-gá.

**Ní dácótó ñàha-xi xii té Páblú sá ñi<sup>n</sup> xìní-dé ñi<sup>n</sup> tée distritú Macèdoniá**

<sup>6</sup>Te ñá ní dàña Espiritú Yá Ndiöxí quíhí<sup>n</sup>-güedé cáhá<sup>n</sup>-güedé tnúhu-gá distritú Àsiá, núú ní sáhá<sup>n</sup>-güedé distritú Frìgiá ndihi distritú Gàlaciá cáhá<sup>n</sup>-güedé tnúhu-gá. <sup>7</sup>Te ní sáá-güedé yuhu distritú Mìsiá. Te quíhí<sup>n</sup>-güedé distritú Bìtiniá ní cùu, dico ñá ní dàña Espiritú Yá Ndiöxí quíhí<sup>n</sup>-güedé yàcá<sup>n</sup>. <sup>8</sup>Te ní yáha-güedé Mìsiá, te ní quexìo-güedé ñuú Tròás, te yàcá<sup>n</sup> ní nanítnáhá-ndí ndihi-dé. <sup>9</sup>Te ñi<sup>n</sup> níú ní dácótó-xi ñuú tée Páblú sá ñi<sup>n</sup> xìní-dé ñi<sup>n</sup> tée distritú Macèdoniá nùtní-dé, te ní xáha<sup>n</sup> tée-á<sup>n</sup> xii té Páblú: “Cada ndee iní-n quíhí<sup>n</sup>-n Màcedoniá chi dacuàha ñaha-n nchaa sá xìní-n”, càchí-dé xáha<sup>n</sup>-dě, ní dácótó ñàha-xi xii té Páblú. <sup>10</sup>Te cuèndá sá dúcá<sup>n</sup> ñi<sup>n</sup> dácótó ñàha-xi xii té Páblú ñuú ní ndatnúhu-ndí quíhí<sup>n</sup>-ndí Macèdoniá, chi ní cutnùní iní-ndí sá cáná ñàha Yá Ndiöxí quíhí<sup>n</sup>-ndí cáhá<sup>n</sup>-ndí tnúhu-gá núú ñáyiú yàcá<sup>n</sup>.



**Té Păblú ndihi té Silás ndécú-güedě ñuú Fìlipú**

11 Te ní quée-ndí bàrcú ñuú Tròás, te cuáhá<sup>n</sup> ndáá-ndí ñuú Samòtraciá, te yàcá<sup>n</sup> ní quexìo-ndí, te ní yáha-ni-ndí cuáhá<sup>n</sup>-ndí. Te nduu tněé ní quexìo-ndí ñuú Nèápolis. 12 Te yàcá<sup>n</sup> ní quene-ndí bàrcú, te xìca-na-ndí cuáhá<sup>n</sup>-ndí ñuú Filipú te ñuú-á<sup>n</sup> yíndèhu-xi distritú Macèdoniá. Te yàcá<sup>n</sup> ní cudíi-ndí ní xíndecu tnaa-ndí. Te ñuú Fìlipú-á<sup>n</sup> ïo cùnuu-xi, chi ïo chitu ñăyiu rómá ní ngóo-yu. 13 Te nduu ndètátú-yu ní quee-ndí ñuú cuáhá<sup>n</sup>-ndí ïi<sup>n</sup> xio yuhu yũte, chi yàcá<sup>n</sup> sàhá<sup>n</sup>-yu càhá<sup>n</sup> ndihí-yu Yá Ndiöxí. Te òré ní quexìo-ndí, te ní naníhí tnáhá-ndí ndihi mee-ni ñăyiu ðihí, te ní cáhá<sup>n</sup>-ndí tnúhu Yá Ndiöxí ní xíndedóho-yu. 14 Te ndècu ïi<sup>n</sup> ñaha nani Lidiá ní xíndedóho-a<sup>n</sup> nàcuáa ní cáhá<sup>n</sup>-ndí, te ñaha ñuú Tiàtirá cúú-á<sup>n</sup>, te ðico-a<sup>n</sup> dóó muràdú, te ïo càhá<sup>n</sup> ndihi-a<sup>n</sup> Yá Ndiöxí. Te ðiu-ni mee Yá Ndiöxí ní chindee ñaha-gá ní sándáá iní-a<sup>n</sup> tnúhu ní cáhá<sup>n</sup> té Păblú. 15 Te ní sandute-a<sup>n</sup> ndihi landú-a<sup>n</sup>, ndihi nchaa ñăyiu xínu cuechi núú-a<sup>n</sup>, te ní cachí-a<sup>n</sup> xii-ndí:

—Te núu ní cutnùní iní-ndó sã ñí sándáá ndisa iní-í tnúhu Jèsús, te cundecu tnaa-ndo vèhe-í —càchí-a<sup>n</sup> xii-ndí.

Te ní quide yica-a<sup>n</sup> ñí xíndecu-ndí vehe-a<sup>n</sup>.

16 Te ïi<sup>n</sup> nduu ñùhu-ndí ichi cuáhá<sup>n</sup>-ndí núú càhá<sup>n</sup> ndihí-yu Yá Ndiöxí, te ní naníhí-ndí ïi<sup>n</sup> xíchí ñúhú ìchi, te yìhi ñaha espíritú cùndìhi yucu ñávãha xii-xi. Te xíã<sup>n</sup> ní quide ní cáhá<sup>n</sup>-xi nchaa sá vã yõ tnàhí cùtnuní iní-xi núú nchaa ñăyiu ní sângándìhi ñaha xii-xi. Te ñăyiu dii vèhe-xi xínu cuechi-xi ïo vài díhú<sup>n</sup> ñí ñíhí-yu chi ní cháhu nchaa ñăyiu ní sângándìhi ñaha xii-xi. 17 Te xíchí-ã<sup>n</sup> ñí chinchícú<sup>n</sup> ñáhá-xí xii-ndí ndihi té Păblú ndëndaha ñaha-xi cuáhá<sup>n</sup>, te ní cáhá<sup>n</sup> níhi-xi xãha<sup>n</sup>-xi xii dava-gá ñăyiu:

—Cue téa-xi xínu cuechi-güedé núú Yá Ndiöxí, chi ïo càhnu cuu-gá, te càchí tnúhu-güedé nása cada-ndo nàníhí tàhú-ndó —càchí-xi xãha<sup>n</sup>-xi xii-yu.

18 Te titní xito ní yáha-ndí duca<sup>n</sup>-ni ñí cáhá<sup>n</sup>-xi. Te ñá ní cùndee-gá iní té Păblú sá dúcá<sup>n</sup> càhá<sup>n</sup>-xi, núu ní nanchocuíhnu-dé núú nútní-xi, te ní xáha<sup>n</sup>-dë xii espíritú cùndìhi yucu ñávãha yìhi ñaha xii-xi:

—Ïo càhnu cuu Xítóhó Jesucristú, núu xíã<sup>n</sup> càchí-í sá xócuñí-n vã quíhí-gã-n yèqui cuñú xíchí-a —càchí-dé xãha<sup>n</sup>-dë.

Te òré-ni ní quee espíritú cùndìhi yucu ñávãha-á<sup>n</sup> yèqui cùñú-xi.

19-20 Te ñăyiu dii vèhe-xi xínu cuechi-xi-á<sup>n</sup> ñí cutnùní iní-yu sá vã ñíhí-gá-yu díhú<sup>n</sup> cuendá tnúhu càhá<sup>n</sup>-xi, núu ní tnií-yu té Păblú ndihi té Silás ndécá ñáhá-yu cuáhá<sup>n</sup> núú cuè téa cùchiu<sup>n</sup> Romá, te xáhã<sup>n</sup>-yu xii-güedé:

—Cue téa-xi cùu-güedé cue téa isràél, te ïo dusa<sup>n</sup> xíquide-güedé ñuú-ó.

21 Te cuíní-güedé cada-o nàcuáa quide-güedé, te vá cúú dùca<sup>n</sup> cada-o chi ñăyiu nació<sup>n</sup> Rómá cúú-ó —càchí-yu xáhã<sup>n</sup>-yu xii cue téa cùchiu<sup>n</sup>.

22Te uu<sup>n</sup>ni ní cáhá<sup>n</sup> nchaá-yu, te xähá<sup>n</sup>-yu sá ñà túú quide váha té Păblú ndihí té Silás. Te cue té cùchiu<sup>n</sup> ní cändeé-güedé dóó tē Păblú ndihí dóó tē Silás ní ndátá-güedě, te ní táuchíu<sup>n</sup>-güedě caniha-güedě ndihí tnudii xii-güedé. 23Te ní caniha-güedě, te dătnùní ní chihi ñaha-güedě vecaá. Te ní xáha<sup>n</sup>-güedě xii té ndēnchito vecaá sá cádá cuèdadú víhí-dě cuendá ná canú-güedé vecaá. 24Te cuendá sá dúcá<sup>n</sup> ñí cáhá<sup>n</sup>-güedé, núu té ndēnchito vecaá ní dáyăha ñaha-dě ingá cuàrtú ndécú xìtí vecaá, te ní chihi-dé sáhá-güedě yaú nduhu, te ní quide tii-dé.

25Te dava niú ní cáhá<sup>n</sup> ndihí té Păblú ndihí té Silás Yă Ndiöxí, te ní xita-güedé ndudú ní quide cãhnu ñaha-güedé xii-gá. Te dava-gá cue té yìhi vecaá ní xíndedóho-güedé nàcuáa ní xita-güedé. 26Te uu<sup>n</sup>ni níhi víhi ní tnáa ní quidi-xi ndéé cimièntú vecaá, te ní nacaá<sup>n</sup> nchaa yèhe vecaá, te ní ndihí cadèná ndútú cuè té yìhi vecaá ní nandáxí. 27Te ní ndiquíú cúnú ìní té ndēnchito vecaá, te ní quide cuendá-dé nchii nchaa yèhe vecaá. Te ní tava-dé machití-dé cahni-dé méé-dě ní cùu, chi ní cáhá<sup>n</sup>-dě sá ñí ndihí cue té yìhi vecaá ní xinu ni cùu. 28Te té Păblú ní cáhá<sup>n</sup> níhi-dé, te xähá<sup>n</sup>-dě xii té ndēnchito vecaá:

—Vá dúcá<sup>n</sup> càda-n cahni-n mee-n, chi nchaa-ni-ndí yíhí —càchí-dé xähá<sup>n</sup>-dě xii té ndēnchito vecaá.

29Te dătnùní ní xícá<sup>n</sup> té ndēnchito vecaá ñuhú, te xínu-dé cuánguihu xití vecaá núu yíhí tē Păblú ndihí té Silás, te quidi ñaha-ná-xi xii-dé ní quexìo-dé ní ngüíñí xítí-dě núu-güedě. 30Te dătnùní ndécá ñaha-dé xii-güedé ní ndee vecaá, te ní xícá<sup>n</sup> tnúhú-dě núu-güedě, te xähá<sup>n</sup>-dě:

—Nchòhó cachí tnúhu-ndo ñasa cada-í naníhí tàhú-í —càchí-dé xähá<sup>n</sup>-dě.

31Te ní xáha<sup>n</sup>-güedě:

—Quindáa ìní-n ndihí ñadihí-n, ndihí landú-n, ndihí nchaa ñáyiu xínu cuechi núu-n tnúhu cãhá<sup>n</sup> Xítohó Jesucristú, te naníhí tàhú-ndó —càchí-güedé xähá<sup>n</sup>-güedě.

32Te ní dăcuáhá ñaha-güedé xii té ndēnchito vecaá ndihí nchaa ñáyiu ndècu vehe-dé tnúhu Yă Ndiöxí. 33Te diu-ni òré-á<sup>n</sup> ñí naquete-dé sátá-güedě núu ñí ñáni, te dătnùní ní sandute-dé ndihí-yu. 34Te ndèca ñaha-dé cuáhá<sup>n</sup> vehe-dé ní sãñaha-dě sá ñí xexi-güedé, te ní cudíí víhí ìní té ndēnchito vecaá ndihí nchaa-dé vehe-dé sá ñí tuhá-yu ichi Yă Ndiöxí. Te cuándihu tucu té Păblú ndihí té Silás vecaá.

35Te nduu tnéé ní xáha<sup>n</sup> cuè té cùchiu<sup>n</sup> xii poleciá cuáhá<sup>n</sup>-güedé cúu-güedé té ndēnchito vecaá queñuhu-dé úú cue té cuánguihu ndedí nduu ìcu núhú-güedé. 36Te té ndēnchito vecaá ní xáha<sup>n</sup>-dě xii té Păblú ndihí té Silás:

—Cue té cùchiu<sup>n</sup> ní cachí-güedé sá queé-ndó nùhú-ndó, chi ñá túú-gá ná cada-güedé, chi sa ní yáha cuendá-ndó —càchí té ndēnchito vecaá xähá<sup>n</sup>-dě xii-güedé.

**37**Te té Păblú ní xáha<sup>n</sup>-dě xii cue tée cùu poleciá:

—Tée rò má cúú-ndí, te vá cúú dùca<sup>n</sup>-ni cunduu, chi ní caniha-güedě tnudii xii-ndí, te ní xiní-yu nchaá-yu. Te ñá túú tnàhí ni xicá<sup>n</sup> tnúhú-güedě nñu ndáá ndècuéchi-ndí àdi ñáhá, chi cuèndá-ni ní chihi ñaha-güedě vecaá xii-ndí. Te vitna cuení-güedé dacăcu ñaha-güedě núhú-ndí cuèndá sá vǎ yõ quiní ñáhá nñhú-ndí cáhá<sup>n</sup>-güedě, dico vá cúú dùca<sup>n</sup> cada ñaha-güedé xii-ndí. Chí cuàhá<sup>n</sup> cúñaha-ndo na quixi mee-güedé queñuhu ñaha-güedě —càchí té Păblú xii-dé cue poleciá.

**38**Te cue tée cùu poleciá cuánuhú-güedé núú ndécú cuè tée cùchiu<sup>n</sup>, te ní xáha<sup>n</sup>-güedě nàcuáa ní cáhá<sup>n</sup> té Păblú. Te sá dúcá<sup>n</sup> nǐ xáha<sup>n</sup> pòleciá sá tée rò má cúú-güedě, xíǎ<sup>n</sup> ní yùhú-güedé. **39**Te ní sáhá<sup>n</sup> cue tée cùchiu<sup>n</sup> yehe vecaá, te ní xáha<sup>n</sup>-güedě sá cádá cǎhnu iní-güedé sá nǐ chihi ñaha-güedě vecaá, te ní ndeñuhu ñaha-güedě vecaá. Te ní cáhá<sup>n</sup> ndàhú-güedé núú cuè tée ní xíhi vecaá sá ndéé-güedě ñuú-á<sup>n</sup> nñhú-güedé. **40**Te ní ndee-güedé vecaá, te cuáhá<sup>n</sup>-güedé vehe tá Lidiá, te ní ndatnúhu-güedé ndihi nchaa ñáyiú ní sándáá iní-xi tnúhu Jèsús, te ní xáha<sup>n</sup>-güedě xíi-yu nàcuáa cadá-yu, te ío ní cudíí iní-yu, te duca<sup>n</sup> te ní xica-güedé cuáhá<sup>n</sup>-güedé.

### Ío dusa<sup>n</sup> quide ñáyiú ñuú Tesalónica

**17**<sup>1</sup>Te ní yáha-güedé ñuú Ànfípólís ndihi ñuú Apòloniá, te ní quexìo-güedé ñuú Tesalónica, te yàcá<sup>n</sup> cáá ì<sup>n</sup> veñúhu ñáyiú isràél. <sup>2</sup>Te ní sáhá<sup>n</sup> té Păblú veñúhu-á<sup>n</sup>, chi duca<sup>n</sup> tnàhí quide-dé, te ndi tnahá nduu ndètátú-yu ní sáhá<sup>n</sup>-dé veñúhu-á<sup>n</sup> ùní xito. Te ní ndatnúhu ndihi ñaha-dě xíi-yu nàcuáa ní chídó tnùnì cue tée ní xóo cáhá<sup>n</sup> tnúhu Yá Ndiõxí ndéé sanaha. <sup>3</sup>Te ní xítñuhu ñaha-dě nàcuáa ní cáhá<sup>n</sup> cue tée-á<sup>n</sup> sǎ Crìstú Yaá tendaha Yǎ Ndiõxí quixi ñuyíú-a ndoho vîhi-gá, te cuú-gá, te ndoto-gá, te xǎha<sup>n</sup>-dě:

—Te diu Jèsús cúú Crìstú Yaá ní tendaha Yǎ Ndiõxí ní quixi ñuyíú-a, núu xíǎ<sup>n</sup> càchí tnúhu-í vitna —càchí té Păblú xǎha<sup>n</sup>-dě xíi-yu.

<sup>4</sup>Te dava ñáyiú isràél ní sándáá iní-yu tnúhu ní cáhá<sup>n</sup> té Păblú, te ní níhí tnáhǎ-yu ndihi-dé, ndihi té Silás. Te vǎi ñáyiú grìégú ñáyiú cǎhá<sup>n</sup> ndihi Yá Ndiõxí ní sándáá iní-yu tnúhu Jèsús. Te ndècu titní ñáyiú dîhí ñáyiú cùnuu, te ñáyiú-á<sup>n</sup> tnàhá-yu ní sándáá iní-yu tnúhu-gá. <sup>5</sup>Te dava ñáyiú isràél ñá túú ní cùu váha iní-yu núú tǎ Păblú nñu ní ndúcǔ-yu cue tée cuihna iní-xi tuhíio-güedé cada chiu<sup>n</sup>-güedé, chi ndi cuíhnu ndi cuíhnu-ni-güedé, te nchaá-yu ndihi cue tée-á<sup>n</sup> ndi coyo ndi coyó-yu xícuáá-yu. Te sátá nǐ tecú dóho dava-gá-yu, te ní sáhá<sup>n</sup> tuhá-yu, te ío ní quide dùsá<sup>n</sup>-yu. Te nísáhá<sup>n</sup>-yu vehe té Jàsón, te ní quide yìcá-yu ní quíhu-yu vehe-dé nándúcú-yu té Păblú ndihi té Silás cuèndá queñuhu ñàhá-yu núú nchàa

ñáyi. <sup>6</sup>Te ñá ní nàníhí ñáhă-yu xii-güedé, núu xíă<sup>n</sup> ní tñí-yu té Jàsón ndíhi ì<sup>n</sup> úú-gá cue té sàndáá iní tnúhu Jèsús, te tãnuhu ñahá-yu xii-güedé cuáhá<sup>n</sup> núu cuè té cùchiu<sup>n</sup>. Te òré ní quexìo-yu núu ndécú cuè té cùchiu<sup>n</sup>, te ní ngúíta-yu ní cuáá-yu, te xăhă<sup>n</sup>-yu xii-güedé:

—Ní quexìo cue téé-ă<sup>n</sup> ñuú-ó, te ío dusa<sup>n</sup> quède-güedé, te duca<sup>n</sup>-ni quède-güedé nchaa ñuú núu xícá cùu-güedé. <sup>7</sup>Te té Jàsón-ă<sup>n</sup> ní xáha<sup>n</sup>-dě sá cúu cùndecu-güedé vehe-dé, te ñá túú sàndáá iní-güedé nàcuáa càhá<sup>n</sup> té Cèsár té yìndaha cuéhé nació<sup>n</sup>, te càchí-güedé sá ndécú ìngá té cùnuu-gá tucu nàni-dé Jèsús —càchí-yu xăhă<sup>n</sup>-yu xii cue té cùchiu<sup>n</sup>.

<sup>8</sup>Te sátá dúcá<sup>n</sup> ñí càhá<sup>n</sup>-yu, te ní cudéé<sup>n</sup> víhí cuè té cùchiu<sup>n</sup> ndíhi dava-gá ñáyi ndèdóho. <sup>9</sup>Te vài díhú<sup>n</sup> ñí xícá<sup>n</sup> cue té cùchiu<sup>n</sup> núu tē Jàsón ndíhi dava-gá cue té cuáhá<sup>n</sup> ndíhi-dé cuèndá té Păblú ndíhi té Silás, te núu na ndèe-güedé núhú-güedé, te nacuáñaha cuè té cùchiu<sup>n</sup> díhú<sup>n</sup>-güedě.

### **Té Păblú ndíhi té Silás ndécú-güedě ñuú Bèreá**

<sup>10</sup>Te òré ní cundiquí<sup>n</sup>, te ní quide ndee ìní ñáhá ñáyi sàndáá iní tnúhu Jèsús xii té Păblú ndíhi té Silás, te ní xica-güedé cuáhá<sup>n</sup>-güedé ñuú Bèreá. Te diu-ni nduu ñí sáá-güedé yàcá<sup>n</sup> ní sáhá<sup>n</sup>-güedé veñúhu ñáyi isràél.

<sup>11</sup>Te váha-gá iní ñáyi ñuú Bèreá dácúúxí ñáyi ñuú Tesàlónica, chí ío ní cudíí iní-yu ní xíndedóho-yu tnúhu Jèsús, te ì<sup>n</sup> nduu ì<sup>n</sup> nduu ní dácúáhă-yu tnúhu ní chídó tñí cue té ní xóo càhá<sup>n</sup> tnúhu Yá Ndiöxí ndéé sanaha cuèndá cuèni-yu quini-yu núu ndáá càhá<sup>n</sup> té Păblú ndíhi té Silás. <sup>12</sup>Te titní ñáyi isràél ní sàndáá iní-yu tnúhu-gá ndíhi titní cue té griégú ndíhi ñáyi dîhí ñáyi cùnuu ní sàndáá iní-yu. <sup>13</sup>Te dava ñáyi isràél ndécú-yu ñuú Tesàlónica, te ñáyi-á<sup>n</sup> ñí níhí-yu tnúhu sá ndécú tē Păblú ndíhi té Silás ñuú Bèreá càhá<sup>n</sup>-güedé tnúhu Yá Ndiöxí, núu xíă<sup>n</sup> ní sáhá<sup>n</sup>-yu ñuú Bèreá ní dácúándèhndé-yu núu nchaa ñáyi vátá dácúàha-gá. Te ñáyi-á<sup>n</sup> ñí sàndáá iní-yu tnúhu ndehnde te ní cudéé<sup>n</sup> víhí-yu núu-güedě. <sup>14</sup>Te òré-á<sup>n</sup> ñí xáha<sup>n</sup> ñáyi sàndáá iní tnúhu-gá xii té Păblú sá quíhí<sup>n</sup>-dé yuhu làmár, te ní xica-dé cuáhá<sup>n</sup>-dé, te té Silás ndíhi té Timùteú ní quendóo-güedé ñuú Bèreá. <sup>15</sup>Te ì<sup>n</sup> úú-güedé cuáhá<sup>n</sup> ndíhi-güedé té Păblú, te ndèca ñaha-güedé cuáhá<sup>n</sup> ndéé ñuú Àtenás, te ní xáha<sup>n</sup> tē Păblú xii-güedé:

—Núu na nùhú-ndó, te cúu-ndo tē Silás ndíhi té Timùteú ná quíxí ndíhi-ni-güedé nanítñáhá-ndí iha —càchí-dé xăha<sup>n</sup>-dě.

Te ní xica-güedé cuánuhú-güedé.

### **Té Păblú ndécú-dě ñuú Àtenás**

<sup>16</sup>Te ñuú Àtenás ndétú tē Păblú quíhí<sup>n</sup> té Silás ndíhi té Timùteú. Te yàcá<sup>n</sup> ní xiní-dé sá ío cuéhé să càchí-yu cùu ndiöxí-yu ndècu te ñá ndáá sá

díú ndiöxí cúú-xí, te xíá<sup>n</sup> ñá túú ní cùu váha iní-dé, chi ñá tnàhá iní-dé nàcuáa quidé-yu. <sup>17</sup>Te ní sáhá<sup>n</sup>-dé veñúhu ní cáhá<sup>n</sup> ndihi-dé ñáyiú isràél ndihi dava-gá ñáyiú càhá<sup>n</sup> ndihi Yá Ndiöxí. Te ì<sup>n</sup> nduu ì<sup>n</sup> nduu sàhá<sup>n</sup>-dé xití ñuú càhá<sup>n</sup>-dé tnúhu-gá ndihi nchaa ñáyiú xìca cuu yacá<sup>n</sup>. <sup>18</sup>Te cue téé cùu epicureú ndihi cue téé cùu estoicú, cue téé-á<sup>n</sup> ñí ndatnúhu-güedé ndihi té Páblú, te dava-güedé xítnàha-güedé:

—iNá tnúhu vìhi cáhá<sup>n</sup> téé lùcú-á<sup>n</sup>! —càchí-güedé xítnàha-güedé.

Te dava-güedé xítnàha-güedé:

—Sàni iní-ndí sá càhá<sup>n</sup>-dé cuendá ndiöxí sá vátá quíní-gá-ó

—càchí-güedé xítnàha-güedé.

Te duca<sup>n</sup> xítnàha-güedé, chi càhá<sup>n</sup> té Páblú tnúhu Jèsús, te ní cáhá<sup>n</sup>-dé nàcuáa ní dándótó ñàha Yá Ndiöxí xii-gá, xíá<sup>n</sup> nùu duca<sup>n</sup> xítnàha-güedé. <sup>19</sup>Te ndèca ñaha-güedé xii té Páblú cuáhá<sup>n</sup> ì<sup>n</sup> xichi núú nání Àreópagú, te ní xáha<sup>n</sup>-güedé xii-dé:

—Cachí tnúhu ndáá-n ñasa cuáhá<sup>n</sup> tnúhu càhá<sup>n</sup>-n, chi na cùtnuní ndáá iní-ndí, <sup>20</sup>chi duca<sup>n</sup>-ni càhá<sup>n</sup>-n tnúhu sá ñà túú sàcúndèdóho-ndí, te cuíní-ndí cachí tnúhu ndáá-n ñasa ndùu tnúhu-á<sup>n</sup> cuendá cutnùní váha iní-ndí —càchí-güedé xàha<sup>n</sup>-güedé xii-dé.

<sup>21</sup>Te nchaa ñáyiú ñuú Àtenás ndihi ñáyiú dava-gá ñuú, mee-ni tnúhu saa cuíní-yu cáhá<sup>n</sup>-yu, nchaa sá vátá cùndèdóho-gá-yu cuíní-yu cundedóho-yu.

<sup>22</sup>Te té Páblú ní ngúnutnì-dé núú xixúcu-yu nchaá-yu, te xàha<sup>n</sup>-dè:

—Nchòhó cue ñáyiú ñuú Àtenás, cundedóho-ndo nchàa tnúhu na càhá<sup>n</sup>-í-a. Ío quide cahnu nchohó sá càchí-ndó cùu ndiöxí-ndó. <sup>23</sup>Te vitna ní quexìo-í ñuú-ndó, te ní xiní-í sá yàyacá<sup>n</sup> ndécú nchàa sá càchí-ndó cùu ndiöxí-ndó càhá<sup>n</sup> ndihi-ndo. Te ní xiní-í ì<sup>n</sup> xichi núú ndèé tnuní quidé cahnu-ndo Yá Ndiöxí Yaá ñá túú xìní-ndó, te diu-ni duca<sup>n</sup> càhá<sup>n</sup> lètrá ndèé tnuní xíá<sup>n</sup>, te càchí-xi: “Iha quide cahnu-ndí Ndiöxí sá ñà túú xìní-ndí”, duha càhá<sup>n</sup> lètrá-á<sup>n</sup>. Te quide cahnu-ndo Yá Ndiöxí cáhá<sup>n</sup>-ndó, dico ñá túú xìní-ndó ñasa càa-gá, te yúhú xìní ndáá-í nàcuáa càa Yá Ndiöxí, chi diu-ni Yá Ndiöxí càhá<sup>n</sup> ndihí-í, te diu tnúhu-gá càhá<sup>n</sup>-í vitna.

<sup>24</sup>Te diu Yá Ndiöxí ní cadúha-gá ñuyíú-a ndihi nchaa sá ìo, núu diu-gá cúú Xìtohó ñuyíú-a ndihi andiu. Te ñá túú xìni ñuhu-gá vehe dàcaa ñáyiú ñuyíú-a cundecu-gá. <sup>25</sup>Te ñá túú xìni ñuhu-gá ñáyiú chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yócó tàchí-ó ndihi nchaa sá xìní ñuhu-o.

<sup>26</sup>Te ndéé sanaha ñí cadúha-gá ì<sup>n</sup> dii-ni téé, te diu-ni níñí-dè cúú ñáyiú ndècu nicaxico ñuyíú. Te diu-ni mee Yá Ndiöxí ní xáha<sup>n</sup>-gá nchaa núú cùndécú-yu, te mee-gá ní cáhá<sup>n</sup>-gá ná daha cuíá cudíi nchaa nàció<sup>n</sup> ndihi mèé-yu. <sup>27</sup>Te cuíní-gá sá ncháá ñáyiú nanducu ñàhá-yu cáhá<sup>n</sup> ndihi

ñàhá-yu xii-gá, te mee-gă ndécú tũha-gá sá cãhá<sup>n</sup> ndihî ñaha-gă xií-yu ii<sup>n</sup> ii<sup>n</sup>-yu. **28**Te diu-ni Yá Ndiöxí xító ñaha-gá xií-yu núu cùdíi-yu ndécú-yu te cãdá-yu. Te duha ní cãhá<sup>n</sup> ii<sup>n</sup> ñanî tnáhã-ndó, téé ní cutnùnî iní-xi ní xíndecu ndéé sanaha, te ní xáha<sup>n</sup>-dë xií-yu: “Nchaa-o cùu-o déhe Yá Ndiöxí”, duha ní xáha<sup>n</sup>-dë xií-yu. **29**Te núu déhe Yá Ndiöxí cúũ-yu nchaa<sup>n</sup>-yu, te vá cúú cãhá<sup>n</sup>-yu sá Yă Ndiöxí cúú sã ñî cadúha-yu ndahá-yu. Te sá ñî cadúha-yu cùu ndiöxí-yu-á<sup>n</sup>, dava cùu-xi díhú<sup>n</sup> cuáá<sup>n</sup>, dava cùu-xi díhú<sup>n</sup> cuixí<sup>n</sup>, dava cùu-xi yúú. Te mèè-yu ní cahu iní-yu nàcuáa cunduu sá cúú ndiöxí-yu. **30**Te cútnáhã ñá túú ní cùtnunî iní-yu sá nèhé ní quidé-yu ní cadúha-yu nchaa xiã<sup>n</sup>, te ñá túú ní quide cuendá Yă Ndiöxí sá dúcá<sup>n</sup> ñî quidé-yu. Te vitna cãchí Yă Ndiöxí sá dáñã nchaa ndi túhú-yu nchaa sá cuèhé sá dúhá quidé-yu. **31**Te Yá Ndiöxí náhá-gă ná nduu cùndecu nchaa ñáyiu núú-gă, te mee-gă sa ñaha-gá ndëndida càa ñáyiu ní quide váha, te ndëndida càa ñáyiu ñá túú ní quide váha. Te mee-gă ní xáha<sup>n</sup>-gă xii Déhe-gá Yaá nánî Jèsús cúñaha-gă xií-yu núu ndëndida càá-yu ní quide váha te ndëndida càá-yu ñá túú ní quide váha. Te mee Jèsús cãhá<sup>n</sup> ndáá cuiti-gá, te sa ñaha-o sá ncháá xiã<sup>n</sup> cada Jèsús, chi diu cuendá-á<sup>n</sup> ñî dándótó ñaha Yá Ndiöxí xii-gá —cãchí té Pãblú xáha<sup>n</sup>-dë xií-yu.

**32**Te òré ní cãhá<sup>n</sup> té Pãblú sá ñî ndoto Jèsús, te dava ñáyiu ñá ní tnáhã iní-xi tnúhu ní cãhá<sup>n</sup>-dé ní cãhá<sup>n</sup> yíchí-yu. Te davá-yu ní xáhá<sup>n</sup>-yu xii-dé:

—Te ingá xito quixi-n, te cãhá<sup>n</sup> tucu-n tnúhu ní cãhá<sup>n</sup>-n vitna —cachí-yu xáhá<sup>n</sup>-yu xii-dé.

**33**Te ní xica-dé cuáhã<sup>n</sup>-dé. **34**Te dava ñáyiu ní xíndedóho tnúhu ní cãhá<sup>n</sup> té Pãblú ní sãndáá iní-yu Jèsús, te ní chindee tnúhu ñàhá-yu xii-dé. Te ii<sup>n</sup> téé cùchiu<sup>n</sup> Areópagú nánî-dë Níxú ndihî ii<sup>n</sup> ñadìhí nánî-á<sup>n</sup> Dãmarís, tnáhã-yu ní sãndáá iní-yu tnúhu-gá ndihî dava-gá-yu.

### Té Pãblú ndécú-dë ñuú Còrintú

**18** **1**Te té Pãblú ní quee-dé ñuú Àtenás cuáhã<sup>n</sup>-dé ñuú Còrintú. **2**Te yacá<sup>n</sup> ní naníhí tnáhã-dë ndihî ii<sup>n</sup> téé isràél nánî-dë Àquilú, te téé-á<sup>n</sup> cúú-dë téé distrítú Pòntó, te ní xíndecu-dé ndihî ñadìhí-dé tá Priscilá ñuú Rómá. Te té Cèsár téé yìndaha cuèhé nació<sup>n</sup>, téé nàni Claudiú ní xáha<sup>n</sup>-dë sá vã cúú-gă cundecu ñáyiu isràél ñuú Rómá, te xiã<sup>n</sup> nõu ní ndee té Àquilú ndihî ñadìhí-dé cuáhã<sup>n</sup>-yu ñuú Còrintú. Te sácú-ni nduu ní cuu sá ñî quexiò-yu ñuú-á<sup>n</sup>, te ní sáhã<sup>n</sup> té Pãblú ní ndatnúhu ndihî ñaha-dë xií-yu vehé-yu. **3**Te ní xáhá<sup>n</sup>-yu sá cùndècu-dé cada chiu<sup>n</sup> ndihî ñahã-yu, chi ii<sup>n</sup>-ni chiu<sup>n</sup> quide-dé ndihí-yu, te ní xóo dacáá-yu vehe dóó. Te núu xiã<sup>n</sup> ní xíndecu ndihî ñaha tã Pãblú ní quide chiu<sup>n</sup> ndihî ñaha-dé xií-yu. **4**Te núú ùná núú ùná nduu, nduu ndètátú-yu, ní xóo quíhí<sup>n</sup>-dé veñúhu ñáyiu isràél.

Te ní ndatnúhu-dé ndihi ñáyiú isràél ndihi ñáyiú ñá túú cùu ñáyiú isràél, te ní xáha<sup>n</sup>-dě sá quìndáá iní-yu tnúhu Jèsús.

5Te té Silás ndihi té Timùteú ní quee-güedé distrítú Macèdoniá cuáhá<sup>n</sup>-güedé núú ndécú tē Păblú. Te òré ní quexìo-güedé, te ní cáhá<sup>n</sup>-ni té Păblú tnúhu Yá Ndiöxí núú ñáyiú isràél, te xáha<sup>n</sup>-dě xií-yu sá Jèsús cúú-gă Crìstú Yaá ní tendaha Yă Ndiöxí ní quixi ñuyíú-a. 6Te sá dúcá<sup>n</sup> ñí cáhá<sup>n</sup>-dé nũu ní nàá ndihi ñàhá-yu xii-dé, te ní cáhá<sup>n</sup> cuèhé-yu cuèndá-dé, núu xǎ<sup>n</sup> ní naquidi-dé dóó-dě. Te duca<sup>n</sup> ñí quide-dé cuèndá sá cútnùní iní-yu sá ñă ní tnàhá iní-dé nàcuáa ní cáhá<sup>n</sup>-yu, te ní xáha<sup>n</sup>-dě xií-yu:

—Yúhú ñá túú cuèchi-í, te núu ní xíta nihnu-ndo, xǎ<sup>n</sup> quèndóo cuèchi mee-nă-ndó. Te vitna quíhí<sup>n</sup>-í cáhá<sup>n</sup> ndihi-í ñáyiú ñá túú cùu ñáyiú isràél, te vá nándùcu-gá-í nchòhó ñáyiú isràél cáhá<sup>n</sup> ndihi ñaha-í xii-ndo —càchí-dé xáha<sup>n</sup>-dě xií-yu.

7Te ní xica-dé cuáhá<sup>n</sup>-dé vehe ìí<sup>n</sup> téé nàni Justú, te téé-á<sup>n</sup> ndécú yàtni-dé núú cáá veñúhu, te tnàhá-dé càhá<sup>n</sup> ndihi-dé Yă Ndiöxí. 8Te té Crìspú téé yìndaha veñúhu-á<sup>n</sup> ñí sándáá iní-dé Jèsús ndihi ñadìhí-dé ndihi landú-dé. Te vai ñáyiú ñuú Còrintú ní sáhá<sup>n</sup>-yu ní xíndedóho-yu tnúhu-gá, te ní sándáá iní ñàhá-yu xii-gá, te ní sanduté-yu. 9Te ìí<sup>n</sup> niú ní cáhá<sup>n</sup> saní té Păblú sá ñí xáha<sup>n</sup> Yă Ndiöxí xii-dé:

—Cáhá<sup>n</sup>-ni-n tnũhu-í, te vá yùhú-n nchàa tnúhu cuèhé tnúhu duha càhá<sup>n</sup> ñáyiú, 10chi yúhú chindee ñàha-í xii-n, te vá yõo ìí<sup>n</sup> cada úhú ñàhá xii-n, te vai-gá ñáyiú ñuú-á<sup>n</sup> quìndáá iní-yu tnúhu-í —càchí-gá xáha<sup>n</sup>-gă núú sání-dé.

11Te ñuú Còrintú ní xíndecu té Păblú ìí<sup>n</sup> cuíá dava, te mee-ni tnũhu Yá Ndiöxí ní xóo dacuàha-dé ñáyiú.

12Te ndècu-gá-dé ñuú-á<sup>n</sup> ñí ngóo té Gàlìón chiu<sup>n</sup> taxi tnuní-dé distrítú Acăyá. Te dàvá-á<sup>n</sup> ñí cudéé<sup>n</sup> ñáyiú isràél núú tē Păblú, te ní tni ñàhá-yu xii-dé ndécá ñàhá-yu cuáhá<sup>n</sup> núú cuè téé cùchiu<sup>n</sup>. 13Te ní xáhá<sup>n</sup>-yu xii té Gàlìón téé cùu gobiernú:

—Téé-a ní quexìo-dé ñuú-ó xica cuu-dé te cuìní-dé dandàhú ñàhá-dě chitnahá-ndí-dé cada-ndí nàcuáa quide-dé quidé càhnu-dé Ndiöxí-dě, te dañ-ndí vá cádá-gă-ndí nàcuáa càhá<sup>n</sup> tnúhu sá sánú ìchi ñaha xii-o nacuáa cundecu-o cuìní-dé —càchí-yu xáhá<sup>n</sup>-yu xii téé cùu gobiernú.

14Te té Păblú cuìní-dé cani-dé cuèndú ní cùu, te ní ngúíta té Gàlìón càhá<sup>n</sup>-dé, te xáha<sup>n</sup>-dě xií-yu:

—Nchòhó ñáyiú isràél, cundedóho-ndo tnũhu na càhá<sup>n</sup>-í-a. Te núu ndècu núú ìí<sup>n</sup> cuèchi ní quide-dé àdi ní sahani-dé ìí<sup>n</sup> ndíyi, te cuu cundáá-xi iha, te cáhá<sup>n</sup>-ndó nũu nándi cùu sá ñí quide-dé, 15àdi dico-ni sá íí<sup>n</sup> tnũhu ní cáhá<sup>n</sup>-dé, te yáchí-gá chí cuáhá<sup>n</sup> yàcá<sup>n</sup> ndatnúhu-ndo núú méé-ndó, chi mee-ni sǎ ñà túú quide-dé nàcuáa càhá<sup>n</sup> tnúhu sá sánú ìchi ñaha xii-ndo

cahá<sup>n</sup>-ndó, te yúhú ñá túú tnàhá iní-í cada ndáá-í nchaa xíă<sup>n</sup> —càchí-dé xăha<sup>n</sup>-dë.

16Te ní cudéé<sup>n</sup>-dë, te ní ndeñuhu ñaha-dë xií-yu vechiù<sup>n</sup>. 17Te ñáyiú ñá túú cùu ñáyiú isràél ní tnií-yu té Sòstenés tée yìndaha veñúhu ñáyiú isràél, te ndèhe té Gàlìón tée cùu gobiernú ní canihá-yu xii-dé, dico ñá túú tnàhí ná tnúhu ni căhá<sup>n</sup>-dé taunihnu-dé tée ní caní-yu-á<sup>n</sup>.

**Té Păblú cuáhá<sup>n</sup> tucu-dé ñuú Antiòquiá, te yàcá<sup>n</sup> ní xica tucu-dé cuáhá<sup>n</sup>-dé dava-gá ñuú càhá<sup>n</sup>-dé tnúhu Yá Ndiöxí**

18Te titní-gá nduu ní xíndecu té Păblú ñuú Còrintú, te ní quide ndee ìní-dé nchaa ñáyiú ní sándáá iní-xi tnúhu Jèsús, te ní tnií-dé ichi cuáhá<sup>n</sup>-dé distritú Sírìá ndihi té Àquilú ndihi ñadìhí té Àquilú-á<sup>n</sup> tă Priscilá, te ní quexiò-yu ñuú Cèncreá. Te cùmání-gă tnií-yu ichi quíhí<sup>n</sup>-yu ñuú Éfesú, te ní dèté díquí tē Păblú, chi duca<sup>n</sup> ñí xăha<sup>n</sup>-dë xii Yá Ndiöxí sá ndéé xínu ìi<sup>n</sup> chiù<sup>n</sup> ní sani iní-dé cada-dé cuendá-gá, te dătnùní dèté-dé. Te ní quée-yu bàrcú cuáhá<sup>n</sup>-yu. 19Te ní quexiò-yu ñuú Éfesú, te yàcá<sup>n</sup> ní xăha<sup>n</sup> tē Păblú sá cúndècu té Àquilú ndihi ñadìhí-dé, te mee-dë quíhí<sup>n</sup>-dé dava-gá ñuú. Te cùmání-gă caca-dé quíhí<sup>n</sup>-dé, te ní sáhá<sup>n</sup>-dé veñúhu ñáyiú isràél ní ndatnúhu ndihi ñaha-dë xií-yu. 20Te ní xáhă<sup>n</sup>-yu sá cúndècu-dé titní nduu, te ñá ní cuìní-dé cundecu-dé. 21Te ní xăha<sup>n</sup>-dë:

—Núhú-í chi dacuití xini ñuhu-xi cundecu-í vico coo ñuú Jerusàlén, te quixi tucu-í te núu Ndiöxí ná càchí-gá, te vitna chí cádá ndèe iní —càchí-dé xăha<sup>n</sup>-dë xií-yu.

Te ní quée-dé bàrcú cuáhá<sup>n</sup>-dé. 22Te ní quexiò-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusàlén, te ní ndexiò-dé, te ní dándácöo váha-dé ñáyiú ndècu ichi Yá Ndiöxí, te dătnùní ní xica-dé cuáhá<sup>n</sup>-dé ñuú Antiòquiá. 23Te yàcá<sup>n</sup> ní xíndecu-dé titní nduu, te dătnùní ní tnií-dé ichi cuáhá<sup>n</sup>-dé. Te ní sáhá<sup>n</sup>-dé ñihí distritú Gàlaciá ndihi distritú Frìgiá. Te ndi tnàhá ñuú ní sáhá<sup>n</sup>-dé ní cáhá<sup>n</sup>-dé ndihi ñáyiú sándáá iní tnúhu Yá Ndiöxí, te ní ndúcú ndéé-gă-yu ní quidé-yu nchaa nàcuáa ní xăha<sup>n</sup>-dë cadá-yu.

**Té Àpolós càhá<sup>n</sup>-dé tnúhu Yá Ndiöxí ñuú Éfesú**

24Te dàvá-á<sup>n</sup> ñí quèxio ìi<sup>n</sup> tée isràél ñuú Éfesú, te nàni-dé Àpolós, te cùu-dé tée ñuú Alejàndriá, te ío váha túha-dé tnúhu Yá Ndiöxí, te ío váha ñùhu díquí-dë nàcuáa cáhá<sup>n</sup>-dé, 25chi sa xìní-dé nàcuáa ní xóo cáhá<sup>n</sup> ndíi Juàá cútñàhá ní xóo dacuàndute ndíi ñáyiú. Te ío ní cudí ìní-dé ní cáhá<sup>n</sup>-dé nchaa nàcuáa ní cuu cuendá Jèsús, dico vátá dăcuàha-gá-dé nchaa tnúhu ní cáhá<sup>n</sup> méé Jèsús. 26Te ní sáhá<sup>n</sup>-dé veñúhu ñáyiú isràél, te yàcá<sup>n</sup> ní cáhá<sup>n</sup>-dé ni yùhu ni iní-dé. Te ndècu té Àquilú ndihi ñadìhí-dé tá



Priscilá ndèdóho-yu tnúhu ní cáhá<sup>n</sup>-dé, te ní xáhă<sup>n</sup>-yu sá quíhí<sup>n</sup>-dé vehé-yu, te ní sáhá<sup>n</sup>-dé, te ní xítñúhu ñàhá-yu xii-dé dava-gá tnúhu Yá Ndiöxí sá ñà túú xìní-dé. <sup>27</sup>Te ní cachí té Àpolós sá quíhí<sup>n</sup>-dé distritú Acăyá, núu xiă<sup>n</sup> ní cadúha ñáyiú ñuú Éfesú ï<sup>n</sup> tutú canehe-dé quíhí<sup>n</sup> ndaha ñáyiú sàndáá iní tnúhu-gá xíndecu Acăyá. Te xáhă<sup>n</sup>-yu núu tütú-yu: “Cáhá<sup>n</sup> váha-ndo ndíhi té Àpolós ñuú ní quexìo-dé”, cächí-yu xáhă<sup>n</sup>-yu núu tütú-yu. Te ní xica-dé cuáhá<sup>n</sup>-dé, te ní quexìo-dé Acăyá. Te nchaa ñáyiú sàndáá iní tnúhu-gá yácá<sup>n</sup>, diu-ni mee Yă Ndiöxí ní chindee ñàha-gá ní sàndáá iní ñáhă-yu xii-gá. Te té Àpolós ío váha ní cáhá<sup>n</sup>-dé tnúhu Yá Ndiöxí núu-yu, te xiă<sup>n</sup> ío ní ndúcú ndéé-gă-yu ní quidé-yu chiú<sup>n</sup>-gá. <sup>28</sup>Te té Àpolós ní ndatnúhu-dé ndíhi ñáyiú isràél, te ní xíndedóho dava-gá-yu. Te ío váha ní cani-dé cuèndú nchaa nàcuáa ní xóo cáhá<sup>n</sup> cue téé ndéé sanaha să quíxí Crìstú ñuyíú-a. Te ní cáhá<sup>n</sup> ndáá-dé ní xáha<sup>n</sup>-dë sá díú-ní Jèsús cúú-gă Crìstú Yaá ní tendaha Yă Ndiöxí ní quixi ñuyíú-a. Te ñáyiú isràél xíndatnúhu-yu sá ñà ndáá nàcuáa càhá<sup>n</sup>-dé, dico ñá ní ñíhí-yu tnúhu cúñàhá-yu xii-dé, chi ío váha ñúhu díquí-dë tnúhu cáhá<sup>n</sup>-dé.

**Té Păblú ndécú-dë ñuú Éfesú**

**19** <sup>1</sup>Te cútnàhá ndécú-gă té Àpolós ñuú Còrintú, te ní xica té Păblú cuáhá<sup>n</sup>-dé tá yăha-dé mee-ni xítí yucu cuáhá<sup>n</sup>, te ní sáa-dé ndéé ñuú Éfesú. Te ñuú-á<sup>n</sup> ñí naníhí tnáhá-dë ndíhi cue téé sàndáá iní tnúhu Jèsús. <sup>2</sup>Te ní xícá<sup>n</sup> tnúhú-dë núú-güedë, te xáha<sup>n</sup>-dë:

—¿Sa ní quexìo Espíritú Yă Ndiöxí ní ngúndecu ndíhi-ndo ndéé òré ní sàndáá iní-ndó Jèsús-ă<sup>n</sup>? —cächí-dé xáha<sup>n</sup>-dë xii-güedë.

Te ní xáha<sup>n</sup>-güedë:

—Ñá túú xìní-ndí sá ío Espíritú Yă Ndiöxí —cächí-güedë xáha<sup>n</sup>-güedë xii-dé.

<sup>3</sup>Te ní xáha<sup>n</sup> tùcu-dé:

—¿Nása ní cáhá<sup>n</sup> téé ní dácuándùte ñaha xii-ndo-i? —cachí-dé xáha<sup>n</sup>-dë xii-güedë.

Te ní xáha<sup>n</sup>-güedë:

—Ní cáhá<sup>n</sup>-dé nàcuáa ní xóo cáhá<sup>n</sup> ndíi Juàá —cächí-güedë xáha<sup>n</sup>-güedë xii-dé.

<sup>4</sup>Te ní xáha<sup>n</sup> tē Păblú:

—Ndíi Juàá ní dácuándùte ñaha ndíi xii ñáyiú, chi ní cuiní-yu sá dáñă-yu nchaa sá cuèhé sá dúhá quidé-yu. Te ní xáha<sup>n</sup> ndíi xií-yu: “Quíndáá iní-ndó tñúhu Jèsús chi dacuití quíxi-gá ï<sup>n</sup> nduu”, duha ní xáha<sup>n</sup> ndíi Juàá xií-yu —cächí té Păblú xáha<sup>n</sup>-dë xii-güedë.

<sup>5</sup>Te sá dúcá<sup>n</sup> ñí cáhá<sup>n</sup> té Păblú xáha<sup>n</sup>-dë xii-güedë, núu xiă<sup>n</sup> ní sandute-güedë nàcuáa ní dándöo tnúhu Jèsús. <sup>6</sup>Te ní sacá<sup>n</sup> ndodo té Păblú

ndahá-dé díquí-güedë, te òré-ni ní quexìo Espíritú Yă Ndiöxí ní ngúndecu ndihi-güedë, te ní ngüíta-güedë ní cáhá<sup>n</sup>-güedë tnúhu sá dácàhu iní ñáhá Espíritú-gá, tnúhu sá ñà túú xìní-güedë cáhá<sup>n</sup>-güedë, te ní cáhá<sup>n</sup>-güedë tnúhu Yá Ndiöxí nàcuáa ní dácáhú ìní ñáhá Espíritú-gá xii-güedë. <sup>7</sup>Te cùu datná úxúú tnàhá-güedë.

<sup>8</sup>Te té Păblú ní sáhá<sup>n</sup>-dé veñúhu ñáyiu isràél ní cáhá<sup>n</sup> ndihi-dé-yu, te úní yóo ñí xínu ní xica cuu-dé veñúhu-yu. Te ío váha ñùhu díquí-dë tnúhu cáhá<sup>n</sup>-dé, núu xíă<sup>n</sup> ní cuyii-dë ní cáhá<sup>n</sup>-dé, te ní xáha<sup>n</sup>-dë sá quíndáa iní-yu tnúhu Jèsús, te duca<sup>n</sup> te ndíhu ndaha ñàha Yá Ndiöxí xii-yu. <sup>9</sup>Te davá-yu ío sàa iní-yu ñá ní cuíní-yu quíndáa iní-yu, te ío ní cáhá<sup>n</sup> cuèhé-yu cuèndá Jèsús xití veñúhu núu dàva-gá-yu. Te té Păblú ní ndee-dé veñúhu cuáhá<sup>n</sup>-dé ndihi ñáyiu sàndáa iní tnúhu Jèsús. Te ìí<sup>n</sup> nduu ìí<sup>n</sup> nduu ní sáhá<sup>n</sup>-dé scuèlá té Tìranú ní dácúáhá ñàha-dé xii-yu. <sup>10</sup>Te úú cuíá duca<sup>n</sup> ñí sáhá<sup>n</sup>-dé scuèlá ní dácúáhá-dë ñáyiu. Te nchaa ñáyiu isràél ñáyiu ndècu nihií distritú Àsiá ndihi nchaa ñáyiu ñá túú cùu ñáyiu isràél ní xíndedóho-yu tnúhu Jèsús. <sup>11</sup>Te té Păblú ío ní chindee ñàha Yá Ndiöxí xii-dé ní quide-dé vài núú sã vă yõo tnàhí ndàcu cada. <sup>12</sup>Te pãnú díquí-dë ndihi dóo cándèe núú yíquí-dë ní xícá<sup>n</sup>-yu nèhé-yu ní sáhá<sup>n</sup> núú ndécú ñáyiu cùhú, te xíă<sup>n</sup> ní tñii ñáyiu cùhú ndihi ñáyiu yìhi ñàha espíritú cúndìhi yucu ñávãha, te ní ndúha-yu.

<sup>13</sup>Te ñúú Isràél véxi cue tée tatna xica cuu-güedë quidé tãtna-güedë ñáyiu yìhi ñàha espíritú cúndìhi yucu ñávãha. Te ní ngüíta-güedë ní cacu nèhe-güedë Jèsús cuèndá quee espíritú-á<sup>n</sup> yiqui cùnù-yu, te ní xáha<sup>n</sup>-güedë:

—Xocuñí-n, chi càchí Jèsús sá vă cúndècu ndihi-gá-n tēe-a. Te diu-ni Jèsús cácu nèhe té Păblú òré càhá<sup>n</sup>-dé tnúhu-gá —càchí-güedë xãha<sup>n</sup>-güedë xii espíritú-á<sup>n</sup>.

<sup>14</sup>Te úsá tnàhá-güedë duca<sup>n</sup> ñí xóo cada-güedë. Te tãtá-güedë ní xínani-dë Èsevá, te tée-á<sup>n</sup> ñí cuu-dé dútú cùnù. <sup>15</sup>Te sá dúcá<sup>n</sup> ñí cáhá<sup>n</sup>-güedë, te ní xáha<sup>n</sup> espíritú cúndìhi yucu ñávãha-á<sup>n</sup> xii-güedë:

—¿Te ná cúú nchòhó nùu dayùhú ñáhá-ndó? Te xíní-í Jèsús, te xíní-í yoo cùu té Păblú, te nchòhó ñá túú xìní ñáhà-í xii-ndo —càchí espíritú-á<sup>n</sup> xãha<sup>n</sup>-xi xii-güedë.

<sup>16</sup>Te tée yìhi ñàha espíritú cúndìhi yucu ñávãha-á<sup>n</sup> ñí ndanchita-dé ní tñii-dé cue tée quide tãtna-á<sup>n</sup>, te ní ndihi dóo-güedë ní ndátá-dë, te ní dánícuèhé ñáhá-dë xii-güedë, te ní xinu-güedë cuáhá<sup>n</sup>-güedë. <sup>17</sup>Te nchaa ñáyiu isràél ndécú ñúú Éfesú ndihi dava-gá ñáyiu ndècu diu-ni ñúú-á<sup>n</sup> ñí níhí-yu tnúhu nàcuáa ní cuu, te ío ní yùhú-yu, te vài-yu ní cachí sá ïo càhnu cuu Xítóhó Jesucristú.

<sup>18</sup>Te dava ñáyiu ní sàndáa iní-xi tnúhu Jèsús ní sáhá<sup>n</sup>-yu núú ndécú tē Păblú, ndihi núú ndécú nchàa ñáyiu ní sàndáa iní tnúhu-gá ní náhmá-yu

nàcuáa ní xóo cada-yu. **19**Te titní ñáyiu ní xóo cada ndùu nehé-yu tutú-yu ní sáhá<sup>n</sup> núú ndécú nchàa ñáyiu sàndáá iní-xi tnúhu-gá, te yàcá<sup>n</sup> ní ndada cuèndá-yu sá ïo yahu ní sáha-yu tutú-yu, chi ndéé údico úxí mǐl díhú<sup>n</sup> cuìxí<sup>n</sup> ní sáha-yu núú ncháá. Te nchaá-yu ní sahmí-yu tutú-yu. **20**Te sátá ñí cáyú nchaa tutú-á<sup>n</sup>, te vài-gá ñáyiu ní tuhá-yu ichi Yá Ndiöxí, te ní sáha-yu cuèndá sá ïo xìni ñuhu tnúhu Yá Ndiöxí.

**21**Te ní cachí té Păblú sá quíhí<sup>n</sup>-dé distritú Macèdoniá ndihi distritú Acáyá, te dàtnùní núhú-dé ñúú Jerusàlén, te duca<sup>n</sup> te dàtnùní quíhí<sup>n</sup>-dé ñúú Rómá. **22**Te ndècu ndihi-dé té Timùteú ndihi té Èrastú cue tée chindee ñaha xii-dé. Te té Păblú ní xáha<sup>n</sup>-dë xii-güedé sá códó nùu-güedé quíhí<sup>n</sup> Macèdoniá, te ní xica-güedé cuáhá<sup>n</sup>-güedé, te mee-dë ní quendóo-dé.

### Ñáyiu Éfesú ío dusa<sup>n</sup> quidé-yu ñúú-yu

**23**Te dàvá-á<sup>n</sup> ïo ní cudéé<sup>n</sup>-yu núú nchàa ñáyiu ní tuha ichi Yá Ndiöxí. **24**Te ì<sup>n</sup> téé ñúú Éfesú nání-dë Demètriú. Te téé-á<sup>n</sup> ñí xóo canehe chiu<sup>n</sup>-dé mee-ni díhú<sup>n</sup> cuìxí<sup>n</sup> ní xóo cadúha-dé veñúhu líhli, dàtná cuìní-ndó càa veñúhu Diàná sá cúú ndiöxí-yu. Te vài díhú<sup>n</sup> ñí xóo níhí-dë ndihi cue téé ní xóo cada chiu<sup>n</sup> ndihi-dé. **25**Te ní cana-dé cue téé quide chiu<sup>n</sup> ndihi-dé, ndihi nchaa cue téé quide chiu<sup>n</sup> ndihi díhú<sup>n</sup> cuìxí<sup>n</sup>, te ní xáha<sup>n</sup>-dë xii-güedé:

—Nàha-ndo sá ïo váha nihí-ó díhú<sup>n</sup> cuèndá chiu<sup>n</sup> quide-o. **26**Te nàha-ndo sá cächí té Păblú sá ñà díú ndiöxí cúú sǎ ñí cadúha ñáyiu ñuyíú-a. Te duca<sup>n</sup> càhá<sup>n</sup>-dé ñúú-ó, te duca<sup>n</sup>-ni càhá<sup>n</sup>-dé nihí distritú Àsiá, te ío-gá vài ñáyiu sàndáá iní tnúhu càhá<sup>n</sup>-dé. **27**Te ío úhú ñúu na cuíta chiu<sup>n</sup> quide-o, vá yóo-gá cuaa<sup>n</sup> sá cadúha-o. Te ngüíta-yu cáhá<sup>n</sup>-yu sá veñúhu Diàná ñá túú càváha, te vá cadá càhnu-gá-yu sàndú-ó. Te nàha-ndo sá ïo càhnu cuu Dianá, chi nchaa ñáyiu distritú Àsiá quidé càhnu ñahá-yu ndihi ñáyiu xíndecu ñí càa xico ñuyíú —cächí té Demètriú xáha<sup>n</sup>-dë xii-güedé.

**28**Te sá dúcá<sup>n</sup> ñí cáhá<sup>n</sup> té Demètriú, xǎ<sup>n</sup> ní cudéé<sup>n</sup>-güedë núú tǎ Păblú, te uu<sup>n</sup>ni ní cuáá-güedé te cächí-güedé:

—Íío càhnu cuu Dianá sàndú ñáyiu Éfesú! —cächí-güedé.

**29**Te nchaa ñáyiu ñúú Éfesú ndì coyo ndi coyó-yu xícáhá<sup>n</sup>-yu. Te tnàhá úú cue téé distritú Macèdoniá xícá cùu-güedé ndihi té Păblú, ì<sup>n</sup>-dé nání-dë Gáyú, te ì<sup>n</sup>-dé nání-dë Àrìstarcú. Te ní tñi-güedé úú cue téé-á<sup>n</sup>, te cuánguihu coyo ndihi ñaha-güedë vehe núú quidé-güedë jùndá. **30**Te té Păblú cuìní-dé quíhu-dé tnàhá-dé vehe-á<sup>n</sup> cǎhá<sup>n</sup> ndihi ñaha-dë ní cùu, te ñá ní dàña cue téé ní sàndáá iní tnúhu-gá. **31**Te ì<sup>n</sup> úú cue téé cùnno distritú Àsiá ní cáhá<sup>n</sup> váha-güedé cuèndá té Păblú, te ní xáha<sup>n</sup>-güedë xii ì<sup>n</sup> téé xìnu cuechi núú-güedë ní sáhá<sup>n</sup>-dé ní xáha<sup>n</sup>-dë xii té Păblú sá vǎ quíhu-dé vehe

núú quidé-güedě jùndá. <sup>32</sup>Te uu<sup>n</sup>ni ní cuáá-yu nchaá-yu, te ñá í<sup>n</sup>-ní tnũhu ni cǎhá<sup>n</sup>-yu, chi ndi díí<sup>n</sup> tnũhu ní cǎhá<sup>n</sup>-yu ìí<sup>n</sup> íí<sup>n</sup>-yu. Te chitu-gǎ ñáyiú ñá ní cùtnuní iní-yu ná cuendá ní dátàcǎ ñáhá-güedě xití vehe-á<sup>n</sup>, chi ñá íí<sup>n</sup>-ní tnũhu ni cǎhá<sup>n</sup>-yu. <sup>33</sup>Te davá-yu ní cǎhá<sup>n</sup>-yu sá cuěchi té Lijandrú cúú-xí, chi ní xáha<sup>n</sup> ñáyiú isràél xii-dé sá cǎhá<sup>n</sup>-dé yuhú-yu chindee tnũhu ñaha-dě xií-yu. Te ní quide-dé ndaha-dé núũ-yu sá cúndedóho-yu tnũhu cǎhá<sup>n</sup>-dé chindee tnũhu ñaha-dě xií-yu yòtnúhu. <sup>34</sup>Te ní cutnùní iní-yu sá tée isràél cúú-dě, te uu<sup>n</sup>ni ní cuáá tucú-yu, ñá ní dañá-yu cǎhá<sup>n</sup>-dé, te cǎchí-yu:

—Íío cùnuu Dianá sàndú ñuú Éfesú! —cǎchí-yu. Te dàtná úú òré íí<sup>n</sup>-ni tnũhu ní cǎhá<sup>n</sup>-yu.

<sup>35</sup>Te tée cùu secretariú-ni-gá ní cǎhá<sup>n</sup>-dé, te dàtnùní cuèè cuèè ní sadí-yu yuhú-yu. Te ní xáha<sup>n</sup>-dě xií-yu:

—Nchaa-ndo cùndedóho-ndo ìí<sup>n</sup> tnũhu na cǎhá<sup>n</sup>-í-a. Ío cùnuu Dianá, te nchaandi túhú ñáyiú sa nàhá-yu sá ncháá-ó ío nèhe cuendá-ó veñúhu-ǎ<sup>n</sup>. Te nàhá-yu sá néhé cuendá-ó sàndú-á<sup>n</sup>, chi véxi cuu<sup>n</sup>-gá andiu. <sup>36</sup>Te vá yòo ìí<sup>n</sup> cǎchí sá ñǎ ndáá. Te coto-ndo mèe-ndo, te vá cuídó-ndó càda-ndo, te vá cuídó-ndó cǎhá<sup>n</sup>-ndó. <sup>37</sup>Te ná cuendá ndécá-ndó cuè tée-á<sup>n</sup> véxi, te ñá túú ñǎ ní quide-güedé, te ñá túú ñǎ ní dùhu-güedé veñúhu, te ñá túú cǎhá<sup>n</sup> cuèhé-güedé cuendá Diàná. <sup>38</sup>Te núu ìó yoo nàá ndihí ñaha xii té Demètriú ndihí cue tée quide chiu<sup>n</sup> ndihí-dé, te quíhí<sup>n</sup>-güedé cacá<sup>n</sup> cuéchi-güedé núú cuè tée cùchiu<sup>n</sup>. Te cue tée cùchiu<sup>n</sup> na cundoho-güedé nũu quehndé-güedé cuéchi-yu àdi ñáhá. <sup>39</sup>Àdi ío-gá ná cuendú ñúhú ìní-ndó, te cǎhá<sup>n</sup>-ndó òré ná cóo jùndá. <sup>40</sup>Te ío úhú nũu na nihí tée tàxi tnuní ñáhá xii-o tnũhu sá dúhá ío quide dusa<sup>n</sup>-o, te cachí-dé sá ndècuéchi-o chi ñá túú sàndáá iní-ó-dě quesaha-dě. Te ñá túú tnàhí ndùu váha-xi sá dúhá càda-o ni cuu, te vitna duha ní quide-o, te ñá cùtnùní iní-ó ñasa cúñaha-o xii tée tàxi tnuní ñáhá xii-o núu na càna ñaha-dé —cǎchí tée cùu secretariú xǎha<sup>n</sup>-dě xií-yu.

<sup>41</sup>Te ní xáha<sup>n</sup>-dě sá nùhú-yu te ní ndihí-yu cuánuhú.

### Té Pǎblú cuáhá<sup>n</sup>-dé distrítú Macèdoniá ndihí distrítú Grèciá

**20** <sup>1</sup>Te òré ñá túú-gǎ ní quide dusa<sup>n</sup>-yu, te ní cana ñaha tǎ Pǎblú xii nchaa ñáyiú sàndáá iní tnũhu Jèsús ní cǎhá<sup>n</sup>-dé dóho-yu nàcuáa cadá-yu. Te ní quide ndee ìní ñáhá-dě xií-yu, te ní tñii-dé ichi cuáhá<sup>n</sup>-dé distrítú Macèdoniá. <sup>2</sup>Te tayáha-dé cuáhá<sup>n</sup> ìí<sup>n</sup> ìí<sup>n</sup> ñuú yíndèhu Macèdoniá. Te cǎhá<sup>n</sup>-dé dóho nchaa ñáyiú sàndáá iní tnũhu Jèsús nàcuáa cadá-yu, te ní cudíí ìní-yu cadá-yu nàcuáa cǎhá<sup>n</sup> Yǎ Ndióxi cadá-yu sá dúcá<sup>n</sup> ní cǎhá<sup>n</sup>-dé dóho-yu. Té ní quexìo-dé distrítú Grèciá. <sup>3</sup>Te xía<sup>n</sup> ñǎ xíndecu-dé úní yóo. Te xía<sup>n</sup> quèe-dé bàrcú quíhí<sup>n</sup>-dé distrítú Sìriá ní cùu, te ní níhí-dě tnũhu sá ndétú ñàha ìí<sup>n</sup> úú cue tée isràél cahni ñaha-güedě xii-dé ní cùu,

núu xíá<sup>n</sup> ní tñii-dé ichi cuáhá<sup>n</sup>-dé ní yáha-dé ichi distritú Macèdoniá. <sup>4</sup>Te cuáhá<sup>n</sup> ndihi-dé té Sopàter téé ñuú Bèrea, ndihi té Arístarcú, ndihi ñi<sup>n</sup> téé nàni Segundú. Te ndi ndùú cue téé-á<sup>n</sup> cúú-güedě cue téé ñuú Tesalónicá. Te tnàhá té Găyú téé ñuú Dèrbé, ndihi té Timùteú cuáhá<sup>n</sup> ndihi-dé, te tnàhá té Tìquicú ndihi té Tröfimú cuáhá<sup>n</sup> ndihi-dé, te úú cue téé-á<sup>n</sup> cúú-güedě cue téé distritú Àsiá. Te nchaa cue téé-á<sup>n</sup> cuáhá<sup>n</sup> ndihi-güedé té Păblú. <sup>5-6</sup>Te ní quexìo-güedé ñuú Filipú, te yàcá<sup>n</sup> ní naníhí ñàhá-güedě xii-ndí. Te té Păblú ní tendaha-dě cue téé ndihi-dé cuáhá<sup>n</sup>-güedé ñuú Tròás, te ní xáha<sup>n</sup>-dě sá díú-ní yàcá<sup>n</sup> cundetu ñaha-güedě xii-ndí. Te ní ndóo-í ndihi-dé, te ní xíndecu-ndí vico xèxí-yu pàá sá ñà túú yìhi levadurá. Te sátá ñí yáha vico, te ní quée-ndí bàrcú cuáhá<sup>n</sup>-ndí, te ní xúhu<sup>n</sup>-ndí ichi úhú<sup>n</sup> nduu, te ní quexìo-ndí ñuú-á<sup>n</sup>. Te yàcá<sup>n</sup> ní naníhí tnàhá-ndí ndihi cue téé yòdo nuu cuáhá<sup>n</sup> ní xíndecu-ndí úsá nduu.

### **Té Păblú cuáhá<sup>n</sup> ngándihi-dé ñáyiu ñuú Tròás**

<sup>7</sup>Te ñi<sup>n</sup> nduu ndumìngú ní naníhí tnàhá-ndí ndihi nchaa ñáyiu ní sándáá iní-xi tnúhu Jèsús ní xexi-ndí pàá ndíhí-yu. Te duca<sup>n</sup> ñí quide-ndí, chi ní cachí Jèsús sá dúcá<sup>n</sup> càda-o cuendá sá vă nácuànaa-o sá ñí xíhí-gá cuendá naníhí tãhú-ó. Te té Păblú ní ngüíta-dé càhá<sup>n</sup>-dé tnúhu-gá, te càhá<sup>n</sup>-dé ní cuu dava niú, chi cuendá ná tũndaá ingá nduu-á<sup>n</sup>, te caca-dé quíhí<sup>n</sup>-dé ingá xichi. <sup>8</sup>Te ndècú-yu vehe yòdo tnaha, te yìhí-yu ndéé cuàrtú cúú ùní núú ññu, te càyú víhí ñùhú xití cuàrtú-á<sup>n</sup>. <sup>9</sup>Te ñi<sup>n</sup> téé sa ta cùu sacuéhé luha nàni-dé Eùticú núcõo-dé yèhe ventaná, cuíní-dé cúdú-dé, chi ní cunaha vìhi cahá<sup>n</sup> té Păblú, te ní tñii ñaha sàní xii-dé ní xídí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xíhí-dé, chi ío dùcú<sup>n</sup> ní ngava-dé. <sup>10</sup>Te tnàhá té Păblú nchìcú<sup>n</sup>-dé ní nuu. Te ní quexìo cunu-dé núú cãtùu téé ní xíhí-á<sup>n</sup>, te ní numi ñaha-ni-dě, te ní xáha<sup>n</sup>-dě xíí-yu:

—Vá ndìhú iní-ndó, chi ní ndoto-dé —càchí-dé xáha<sup>n</sup>-dě xíí-yu.

<sup>11</sup>Te dătnùní cuándaa ndihi ñaha tùcu-dé xíí-yu cuàrtú núú yíhí-yu ni cùu, te yàcá<sup>n</sup> ní xexi ndihi ñaha-dě xíí-yu, dătnùní ní ngüíta-dé vài-gá tnúhu ní càhá<sup>n</sup>-dé, te càhá<sup>n</sup>-ni-dé ní tũndaá, te dătnùní ní xica-dé cuáhá<sup>n</sup>-dé. <sup>12</sup>Te téé ní ngava-á<sup>n</sup> ní sánúndeca ñàhá-yu xii-dé ndéé vehe-dé, te ío ní cudíí iní-yu sá ñí ndoto-dé.

### **Ní quee-güedé ñuú Tròás cuáhá<sup>n</sup>-güedé ñuú Miletú**

<sup>13</sup>Te té Păblú ní cachí-dé sá quíhí<sup>n</sup>-ndí ndihi bàrcú ndéé ñuú Àsón, te mee-dě caca saha-dě, te yàcá<sup>n</sup> naníhí tnàhá-ndí ndihi-dé te quée-dé bàrcú, te ní quée-ndí bàrcú cuáhá<sup>n</sup>-ndí. <sup>14</sup>Te ní naníhí tnàhá-ndí ndihi-dé ñuú Àsón, te yàcá<sup>n</sup> ní quée-dé bàrcú tnàhá-dé cuáhá<sup>n</sup>-ndí ñuú Mitilené. <sup>15</sup>Te ní

quexìo-ndí ndéé ingá nduu yatni ñuú Quìú, te ndéé nduu tnéé ní quexìo-ndí ñuú Sámú te yàcá<sup>n</sup> ní yáha-ndí, te ní quexìo-ndí ñuú Trògiliú. Te ndéé nduu ìdá ní quexìo-ndí ñuú Mìletú. **16**Te té Păblú ñá ní cuiní-dé yáha-ndí ñuú Éfesú, chi ñá túú ní tnàhá iní-dé cuyaa-dě ichi, chi ío ndĩhi iní-dé cuèndá cuiní-dé quiní-dé ñuu vá ndácú-dě ndexìo-dé ñuú Jerusalén cundecu-dé vico Pentecòstés.

**Té Păblú cāhá<sup>n</sup> ndihi-dé cue tée yìndaha ñaha xii ñáyiú sàndáá iní tnúhu Jèsús ñuú Éfesú**

**17**Te òré ndécú tē Păblú ñuú Mìletú, te ní cana-dé cue tée yìndaha ñaha xii ñáyiú sàndáá iní tnúhu Jèsús ñuú Éfesú sá quĩhí<sup>n</sup>-güedé núú ndécú-dě.

**18**Te sátá ñí quexìo-güedé, te ní xáha<sup>n</sup>-dě xii-güedé:

—Nàha-ndo nacuaá ní quide-í ndéé cútnàhá ní quexìo-í distrítú Àsiá.

**19**Chi ní quide-í nàcuáa ní cáhá<sup>n</sup> Yă Ndiöxí cada-í, ñá túú ní tühío-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá tìtní xito ní cuiní ñáyiú isràél cahni ñàhá-yu xii-í ní cùu, te ío ní ndoho-í ní cácu-í. **20**Te sa nàha-ndo sá ncháándì túhú sa ní cachí tnúhu-í nàcuáa cada-ndo cuèndá sá chíndèe ñaha Yá Ndiöxí xii-ndo. Te ní cáhá<sup>n</sup>-í tnúhu-gá núú-ndó nchàa-ndo, te ñuu-ni duca<sup>n</sup> ñí quixi-í ndi tnàhá vehe-ndo ñí cáhá<sup>n</sup>-í tnúhu-gá núú-ndó. **21**Te ní xáha<sup>n</sup>-í xii ñáyiú isràél ndihi ñáyiú ñá túú cùu ñáyiú isràél sá dáñă-yu nchaa sá cuèhé sá dúhá quidé-yu te quíndáá iní-yu tnúhu Xítohó Jesucristú. **22**Te dacuití quĩhí<sup>n</sup>-í ñuú Jerusalén, chi Espiritú Yă Ndiöxí ní cachí-xi sá dáí quĩhí<sup>n</sup>-í, te ñá túú xini-í nándi cada ñaha-güedě xii-í yàcá<sup>n</sup> te núu na quèxio-í. **23**Te ñí<sup>n</sup> ñí<sup>n</sup> ñuú núú sàhá<sup>n</sup>-í càchí tnúhu Espiritú-gá sá chíhí ñaha-güedé vecaá, te cada úhú ñàhá-güedě. **24**Dico ñá túú tnàhí ná cuu cuèi na càhni ñaha-güedé xii-í, dico cuiní-í sá dǐí iní dandìhi-í nchaa sá ñí cachí Xítohó Jesucristú cada-í. Te ní cachí Yă Ndiöxí sá càhá<sup>n</sup>-í núú ñáyiú sá ño cùu iní ñàhá-gă xii-yu, te naníhí tàhú-yu núu na quèndáá iní-yu tnúhu-gá.

**25**Te sa ní cachí tnúhu-í xii-ndo nchàa-ndo sá ñuu na quèndáá iní-ndó Yă Ndiöxí, te ndíhu ndaha ñàha-gá xii-ndo. Te na càchí tnúhu-í sá ñí ñí<sup>n</sup> nduu-gá vá quini ñàhá-ndó xii-í ñuyíú-a. **26-27**Te yúhú ñá túú cuèchi-í ñuu ío ñáyiú vá naníhí tàhú, chi sa ní cachí tnúhu-í nchaa sá ñí cáhá<sup>n</sup> mée Yă Ndiöxí cada-ndo. **28**Te coto-ndo mée-ndo, te coto-ndo tnàhá ñáyiú sàndáá iní tnúhu-gá, chi Espiritú-gá ní cachí-xi sá cúnùu-ndo núú-yu dacuàha-ndó-yu tnúhu-gá. Te cada-ndo cuèndá sá dàtná mbéé-ndó cùú-yu, te mee-ndo cùu-ndo datná toli xito-ndó-yu duca<sup>n</sup> càda-ndo cuèndá, chi nàha-ndo sá Jèsús ní sati níñí-gă, te ní xihí-gá cuèndá naníhí tàhú-ó ndihí-yu. **29**Te yúhú sa cùtnuní iní-í sá òré ñá túú-gă-í ndécú, te quixi ñáyiú dandàhú ñàhá xii-ndo cuèndá dañà-ndo tnúhu Yá Ndiöxí, te cada

ñàhá-yu xii-ndo dàtná quídé ñǎǎá òré tníí-dí mběé. <sup>30</sup>Te ñíu-ni ñí<sup>n</sup> úú cue téé ndècu ndíhi-ndo, cue téé-á<sup>n</sup> dacuàndehnde-güedé, te cudana davá-yu quindáá iní-yu chítnáhá ñáhǎ-yu xii-güedé. <sup>31</sup>Te xǎ<sup>n</sup> ñúu cǎchí tnúhu-í sá ïo quíhi iní-ndó cùndecu-ndo ndíhi nchaa ñáyíu sàndáá iní tnúhu-gá. Te nàha-ndo sá yǎhú ní xíndecu-í úní cuíá ñí cǎhá<sup>n</sup>-í tnúhu Jèsús núú ñáyíu cuèi nduu cuèi níú. Te áma ní xóo ndáhyú-í, chi ñá ní cuíní-yu quindáá iní-yu ncháá-yu tnúhu ní cǎhá<sup>n</sup>-í —cǎchí té Pǎblú xǎha<sup>n</sup>-dě xii-güedé.

<sup>32</sup>Te xǎha<sup>n</sup> tùcu-dé:

—Nchòhó cue téé ndècu ndíhi-í ichi Xítóhó Jesucrístú, ío cuíní-í sá méé Yǎ Ndiöxí chindee ñàha-gá xii-ndo. Te mee-gǎ ní cǎhá<sup>n</sup>-gá sá ïo cùdíí ìní ñáhá-gǎ xii-ndo. Te naníhí tàhú-ndó ndíhi nchaa ñáyíu cùu cuendá-gá, te chindee ñàha-gá xii-ndo cuendá cada-ndo nchàa sá cǎhá<sup>n</sup>-gá. <sup>33</sup>Te òré ní xíndecu ndíhi ñàha-í xii-ndo, te ní díhú<sup>n</sup> ní dǒó ñà túú ní cùdíí ìní-í. <sup>34</sup>Te mee-ndo sà naha-ndo sá yǎhú ní quide chiu<sup>n</sup>-í, te ní níhí-í nchaa sá ñí nandíhi-í ndíhi cue téé xica cuu ndíhi-í. <sup>35</sup>Te sa ní xiní-ndó nàcuáa ní quide-í ní quide chiu<sup>n</sup>-í, te ñíu-ni duca<sup>n</sup> cǎda chiu<sup>n</sup>-ndo cuendá chindee-ndo nchàa ñáyíu ndàhú, chi sa nàha-ndo nacuáa ní cachí Xítóhó Jesucrístú, te duha ní cachí-gá: “Cùdíí-gǎ iní-ó cuǎha-o ñáyíu ndàhú sá xíní ñùhú-yu dàcúxí sǎ táxí-yu xii mee-o”, duha ní cachí-gá —cǎchí té Pǎblú xǎha<sup>n</sup>-dě xii-güedé.

<sup>36</sup>Te sátá dúcá<sup>n</sup> ñí cǎhá<sup>n</sup>-dé, te ní ngüíñí xítí-dě ndíhi dava-gá-güedé, te ní cǎhá<sup>n</sup> ndíhi-dé Yǎ Ndiöxí. <sup>37</sup>Te sátá ñí túhú tnúhu ní cǎhá<sup>n</sup>-dé ndíhi Yá Ndiöxí, te ní ndáhyú víhí-güedé sá quíhí<sup>n</sup>-dé, te ní numi ñàha-güedé, te ní teyuhu ñàha-güedé. <sup>38</sup>Te ní ndíhú víhí ìní-güedé, chi ní xǎha<sup>n</sup> tǎ Pǎblú sá ñí ñí<sup>n</sup> nduu-gá vá naníhí tnáhá-güedé cǎhá<sup>n</sup> ndíhi tnàha-güedé. Te cuáhá<sup>n</sup> ndíhi ñàha-güedé xii-dé núú ndécú bàrcú.

### Té Pǎblú cuáhá<sup>n</sup>-dé ñúú Jerusàlén

**21** <sup>1</sup>Te ní quide ndee ìní-ndí nchaa cue téé cùnuu. Te ní queé-ndí bàrcú cuáhá<sup>n</sup> ndáá ichi-ndí ñúú Còs. Te nduu tnéé ní sáhá<sup>n</sup>-ndí ñúú Ròdás, te ní yáha-ndí cuáhá<sup>n</sup>-ndí ñúú Pàtará. <sup>2</sup>Te yàcá<sup>n</sup> ní naníhí-ndí ñí<sup>n</sup> bàrcú ñúhú ìchi-xi quíhí<sup>n</sup>-xi distrítú Fèniciá, xǎ<sup>n</sup> ní queé-ndí cuáhá<sup>n</sup>-ndí. <sup>3</sup>Te ichi cuáhá<sup>n</sup>-ndí ní xiní-ndí distrítú Chìpré cáá cuǎdava xítí làmár, te ní yáha-ndí, te ní quendóo ñúú-á<sup>n</sup> xio dàtni-ndí. Te cuáhá<sup>n</sup>-ndí ñúú Tìrú ñí<sup>n</sup> ñúú yíndèhu distrítú Sìriá cuendá yàcá<sup>n</sup> tava-güedé nchaa sá nchídó bàrcú. <sup>4</sup>Te yàcá<sup>n</sup> ní naníhí tnáhá-ndí ndíhi ñáyíu ní sàndáá iní tnúhu Jèsús, te ní xíndecu-ndí úsá nduu ndíhí-yu. Te ní xáhǎ<sup>n</sup>-yu sá vǎ quíhí<sup>n</sup> té Pǎblú ñúú Jerusàlén, chi Espíritú Yǎ Ndiöxí ní xǎha<sup>n</sup>-xi xíí-yu sá ndóhó vèhi-dé ñúu na quíhí<sup>n</sup>-dé. <sup>5</sup>Te sátá ñí yáha nduu úsá, te ní quee-ndí cuáhá<sup>n</sup>-ndí yuhu làmár. Te ní quee nchaa ñáyíu ní sàndáá iní tnúhu-gá, téé, ñadìhí, nchaa landú, ncháá-yu ní

sándeça ñàhá-yu yuhu làmár, te òré ní quexìo-ndí, te ní ngüíñí xítí-ndí ní cáhá<sup>n</sup> ndíhi-ndí Yá Ndiöxí. <sup>6</sup>Te ní quide ndee ìní tnáhá-ndí ndíhi-yu, te dätñuní ní quée-ndí bàrcú, te ní naquehé<sup>n</sup>-yu ichi cuánuhú-yu vehé-yu.

<sup>7</sup>Te ní xica bàrcú ñúhú-ndí ní quee-xi ñuú Tìrú cuáhá<sup>n</sup>-ndí ndíhi-xi ñuú Tolèmaidá. Te xíá<sup>n</sup> ñí sáá-xi te ní quene-ndí, te ní sáhá<sup>n</sup>-ndí ní cáhá<sup>n</sup> ndíhi-ndí nchaa ñáyiú sàndáá ìní-xi tnúhu Jèsús, te ní xíndecu-ndí ndíhi-yu ìí<sup>n</sup> nduu. <sup>8</sup>Te nduu tnéé ní ndée tucu-ndí bàrcú cuáhá<sup>n</sup>-ndí ñuú Cèsareá, te yàcá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lìpé cundecu-ndí ndíhi-dé. Te té-á<sup>n</sup> ñí xóo cada chù<sup>n</sup> ndíhi-dé ìñú-gá cue té ní chindee ñàha xii ñáyiú sàndáá ìní tnúhu-gá ñuú Jerusàlén ní xóo cuáñaha-güedé sá ñí xóo caxí-yu. Te dätñuní mee-ñá tnúhu Yá Ndiöxí càhá<sup>n</sup>-dé xíca cùu-dé. <sup>9</sup>Te té Lìpé-á<sup>n</sup> ndècu cùmí dèhe dñí-dé, te ni ìí<sup>n</sup>-yu vátá ndúcú ñàha-gá té xii-yu, te ncháá-yu càhá<sup>n</sup>-yu tnúhu Yá Ndiöxí tnúhu sá dácàhu ìní ñáhá mèe-gá. <sup>10</sup>Te xíá<sup>n</sup> ñí cuu tìtní nduu ndècu-ndí, te ní quexìo ìí<sup>n</sup> té nani Agabú ñuú-á<sup>n</sup>, véxi-dé distritú Jùdeá, te té-á<sup>n</sup> tnàhá-dé càhá<sup>n</sup>-dé tnúhu Yá Ndiöxí. <sup>11</sup>Te ní níhí-dé tnúhu núú ndécú-ndí ñuú ní quixi-dé ní cáhá<sup>n</sup> ndíhi ñàha-dé xii-ndí. Te ní xíca<sup>n</sup>-dé cìnchú té Pàblú, te ní ngóo-dé, te ní ngüíta-dé ní dácútú-dé sáhá-dé ndíhi ndaha-dé, te ní cachí-dé xii-ndí:

—Espiritú Yá Ndiöxí ní cachí-xi sá tée dii cìnchú-xi-a tñii ñàha cuè tée isràél ñuú Jerusàlén, te duha dacùtu ñàha-güedé xii-dé, te cuáha cuèndá ñáhá-güedé xii-dé núú cuè tée ñuú Rómá. Duha ní cáhá<sup>n</sup> Espiritú-gá —càchí té Àgabú.

<sup>12</sup>Te sá dúcá<sup>n</sup> ñí cáhá<sup>n</sup>-dé, te ní xáha<sup>n</sup>-ndí nchaa-ndí sá vǎ quíhí<sup>n</sup> té Pàblú ñuú Jerusàlén. <sup>13</sup>Te té Pàblú ní cachí-dé:

—¿Ná cuèndá ndéé dúcá<sup>n</sup> ndàhyú-ndó dándíhú ìní ñáhá-ndó xii-í-i? Te ñá túú ñá cuu cuèi na dàcutu ñàha-güedé, àdi cuèi na càhni ñàha-güedé xii-í cuèndá sá càhá<sup>n</sup> ndíhi-í Jèsús, chi sa ndècu túha-í sá cùú-í —càchí-dé.

<sup>14</sup>Te ñá túú ní sàndáá ìní-dé sá dúcá<sup>n</sup> xáha<sup>n</sup>-ndí, núu xíá<sup>n</sup> ñá túú-gǎ ná ní xáha<sup>n</sup>-ndí xii-dé sá vǎ quíhí<sup>n</sup>-dé, te ní xítnàha-ndí:

—Mee-ni-gǎ Yá Ndiöxí ná cùnaha-gá nása sàni ìní-gá cada-gá —xítnàha-na-ndí.

<sup>15</sup>Te ní quehe<sup>n</sup>-ndí ndàchiu<sup>n</sup>-ndí, te ní xica-ndí cuáhá<sup>n</sup>-ndí ñuú Jerusàlén. <sup>16</sup>Te cuáhá<sup>n</sup> ndíhi-ndí ìí<sup>n</sup> úú cue tée Cèsareá, cue tée ní sàndáá ìní tnúhu Jèsús. Te ndèca ñàha-güedé xii-ndí cuáhá<sup>n</sup> vehe té Mnàson, te té-á<sup>n</sup> cúú-dé tée distritú Chìpré, te ndècu-dé ñuú Jerusàlén, te sa ní cuu vǎi nduu ní sàndáá ìní-dé tnúhu-gá, te vehe té-á<sup>n</sup> ñí xíndecu-ndí.

### **Té Pàblú ndátnùhu-dé ndíhi té Jàcobó**

<sup>17</sup>Te òré ní quexìo-ndí ñuú Jerusàlén, te nchaa ñáyiú ní sàndáá ìní tnúhu Jèsús ní quixí-yu ní dándácöo váha ñàhá-yu, chi ní cudíí víhí ìní-yu



sá nǐ quexìo-ndí. **18**Te nduu tněé cuáhá<sup>n</sup> ndihí-ndí té Pǎblú cuendá cáhá<sup>n</sup> ndihí-ndí té Jàcobó, te òré ní quexìo-ndí núú ndécú-dě, te ndècu ndihí-dě nchaa cue té yìndaha ñaha xii ñáyiú sàndáá iní tnúhu Jèsús. **19**Te té Pǎblú ní dándácõo váha ñaha-dě xii-güedé, te ní xáha<sup>n</sup>-dě nàcuáa ní quide Yá Ndiõxí ní chindee ñaha-gá xii-dé ní cáhá<sup>n</sup>-dé tnúhu-gá núú ñáyiú ñá túú cùu ñáyiú isràél. **20**Te sátá nǐ yáha ní cáhá<sup>n</sup>-dé, te ní ndácá<sup>n</sup> táhũ-yu núú Yá Ndiõxí cuendá nchaa sá nǐ quide-gá. Te dǎtnùní ní xáha<sup>n</sup>-güedě xii té Pǎblú:

—Yòhó sa nàha-n sá nǐ cuu titní mǐl ñáyiú isràél ní sàndáá iní-yu tnúhu Jèsús, te càchí-yu sá ìo xìni ñuhu-xi cadá-yu nchaa nàcuáa càhá<sup>n</sup> tnúhu sá nǐ chídó tnùní ndíi Moisés. **21**Te ní níhĩ-yu tnúhu sá dácuaaha-n ñáyiú isràél ñáyiú ndècu ñuú xícá cuendá sá vǎ cadá-gǎ-yu nàcuáa ní cachí ndíi Moisés cadá-yu. Te xǎha<sup>n</sup>-n xii-yu sá vǎ cuǎha-gá-yu sèñá ñii landú-yu, te vá cadá-gǎ-yu dàtná ní xóo cada ñáyiú ndéé sanaha, duha dàcuaha-n ñáyiú ní níhĩ-yu tnúhu. **22**Te na nihí-yu tnúhu sá ndécú-n ìha, te tnàvíí ngüíta-yu cáhá<sup>n</sup> cuèhé-yu cuendá-n. **23**Te na càchí tnúhu-ndí nàcuáa cada-n. Ndècu cúmí cue té vátá cadá-gǎ-güedé nàcuáa ní cáhá<sup>n</sup> méé-güedě sá cadá-güedě cuendá nduu vétú iní Yá Ndiõxí. **24**Te quíhĩ<sup>n</sup>-n ndìhi-güedé te cada-n nchaa nàcuáa ní xóo cada ñáyiú ndéé sanaha cuendá nduu vétú iní Yá Ndiõxí. Te tava-n dǐhú<sup>n</sup> cuu núú-güedě cháhu-güedé veñúhu, te duca<sup>n</sup> te dǎtnùní ndacu dèté díquí-güedě. Nchaa xǎ<sup>n</sup> cada-n, te quiní ñáyiú sá ñǎ ndàá tnúhu càhá<sup>n</sup> nchaa ñáyiú càhá<sup>n</sup> cuèhé cuendá-n. Te na cùtnuní iní-yu sá tnàhá-n quide-n nchaa nàcuáa ní chídó tnùní ndíi Moisés cadá-yu. **25**Te sa ní quide ndáá-ndí cuendá nchaa ñáyiú ñuú xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyiú-á<sup>n</sup> sǎ vǎ cáxĩ-yu nchaa sá nchító-ó ndùu táhú nchaa sá càchí-yu cùu ndiõxí ní cadúha cue ñáyiú ñuyú-a. Te ní xáha<sup>n</sup>-ndí sá vǎ cáxĩ-yu níñí, te vá cáxĩ-yu cuñú nchaa quití cuèhné. Te vá càhá<sup>n</sup> ndihí cue té ñadìhí te núu ñá díú ñadìhí-güedé cúũ-yu, te ni cuè ñáyiú dǐhí vá càhá<sup>n</sup> ndihí-yu té te núu ñá díú yǐ-yu cùu-güedé. Duha ní tee-ndí núú tütú cuáhá<sup>n</sup> —càchí-güedé xǎha<sup>n</sup>-güedě xii té Pǎblú.

### Ní tñii-güedé té Pǎblú xití veñúhu ñáyiú isràél

**26**Te nduu tněé cuáhá<sup>n</sup> té Pǎblú ndihí cúmí cue té veñúhu càhnu sá ìo cùnuu núú ñáyiú isràél cada-güedé nàcuáa ní xóo cada ñáyiú ndéé sanaha cuendá nduu vétú iní Yá Ndiõxí. Te ní quíhu-dé veñúhu càhnu sá ìo cùnuu-á<sup>n</sup> nǐ xáha<sup>n</sup>-dě ná daha-gá nduu cùmání dandìhi-güedé nàcuáa ní xóo cada ñáyiú ndéé sanaha, te dǎtnùní cànehe-güedé sá ndúú táhú Yá Ndiõxí quíhĩ<sup>n</sup> veñúhu.

**27**Te cùmání-gǎ cuu úsá nduu sá nǐ sáhá<sup>n</sup>-güedé veñúhu càhnu sá ìo cùnuu, te sa ndècu tucu té Pǎblú veñúhu. Te cue té isràél véxi distritú

Àsiá ní xiní-güedé té Păblú yíhí-dě veñúhu, te ní tniî ñaha-güedě xii-dé, te ío ní cáhá<sup>n</sup> cuèhé-güedé cuendá-dé núú dăva-gá ñáyiú yìhi veñúhu cuendá sá cúdě<sup>n</sup>-yu núú tē Păblú. **28**Te níhi ní cáhá<sup>n</sup>-güedé, te xăha<sup>n</sup>-güedě xií-yu:

—iNchòhó ñáyiú isràél, yáchí-ndó chî cuánùndaha ñaha-ndo! Chi tée-a yayacá<sup>n</sup> cuáhá<sup>n</sup>-dé cāhá<sup>n</sup>-dé sá ñà túú nàndíhi-o, te cāhá<sup>n</sup>-dé sá vă cādá-ó nchàa nacuáa cāhá<sup>n</sup> tnúhu sá ñî chídó tnùnî ndîi Moisés, te cāchí-dé sá ñà túú nàndíhi veñúhu-a. Te ñá dífú-ní xǎ<sup>n</sup> chi sa ní quíhu-dé veñúhu-a ndîhi cue tée ñá túú cùu ñáyiú isràél, te sá dúcá<sup>n</sup> ñî quide-dé, te ñá túú-gă ní cānehe íí-dě xití veñúhu. Te veñúhu-a cùu-xi vehe Yá Ndiöxí —cāchí-güedé xăha<sup>n</sup>-güedě xií-yu.

**29**Te duca<sup>n</sup> ñî cáhá<sup>n</sup>-güedé chi ní sani iní-güedé sá ñî quíhu ndîhi-dé té Tröfimú veñúhu-güedé, chi ní xiní-güedé xícá cùu ndîhi ñaha-dé xití ñuú. Te tée-á<sup>n</sup> cúú-dě tée ñuú Éfesú, te ñá dífú tēe isràél cúú-dě.

**30**Te chitu ñáyiú ñuú-á<sup>n</sup> ñî tacá-yu ní tniî-yu té Păblú táñùhu ñahá-yu ní ndee veñúhu cāhnu sá ío cùnuu, te òré-ni ní nacadí-güedé yèhe veñúhu-á<sup>n</sup>.

**31**Te sa cahní-yu té Păblú ní cùu, te ní sáhá<sup>n</sup> ì<sup>n</sup> úú-güedé núú ndécú tēe cùu capitá<sup>n</sup> cúnùu-gá, te ní xăha<sup>n</sup>-güedě xii-dé sá ncháá ñáyiú ñuú Jerusàlén xínàá-yu. **32**Te òré-á<sup>n</sup> cuáhá<sup>n</sup> tēe cùu capitá<sup>n</sup> cúnùu-gá ndîhi dăva-gá cue tēe nchícú<sup>n</sup>-gá ndîhi sandàdú-dé. Te òré ní xiní-yu ní quexìo coyo-güedé núú xixúcu-yu, te ní yùhú-yu ñá túú-gă ní cānî-yu té Păblú.

**33**Te tēe cùu capitá<sup>n</sup> ní sātuha-dé té Păblú, te ní xăha<sup>n</sup>-dě xii cue sandàdú-dé sá tníí ñaha-güedé dacùtu ñaha-güedé úú cadèná. Te dătnùnî ní xícá<sup>n</sup> tnúhú-dě núú-yu, te xăha<sup>n</sup>-dě:

—¿Ná cúú tēe-a? ¿Ná ní quide-dé? —cāchí-dé xăha<sup>n</sup>-dě xií-yu.

**34**Te tēe cùu capitá<sup>n</sup>-á<sup>n</sup> ñă ní cùnùnî iní-dé nūu ná cúú să ñî quide té Păblú, chi uu<sup>n</sup>ni ní cuáá-yu. Te tucu cāhá<sup>n</sup> ì<sup>n</sup>, tucu cāhá<sup>n</sup> ì<sup>n</sup>-yu, núu xǎ<sup>n</sup> ní xăha<sup>n</sup>-dě cue sandàdú-dé sá cándèca ñaha-güedé xii-dé quíhí<sup>n</sup> cuàrtél núú ndécú-güedě. **35-36**Te nchícú<sup>n</sup> ñáhă-yu cuáhá<sup>n</sup> ní quexìo ndéé nācuáa cāa nchio cùnî-yu cahni ñahá-yu xii-dé ni cùu. Te níhi ní cáhá<sup>n</sup>-yu xăhă<sup>n</sup>-yu sá cahní ñaha-güedé, te xǎ<sup>n</sup> ní ndacani ñaha-güedě ndécá ñaha-güedé cuásáa nchio-ă<sup>n</sup>.

### Té Păblú xăha<sup>n</sup>-dě xii-güedé sá ñà túú cuèchi-dé

**37**Te cuánguîhu-güedé cuàrtél ndîhi té Păblú ní cùu, te ní xăha<sup>n</sup>-dě xii tēe cùu capitá<sup>n</sup> cúnùu-gá:

—Cāhá<sup>n</sup> ndàhú-í núú-n cùndetu-n na cúñaha-í ì<sup>n</sup> úú tnúhu xií-yu —cāchí-dé xăha<sup>n</sup>-dě.

Te tēe tàxi tnuní-á<sup>n</sup> ñî xăha<sup>n</sup>-dě:

—¿Náa tnàhá yòhó cāhá<sup>n</sup>-n tnúhu grìégú? **38**Te ní cáhá<sup>n</sup>-í sá tēe ègiptú cúú-n, chi diu-n ñî ndúcú-n cuè tēe ní nàá ndîhi tēe cùchiu<sup>n</sup> Cesár ní

cáhà<sup>n</sup>-í, chi diu ìí<sup>n</sup> té yacá<sup>n</sup> ní ndúcú-dě cùmí mǐl cue té ní sahani ndíyì. Te ndèca tnaha-güedé ní sáhá<sup>n</sup> xití yucu ní xíhi váha-güedé —càchí-dé xǎha<sup>n</sup>-dě xii té Pǎblú.

**39**Te té Pǎblú ní xáha<sup>n</sup>-dě:

—Ñá díú tée ègiptú cúu-í, chi tée isràél cúu-í, chi diu-ni tée isràél cúú tǎtà-í, te dicó-ni sá ñǎ cacu-í ñuú Tàrsú ñuú cǎhnú, te ñuú-á<sup>n</sup> yíndèhu-xi distritú Ciliciá. Te cuiní-í cada ndee ìní-n dàña-n na cahá<sup>n</sup> ndíhi-í-yu —càchí-dé xǎha<sup>n</sup>-dě.

**40**Te ní xáha<sup>n</sup> tée cùu capitá<sup>n</sup> cúnùu-gá sá cúú cǎhá<sup>n</sup> té Pǎblú, núu ní ngúnutnǐ-dé núú nchio, te ní quide-dé ndaha-dé sá cündedóho-yu. Te ní sadí-yu yuhú-yu, te ní cǎhá<sup>n</sup>-dé tnúhu ñáyíu isràél, te xǎha<sup>n</sup>-dě xíí-yu:

**22**<sup>1</sup>—Chí cǎdá cǎhnu ìní nchòhó cue té sa cuéhé ndíhi nchòhó cue tée cuechi, na cǎhá<sup>n</sup>-í ìí<sup>n</sup> tnúhu cundedóho-ndo sǎ ñà túú cuèchi-í, chi ñà túú ñǎ ní quide-í, te ni ñà túú ñǎ tnúhu cǎhá<sup>n</sup>-í —càchí-dé xǎha<sup>n</sup>-dě xii-güedé.

<sup>2</sup>Te cuèndá sá dúcá<sup>n</sup> ñǎ cǎhá<sup>n</sup>-dé tnúhu mée-yu núu tnàví-ñǎ ní sadí-yu yuhú-yu ní xíndedóho-yu ní cǎhá<sup>n</sup>-dé, te xǎha<sup>n</sup>-dě:

<sup>3</sup>—Yúhú cúu-í tée isràél, te ní cacu-í ñuú Tàrsú, te ñuú-á<sup>n</sup> yíndèhu-xi Ciliciá. Te davitna líhli-í cútnàhá ní quexìo-í ñuú Jerusàlén ní dǎcuáhá ñàha té Gamàliél. Te ní dǎcuáhà-í nchaa tnúhu ní chídó tnùnì nchaa cue tée ndée sanaha nàcuáa cada ñáyíu. Te yúhú ní cahu ìní-í ní quide-í titnǐ núú chiu<sup>n</sup> nacuáa cuu váha ìní Yǎ Ndiöxí ní cǎhá<sup>n</sup>-í, te diu-ni duca<sup>n</sup> quide nchohó tucu. <sup>4</sup>Te ní sánú ndúcù-í nchaa ñáyíu sàndáá ìní-xi tnúhu Jèsús, cuèi tée, cuèi ñáyíu dǐhí ní dácútù-í-yu, te ní chihi-í-yu vecaá, te ní níhì-í tnúhu ndee ìní sá cǎhni-ndí-yu. <sup>5</sup>Te dútú cúnùu-gá ndíhi cue tée cùnùu núú-ndó naha-güedé sá ndàá cǎhá<sup>n</sup>-í chi mee-güedé ní taxi-güedé tutú cuáñaha-í xii ñáyíu isràél ñáyíu ndècu ñuú Dàmascú cuèndá cutnùnì ìní-yu ná chíú<sup>n</sup> cuáhá<sup>n</sup>-í ní cùu. Te ñùhu-í ichi cuáhá<sup>n</sup>-í ñuú-á<sup>n</sup> cuǎnúndúcù-í ñáyíu ní sàndáá ìní-xi tnúhu Jèsús cuèndá dacùtu-í-yu te candeca-í-yu ndixi, te iha cada úhú ñáhá-güedé xíí-yu ni cùu.

**Té Pǎblú xǎha<sup>n</sup>-dě xii ñáyíu nàcuáa ní cuu ní tuha-dé ichi Jèsús**

(Hch. 9:1-19; 26:12-18)

<sup>6</sup>Te ta cùyatni-í ñuú Dàmascú cuáhá<sup>n</sup>-í, te cùu-xi datná òré cauxúú nduu, te uu<sup>n</sup>ni ní quee ñuhú andíu, te ní dáyèhé-xi ndée núú nútñi-í. <sup>7</sup>Te ní quide nee-xi núu-í, xǎ<sup>n</sup> ní nduá-í ndée ñuhu. Te ní tecú dóho-í cǎhá<sup>n</sup> ìí<sup>n</sup> sá cǎhá<sup>n</sup> andíu, te càchí-xi: “Yòhó té Sàulú, ¿ná cuèndá cúú úhú ìní ñáhá-n dàndoho ñaha-n xii-í?”, càchí sá cǎhá<sup>n</sup>-á<sup>n</sup>. <sup>8</sup>Te ní xáha<sup>n</sup>-í: “¿Ná cúú yòhó sá cǎhá<sup>n</sup>-ái<sup>n</sup>?”, xǎha<sup>n</sup>-í. Te ní cǎhá<sup>n</sup> tucu ìngá xito te càchí-xi: “Yúhú cúu-í Jèsús tée ní xíndecu ñuú Nazàrét, te duca<sup>n</sup> ïo dàndoho ñaha-n xii-í”, càchí

sá cãhá<sup>n</sup>-á<sup>n</sup>. Te xíã<sup>n</sup> ní cutnùní iní-í sá díú Jèsús cãhá<sup>n</sup>. <sup>9</sup>Te nchaa cue tée ndihi-í ní xiní-güedé ní dáyèhé ñuhú, te ní yùhú-güedé, dico ñá túú ní tècú dóho-güedé òré ní cãhá<sup>n</sup>-gá. <sup>10</sup>Te ní xáha<sup>n</sup>-ï xii-gá: “Yòhó Xítóhó Jesucrístú, ¿ná cuìní-n cãda-í?”, xáha<sup>n</sup>-ï xii-gá. Te ní cachí-gá: “Ndacóo, te quíhí<sup>n</sup>-n ñúú Dàmascú, yàcá<sup>n</sup> tecú tnúhu-n nchàa nacuáa cuìní Yã Ndiöxí cada-n”, cãchí-gá —cãchí té Pãblú xáha<sup>n</sup>-dë xii-yu.

<sup>11</sup>Te ní xáha<sup>n</sup> tùcu té Pãblú:

—Te cuendá sá ñí dácuaá ñaha ñuhú xii-í ñuu ní tñii cue tée ndihi-í ndaha-í ndécá ñaha-güedé cuáhá<sup>n</sup> ndéé ñuú Dàmascú.

<sup>12</sup>Te yàcá<sup>n</sup> ndécú ñí<sup>n</sup> tée nàni Ananiás, te ío vãi sá ñí chídó tnùní ndíi Moisés cadá-yu quide-dé. Te nchaa ñáyiu ñuú Dàmascú ío váha cãhá<sup>n</sup> ndihi ñahá-yu xii-dé. <sup>13</sup>Te ní quexìo-dé núú ndécù-í, te ní cachí-dé: “Yòhó té Sàulú, tée ndècu ndihi-í ichi Xítóhó Jesucrístú, ndúha núú-n”, cãchí-dé. Te òré-ni ní nacaá<sup>n</sup> núú-í te ní xiní-í-dé. <sup>14</sup>Te dãtnùní ní cachí-dé: “Yá Ndiöxí ní cãhá<sup>n</sup> ndihi-gá ñaní tnáhá-ó ñí xíndecu ndéé sanaha. Te diu-gá ní cãxi ñaha-gã xii-n cuendá quiní-n nchàa sá vãha cuìní-gá cada-n. Te quiní-n Jèsús Yaá ñá túú cuèchi-xi, te diu-ni mee-gã cãhá<sup>n</sup> ndihi ñaha-gã xii-n. <sup>15</sup>Te cãhá<sup>n</sup>-n tnúhu Jèsús núú nchàa ñáyiu, te cãhá<sup>n</sup>-n nchàa sá ñí xiní-n ndihi nchaa sá ñí xíndedóho-n. <sup>16</sup>Tnávíí, te quíhí<sup>n</sup>-n cuàndute-n, te cãhá<sup>n</sup> ndihi-n Yã Ndiöxí cuendá cada cãhnu iní-gá nchaa sá cuèhé sá dúhá ñí quide-n”, duha ní cachí té Ananiás xii-í —cãchí té Pãblú xáha<sup>n</sup>-dë xii-yu.

**Té Pãblú ní cani-dé cuendú nacuáa ní xáha<sup>n</sup> Jèsús cada-dé quíhí<sup>n</sup>-dé ñuú núú xíndecu ñáyiu ñá túú cùu ñáyiu isràél**

<sup>17</sup>Te ní xáha<sup>n</sup> tùcu té Pãblú:

—Te ní ndee-í cuándixi-í ñuú Jerusàlén. Te ní sáhá<sup>n</sup>-í veñúhu cãhnu sá ño cùnuu ní cãhá<sup>n</sup> ndihi-í Yã Ndiöxí, te ní dácótó núú ñahá-xí sã méé Jèsús ní xiní-í xití veñúhu, <sup>18</sup>te ní cachí-gá: “Yáchí, quee-n ñúú Jerusàlén, chi ñáyiu-a vá quèndáa iní-yu nacuáa ní cachí-í cúñaha-n xii-yu cuendá-í”, duha ní cachí-gá xii-í. <sup>19</sup>Te ní xáha<sup>n</sup>-ï xii-gá: “Yòhó Xítóhó Jesucrístú, sa xìní-n sã ncháa ñáyiu ñahá-yu sá ñí sáhá<sup>n</sup>-í ndi tnahá ñí<sup>n</sup> ndi tnahá ñí<sup>n</sup> veñúhu nànducu-í ñáyiu sàndáa iní tnúhu-n, te ní tñii-í-yu, ní chihí-í-yu vecaá, te ní táuchíu<sup>n</sup>-í ní caniha-güedë xii-yu. <sup>20</sup>Te cútnahá ní sahani-güedé ndíi Tëvá tée ní xóo cãhá<sup>n</sup> tnúhu-n, te tnáhá-í ndécú òré-á<sup>n</sup> te ní xíndeé-í dóo cue tée ní sahani ñaha xii ndíi. Te yúhú ní cãhá<sup>n</sup>-í sá ñí quide váha-güedé sá dúcá<sup>n</sup> ñí quide-güedé”, duha ní xáha<sup>n</sup>-ï xii-gá. <sup>21</sup>Te ní cachí tnúhu-gá xii-í: “Cuáhá<sup>n</sup> chi cuìní-í quíhí<sup>n</sup>-n nchàa ñuú xicá núú xíndecu cue ñáyiu ñá túú cùu ñáyiu isràél cãhá<sup>n</sup>-n tnúhu-í”, cãchí-gá —cãchí té Pãblú xáha<sup>n</sup>-dë xii-yu.

**Te Păblú ndihi tée tàxi tnuní ñáhá xii cue sandadú**

22Te sá dúcá<sup>n</sup> ñí cáhá<sup>n</sup>-dé, te ñá ní tnàhá-gá iní-yu cundedóho-yu tnúhu cáhá<sup>n</sup>-dé. Te ì<sup>n</sup>-ni ñí cuú-yu nchaá-yu, te ní cuáá-yu, te xăhá<sup>n</sup>-yu:

—íChí cáhní-dě! íÑá díú să cúnđecu-dé ñuyíú-a! —càchí-yu xăhá<sup>n</sup>-yu.

23Te mei òré duca<sup>n</sup> ñí cáhá<sup>n</sup>-yu, te ní ndátă-yu dóo-yu, te ní dáquéně-yu núú ñnu sá sàtú iní-yu. Te ní quéhnu-yu ñuhu, te ní dácácòyó-yu núú ñnu sá ïo sàtú iní-yu. 24Te tée cùu capitá<sup>n</sup> cúnùu-gá ní xáha<sup>n</sup>-dě xii cue sandadú-dé:

—Chí dítá-dě ná quǐhu-dé ndéé xití vehe, te cani-ndo-dě ñii, chi na quène yuhu-dé ná tnúhu ní cáhá<sup>n</sup>-dé ñnu ndéé dúcá<sup>n</sup> cùdée<sup>n</sup>-yu núú-dě —càchí-dé xăhá<sup>n</sup>-dě xii-güedé.

25Te sátá ñí dácútú ñàha-güedé xii té Păblú sá cání ñàha-güedé ní cùu, te ní xáha<sup>n</sup>-dě xii tée cùu capitá<sup>n</sup> ndécú-ă<sup>n</sup>:

—Te na càchí tnúhu-í sá vă cúú cànìha-güedé ñii, chi tée ròmá cúù-í, te vátá quìní ndáá-gá-ndó ñnu ndècuéchi-í àdi ñáhá —càchí-dé xăhá<sup>n</sup>-dě xii tée cùu capitá<sup>n</sup>.

26Te sá dúcá<sup>n</sup> ñí cáhá<sup>n</sup>-dé, te ní sáhá<sup>n</sup> tée cùu capitá<sup>n</sup> núú tée cùnùu-gá, te ní xáha<sup>n</sup>-dě:

—Vá cúú cànì-o tée-ă<sup>n</sup>, chi tée ròmá cúú-dě —càchí-dé xăhá<sup>n</sup>-dě.

27Te ní sáhá<sup>n</sup> tée cùu capitá<sup>n</sup> cúnùu-gá ndéé núú tē Păblú, te ní xáha<sup>n</sup>-dě:

—Cáhá<sup>n</sup> ndáá-n ñnu ndisa tée ròmá cúú-n —càchí-dé xăhá<sup>n</sup>-dě.

Te ní xáha<sup>n</sup> tē Păblú:

—Ndáá sá tē ròmá cúù-í —càchí té Păblú xăhá<sup>n</sup>-dě xii tée cùnùu-á<sup>n</sup>.

28Te ní xáha<sup>n</sup> tē cùnùu-á<sup>n</sup>:

—Yúhú tnàhá-í cúù-í tée ròmá, chi vài díhú<sup>n</sup> ñí cháhu-í —càchí-dé xăhá<sup>n</sup>-dě.

Te té Păblú ní xáha<sup>n</sup>-dě:

—Tnàhá-í cúù-í tée yàcá<sup>n</sup> tucu, chi tătà-í cúú-dě tée ròmá —càchí té Păblú xăhá<sup>n</sup>-dě xii tée cùu capitá<sup>n</sup> cúnùu-gá.

29Te uu<sup>n</sup>ni ní nacaca sata cuè tée cuáhá<sup>n</sup> canìha xii-dé ní cùu. Te ní yùhú tée tàxi tnuní sá dúcá<sup>n</sup> ñí xáha<sup>n</sup> tē Păblú sá tē ròmá cúú-dě, chi ní xáha<sup>n</sup>-dě ní dácútú ñàha-güedé xii-dé, núu xíă<sup>n</sup> ní yùhu-dé.

**Té Păblú ní cáhá<sup>n</sup> ndihi-dé cue tée cùnùu oré ní quide-güedé jùndá**

30Te tée tàxi tnuní sandadú ñá ní xìní-dé ná cuéchi ní dácáá ñăyiu isràél díquí tē Păblú, núu xíă<sup>n</sup> nduu tněé ní cana-dé cue dútú cúnùu, ndihi cue tée cùchiu<sup>n</sup>, ndihi cue tée cùu sacuéhé, te ní xáha<sup>n</sup>-dě sá cádá-güedě jùndá cuèndá nducu tnúhu-güedé núú tē Păblú ná cuéchi ní dácáă-yu díquí-dě.

Te ní xáha<sup>n</sup>-dě xii cue sandàdú sá nándàxi ñaha-güedé cadèná ndútú-dě, te candeca ñaha-güedé quíhí<sup>n</sup> núú cádá-güedé jùndá. Te ní sáhá<sup>n</sup>-güedé ní nandaxi ñàha-güedé xii-dé ndécá ñàha-güedé cuáhá<sup>n</sup> jùndá, te ní quexìo-güedé, te ní ngúnutnǎí-dé núú cuè téè cùchiu<sup>n</sup>.

**23** <sup>1</sup>Te yacá<sup>n</sup> ní xíndéhé vǎha té Pǎblú núú nchàa-güedé, te ní xáha<sup>n</sup>-dě:

—Cada càhnu iní nchòhó cue téè cùchiu<sup>n</sup>, te duca<sup>n</sup> nchòhó cue téè cùu sacuéhé, véxi-í cǎchí tnúhu-í sá ñà túú cuèchi-í, chi mee Yǎ Ndiǒxí náhá-gǎ nása ndècu-í ñuyú-a, te ñá túú cùcaha<sup>n</sup> núù-í núú-gǎ —cǎchí té Pǎblú xǎha<sup>n</sup>-dě xii-güedé.

<sup>2</sup>Te té Anàniás téè cùu dútú cúnùu-gá ní xáha<sup>n</sup>-dě xii cue téè nùtnǎí yatni òhí té Pǎblú sá cǎní-güedé déhndé yuhu-dé. <sup>3</sup>Te té Pǎblú ní xáha<sup>n</sup>-dě xii dútú-ǎ<sup>n</sup>:

—Yòhó, chi úhú tnàhí iní-n, chi ní ndúcú-n téè ní caniha xii-í, te ñá túú cuèchi-í, dico quiní-n ñà cada ñaha Yǎ Ndiǒxí xii-n. Te yòhó ní cana ñaha-n ndùcu tnúhu-n ñuu quide-í nchaa nàcuáa cǎhá<sup>n</sup> tnúhu sá ñí chídó tnùní ndíi Moisés cada-o. Te mee-n ñí ndúcú-n téè ní caniha, te ñá túú dùca<sup>n</sup> ní cǎhá<sup>n</sup> ndíi cada-o —cǎchí té Pǎblú xǎha<sup>n</sup>-dě xii dútú cúnùu-gá-ǎ<sup>n</sup>.

<sup>4</sup>Te cue téè xǎnutnǎí òhí té Pǎblú ní xáha<sup>n</sup>-güedé xii-dé:

—Nèhé ní quide-n chi ní xícuèhé-n dütú cúnùu-gá téè xínu cuechi núú Yǎ Ndiǒxí —cǎchí-güedé xǎha<sup>n</sup>-güedé xii té Pǎblú.

<sup>5</sup>Te té Pǎblú ní xáha<sup>n</sup>-dě xii-güedé:

—Cada càhnu iní-ndó chi ñá túú xíní-í sá dütú cúnùu-gá cúú-dě, chi núú tütú Yǎ Ndiǒxí cǎchí-xi sá vǎ cúú cǎhá<sup>n</sup> cuèhé-ó cuèndá ñí<sup>n</sup> téè cúnuu ñuu-ó yòtnúhu. Te yúhú ñá túú xíní-í sá téè cúnuu cuu-dé ñuu ní sácóo-í ní cǎhá<sup>n</sup>-í —cǎchí té Pǎblú xǎha<sup>n</sup>-dě xii-güedé.

<sup>6</sup>Te òré-ǎ<sup>n</sup> ñí cutnùní iní té Pǎblú sá dáva-güedé cùndìhi-güedé cue téè cùu saducéú, te dáva-güedé cùndìhi-güedé cue téè cùu fariséú, te níhi ní cǎhá<sup>n</sup>-dé ní xáha<sup>n</sup>-dě xii-güedé:

—Yúhú cúú-í téè fariséú, te tnàhá tǎtà-í ndìhi xí-í cúú-güedé cue téè fariséú tucu. Te tnàhá yúhú sàndáá iní-í sá ndótó nchàa ñáyuu ní xíhí, te núu xǎ<sup>n</sup> cuíní-ndó ndùcu tnúhu-ndo núù-í cǎná ñaha-ndo —cǎchí-dé xǎha<sup>n</sup>-dě xii-güedé.

<sup>7</sup>Te sá dúcá<sup>n</sup> ñí cǎhá<sup>n</sup>-dé xǎ<sup>n</sup> ní nàá ndìhi tnàha cue téè cùu fariséú ndìhi cue téè cùu saducéú, chi ñá ñí<sup>n</sup>-ní tnúhu ni cǎhá<sup>n</sup>-güedé, chi ní ndí quehe<sup>n</sup> ndí quehe<sup>n</sup>-güedé sá ñí cǎhá<sup>n</sup>-güedé. <sup>8</sup>Te cue téè cùu saducéú cǎchí-güedé sá vǎ ndótó cuè ñáyuu ní xíhí, te cue téè cùu fariséú cǎchí-güedé sá ndótó-yu. Te cue téè cùu saducéú cǎchí-güedé sá ñà túú espíritú xínu cuèchi núú Yǎ Ndiǒxí, te cue téè cùu fariséú cǎchí-güedé sá ò espíritú xínu cuèchi núú-gǎ. <sup>9</sup>Te ta cùdée<sup>n</sup>-güedé cuáhá<sup>n</sup>, te níhi-gá cúú

iní-güedé cãhá<sup>n</sup>-güedé, te ìí<sup>n</sup> úú cue tée cùu fariséú cue tée dàcuaha ñaha xii ñáyiú nchaa tnúhu ní chídó tnùní ndíi Moisés ní cáhá<sup>n</sup> níhi-güedé, te xãhá<sup>n</sup>-güedé:

—Ñá túú cuèchi-dé, te cudana te ní cáhá<sup>n</sup> ndíhi-dé ìí<sup>n</sup> espíritú xínú cuèchi núú Yã Ndiöxí te vá ngöo vá cúú vãha iní-ó núú-gã —càchí cue tée cùu fariséú xãhá<sup>n</sup>-güedé xii-güedé.

**10**Te cuendá sá ìo xĩnãá-güedé, xiã<sup>n</sup> ní yùhú tée cùu capitá<sup>n</sup> cúnúu-gá sá cáhni-güedé té Pãblú, núu xiã<sup>n</sup> ní xãhá<sup>n</sup>-dë sá quĩhí<sup>n</sup>-güedé cúnúcuaca ñaha-güedé candeca ñaha-güedé núhú cuàrtél.

**11**Te ndéé niú cúú ùú ní quexìo Xítohó Jesucrìstú núú ndécú tã Pãblú, te ní xãhá<sup>n</sup>-gã:

—Ñíí cunduu-n, vá yùhú-n, chi nàcuáa ní cáhá<sup>n</sup>-n ñí cacunehe ñaha-n xii-í iha, te diu-ni duca<sup>n</sup> cãhá<sup>n</sup>-n càcunehe ñaha-n xii-í quĩhí<sup>n</sup>-n ñúú Rómá —càchí-gá xãhá<sup>n</sup>-gã xii-dé.

### Cahni-güedé té Pãblú ní cùu

**12-13**Te nduu tnéé ní natacá vñhi-gá údico cue tée isràél ní ndatnúhu-güedé sá cáhni-güedé té Pãblú, te ní xitnãha-güedé:

—Ni dítá vã cáxí-ó te ni ndüte vá cóhó-ó ndéé ndacu-o cãhni-o té Pãblú, te dàtnùní caxi-o dítá, te coho-o ndüte, chi sa ní sani iní-ó sã cádá-ó, te cuu cuéchi xii-o núu vá cádá-ó —càchí-güedé xitnãha-güedé.

**14**Te ní sãhá<sup>n</sup>-güedé núú ndécú nchãa dútú cúnúu ndíhi nchaa cue tée cùu sacuéhé, te ní xãhá<sup>n</sup>-güedé:

—Ní cachí-ndí sá ni dítá vã cáxí-ndí ndéé núu ní ndacu-ndí ní sahni-ndí té Pãblú, chi sa ní sani iní-ndí sã cádá-ndí, te cuu cuéchi núu vá cádá-ndí.

**15**Te duha cada-ndo ndíhi dava-gá cue tée cùnúu, chi cúnãha-ndo xii tée cùu capitá<sup>n</sup> cúnúu-gá: “Quixi ndíhi-n tã Pãblú núú ndécú-ndí cuendá ndatnúhu ndíhi-ndí-dé, chi cuini-ndí nducu tnúhu váha-gá-ndí ná cúú sã ñí quide-dé”, duha cúnãha-ndo xii tée tàxi tnuní sandàdú. Te duca<sup>n</sup>-ni cúnãha-ndo dandahú-ndó-güedé cuendá quixi ndíhi-güedé té Pãblú, te nchúhú sa cundetu-ndí-güedé ichi, chi quiní té Pãblú ná cahni-ndí-dé —càchí-güedé xãhá<sup>n</sup>-güedé xii cue tée cùchiu<sup>n</sup>.

**16**Te déhe cúha té Pãblú ní níhí-dë tnúhu nàcuáa cada-güedé ditó-dé. Te ní sãhá<sup>n</sup>-dé cuàrtél, te ní xãhá<sup>n</sup>-dë xii ditó-dé nàcuáa cãhá<sup>n</sup>-güedé cada ñaha-güedé. **17**Te ní cana té Pãblú ìí<sup>n</sup> tée cùu capitá<sup>n</sup>, te ní xãhá<sup>n</sup>-dë:

—Vá cündèe iní-n, quĩhí<sup>n</sup> ndíhi-n tãe-a na cãhá<sup>n</sup> ndíhi-dé tée cùnúu-gá, chi ndècu ìí<sup>n</sup> cuendú cúnãha-dë cuini-í —càchí té Pãblú xãhá<sup>n</sup>-dë xii tée cùu capitá<sup>n</sup>.

18 Te dātnūnī ní xica tée cūu capitá<sup>n</sup> ndécá-dě dāxí<sup>n</sup> tē Pāblú cuáhá<sup>n</sup> núu ndécú tē cūnuu-gá, te òré ní quexìo-güedé núu-dě, te ní xāha<sup>n</sup> tē cūu capitá<sup>n</sup> xii-dé:

—Té Pāblú tē yìhi vecaá ní cana ñaha-dě xii-í, te ní cachí-dé véxi-í ndìhi tē-a cuendá cachí tnúhu-dé ì<sup>n</sup> cuendú cuiní-dé —càchí-dé xāha<sup>n</sup>-dě xii tē cūnuu-gá.

19 Te tē cūnuu-á<sup>n</sup> ñi tñi-dé ndaha dāxí<sup>n</sup> tē Pāblú, te tanehe ñaha-dé cuáhá<sup>n</sup> ì<sup>n</sup> xio, te ní xicá<sup>n</sup> tnúhú-dě núu-dě, te xāha<sup>n</sup>-dě:

—¿Ná cuendú cuiní-n cāhá<sup>n</sup>-n? —càchí-dé xāha<sup>n</sup>-dě xii dāxí<sup>n</sup> tē Pāblú.

20 Te ní xāha<sup>n</sup>-dě xii tē cūnuu-á<sup>n</sup>:

—Cue tē isràél ní ndatnúhu ndáá-güedé sá quíxí-güedě tneé cáhá<sup>n</sup> ndàhú-güedé núu-n càndeca-n té Pāblú quíhí<sup>n</sup> jùndá, te yàcá<sup>n</sup> cacá<sup>n</sup> tnúhú ndáá-güedé núu-dě ná cúu sã ñi quide-dé, càchí-güedé xitnàha-güedé. 21 Te vá quìndáá iní-n chi dìcò dandàhú ñáhá-güedě, chi vèhi-gá údico-güedé ndátnúhu-güedé cundedí-güedé ichi cahni ñaha-güedě. Te xitnàha-güedé sá ni dítá vã cáxí-güedě, te ni ndùte vá cóhó-güedě ndéé ñuu ní ndacu-güedé ní sahani ñaha-güedě, te dātnūnī caxi-güedé dítá, te coho-güedé ndute, chi sa ní sani iní-güedé sá cádá-güedě, te cuu cuéchi núu vá cádá-güedě, càchí-güedé xitnàha-güedé. Te cundecu túha-ná-güedé cundetu ñaha-güedě tneé, te núu na quìndáá iní-n càndeca-n-dé quíhí<sup>n</sup> jùndá —càchí-dé xāha<sup>n</sup>-dě xii tē cūnuu-á<sup>n</sup>.

22 Te tē cūnuu-á<sup>n</sup> ñi xāha<sup>n</sup>-dě:

—Cuanùhú, te vá yōo tnàhí cūñaha-n sã ñi quixi-n ñi cachí tnúhu-n nàcuáa càhá<sup>n</sup>-güedé cada-güedé té Pāblú —càchí-dé xāha<sup>n</sup>-dě.

### Ndèca-güedé té Pāblú cuáhá<sup>n</sup> núu tē Juělí tē cūu gobiernú

23 Te tē cūnuu-gá ní cana-dé úu cue tē cūu capitá<sup>n</sup>, te xāha<sup>n</sup>-dě:

—Tava-ndo ũú ciendú sandàdú cue tē xica saha, ndìhi únídico úxí sandàdú cue tē yòdo cuayú, ndìhi úu ciendú sandàdú mee-ni cuè tē xìnehe lànzá. Te cada túha-ndo chi caca-ndo òré caá í<sup>n</sup> niú quíhí<sup>n</sup>-ndó ñùú Cèsareá ndìhi té Pāblú. 24 Te nducu-ndo cuèdìcò ì<sup>n</sup> ũú cuayú codo-dě ndìhi cue tē ndèé ñáhá xii-dé. Te cada cuèdàdú-ndó-dě ichi, te candeca-ndo-dě quíhí<sup>n</sup> quíndeca-ndo-dě núu tē cūu gobiernú —càchí tē cūnuu-á<sup>n</sup> xāha<sup>n</sup>-dě xii cue tē cūu capitá<sup>n</sup>.

25 Te tē cūnuu-á<sup>n</sup> ñi cadúha-dé tutú cuendá quíhí<sup>n</sup> ndaha té Juělí tē cūu gobiernú. Te duha ní chídó tnūnī-dé núu tütú cuáhá<sup>n</sup>:

26 “Cóvāha díi-n, tātá gobernàdór. Ío cada càhnu iní, yúhú nánì-í Clàudiú Lìsiás. Yúhú ní tendaha-í ì<sup>n</sup> tutú véxi ndaha-n cuendá quiní tnūnī-n nàcuáa ní cuu iha. 27 Cue tē isràél ní tñi-güedé ì<sup>n</sup> tē nàni Pāblú cuiní-güedé cahni ñaha-güedě ní cūu, te ní níhì-í tnúhu sá tē ròmá cúu-dě



nũu ní sáhá<sup>n</sup>-í ndihi sandàdú-í ní dácăcu-ndí-dé. **28**Te ní cuiní-í quiní-í ná cuendá tée ñaha-güedé cuéchi xii-dé, núu xiă<sup>n</sup> ndécà-í-dé ní sáhá<sup>n</sup> núu ní quide cue tée cùchiu<sup>n</sup> israél jùndá. **29**Te yàcá<sup>n</sup> ní níhì-í tnúhu sá ñà túú ñà cuéchi ni quide-dé, chi cuendá-ni sá ní níhì-güedě tnúhu sá ñà túú sàndáá iní-dé cada-dé nchaa sá ní xóo cada ñáyiu ní xíndecu ndéé sanaha nchicú<sup>n</sup> nihnu-güedé quide-güedé, xiă<sup>n</sup> ní cudéé<sup>n</sup>-güedě núú-dě. Te ñà túú cuéchi cahnú ni quide-dé nũu quíhí<sup>n</sup>-dé vecaá àdi cahni-í-dé. **30**Te ní níhì-í tnúhu sá cuè tée israél ndúcú-güedě nàcuáa cada-güedé cahni ñaha-güedě xii-dé, xiă<sup>n</sup> ní xáha<sup>n</sup>-í xii sandàdú-í sá cándèca ñaha-güedé quixi xiă<sup>n</sup>. Te ní xáha<sup>n</sup>-í xii cue tée tée ñaha cuéchi sá quixí-güedě ndéé xiă<sup>n</sup> cǎhá<sup>n</sup>-güedé nũu ná cuéchi ní quide-dé. Te cada cahnú iní-n chi duha-ni ndùu tnúhu cǎhá<sup>n</sup>-í, te cundee ìní-n quèhe<sup>n</sup> cuendá-n-dě”, duha ní chídó tnùnì tée ní cadúha tutú cuáhá<sup>n</sup> ndaha té Juělí.

**31**Te cue sandàdú ní quide-güedé nàcuáa ní xáha<sup>n</sup> tée tàxi tnuní ñáhá xii-güedé chi ní xica-güedé ndihi té Pǎblú òré caá íf<sup>n</sup> niú, te diu-ni niú-á<sup>n</sup> ní quexìo-güedé ñuú Antipatrís. **32**Te sátá ní túndaá, te ní nacuico cuè tée xínehe lànzá ndihi dava-gá sandàdú xícá sàha cuánuhú-güedé cuàrtél, te mee-ñà sandàdú cue tée yòdo cuayú cuáhá<sup>n</sup> ndihi té Pǎblú. **33**Te òré ní quexìo-güedé ñuú Cèsareá, te ní sàha-güedé tée cùu gobiernú tutú néhé-güedě cuáhá<sup>n</sup>. Te ní quehe<sup>n</sup> cuendá-dé té Pǎblú. **34**Te sátá ní dácúahá tée cùu gobiernú-á<sup>n</sup> tutú-á<sup>n</sup> te ní xícá<sup>n</sup> tnúhú-dě núú tǎ Pǎblú, te xáha<sup>n</sup>-dě:

—¿Ndéé tée cùu-n? —cachí-dé xáha<sup>n</sup>-dě.

Te ní xáha<sup>n</sup> tǎ Pǎblú:

—Tée Ciliciá cùu-í —càchí-dé xáha<sup>n</sup>-dě.

**35**Te ní xáha<sup>n</sup> tée cùu gobiernú-á<sup>n</sup>:

—Òré quexìo cue tée tée ñaha cuéchi xii-n, te cǎhá<sup>n</sup>-n ñasa ní cuu, chi níhì-í nàcuáa cada ndáá-í cuendá-n —càchí-dé xáha<sup>n</sup>-dě xii té Pǎblú.

Te ní xáha<sup>n</sup>-dě xii sandàdú sá cùndèé-güedé té Pǎblú vehe cahnú té Hèrodés.

**Té Pǎblú xáha<sup>n</sup>-dě xii té Juělí sá ñà túú cuéchi-dé**

**24** **1**Te sátá ní cuu úhú<sup>n</sup> nduu, te té Ananiás dútú cùnùu-gá cuáhá<sup>n</sup>-dé ñuú Cèsareá ndihi cue tée cùu sacuéhé ndihi íí<sup>n</sup> tée nàni Tértulú tée cǎhá<sup>n</sup> yuhu-güedé. Te cuáhá<sup>n</sup>-güedé núú tée cùu gobiernú cuáhá<sup>n</sup> dácúándèhnde-güedé núú-dě sá ndécúéchi té Pǎblú. **2**Te ní sánguaca-güedé té Pǎblú. Te òré ní quexìo-dé núú-güedě, te ní ngüíta té Tértulú xáha<sup>n</sup>-dě xii té Juělí nàcuáa cǎa cuéchi tée-güedé té Pǎblú:

—Ío cahnú cada iní tǎtá gobernàdór. Duha ndùu chiu<sup>n</sup> ndéé iní ñáhá-ndí xii-n vèxi-ndí, núu nása cachí-n cùnduu. Tǎxáhu xii-n, chi ío váha ndècu nchaa ñáyiu, te ñà túú nàá-yu chi ío váha quide-n. **3**Te ío cùdíí ìní-yu chi

nchaa-ni nduu xĩndecu váha-yu nchaá-yu, te ío táxãhu Ndiõxí xii-n sã dúcá<sup>n</sup> quide-n. <sup>4</sup>Te cada cãhnu iní, cuiní-í ndatnúhu-o ì<sup>n</sup> úu-ni cuendú cuendá sá vã cúyaa-o dacuíta-í chiú<sup>n</sup>-n. <sup>5</sup>Te ì<sup>n</sup> tée iha ío dásatú iní ñáhá-dě, chi ndëni ní cuu cuáhá<sup>n</sup>-dé ndátnũhu-dé ndihí ñáyiú isràél dánàá-dé-yu. Te nèhé quidé-dě chi cuáhá<sup>n</sup>-dé dácàhá<sup>n</sup>-dé nchaa ñáyiú cuendá quíndáá iní-yu tnúhu tée ní xĩndecu ñúú Nazàrét. <sup>6</sup>Chi duca<sup>n</sup> cãhá<sup>n</sup> cue tée iha sá ñí sáhá<sup>n</sup>-dé veñúhu cãhnu sá ìo cùnuu, te cuiní-dé daquèe tĩhú-dě veñúhu cuendá cuiní-dé xocàni-dé sá ìí ndécú, núu xĩá<sup>n</sup> ní tñi ñaha-güedě ndécá ñaha-güedé cuáhá<sup>n</sup> núu cuè tée cùchiu<sup>n</sup> cuendá cáca<sup>n</sup> tnúhú-güedě núu-dě ñuu ná cuendá duca<sup>n</sup> cuiní-dé cada-dé, chi duca<sup>n</sup> cãa leí ndécú ndihí-güedé sá cáda ndáá-güedé ñuu ná ì<sup>n</sup> sá cúu. <sup>7</sup>Te té Lisiú tée cùu capitá<sup>n</sup> cúnù-gá ní quexìo-dé ndihí sandàdú, te ní dácúnú-güedě nchaa cue tée nùtní ndihí té Pãblú, te dãtnùní ní tñi ñaha-güedě xii-dé ndécá ñaha-güedé cuáhá<sup>n</sup>. <sup>8</sup>Te sátá xĩá<sup>n</sup>, te ní xáha<sup>n</sup>-dě sá quixí-güedě ndéé ndíha cundáá cuéchi-dé. Te yòhó cundee ìní-n cãcá<sup>n</sup> tnúhú-n ñúu-dě, te núu ndáá duca<sup>n</sup> ñí quide-dé àdi ñáhá —càchí té Tèrtulú xãha<sup>n</sup>-dě xii té Juělí tée cùu gobiernú.

<sup>9</sup>Te dava-gá cue tée isràél xĩnutnĩ xĩá<sup>n</sup> ñí cáhá<sup>n</sup>-güedé sá ndàá cãhá<sup>n</sup> té Tèrtulú. <sup>10</sup>Te tée cùu gobiernú ní quide-dé ndaha-dé núu tẽ Pãblú cuendá cáhá<sup>n</sup>-dé, te té Pãblú ní xáha<sup>n</sup>-dẽ:

—Yòhó sa ní cuu titnĩ cuía ndécú-n ìha xehndé-n cuèchi nchaa ñáyiú xĩnàá, núu xĩá<sup>n</sup> ío cùdí ìní-í sá ndíha téhndé cuéchi tẽ ñaha-güedé xii-í. Te cundee ìní-n cùndedóho-n na cãni-í cuendú nãcuáa ní cuu. <sup>11</sup>Te nducu tnũhu-n te quiní-n ñã cãhá<sup>n</sup> ndáá-í, chi sa ní cuu úxúú nduu sá ñí sáhá<sup>n</sup>-í veñúhu cãhnu sá ìo cùnuu ñúú Jerusàlén ní cáhá<sup>n</sup> ndihí-í Yã Ndiõxí. <sup>12</sup>Te ni ñà túú ní nàá-í ndihí ñáyiú xití veñúhu, te ñà túú ní xáha<sup>n</sup>-ĩ nàá-yu ni ì<sup>n</sup> xichi, te ni ì<sup>n</sup> veñúhu líhli ní sáhá<sup>n</sup>-í ñà túú ñã ní xáha<sup>n</sup>-ĩ cadá-yu. <sup>13</sup>Te ni ñà túú quẽnhu-güedé cue tée cáhá<sup>n</sup> ndáá te núu ndáá duca<sup>n</sup> ñí quide-í. <sup>14</sup>Te yúhú cãhá<sup>n</sup> ndáá-í sá cãhá<sup>n</sup> ndihí-í Yã Ndiõxí, chi ñiú-ni Yá Ndiõxí ní xóo cáhá<sup>n</sup> ndihí ñáyiú ndéé sanaha, núu xĩá<sup>n</sup> ní tuha-í ichi-gá. Te cue tée-a càchí-güedé sá ñà díú ì<sup>n</sup> ichi váha ni tuha-í. Te yúhú sàndáá iní-í nchaa sá ñí chídó tnùní ndíi Moisés ndihí dava-gá cue tée ní xóo cáhá<sup>n</sup> tnúhu Yá Ndiõxí ndéé sanaha. <sup>15</sup>Te sàndáá tucu iní-í sá ndótó nchaa ñáyiú ní xihí, cuèi ñáyiú váha iní-xi, te cuèi ñáyiú úhú iní-xi, dico ndotó-yu. Te duca<sup>n</sup> ñí xóo quíndáá iní nchaa ñáyiú ní xĩndecu ndéé sanaha. <sup>16</sup>Te yúhú ío ndùcu ndee-í quidè-í nchaa sá cãhá<sup>n</sup> Yã Ndiõxí cuendá sá vã cúu cãha<sup>n</sup> núu-í núu-gã ndihí núu ñáyiú ñuyíú-a.

<sup>17</sup>Te sa ní cuu titnĩ cuía sã ñà túú-gã sãhá<sup>n</sup>-í ñúú Jerusàlén, te ní sáhá<sup>n</sup> tucu-í nèhè-í díhú<sup>n</sup> ñí taxi ñáyiú ñúú xicá cuendá cuãñaha-ĩ xii ñáyiú ñúú Jerusàlén. Te ní ndúcù-í sá cuãha táhù-í Yã Ndiõxí. <sup>18</sup>Te ní xĩndecu-í

veñúhu càhnu sá ïo cùnuu ní quide-í nchaa nàcuáa ní xóo cada ñáyiú ní xíndecu ndéé sanaha cuèndá nduu vétú iní Yă Ndiöxí. Te ñá túú chítú-yu ni sáhá<sup>n</sup>, te ni ñà túú nă ní cùu, te ní naníhí ñáhá ì<sup>n</sup> úú cue tée isràél xii-í, cue tée véxi distritú Àsiá. **19**Te quixi mee-güedë iha cáhá<sup>n</sup>-güedé, te núu sá ndàá ní xini-güedé sá yühú ndècuéchi-í ní cùu, **20**àdi ñáhá. Dico cachí tnúhu cue tée-á<sup>n</sup> năsa ní cuu òré ní xíndecu-í jündá-güedé nūu ndècuéchi-í àdi ñá túú ndècuéchi-í. **21**Dico ñá túú cuëchi-í chi ì<sup>n</sup>dii-ni tnúhu ni cáhá<sup>n</sup>-í ní xáha<sup>n</sup>-í xii-güedé sá sàndáá iní-í sá ndótó nchaa ñáyiú ní xíhí, te diu-ni núu xíă<sup>n</sup> càchí-güedé sá ndècuéchi-í —càchí té Păblú xăha<sup>n</sup>-dë xii té Juělí.

**22**Te té Juělí sa xíní váha-dé nàcuáa cuáhá<sup>n</sup> tnúhu Jèsús, núu xíă<sup>n</sup> ñá ní cuiní-gá-dé ndatnúhu-dé ndihí té Păblú, te ní xáha<sup>n</sup>-dë:

—Sa ní cuu, cundetu-n na quèxio té Lìsiú tée cùu capitá<sup>n</sup> cúnùu-gá, te òré-á<sup>n</sup> cundáá cuèndá-n —càchí té Juělí xăha<sup>n</sup>-dë.

**23**Te ní xáha<sup>n</sup>-dë xii tée cùu capitá<sup>n</sup>:

—Cundeé-n tē Păblú-ă<sup>n</sup>, te núu năsa càchí-dé cada-n, te dañá-n na càhá<sup>n</sup> ndihí-dé cue tée xíní tnáhá ndihí-dé nūu cuăñaha-güedë nchaa sá xíní ñūhu-dé àdi năsa cada-güedé —càchí té Juělí xăha<sup>n</sup>-dë xii tée cùu capitá<sup>n</sup>.

**24**Te ní cuu titní nduu, te ní sáhá<sup>n</sup> té Juělí vechiū<sup>n</sup> ndihí ñadihí-dé, te ñaha-á<sup>n</sup> nání-á<sup>n</sup> Drùsilá, te ñaha isràél cúú-á<sup>n</sup>. Te ní xáha<sup>n</sup>-dë sá quĩngueñuhu-güedé té Păblú, te òré ní quexio-dé vechiū<sup>n</sup>, te ní cáhá<sup>n</sup>-dé núū-yu ncháá-yu sá quèndáá iní-yu tnúhu Xítohó Jesucristú. **25**Te ní xáha<sup>n</sup>-dë:

—Mee-ni să văha cada-ndo. Te coto-ndo mēe-ndo, te vá cádá-ndó nì ì<sup>n</sup> sá cuèhé sá dúhá, chi ì<sup>n</sup> nduu cáhá<sup>n</sup> Yă Ndiöxí ndēdacàa ñáyiú váha iní-xi, te ndēdacàa ñáyiú úhú iní-xi —càchí té Păblú xăha<sup>n</sup>-dë.

Te sá dúcá<sup>n</sup> ñí xáha<sup>n</sup>-dë, te ní yühú té Juělí, te ní xáha<sup>n</sup>-dë:

—Vá càhá<sup>n</sup>-gá-ó tnàvíí, cuáhá<sup>n</sup>, te òré cúyăchí-í, te cana ñaha-í xii-n —càchí-dé xăha<sup>n</sup>-dë.

**26**Te té Juělí ní quide-dé cuèndá sá cuăñaha tē Păblú díhú<sup>n</sup> te vá ndíhu-gá-dé vecaá ní cùu, núu xíă<sup>n</sup> titní xito ní cana-dé té Păblú vechiū<sup>n</sup> ní ndatnúhu ndihí tnàha-güedé, dico ñá túú ní chăhu-dé. **27**Te úú cuiá duca<sup>n</sup> ñí quide-güedé, te dătnùní ní xínu té Juělí chiu<sup>n</sup>-dé, te ní ngúnutnîí té Pòrsiú Fèstú. Te òré ní xínu té Juělí chiu<sup>n</sup>-dé, te ní dándöo-dé té Păblú yíhí-ni-dë vecaá. Te duca<sup>n</sup> ñí quide-dé cuèndá ní cuiní-dé cudüu-dé núú cuè tée isràél.

### Té Păblú càhá<sup>n</sup> ndihí-dé té Fèstú

**25** **1**Te ní cuu úní nduu sá ñí quexio té Fèstú ñúú Cèsareá ní quehe<sup>n</sup>-dé chiu<sup>n</sup>, te ní quee-dé cuáhá<sup>n</sup>-dé ñúú Jerusalén. **2**Te yàcá<sup>n</sup> ní naníhí tnáhá-dë ndihí nchaa dútú cúnùu ndihí nchaa cue tée tàxi tnuní ñáhá xii

ñáyiú isràél, te xáha<sup>n</sup>-güedě xii té Fèstú sá ndàá ndècuéchi té Păblú. <sup>3</sup>Te ní cáhá<sup>n</sup> ndàhú-güedé núú-dě sá téndàha-dé sandàdú-dé quíngueñuhu ñaha-güedě vecaá xii-dé ndéé ñuú Cèsareá te candeca ñaha-güedě quíhí<sup>n</sup>. Te duca<sup>n</sup> ñí cáhá<sup>n</sup>-güedé, chi ní ndatnúhu-güedé sá cáhni ñaha-güedé xii té Păblú ichi ni cùu. <sup>4</sup>Te té Fèstú ní xáha<sup>n</sup>-dě:

—Vá cúú quìxi-dé ndéé ndíha. Na cùndetu-dé ñuú Cèsareá chi sacú-ni nduu cuyaa-í iha te dătnùní núhú-í yàcá<sup>n</sup>. <sup>5</sup>Te yáchí-gá quíhí<sup>n</sup> ndíhi-í cue té cùnuu-gá, te yàcá<sup>n</sup> cuu cáhá<sup>n</sup>-ndó nũu ndàá ndècuéchi-dé àdi cáhá<sup>n</sup> méé-dě nũu ndàá ndècuéchi-dé àdi ñáhá, te cutnùní iní-ndó —càchí-dé xáha<sup>n</sup>-dě.

<sup>6</sup>Te ní xíndecu té Fèstú úná úxí nduu ñuú Jerusalén, te dătnùní cuánuhú-dé ñuú Cèsareá. Te nduu tnéé cuáhá<sup>n</sup>-dé vechiù<sup>n</sup>, te òré ní quexìo-dé, te ní xáha<sup>n</sup>-dě xii cue sandàdú xínú cuèchi sá quíhí<sup>n</sup>-güedé queñuhu-güedé té Păblú vecaá te candeca ñaha-güedě quíhí<sup>n</sup> vechiù<sup>n</sup>. <sup>7</sup>Te òré ní quexìo té Păblú vechiù<sup>n</sup>, te sa ndècu cue téé isràél cue téé ní quee ñuú Jerusalén, te cuánguihu-güedé ndéé dîñi té Păblú ní ngúnutní-güedé, te xáha<sup>n</sup>-güedě xii cue téé cùchiu<sup>n</sup> sá ndècuéchi vîhi-dé, dico ñá túú ní cùndee tnúhu-güedé. <sup>8</sup>Te té Păblú ní xáha<sup>n</sup>-dě xii té Fèstú:

—Ñá túú ndècuéchi-í, ñá túú nă ní quide-í, chi ñá túú tnàhá iní-í cada-í ñí<sup>n</sup> sá càchí lèi sá vă cúú càda-o. Te ni xití veñúhu càhnu sá ïo cùnuu ñá túú nă quide-í, te ni té Cèsár téé yìndaha cuéhé nàció<sup>n</sup> ñá túú càhá<sup>n</sup> cuéhé-í cuèndá-dé —càchí té Păblú xáha<sup>n</sup>-dě xii-dé.

<sup>9</sup>Te té Fèstú ní cuiní-dé cada-dé nàcuáa cudù-dé núú cuè téé isràél ní cùu, núu xíă<sup>n</sup> ní xáha<sup>n</sup>-dě xii té Păblú:

—¿Cundee iní-n quíhí<sup>n</sup>-n ñuú Jerusalén-ă<sup>n</sup>? Te yàcá<sup>n</sup> cundáá cuéchi sá sàá díquí-n —càchí té Fèstú xáha<sup>n</sup>-dě xii té Păblú.

<sup>10</sup>Te xáha<sup>n</sup> tē Păblú:

—Diu-ni ñí<sup>n</sup> vechiù<sup>n</sup> téé cùchiu<sup>n</sup> Cèsár ndécù-í iha, te diu-ni iha cada ndàá-n nũu cuiní-n ní cùu. ¿Te ná cuèndá candeca ñaha-n quíhí<sup>n</sup> ingá xichi? Yòhó tnàhá-n xíní-n să ñà túú nă quide-í ñáyiú isràél. <sup>11</sup>Chi núu dícó yúhú ní quide-í ñí<sup>n</sup> cuéchi càhnu, te ñá túú nă cada-xi cuèi na càhni ñaha-ndo xii-í ní cùu. Te sa ní cutnùní iní-n să ñă ndàá, chi mee-ni tnúhu ndehnde xícáhá<sup>n</sup>-güedé, te ñá túú ndùu váha-xi duca<sup>n</sup> càda-n cúñaha-n să quíhí<sup>n</sup>-í ndíhi-güedé ingá xichi. Te xíă<sup>n</sup> cuiní-í quíhí<sup>n</sup>-í núú tē Cèsár téé yìndaha cuéhé nàció<sup>n</sup>, te yàcá<sup>n</sup> cáhá<sup>n</sup> méé-dě nũu ndàá ndècuéchi-í —càchí té Păblú xáha<sup>n</sup>-dě xii té Fèstú.

<sup>12</sup>Te ní ndatnúhu té Fèstú ndíhi cue téé chindee tnúhu ñaha xii-dé, te dătnùní ní xáha<sup>n</sup>-dě xii té Păblú:

—Te sa ní cáhá<sup>n</sup>-n să quíhí<sup>n</sup>-n quítnahá-n tē Cèsár te diu-ni quíhí<sup>n</sup>-n, te quiní-n năsa cáhá<sup>n</sup> téé-ă<sup>n</sup> yàcá<sup>n</sup> —càchí-dé xáha<sup>n</sup>-dě xii té Păblú.

**Té Păblú cǎhá<sup>n</sup> ndihí-dé té Àgripá tée yìndaha nació<sup>n</sup> Isràèl**

**13**Te sǎtá nǐ cuu cuéhé nduu, te ní quee té Àgripá tée yìndaha nació<sup>n</sup> Isràèl cuáhá<sup>n</sup>-dé ñuú Cèsareá ndihí ñadìhí-dé, te ñaha-á<sup>n</sup> nání-á<sup>n</sup> Berènicé te òré ní quexió-yu, te ní cǎhá<sup>n</sup> ndihí-yu té Fèstú. **14**Te sǎtá nǐ cuu titní nduu, te ní cǎhá<sup>n</sup> té Fèstú cuendá té Păblú ní xii-dé té Àgripá:

—Ndècu ìí<sup>n</sup> tée ní dándõo té Juělí vecaá nání-dě Păblú. **15**Te cútnàhá ní sáhá<sup>n</sup>-í ñuú Jerusàlén ní nanítnáhà-í ndihí cue dútú cúnùu ndihí cue tée cùu sacuéhé nǔú ñǎyiu isràèl. Te ní dácáá dǐquí-güedě té Păblú cuéchi, te ní cachí-güedé sá táúchìu<sup>n</sup>-í cahni ñaha-güedě xii-dé ní cùu. **16**Te ní xáha<sup>n</sup>-í xii-güedé sá vǎ cúú, chi ñá túú dùca<sup>n</sup> quide nchúhú cue tée rómá cùtexínu cada castiú-ndí ñǎyiu, chi dǐhna-gá ndúcú tnǔhu-ndí núú ñǎyiu sàá cuéchi dǐquí-xi cuendá quiní-ndí nǔu nása cǎhá<sup>n</sup> mée-yu ndihí ñǎyiu sàcá<sup>n</sup> cuéchi cuendá-yu, te òré-á<sup>n</sup> cútnùnì iní-ndí nǔu ndáá ndècuéchi-yu àdi ñáhá, te duca<sup>n</sup> te nihí-ndí nàcuáa quide ndáá-ndí cuendá-yu, duha ní xáha<sup>n</sup>-í xii-güedé —càchí té Fèstú xáha<sup>n</sup>-dě xii té Àgripá.

**17**Te ní xáha<sup>n</sup> tùcu té Fèstú:

—Te sǎtá nǐ quexìo-güedé ndéé ndíha, te nduu tnée ní sáhá<sup>n</sup>-ni-ndí vechiú<sup>n</sup>. Te ní xáha<sup>n</sup>-í sá quǐngueñuhu-güedé té Păblú candeca ñaha-güedě quixi, te òré ní quexìo-dé, **18**te ní ngüíta-güedé xáha<sup>n</sup>-güedě sá ndècuéchi-dé. Te ní sani iní-í sá íí<sup>n</sup> cuéchi cǎhnu tee ñaha-güedé dico ñáhá, chi dícó-ni sá íí<sup>n</sup> tnǔhu ní cǎhá<sup>n</sup>-dé, xǐǎ<sup>n</sup> duca<sup>n</sup> nǐ quide-güedé. **19**Te ní tenàá ñáhá-güedě xii-dé, chi cǎchí-güedé sá ñà túú cǎhá<sup>n</sup> váha-dé cuendá ndiõxí-güedě. Te tnàhá-ni cuendá ìí<sup>n</sup> tée nàni Jesús cǎhá<sup>n</sup>-dé, chi cǎchí-dé sá nǐ xǐhí tée-á<sup>n</sup> te ní ndoto-dé cǎchí-dé xáha<sup>n</sup>-dě xii-güedé, cǎchí-güedé. **20**Te ñá ní cùtnunì iní-í nása cúñaha-í xii-güedé cuendá téhndé cuéchi-dé. Te xǐǎ<sup>n</sup> ní xícá<sup>n</sup> tnúhu-í núú tǎ Păblú nǔu cundee ìní-dé quíhí<sup>n</sup>-dé ñuú Jerusàlén, te ndéé ndíácǎ<sup>n</sup> cada ndáá-ndí cuendá-dé, te núu ndáá ndècuéchi-dé nàcuáa cǎhá<sup>n</sup>-güedé àdi ñáhá ní cùu. **21**Te dǎtnùnì té Păblú ní cachí-dé sá cùndècu tnaa-dé vecaá te dǎtnùnì quíhí<sup>n</sup>-dé núú tǎ Cèsár, te tée-á<sup>n</sup> cada ndáá-dé cuendá-dé. Te cuendá sá dúcá<sup>n</sup> nǐ cǎhá<sup>n</sup> té Păblú, xǐǎ<sup>n</sup> nǔu ní xáha<sup>n</sup>-í sá cùndèé ñáhá cuè sandadú xii-dé, nini na còto-í nása cada-í quíhí<sup>n</sup>-dé núú tǎ Cèsár, duha ní xáha<sup>n</sup>-í xii-güedé —càchí té Fèstú xáha<sup>n</sup>-dě xii té Àgripá.

**22**Te té Àgripá ní xáha<sup>n</sup>-dě xii té Fèstú:

—Te tnàhá yúhú ío cudíí ìní-í cundedóho-í tnúhu cǎhá<sup>n</sup>-dé —càchí-dé xáha<sup>n</sup>-dě.

Te ní xáha<sup>n</sup> tǎ Fèstú:

—Tneé cana-í-dé te cundedóho-n nǎsa cǎhá<sup>n</sup>-dé —càchí-dé xáha<sup>n</sup>-dě.

23 Te nduu tněé ní quexìo té Àgripá ndihi ñadihí-dé tá Berènicé vechiù<sup>n</sup>, te ío ní quide càhnu ñaha-güedé xií-yu. Te cuánguihú-yu vechiù<sup>n</sup> ndihi cue tée cùu capitá<sup>n</sup> cùnùu-gá ndihi cue tée cùnùu ñuú Cèsareá. Te té Fèstú ní xáha<sup>n</sup>-dě sá quĩngueñuhu-güedé té Păblú vecaá, te òré ní quexìo-dé, 24 te ní xáha<sup>n</sup> tĕ Fèstú xii té Àgripá ndihi nchaa ñáyiù xĩndecu-á<sup>n</sup>:

—Chí cùndèhe tée iha chi téa-a càchí cue tée isràél sá ndècuéchi-dé, te cútnàhá ní xĩndecu-í ñuú Jerusàlén ní cachí-güedé sá ndàá ndècuéchi-dé, te diu-ni duca<sup>n</sup> càhá<sup>n</sup>-güedé iha. Te nchaa-güedé ní cuáá-güedé te càchí-güedé sá táuchìu<sup>n</sup>-í cahni ñaha-güedĕ xii-dé ní cùu. 25 Te sáta ní ndihi cuèndú ní cáhá<sup>n</sup>-güedé, te ní cutnùní iní-í sá ñà túú ñi ì<sup>n</sup> cuéchi càhnu ni quide-dé, núu ñá túú ní tàuchìu<sup>n</sup>-í cahni ñaha-güedĕ xii-dé. Te mee-dĕ ní cachí-dé sá quĩhí<sup>n</sup>-dé núú tĕ Cèsár té yìndaha cuéhé nació<sup>n</sup>, te ní xáha<sup>n</sup>-ĭ sá cúu quĩhí<sup>n</sup>-dé. 26 Te ñá túú ní xìní váha-í nása ní quide-dé, núu xíă<sup>n</sup> ñá ní ñhì-í nàcuáa cadúha-í tutú quĩhí<sup>n</sup> ndaha té Cèsár, te xíă<sup>n</sup> ní cana-í-dé véxi-dé iha cuèndá nchaa-ndo cãhá<sup>n</sup> ndihi-ndo-dĕ. Te duca<sup>n</sup> cànuu cadíhna-gá yòhó tătá Àgripá cáca<sup>n</sup> tnúhú-n nũú-dĕ nũu nása cáhá<sup>n</sup>-dé, te òré-á<sup>n</sup> cutnùní iní-í nása cada-í cadúha-í tutú quĩhí<sup>n</sup> ndaha té Cèsár. 27 Chi sàni iní-í sá ñà túú ndùu váha-xi sá quĩhí<sup>n</sup> ì<sup>n</sup> tée tàú cuéchi te núu vá códó tnùní núú ì<sup>n</sup> tutú nàcuáa càa cuéchi tàú-dé —càchí té Fèstú xáha<sup>n</sup>-dĕ xii-güedé.

### Te Păblú càhá<sup>n</sup> ndihi-dé té Àgripá

**26** 1 Te dătnùní ní xáha<sup>n</sup> tĕ Àgripá té yìndaha nació<sup>n</sup> Isràél xii té Păblú:

—Te vitna cáhá<sup>n</sup>-n nũu nása ní cuu cuèndá-n —càchí-dé xáha<sup>n</sup>-dĕ.

Te té Păblú ní ndacani-dé ndaha-dé sá cùndèdóho-güedé, te ní xáha<sup>n</sup>-dĕ xii té Àgripá té yìndaha nació<sup>n</sup> Isràél:

2-3 —Tătá Àgripá, ío cùdíí iní-í sá ñi naníhí tnáhá-ó vitna, chi yòhó ío váha xìní-n nchàa nacuáa quide ñáyiù isràél quidé càhnú-yu Yá Ndiöxí, te ío váha xìní-n nchàa tnúhu xĩtnàhá-yu. Te vitna cundee iní-n cùndedóho-n ì<sup>n</sup> úú tnúhu na càhá<sup>n</sup>-í. Na càchí tnúhu-í sá ñă ndàá ní quide-í nchaa sá càhá<sup>n</sup> cue tée isràél.

### Té Păblú càhá<sup>n</sup>-dé nàcuáa ní quide-dé cútnàhá vátá túhá-gă-dé ichi Yá Ndiöxí

4 Te sa nàha nchaa cue tée cùnùu núú ñáyiù isràél nàcuáa ní quide-í ñuú-í ndihi ñuú Jerusàlén cútnàhá ní cuu landú-í. 5 Te mee-güedĕ náhá-güedĕ sá ndĕé líhli-í ní chitnahá-í cue tée cùu fariséú. Te núu cuìní-güedé cáhá<sup>n</sup>-güedé sá tĕe fariséú cúu-í àdi ñáhá dico nchaa-güedé sa nàha-güedé sá cuè téa-á<sup>n</sup> ñi chitnahá-í. Te cue tée cùu fariséú-á<sup>n</sup> ïo cuìní-güedé cada-güedé nchaa nàcuáa nchìcú<sup>n</sup> nihnu ñáyiù quidé-yu. Te

yúhú nchaa sá nchìcú<sup>n</sup> nihnú-yu quidé-yu-á<sup>n</sup> ñí quide-í. <sup>6</sup>Te vitna ndècu-í iha, te cáhá<sup>n</sup>-n ñúu váha-ni quide-í àdi ñáhá, chi cue téé-á<sup>n</sup> téé ñàha-güedé cuéchi xii-í cuèndá sá sàndáá iní-í sá ndótó nchàa ñáyiú ní xíhí. Te ñi-ni duca<sup>n</sup> ñí xáha<sup>n</sup> Yá Ndiöxí xii nchaa ñaní tnáhá-ó ñí xíndecu ndéé sanaha. <sup>7</sup>Te nchaa ñáyiú-á<sup>n</sup> xíndetú-yu nduu ndòto ñáyiú ní xíhí ní cùu. Te ñi-ni duca<sup>n</sup> ndètu nchaa ñaní tnáhá-ó ndècu ñuyíú-a ndéé vitna, te xíá<sup>n</sup> ñúu cuèi nduu cuèi niú cáhá<sup>n</sup> ndihí-yu Yá Ndiöxí. Te sá sàndáá iní-í ñúu xíá<sup>n</sup> ní cáhá<sup>n</sup>-í, te tèe ñaha cue téé isràél cuéchi xii-í. <sup>8</sup>¿Te ná cuèndá nchòhó cue téé isràél ñá túu cuìní-ndó quèndáá iní-ndó sá dándòto Yá Ndiöxí nchaa ñáyiú ní xíhí? —càchí té Pàblú xáha<sup>n</sup>-dè.

**Té Pàblú caní-dè cuèndú sá ñí xóo chihi-dé  
ñáyiú sàndáá iní tnúhu Jèsús vecaá**

<sup>9</sup>Te ní xáha<sup>n</sup> tucu té Pàblú:

—Ndéé dàvá-á<sup>n</sup> ñí quide úhú-í ñáyiú sàndáá iní-xi tnúhu Jèsús Yaá ní quee ñúú Nazàrèt, te ní cáhá<sup>n</sup>-í sá vǎha-ni ní quide-í sá dúcá<sup>n</sup> ñí quide-í. <sup>10</sup>Te ñi-ni duca<sup>n</sup> ñí quide-í ñúú Jerusàlén. Te cue dútú cúnùu ní taxi-güedé ñí tutú cuèndá tñi-í ñáyiú ní sàndáá iní tnúhu Jèsús, te vài-yu ní chihi-í vecaá. Te òré ní cáhá<sup>n</sup>-güedé sá cahní-güedè ñáyiú-á<sup>n</sup>, te tnáhá-í ní cáhá<sup>n</sup>-í sá cúu cǎhni ñaha-güedé xií-yu. <sup>11</sup>Te titní xito ní sáhá<sup>n</sup>-í nchaa veñúhu ñáyiú isràél, te ní caní-í-yu te ní xáha<sup>n</sup>-í sá dáñǎ-yu ichi Jèsús. Te cuèndá ío ní cudéè<sup>n</sup>-í núú-yu, xíá<sup>n</sup> ní sáhá<sup>n</sup>-í nchaa ñúú xícá ñí sánúndúcù-í dava-gá ñáyiú sàndáá iní tnúhu-gá cuèndá dandòho ñaha-güedé xií-yu.

**Té Pàblú cáhá<sup>n</sup> tucu-dé nása ní cuu ní  
tuha-dé ichi Yá Ndiöxí**

*(Hch. 9:1-19; 22:6-16)*

<sup>12</sup>Te cuèndá xíá<sup>n</sup> ní xica tucu-í cuáhá<sup>n</sup>-í ñúú Dàmascú, néhè-í tutú ní taxi cue dútú cúnùu cuáhá<sup>n</sup>, cuèndá sá ndácù-í tñi-í nchaa ñáyiú sàndáá iní tnúhu Jèsús ní cùu. <sup>13</sup>Te òré caúxúú nduu ñùhu-í ichi cuáhá<sup>n</sup>-í, te uu<sup>n</sup> ní quee ñuhú andiú ñí dáyèhé-xi ndéé núu nútní-í ndihí cue téé ndèca tnaha ndihí-í, te níhi-gá ní dáyèhé-xi dàcúxí nchícanhii. <sup>14</sup>Te nchaa-ndí ní nduá-ndí ndéé ñuhu, te ní tecú dóho-í cáhá<sup>n</sup> ñí sá cáhá<sup>n</sup> tnúhu ñáyiú isràél, te càchí-xi: “Yòhó Sàulú, ¿Ná cuèndá cúu úhú iní ñáhá-n xii-í dándòho ñaha-n? Te ío dándòho-n mee-n, chi dàtná cuìní-n quide ndicutu quide-n chi quití-á<sup>n</sup> òré cǔxi-güedé-di pùyá te sǎha-di patàdá núú-xi, te sá dúcá<sup>n</sup> quide-di te quide úhú-di mee-di. Te duca<sup>n</sup> sǎtnahá-xi cùu yohó chi ñá túu sàndáá iní ñáhá-n xii-í”, càchí sá ñí cáhá<sup>n</sup>-á<sup>n</sup>. <sup>15</sup>Te ní xáha<sup>n</sup>-í: “¿Ná cúu yòhó sá ñí cáhá<sup>n</sup>-ái?”, xáha<sup>n</sup>-í. Te càchí sá cáhá<sup>n</sup>-á<sup>n</sup>: “Yúhú cúu-í Jèsús Yaá cúu úhú iní-n”, duha ní cachí sá cáhá<sup>n</sup>-á<sup>n</sup>. Te xíá<sup>n</sup> ní cutnùní iní-í sá Jèsús

càhá<sup>n</sup>. 16Te ní cachí-gá: “Ndacuñí-n chi yúhú càhá<sup>n</sup>-í chi cuìní-í quíhí<sup>n</sup>-n càda-n chiu<sup>n</sup>-í, chi quíhí<sup>n</sup>-n cǎhá<sup>n</sup>-n núú ñǎyiu nàcuáa ní cuu ní xiní ñáhá-n xii-í vitna, te quixi tucu-í cǎhá<sup>n</sup> ndihi ñaha-ǎ xii-n, te cúñaha-n xii-yu nàcuáa cǎhá<sup>n</sup>-í. 17Chi cuìní-í quíhí<sup>n</sup>-n cǎhá<sup>n</sup>-n tnúhu-í núú ñǎyiu isràél ndihi núú ñǎyiu ñá túú cùu ñáyiu isràél, te coto ñaha-ǎ xii-n cuèndá vá cǎhni ñáhá-yu xii-n. 18Te cuìní-í quíhí<sup>n</sup>-n cǎhá<sup>n</sup>-n xii-yu sá dáñǎ-yu nchaa ichi cuèhé ichi duha ndècú-yu, te tuhá-yu ichi váha cuèndá vá quìndáá iní-yu cadá-yu sá càhá<sup>n</sup> yucu ñávaha, te quìndáá iní-yu cadá-yu nchaa nàcuáa càhá<sup>n</sup> Yǎ Ndiöxí. Te núu na quìndáá iní-yu tnúhu càhá<sup>n</sup>-í, te cada càhnu iní-í nchaa cuèchi-yu, te naníhí tàhú-yu ndihi dava-gá ñáyiu sa ní xócuñí nchaa sá cuèhé sá dúhá ñí xíndecu iní-yu”, duha ní cachí-gá xii-í —càchí té Pǎblú xǎha<sup>n</sup>-dǎ xii té Àgripá té yèndaha nació<sup>n</sup> Isràél.

**Té Pǎblú quídè-dǎ nchaa nàcuáa ní xǎha<sup>n</sup> Jèsús cada-dé**

19Te ní xǎha<sup>n</sup> tùcu té Pǎblú xii té Àgripá:

—Ñá túú dàña ndeé-í quídè-í nchaa nàcuáa ní cǎhá<sup>n</sup> Jèsús òré ní cǎhá<sup>n</sup>-gá andiu. 20Te díhna-gá ñáyiu ñúú Dàmascú ní cǎhá<sup>n</sup>-í tnúhu-gá núú-yu, te ní xǎha<sup>n</sup>-í xii-yu sá dáñǎ-yu nchaa sá cuèhé sá dúhá quídè-yu, te cǎhá<sup>n</sup> ndihí-yu Yǎ Ndiöxí, te cadá-yu mee-ni sǎ vǎha cuèndá cutnùní iní dava-gá-yu sá ñí dáñǎ-yu nchaa sá ñà túú vǎha ní xóo cadá-yu. Te duca<sup>n</sup>-ni nì xǎha<sup>n</sup>-í xii ñáyiu ñúú Jerusàlén ndihi ñáyiu ñihí nació<sup>n</sup> Isràél ndihi nchaa ñáyiu ñá túú cùu ñáyiu isràél. 21Te cuèndá sá dúcá<sup>n</sup> ñí cǎhá<sup>n</sup>-í núu ní tñi ñaha cuè téé isràél xii-í cútnàhá ní sáhá<sup>n</sup>-í veñúhu càhnu sá ïo cùnuu cahni ñaha-güedé ní cùu. 22Te ñu-ni mee Yǎ Ndiöxí ní chindee ñàha-gá xii-í núu ndècu-í iha tnàvíí cǎhá<sup>n</sup>-í tnúhu-gá, te mee-ni tnúhu-gá cǎhá<sup>n</sup> ndihí-í ncháa-yu, cuèi ñáyiu cuica, te cuèi ñáyiu ndàhú. Te ndii Moisés ndihi dava-gá cue téé ní xóo cǎhá<sup>n</sup> tnúhu Yǎ Ndiöxí ndéé sanaha ñí cǎhá<sup>n</sup>-güedé nàcuáa cada-xi vitna, te ñu-ni duca<sup>n</sup> cǎhá<sup>n</sup>-í nchaa-ni nduu. 23Te cue téé-á<sup>n</sup> ñí cachí-güedé sá Crìstú Yaa tendaha Yǎ Ndiöxí quixi ñuyú-a ndoho tnahá-gá, te cuú-gá, te dàtnùní ndoto-gá. Te duca<sup>n</sup> càda-xi nchaa ñáyiu ní xíhí ndotó-yu núu na sàá nduu chi duca<sup>n</sup> càda-xi ní cachí méé Yǎ Ndiöxí. Te cuèndá sá dúcá<sup>n</sup> ñí ndoto-gá, xí<sup>n</sup> cútnùní sá cúú naníhí tàhú ñáyiu, cuèi ñáyiu isràél, te cuèi ñáyiu ñá túú cùu ñáyiu isràél. Te dàtná-ni ndùu tnúhu ní cǎhá<sup>n</sup> cue téé ní xóo cǎhá<sup>n</sup> tnúhu-gá ndéé sanaha-ǎ<sup>n</sup>, te ñu-ni duca<sup>n</sup> cǎhá<sup>n</sup> yúhú tucu —càchí té Pǎblú xǎha<sup>n</sup>-dǎ.

**Té Pǎblú xǎha<sup>n</sup>-dǎ xii té Àgripá sá quìndáá iní-dé tnúhu Jèsús**

24Te sá dúcá<sup>n</sup> ñí cǎhá<sup>n</sup> té Pǎblú, te ní cǎhá<sup>n</sup> níhi té Fèstú, te xǎha<sup>n</sup>-dǎ:

—Pǎblú, ïo lùcú cǎhá<sup>n</sup>-n! Cuèndá ïo vai ní dácuáhá-n, núu xí<sup>n</sup> ndádá lùcú ñáhá-xí xii-n —cachí-dé xǎha<sup>n</sup>-dǎ.



25Te ní xáha<sup>n</sup> tẽ Păblú:

—Ñáhá, vá dúcá<sup>n</sup> cǎhá<sup>n</sup>-n chi ñá díú sǎ lúcú-í duha cǎhá<sup>n</sup>-í, chi tnúhu ndáá cǎhá<sup>n</sup>-í. 26Te té Àgripá-a sa nàha-dé ndihi nchaa ñáyiú isràél nàcuáa ní cuu, chi sa ní níhí-dě tnúhu ndihi dava-gá-yu nàcuáa ní cǎhá<sup>n</sup>-í, núu xíǎ<sup>n</sup> cúyì-í cǎhá<sup>n</sup> ndihi-í-dé —càchí-dé xǎha<sup>n</sup>-dě xii té Fèstú.

27Te ní xáha<sup>n</sup>-dě xii té Àgripá:

—Yúhú sa xìní-í sá sàndáá iní-n tnúhu ní chídó tnùní cue tée ní xóo cǎhá<sup>n</sup> tnúhu Yá Ndiǒxí ndéé sanaha —càchí-dé xǎha<sup>n</sup>-dě.

28Te ní xáha<sup>n</sup> tẽ Àgripá:

—¿Quìde-n cuendá sá íí<sup>n</sup> úú tnúhu ní cǎhá<sup>n</sup>-n te quìndáá iní-í tnúhu Jèsús cǎhá<sup>n</sup>-n-ǎ? —càchí-dé xǎha<sup>n</sup>-dě.

29Te ní xáha<sup>n</sup> tùcu té Păblú:

—Cuèi vitna te cuèi ndéé cuèé-gá dico cuìní-í sá dàcuiíí sǎ quìndáá iní-n tnúhu Jèsús. Te diu-ni duca<sup>n</sup> xicá<sup>n</sup> táhù-í núú Yǎ Ndiǒxí sá ncháá ñáyiú ndècu ndihi-o iha quìndáá iní-yu tnúhu-gá dàtná cuìní-n ñí quide yúhú, duca<sup>n</sup> càdá-yu. Dìcò-ni sá nõu vá quìhí<sup>n</sup>-ni-yu vecaá dàtná cuìní-n ndòho yúhú —càchí-dé xǎha<sup>n</sup>-dě xii té Àgripá.

30Te sáta dúcá<sup>n</sup> ñí cǎhá<sup>n</sup>-dé, te ní ngúnutnǐi té Àgripá tée yìndaha nació<sup>n</sup> Isràél, ndihi té Fèstú tée cùu gobiernú, ndihi tá Berènicé ndihi dava-gá ñáyiú xìnucóo yatni. 31Te ní tnahá-yu ndèca tnahá-yu cuáhá<sup>n</sup> íí<sup>n</sup> xio. Te ní xítnàhá-yu:

—Tée-ǎ<sup>n</sup> ñá túú ñǎ cuéchi ni quìde-dé nõu chihi ñaha-güedě vecaá àdi cahni ñaha-güedé —càchí-yu xítnàhá-yu.

32Te té Àgripá ní xáha<sup>n</sup>-dě xii té Fèstú:

—Cuéchi mee-dě chi ní cachí-dé sá quítnahá-dé té Cèsár, xíǎ<sup>n</sup> nõu ndíhu tucu-dé vecaá, te núu ñá túú dùca<sup>n</sup> ni cǎhá<sup>n</sup>-dé, te cácu-dé ní cùu —cachí-dé xǎha<sup>n</sup>-dě xii té Fèstú.

### Té Păblú cuáhá<sup>n</sup>-dé ñuú Ròmá

**27** 1-2Te ní ndatnúhu-güedé sá quìhí<sup>n</sup> té Păblú ndihi bàrcú nació<sup>n</sup> Itàliá, te tnahá yúhú quíhí<sup>n</sup>-í ndihi-dé. Te tnahá íí<sup>n</sup> tée nani Aristarcú cuìní-dé quíhí<sup>n</sup> ndihi-ndí-dé, te cùu-dé tée ñuú Tesalónica, te ñuú-á<sup>n</sup> yíndèhu-xi distritú Macèdoniá. Te ní sáha cuendá-güedé té Păblú ndihi íí<sup>n</sup> úú-gá cue tée xixíhi vecaá ní quehe<sup>n</sup> cuendá ñáhá tẽ Jülüú tée cùu capitá<sup>n</sup>, tée yìndaha nchaa sandadú nání Àugustú, te ní quée-ndí nchaa-ndí bàrcú ñuú Adràmitiú. Te ní xica bàrcú-á<sup>n</sup> cuáhá<sup>n</sup>-ndí ndihi-xi te cuita yáha-ndí íí<sup>n</sup> úú ñuú yíndèhu distritú Àsiá quíhí<sup>n</sup>. 3Te nduu tnéé ní quexìo-ndí ñuú Sidón. Te ío váha ní quide té Jülüú, chi ní dáñá-dě ní quene té Păblú ní sáhá<sup>n</sup>-dé ní cǎhá<sup>n</sup> ndihi-dé cue tée ío váha tnahá tnúhu ndihi-dé nõu cudana cundàhú iní ñáhá-güedě cuáñaha-güedě nchaa sá xíní ñùhu-dé.

<sup>4</sup>Te dătnùní ní ndée tucu-dé bàrcú cuáhá<sup>n</sup>-ndí. Te ío níhi táchí te ñá ní dàña-xi caca ndáá bàrcú, te ní sáhá<sup>n</sup> bàrcú ndée yatni yuhu d̀̀strítú Ch̀̀pré, te d̀̀strítú-á<sup>n</sup> cáá cuădava xítí làmár, te xíá<sup>n</sup> ñà túú cuèhé tăchí ni yăha-ndí.

<sup>5</sup>Te ta yăha-ndí cuáhá<sup>n</sup>, te ní yăha-ndí ì<sup>n</sup> xio yuhu d̀̀strítú Cìliciá ndìhi yuhu d̀̀strítú Pànfilíá, te ní sáá-ndí ndée ñúú Mírá ì<sup>n</sup> ñúú yíndèhu d̀̀strítú Lìciá.

<sup>6</sup>Te ní quene tée cùu capitá<sup>n</sup> cuándúcú-dě ingá bàrcú, te ní níhí-dě ì<sup>n</sup> bàrcú tée ñúú Alejàndriá, ñúhú ìchi-xi quíhí<sup>n</sup>-xi nàció<sup>n</sup> Itàliá. Te ní ndicuaca ñaha-dě xii-ndí cuáhá<sup>n</sup>-ndí ní quée-ndí bàrcú-á<sup>n</sup>, te ní xica-xi cuáhá<sup>n</sup>-xi. <sup>7</sup>Te ío cuèé cuáhá<sup>n</sup> bàrcú-á<sup>n</sup>, cuèhé nduu ní xúhu<sup>n</sup>-xi ichi, te yica-ni ní quexìo-ndí yuhu ñúú Nìdú, te ñá ní dàña-gá táchí quíhí<sup>n</sup> ndáá bàrcú ñuu ní xícó ndùú-xi. Te ní yăha-ndí ì<sup>n</sup> xio yuhu d̀̀strítú Crětá núú ñà túú quène vihi táchí, te ò<sup>n</sup>-ni cuădava tucu làmár cáá d̀̀strítú-á<sup>n</sup>. Te ní yăha-ndí yuhu ñúú Sàlmón, te ò<sup>n</sup>-ni Crětá yíndàha-xi ñúú-á<sup>n</sup>. <sup>8</sup>Te ní yăha-ndí cuáhá<sup>n</sup>-ndí mee-nă núú ràyá d̀̀strítú Crětá, te ío ní ndoho-ndí ní sáá-ndí ì<sup>n</sup> xichi núú nání Puèrtú Váha, yatni víi-ni-gá ñúú Làseá.

<sup>9</sup>Te ní cuyaa v̀̀hi-ndí ichi, duca<sup>n</sup>-ni cùu-ndí ní tnahá yóó cúú<sup>n</sup> dăú táchí, te ío úhú yăha bàrcú ñuu na quíhí<sup>n</sup>-ni-xi. <sup>10</sup>Te ní xáha<sup>n</sup> tē Păblú xii-güedé:

—Nchaa-ndo c̀̀ndedóho-ndo tñuhu na càhá<sup>n</sup>-í-a. Ío úhú núú na càda yica-o quíhí<sup>n</sup>-ó ndìhi barcú chi cuíta càrgá te cuíta bàrcú, te cuu-ni iní-xi tnahá-ni mee-o c̀̀ú-ó chi cáhá-ó ñuu na ngàunihnu-o xítí ndute —càchí-dé xăha<sup>n</sup>-dě xii-güedé.

<sup>11</sup>Te tée cùu capitá<sup>n</sup> ñá ní sàndáá iní-dé tñuhu ní cáhá<sup>n</sup> té Păblú. Dico tñuhu ní cáhá<sup>n</sup> tée dàcaca barcú ndìhi xítóhó-xi chi ní sàndáá iní-dé. <sup>12</sup>Te ñá ní tnahá iní-güedé Puèrtú Váha cuèndá sá ní tnahá yóó cúú<sup>n</sup> dăú táchí, te ñá túú dăhu váha táchí xíá<sup>n</sup>, núú v̀̀i-güedé ní cuiní-güedé yăha-güedé quíhí<sup>n</sup>-güedé sáá-güedé ndée ñúú Fènicé ní cùu. Te yàcá<sup>n</sup> cundecu-güedé yóó cúú<sup>n</sup> dăú táchí cuèi ñá túú c̀̀váha v̀̀hi, chi nchí nàcuáa yăha bàrcú, te yàcá<sup>n</sup> quíhu táchí, dico dăhu-gá. Núú xíá<sup>n</sup> ndée ndíacă<sup>n</sup> nátacá bàrcú yóó cúú<sup>n</sup> dăú táchí, te ò<sup>n</sup>-ni Crětá yíndàha-xi ñúú-á<sup>n</sup>.

### Nitùhú làmár cúú<sup>n</sup> dăú táchí

<sup>13</sup>Te duha ní quene nuu luha táchí, xíá<sup>n</sup> ní sani iní-güedé sá ndácú-güedé quíhí<sup>n</sup>-güedé, núú ní natava-güedé caá ndètní ndée bàrcú, te ní xica-xi cuáhá<sup>n</sup>-xi ní yăha-ndí yatni víi yuhu d̀̀strítú Crětá. <sup>14</sup>Te tnaa-ni ní cuu sá ní xica bàrcú, te duha ní cunuu dăú táchí ì<sup>n</sup> xio yuhu ñúú-á<sup>n</sup> <sup>15</sup>te nchita ichi cuáhá<sup>n</sup> bàrcú. Te ñá ní ndàcu-gá-xi quíhí<sup>n</sup> ndáá-xi nàcuáa cuáhá<sup>n</sup>-xi ni cùu, núú ní dáñá-ndí cuáhá<sup>n</sup> méé-nă bàrcú. <sup>16</sup>Te ní yăha-ndí ì<sup>n</sup> ñúú nání Clàudá, te ñúú-á<sup>n</sup> cáá cuădava xítí làmár. Te ì<sup>n</sup> xio yuhu ñúú núú ñà túú quène vihi táchí ní yăha-ndí, te bàrcú l̀̀hli sá nchìcú<sup>n</sup> sátá

bàrcú cáhnú, chi ní ndacu-ndí ní taxúha-ndí xití bàrcú cáhnú. **17**Te sátá nǐ ndacu-ndí ní taxúha-ndí bàrcú líhli, te ní ducu<sup>n</sup> nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cǔchí yuhu ñúú Sǐrté, núu xǐá<sup>n</sup> ní ndíhi dóó nchítá dǐquí bàrcú ní nuu nehe-güedé, chi dóó-ǎ<sup>n</sup> ío níhi chìndaha táchí, núu xǐá<sup>n</sup> cuáhá<sup>n</sup> bàrcú ìí<sup>n</sup> xio. Te ní dáñá-güedé ñá túú-gǎ ní dàcaca-güedé, núu cuáhá<sup>n</sup> méé-nǎ-xi ta chìndaha táchí cuáhá<sup>n</sup>. **18**Te ío níhi dáú táchí, te ñá ní cuìní tnàhí-xi yáha. Te nduu úú sá dúcá<sup>n</sup> ñà túú-gǎ ní dàcaca-güedé bàrcú te ní ngüíta-güedé ní dǎngöyo-güedé sá nchídó-xí cuèndá cuìní-güedé nduu ñamá-xi. **19**Te nduu úní ní dǎngoyo-güedé nchaa ndachìu<sup>n</sup> cánehe chìu<sup>n</sup>-güedé xití bàrcú. **20**Te cuéhé nduu ñá túú ní xìní-ndí ni chòdíní ni nchǐcanchii, chi ío níhi ní cuu<sup>n</sup> dáú táchí, núu ní cáhá<sup>n</sup>-ndǐ sá vǎ cǎcu-ndí, chi ndíhi-ndí cáhá ní cáhá<sup>n</sup>-ndǐ.

**21**Te ní cuu tǐtní nduu ñá túú-gǎ xéxí-ndǐ, núu xǐá<sup>n</sup> ní ngúnutnǐ té Pǎblú núú-güedé, te xǎha<sup>n</sup>-dǎ:

—Quindáá iní-ndó tnǔhu ní cáhá<sup>n</sup>-í, te cundecu nahi-o Crětá ní cùu. Te núu ni tnǐ-ndo tnúhu-í, te vǎ dácuíta-o cǎrgá ndíhi dava-gǎ ndàchiu<sup>n</sup> ni cuu. **22**Te vǎ yùhú-ndó chi vǎ cùú ni ìí<sup>n</sup>-ndo dico bàrcú chi cuíta. **23**Te nàha-ndo sá yùhú càhá<sup>n</sup> ndíhi-í Yǎ Ndiöxí te quìde-í nàcuáa càhá<sup>n</sup>-gǎ. Te dǐu-ni mee-gǎ ní techìu<sup>n</sup>-gǎ ìí<sup>n</sup> espíritú xínú cuèchi núú-gǎ ní quixi, **24**te ní cachí-xi xii-í: “Vǎ yùhú-n chi vǎ cùú-n, dico dacuití quǐhí<sup>n</sup>-n càhá<sup>n</sup> ndíhi-n tǎ Cèsár. Te ni ìí<sup>n</sup> tée ndíhi-n vǎ cùú, chi ío cùdí ìní ñáhá Yǎ Ndiöxí xii-n”, duha ní cáhá<sup>n</sup> espíritú xínú cuèchi núú-gǎ ní cachí tnúhu-xi xii-í. **25**Núu xǐá<sup>n</sup> cǎchí tnúhu-í sá vǎ yùhú-ndó, chi sa cùtnuní iní-í sá cǎdá Yǎ Ndiöxí nàcuáa ní cáhá<sup>n</sup> espíritú xínú cuèchi núú-gǎ. **26**Te mee tǎchí chindaha-xi bàrcú daquǐhí<sup>n</sup>-xi ndéé yuhu ndùte —cachí té Pǎblú xǎha<sup>n</sup>-dǎ xii-güedé.

**27**Te sa ní cuu sáhú<sup>n</sup> nduu sáhú<sup>n</sup> niú sá nǐ ngüíta-xi cùu<sup>n</sup> dáú táchí, te ñá túú-gǎ dǎcaca-güedé bàrcú, chi mee-nǎ táchí tá chìndaha-xi bàrcú cuáhá<sup>n</sup> núú ndute làmár Àdriá. Te sátá nǐ cuu dava niú, te ní quide cuèndá cue tée dàcaca bàrcú sá tá cùyatni-güedé ñuhu yìchí. **28**Te ní chicuàhá-güedé ná daha-gǎ mètrú néhé-xí sǎ cùnú xití ndute cuèndá cutnùní iní-güedé sá tá cùyatni-xi ndéé yuhu làmár, te nèhe-xi ócó sáhú<sup>n</sup> ìí<sup>n</sup>-ni-gǎ mètrú. Te ní xica tucu bàrcú luha-gǎ, te dǎtnùní ní chicuàhá tucu-güedé, te xǐá<sup>n</sup> néhé-xí ócó úsá-ni-gǎ mètrú. **29**Te ní yùhú-güedé sá candaundé-xi cava, te ní quehe<sup>n</sup>-güedé cùmí caá náhnú sǎ nchìcú<sup>n</sup> yoho, te ní dáquèe-güedé xití ndute ndàa sátá bàrcú, te dǎtnùní ní ngüíñí-xi ñá ní xica-gǎ-xi, te ní cuìní-güedé sá òré-ni túndaá ní cùu. **30**Te cue tée dàcaca bàrcú ní natava-güedé bàrcú líhli dǎndée-güedé núú ndute ni cùu, te ní cachí-güedé sá quǐhí<sup>n</sup>-güedé ndàa núú bàrcú dàquèe-güedé úú-gǎ caá cuèndá cuita candéé-xi bàrcú cáhnú cuèndá sá vǎ cǎcá-xí. Te cuìní-güedé dandàhú-güedé dava-gǎ nchúhú cue tée ñùhu ndíhi-güedé bàrcú, chi ní

ndatnúhu-güedé sá cúnú-güedě ní cùu. **31**Te té Păblú ní xáha<sup>n</sup>-dě xii téé cùu capitá<sup>n</sup> ndihi dava-gá sandàdú:

—Te núu na dàndóo ñaha cuè téé dàcaca barcú cunu-güedé, te vá căcu-o —cächí-dé xăha<sup>n</sup>-dě.

**32**Te sá dúcá<sup>n</sup> ñí xáha<sup>n</sup>-dě núu ní sáhá<sup>n</sup> sandàdú ní xehndé-güedé yoho nchìcú<sup>n</sup> bàrcú líhli dāngáúñihu-güedé xití ndute cuáhá<sup>n</sup>-xi.

**33**Te váha váha-ni ta tūndaá cuáhá<sup>n</sup>, te ní xáha<sup>n</sup> tē Păblú:

—Sa ní cuu sáhú<sup>n</sup> nduu ñá túú tñahí xèxi-ndo sá ndìhú iní-ndó. **34**Te vitna yáchí-ndó, chi caxi-ndo cuendá naníhí ndéé-ndó, te vá yùhú-ndó chi ñá túú ñă tñahá ni ñí<sup>n</sup>-ndo —cachí-dé xăha<sup>n</sup>-dě xii-güedé.

**35**Te sátá dúcá<sup>n</sup> ñí cáhá<sup>n</sup>-dé, te ní quehe<sup>n</sup>-dé ñí<sup>n</sup> pàá, te ní ndacá<sup>n</sup> táhú-dě núú Yă Ndiöxí, te núú-güedě nchaa-güedé duca<sup>n</sup> ñí quide-dé, te dătnùní ní táhú-dě luha ní xexi-dé. **36**Te duca<sup>n</sup> te dătnùní ní cuyí-güedě ní xexi-güedé nchaa-güedé. **37**Te úú ciendú únídico sáhú<sup>n</sup> ñí<sup>n</sup>-ndí ñúhú bàrcú núú tñahá té Păblú, te nchaa-ndí ní xexi ndihi-ndí-dé. **38**Te ní xexi-ndí ní ndahá xití-ndí. Te dătnùní ní ngüíta-güedé ní tava-güedé nchaa ngohnchi tríú ní dāngoyo-güedé xití ndute cuendá nduu ñamá-gá bàrcú.

#### Ní dáhu bàrcú xití làmár

**39**Te sátá ñí tūndaá, te ñá ní cùtnuní-gá iní-güedé ndèé cúú-xí núú ñí sáá-güedé, te ní xiní-güedé ñí<sup>n</sup> xichi núú ñí xícó ndúú luha yuhu làmár, te vâi vihi cúchí dāndáá-xí yùhu ndute, te xíá<sup>n</sup> ñà túú dàcandá víhí tächí ndute. Te ní ndatnúhu-güedé sá ndácú-güedě dacàca-güedé bàrcú quíhí<sup>n</sup>-xi ndéé núú ñúhú cūchí. **40**Te xíá<sup>n</sup> núu ní sáhá<sup>n</sup>-güedé ní xehndé-güedé nchaa yoho nchìcú<sup>n</sup> caá tácàndeé bàrcú ní ndóo xití làmár, te ní nadatàyá-güedé vítú sã dācuico-xi barcú, te ní nacata caa-güedé ñí<sup>n</sup> dóó dīquí bàrcú, te ta chindaha táchí cuáhá<sup>n</sup> yuhu làmár tá cūyatni-xi ñuhu yichí cuáhá<sup>n</sup>. **41**Te ndècu ñí<sup>n</sup> xichi ní nataká víhí cūchí xití ndute, te xíá<sup>n</sup> ñí nguíndūxi nihnu bàrcú-güedé, te ní cutí-xi xití cúchí, te ñá ní ñíhí-gă-güedé nācuáa cada-güedé nene-xi. Te ío níhi ní dācandá táchí ndute, te ní chúcú ndèé-xi ndàa sátá bàrcú, te ní ndihi ní táhú-xí. **42**Te cue sandàdú ní xitnàha-güedé sá cáhñí-güedě nchaa cue téé ní xíhi vecaá cuendá sá vă quíhí<sup>n</sup>-güedé núú ndute te cunu-güedé. **43**Te téé cùu capitá<sup>n</sup> ñá ní dàña-dé cahni-güedé cue téé ní xíhi vecaá, chi ñá ní cūndee iní-dé cahni-güedé tñahá té Păblú. Te ní xáha<sup>n</sup>-dě xii-güedé sá cuè téé xícuu cada quíhí<sup>n</sup> núú ndute te na yăha-güedé ndute quene-güedé yuhu làmár. **44**Te dava cue téé ñá cúú càda, ní xáha<sup>n</sup>-dě nanducu-güedě vítú ñí àdi vítú ñí táhú sã ñí xíhi bàrcú, te núú xíá<sup>n</sup> caundodo-güedé yáha-güedé ndute quene-güedé ndéé yuhu làmár. Núu duha ní cuu ní cācu-ndí nchaa-ndí.

### Té Păblú ndécú-dě ñuú Măltá cáá cuădava làmár

**28** <sup>1</sup>Te sátá ñí cácu-ndí ní nene-ndí ñuhu yìchí, te ní níhí-ndě tnúhu nàcuáa nàni ñuú núú ñí sáá-ndí, te ñuú-á<sup>n</sup> nání-xí Măltá, te càa-xi cuădava làmár. <sup>2</sup>Te ío quide víxi<sup>n</sup>-xi cuendá ío cùu<sup>n</sup> dáú. Te ñáyiú ñuú-á<sup>n</sup> ñí cundàhú iní ñàhă-yu xii-ndí, ní dátàhă-yu ñuhú te ní cana ñàhă-yu ní sáhá<sup>n</sup>-ndí ní nacuídí-ndě. <sup>3</sup>Te té Păblú dátàcá-dé nducú, te tnàhă-ni ìi<sup>n</sup> cóó děé<sup>n</sup> ñí tniì nihnu-dé-di, te òré cuáhá<sup>n</sup> ndaha-dé chucu-dě núú ñùhú, te ní ñàni-di cahni, te ní ndee-di xití nducú ní sânduú-di ndaha-dé, te ní xexiha<sup>n</sup>-di xii-dé. <sup>4</sup>Te nchaa ñáyiú ndèhé-yu sá təcàndeé-di ndaha-dé, te ní ngúita-yu ní xitnàhă-yu:

—Váa ndíyi ní sahani téa-a, te ñá ní xhí-dé làmár, te dacuitíi sà cùú-dé vitna, chi sa nàha Yá Ndiöxí ná ní quide-dé ñuyíú-a —càchí-yu xitnàhă-yu.

<sup>5</sup>Te té Păblú ní quidi-dé ndaha-dé ní ngaunihnu-di núú ñùhú, te ñá túú tnàhí ná ní cùu núú ñí xexi-di. <sup>6</sup>Te ñáyiú ñuú-á<sup>n</sup> xíndéhě-yu núú daquìhí<sup>n</sup>-xi chúhú<sup>n</sup> àdi nduá-dé cuú-dé. Te naha ñí xíndéhé ñàhă-yu núú nása cada ñaha-xi xii-dé, te ñá túú tnàhí ná ní quide ñaha-xi, te ní xitnàhă-yu:

—Váa ndiöxí cúú tée-a núú dácá<sup>n</sup> ñá túú tnàhí ná ní quide-xi ndaha-dé núú ñí xexi cóó —càchí-yu xitnàhă-yu.

<sup>7</sup>Te yatni núú dúcá<sup>n</sup> ñí xexiha<sup>n</sup> cóó-ă<sup>n</sup> cáá ñùhu xitu téa nàni Publiú, te téa-á<sup>n</sup> táxi tnùní-dé nihíi ñuú cáá cuădava xití làmár núú ndécú-ndě nduu-ă<sup>n</sup>. Te ío váha iní-dé chi ní cana ñaha-dě ní sáhá<sup>n</sup>-ndí ní xíndecu-ndí úní nduu vehe-dé. <sup>8</sup>Te tătá tě Pùbliú-á<sup>n</sup> cáá-dě cùhú-dé ñùhú-dě cahni, te tnàhă-dé daxi. Te té Păblú ní sáhá<sup>n</sup>-dé núú cáá-dě, te ní cáhă<sup>n</sup> ndihí-dé Yă Ndiöxí, te ní sacá<sup>n</sup> ndodo-dé ndaha-dé díquí tée cùhú-á<sup>n</sup>, te duca<sup>n</sup>-ni ñí quide-dé, te ní ndúha téa cùhú-á<sup>n</sup>. <sup>9</sup>Te sátá dúcá<sup>n</sup> ñí quide té Păblú, te ní quixi nchaa ñáyiú cùhú núú ndécú-ndě, te ní quide tátna ñaha tě Păblú xii-yu te ní ndúha-yu. <sup>10</sup>Te òré ndécú-ndě xía<sup>n</sup>, te vài sá ñí taxi táhú-güedě, te òré ní xica-ndí ní taxi tucu-güedé nchaa sá xíní ñùhu-ndí ichi.

### Té Păblú ní quexìo-dé ñuú Ròmá

<sup>11</sup>Te yàcá<sup>n</sup> ní xíndecu-ndí úní yóó, te sa ndècu ìi<sup>n</sup> barcú téa ñuú Alejàndriá òré ní quexìo-ndí, te ní xíndecu-xi nihíi yóó cúú<sup>n</sup> dăú táchí. Te núú-xi cándodo sandú sá dánàni-güedé Càstór ndihí sàndú sá dánàni-güedé Pólúx, te xití bàrcú-á<sup>n</sup> ñí quée-ndí cuáhá<sup>n</sup>-ndí. <sup>12</sup>Te ní quexìo-ndí ñuú Siràcusá, te yàcá<sup>n</sup> ní xíndecu-ndí úní nduu. <sup>13</sup>Te ní xica tucu bàrcú cuáhá<sup>n</sup>-xi, te ní quexìo-ndí ñuú Règiú. Te nduu tněe duha ní quene nuu táchí. Te ní xica bàrcú cuáhá<sup>n</sup>-xi, te ndéé nduu úú ní quexìo-ndí ñuú Pùteolí. <sup>14</sup>Te yàcá<sup>n</sup> ní naníhí tnàhă-ndě ndihí ñáyiú sàndáá iní tnúhu Jèsús,

te ní cachí-yu sá cùndècu-ndí úná nduu, núu xíǎ<sup>n</sup> ní xíndecu-ndí úná nduu ndihí-yu. Te ní xica tucu bàrcú cuáhá<sup>n</sup>-xi, te ní quexìo-ndí ñúú Ròmá. **15**Te ñáyiú ròmá ñáyiú sàndáá iní tnúhu Jèsús, ní níhí-yu tnúhu sá cuáhá<sup>n</sup>-ndí, te ní quixí-yu ní quixi tnahá ñáhá-yu ichi. Te davá-yu ní naníhí-ndí ñúú Fòrú Ápiú, te davá-yu ní naníhí-ndí ñúú Úní Tàbernás. Te òré ní xiní té Pàblú nchaa ñáyiú véxi tnahá ñáhá xii-ndí, te ndee ndèe ní cuu iní-dé, te ní ndacá<sup>n</sup> táhú-dè núú Yá Ndiöxí sá dúcá<sup>n</sup> ñí quidé-yu. **16**Te sátá ñí quexìo-ndí ñúú Ròmá, te cue tée cùchiu<sup>n</sup> ní xáha<sup>n</sup>-güedè xii té Pàblú sá cùndècu dii<sup>n</sup>-dé, te ní xíndeé ñáhá cuàa sandadú xii-dé.

### Té Pàblú càhá<sup>n</sup>-dé tnúhu Yá Ndiöxí ñúú Ròmá

**17**Nduu úní sá ñí quexìo té Pàblú, te ní cana-dé cue tée cùnuu núú ñáyiú isràél ndécú ñúú Ròmá, te ní sáhá<sup>n</sup>-güedé núú ndécú-dè, te ní xáha<sup>n</sup>-dè:

—Nchòhó cue tée isràél, càchí tnúhu-í sá ñà túú ñà ní quide-í ní ñí<sup>n</sup> ñáyiú cútnàhá ní xíndecu-í ñúú Jerusàlén. Te ñà túú ní cǎhá<sup>n</sup> cuèhé-í sá quidè-yu nchaa nàcuáa ní xóo cada cue ñaní tnáhá-ó ñí xíndecu ndéé sanaha, te ñà túú ñà ní quide-í te ní tñii ñaha-güedè ní sáha cuèndá ñáhá-güedè xii-í núú cuè tée ròmá, cue tée ndècu yacá<sup>n</sup>. **18**Te cue tée-á<sup>n</sup> ñí ndúcú tnúhu-güedè ñúu ndáá ndècuéchi-í, te ní cutnùní iní-güedé sá ñà túú ñà ní quide-í, te xíǎ<sup>n</sup> cuiní-güedé queñuhu ñaha-güedè xii-í vecaá ní cùu. **19**Te diu-ni cue tée isràél ñà ní dàña-güedé cácu-í, chi cuiní-güedé sá cáhní ñàha cue tée ròmá, cue tée xíndecu yàcá<sup>n</sup> xii-í ní cùu, te xíǎ<sup>n</sup> ñúu ní xáha<sup>n</sup>-í sá quixì-í càhá<sup>n</sup> ndihi-í té Cèsár cuèndá iha cada ndáá méé-dè cuèndá-í, te vǎ yóo ñí<sup>n</sup> tee-í cuéchi. **20**Núu xíǎ<sup>n</sup> ní cana ñaha-í xii-ndo cuèndá cunaha-ndo nàcuáa ní cuu. Te ní xáha<sup>n</sup>-í sá sàndáá iní-í sá ndótó ñáyiú ní xíhí, te diu-ni duca<sup>n</sup> càhá<sup>n</sup> dava-gá ñáyiú isràél, te sá dúcá<sup>n</sup> ñí càhá<sup>n</sup>-í, te ní chihi ñaha-güedè vecaá, te xíndeé ñáhá-güedè ndéé vitna —càchí té Pàblú xáha<sup>n</sup>-dè xii-güedé.

**21**Te ní xáha<sup>n</sup>-güedè xii-dé:

—Ñà túú tnàhí tutú ní tèndaha cue tée distritú Jùdeá quixi cuèndá-n. Te ní cuè tée isràél ñà túú ní quixi-güedé càhá<sup>n</sup> cuèhé-güedé cuèndá-n. **22**Te cuiní-ndí cundedóho-ndí nása cunduu tnúhu càhá<sup>n</sup>-n, chi sa ní níhí-ndí tnúhu sá ncháá xìchi ío xícáhá<sup>n</sup> cuèhé-yu cuèndá nchaa ñáyiú sàndáá iní tnúhu Jèsús —càchí-güedé xáha<sup>n</sup>-güedè xii té Pàblú.

**23**Te ní xáha<sup>n</sup>-güedè nduu cùyáchí-güedé te quixi-güedé cundedóho-güedé dava-gá cuèndú càhá<sup>n</sup> té Pàblú. Te ní tnahá nduu ñí ndatnúhu-güedé quíhí<sup>n</sup>-güedé núú quidé vèhe-dé, te vǎi-yu ní sáhá<sup>n</sup>-yu ní xíndedóho-yu tnúhu ní càhá<sup>n</sup>-dé, te nchàca nchaa ní càhá<sup>n</sup> ndihi-dé-yu. Te ní xáha<sup>n</sup>-dè xii-yu sá ndíi Moisés ndihi dava-gá cue tée ní xóo càhá<sup>n</sup> tnúhu Yá Ndiöxí ndéé sanaha ñí chídó tnùní-güedé núú tütú-güedé sá díú-gǎ

tendaha-gă Crìstú quixi-gá ñuyú-a. Te ní chídó tnùnì-güedé nchaa nàcuáa cada-gá, te diu-ni nàcuáa càhá<sup>n</sup> tutú-güedé cada Crìstú, te duca<sup>n</sup> ñi quide-gá cútnàhá ní xica cuu-gá ñuyú-a, núu xíã<sup>n</sup> ní cutnùnì sá díú Jèsús cúu-gă Crìstú Yaá ní tendaha Yă Ndiöxí ní quixi ñuyú-a. Te núu quindáá iní-yu, te ndíhu ndaha ñàha Yá Ndiöxí xií-yu. **24**Te davá-yu ní sándáá iní-yu tnúhu ní cáhá<sup>n</sup>-dé, te davá-yu ñá túú ní sándáá iní-yu. **25**Te cuendá sá ñă íí<sup>n</sup>-ní tnúhu ni cãhá<sup>n</sup>-yu, núu xíã<sup>n</sup> cuìnì-yu núhú-yu ni cùu. Te ní xáha<sup>n</sup> tẽ Păblú sá cùndètu tnaá-yu cáhá<sup>n</sup>-dé ingá tnúhu, te xáha<sup>n</sup>-dẽ:

—Ní xáha<sup>n</sup> Espíritú Yă Ndiöxí xii ndíi Chàíá nàcuáa cáhá<sup>n</sup> ndíi núu nchàa ñanì tnáhá-ó ñi xíndecu ndéé sanaha. Te ní cáhá<sup>n</sup> Espíritú-gá íí<sup>n</sup> sá ndàá ní xáha<sup>n</sup>-xi xii ndíi, te duha ní xáha<sup>n</sup>-xi:

**26** Quíhí<sup>n</sup>-n te cúñaha-n xii ñáyiu:

Nchòhó mee-ni cùndedóho-ndo tnúhu càhá<sup>n</sup> Yă Ndiöxí, dico ni vă tècú tnùnì-ndó.

Te cada-gá titní núu sã vă yõ tnàhí ndàcu cada, dico ni vă cútnùnì iní-ndó nàcuáa ndùu sá cádá-gă,

**27** chi cuendá sá ïo sàá iní-ndó,

xíã<sup>n</sup> duca<sup>n</sup> ñà túú sãha-ndo cuendá nása cuáhá<sup>n</sup> tnúhu càhá<sup>n</sup>-gá, chi ñă cuìnì-ndó cùndedóho-ndo, te ni ñă sándáá iní-ndó.

Te ni ñă cuìnì-ndó dàña-ndo nchaa sá cuèhé sá dúhá quide-ndo cuendá xocàni-gá nchaa xíã<sup>n</sup> iní-ndó, duha cúñaha-n xii-yu.

Càchí Espíritú-gá xáha<sup>n</sup>-xi xii ndíi. **28**Te na càchí tnúhu-í sá quíhí<sup>n</sup> cue téé càhá<sup>n</sup> tnúhu Yá Ndiöxí cáhá<sup>n</sup>-güedé tnúhu-gá núu ñáyiu ñá túú cùu ñáyiu isràél, chi ñáyiu isràél ñá túú cuìnì-yu cùndedóho-yu. Dico ñáyiu ñá túú cùu ñáyiu isràél chi cùdíí iní-yu cùndedóho-yu, núu xíã<sup>n</sup> naníhí tàhú-yu —càchí té Păblú xáha<sup>n</sup>-dẽ xií-yu.

**29**Te sátá ñi ndíhi cuèndú ní xáha<sup>n</sup>-dẽ, te ní ndeé-yu cuánuhú-yu ta ndàtnúhu-yu cuáhá<sup>n</sup>.

**30**Te úu cuíá ñi xínu ní xíndecu té Păblú íí<sup>n</sup> vehe ní cháhu-dé. Te ní xóo cáhá<sup>n</sup> váha-dé ndíhi nchaa ñáyiu ní xóo quíhí<sup>n</sup> vehe-dé. **31**Te ní xáha<sup>n</sup>-dẽ sá ndíhu ndaha ñàha Yá Ndiöxí xií-yu núu quindáá iní-yu tnúhu-gá, te vă yõ íí<sup>n</sup> ni sàdí yuhu-dé. Te mee-ni tnúhu Xítohó Jesucristú ní cáhá<sup>n</sup>-dé núu-yu.